

KOLEKSI

# *Sajak*

SIRI 2

TASAWUF



USTAZ  
HJ ASHAARI  
MUHAMMAD

# *Sajak*

---

Ustaz Haji Ashaari Muhammad

Siri II

• Tasawuf

E D I S I K H A S

## **Sajak – Siri II** **• Tasawuf**

*oleh*

**Ustaz Haji Ashaari Muhammad**

© Ustaz Haji Ashaari Muhammad

Semua hak cipta artikel dalam buku ini adalah terpelihara. Sebarang bahagian daripada artikel dalam buku ini tidak boleh diterbitkan semula, disimpan dalam cara yang boleh dipergunakan lagi, ataupun dipindahkan, dalam sebarang bentuk atau dengan sebarang cara, baik dengan cara elektronik, mekanik, penggambaran semula, perakaman dan sebagainya, tanpa izin terlebih dahulu daripada pemilik hak cipta.

*Kali pertama diterbitkan*  
Ogos 2005

*Teks diset dalam*  
Palatino 10 poin

# 3

---

## Tasawuf

---

## KANDUNGAN

### NAFSU DAN MAZMUMAH

|  |    |
|--|----|
| 1 Nafsu Laksana Anjing Garang                    | 11 |
| 2 Nafsu Dalam Diri Itu Paling Bahaya             | 12 |
| 3 Manusia Bersifat Haiwan                        | 13 |
| 4 Buaya Telah Naik Ke Darat                      | 14 |
| 5 Susahnya Mengubah Perangai Manusia             | 15 |
| 6 Setiap Hari Menyubur Mazmumah                  | 17 |
| 7 Mazmumah Mengeraskan Hati                      | 18 |
| 8 Booby Trap                                     | 19 |
| 9 Bila Nafsu Menguasai Diri                      | 20 |
| 10 Apabila Nafsu Menguasai Manusia               | 21 |
| 11 Manusia Diletihkan Oleh Nafsunya              | 22 |
| 12 Bahaya Lidah                                  | 23 |
| 13 Lidah Jurubicara Paling Baik Dan Paling Jahat | 24 |
| 14 Fungsi Lidah Disalahgunakan                   | 25 |
| 15 Tuhan Jagalah Lidahku!                        | 26 |
| 16 Lalai Basahan Manusia                         | 27 |
| 17 Manusia Selalu Lupa                           | 28 |
| 18 Pernahkah Sedih Tertinggal Sembahyang?        | 29 |
| 19 Merajuk Jadi Budaya                           | 30 |
| 20 Sifat Ego                                     | 33 |
| 21 Marah Sentiasa Membara Di Dada                | 35 |
| 22 Mujadalah Dan Mubahasah                       | 36 |
| 23 Mazmumah Manusalah Yang Bergaduh              | 38 |
| 24 Islam Di Mulut Tidak Di Hati                  | 40 |
| 25 Saranan Hendaklah Takut Kepada Tuhan          | 41 |
| 26 Orang Yang Menghina Guru                      | 43 |
| 27 Kenal Diri Setelah Diuji                      | 44 |
| 28 Pengumpat Tidak Tahan Diumpat                 | 45 |
| 29 Yang Suka Dipuji Dan Yang Suka Memuji         | 47 |
| 30 Ramai Orang Mengejar Nama Dan Glamour         | 48 |
| 31 Manusia Prejudis Sesamanya                    | 49 |
| 32 Manusia Telah Ditawan Oleh Nafsu              | 50 |
| 33 Nafsu Memperbudak-Budakkan Manusia            | 52 |
| 34 Mujahadah Jalan Menuju Allah                  | 53 |
| 35 Musuh Ketatku Ada Dua                         | 55 |
| 36 Bantulah Aku Melawan Nafsuku                  | 56 |
| 37 Lembutnya Hati Mazmumah Boleh Mati            | 57 |
| 38 Bermujahadahlah Membersihkan Jiwa             | 58 |

**PERSOALAN HATI – I**

|  |    |
|--|----|
| 39 Fitrah Murni Telah Punah            | 59 |
| 40 Hati Nuraninya Telah Mati           | 61 |
| 41 Hati Yang Lalai Dengan Tuhan        | 63 |
| 42 Hindari Perkara Yang Mematikan Hati | 64 |
| 43 Susah Mengenal Diri                 | 65 |
| 44 Sudahkah Kenal Diri?                | 66 |
| 45 Engkau Jaga Sangat Jasad Lahir      | 68 |
| 46 Engkau Biarkan Batinmu              | 70 |
| 47 Anggota Lahir Cacat Kita Terasa     | 71 |
| 48 Demi Nama Dan Glamor                | 72 |
| 49 Apabila Hati Sudah Buta             | 73 |
| 50 Bila Hati Lapang                    | 74 |
| 51 Penyakit Jiwa Bila Parah            | 75 |
| 52 Alangkah Payahnya Menjaga Hati      | 77 |
| 53 Warna Hati Sentiasa Berubah         | 78 |
| 54 Renunglah Selalu Hati Kita          | 79 |

**PERSOALAN HATI – II**

|   |     |
|---|-----|
| 55 Mengenal Hati Dan Keajaibannya           | 80  |
| 56 Hati Sebagai Wadah                       | 82  |
| 57 Bersihkanlah Jiwa Kerana Ia Adalah Wadah | 83  |
| 58 Soal Maknawi Sukar Dirasa                | 84  |
| 59 Celikkanlah Rohku                        | 86  |
| 60 Belajar Melalui Rasa Hati                | 88  |
| 61 Hamba Yang Jiwanya Bersih                | 90  |
| 62 Apabila Jiwa Hidup                       | 91  |
| 63 Apabila Mempertajamkan Hati              | 93  |
| 64 Lahir Batin Hendaklah Selaras            | 95  |
| 65 Peliharalah Hatiku!                      | 97  |
| 66 Luruskan Hatiku                          | 98  |
| 67 Hati Mukmin                              | 99  |
| 68 Hati Mukmin Tidak Tenang Dengan Tuhan    | 100 |
| 69 Orang Mukmin Yang Baik Itu Unik          | 101 |
| 70 Tabiat Orang Mukmin                      | 102 |
| 71 Disiplin Diri Orang Mukmin               | 103 |
| 72 Kepentingan Berdoa                       | 105 |

**RASA KEHAMBAAN**

|                             |     |
|-----------------------------|-----|
| 73 Hakikat Diri             | 106 |
| 74 Mari Mengenal Insan      | 107 |
| 75 Di Mana Mulianya Manusia | 110 |

|     |   |     |
|-----|---|-----|
| 76  | Kuali Tetap Kuali   | 111 |
| 77  | Kita Hamba Yang Tidak Ada Kuasa                             | 112 |
| 78  | Kembali Kepada Fitrah Hamba                                 | 113 |
| 79  | Sikap Seorang Hamba   | 115 |
| 80  | Sikap Seorang Hamba Yang Sebaik-Baiknya                     | 116 |
| 81  | Kekalkan Rasa Kehambaan                                     | 117 |
| 82  | Manusia Adalah Pengemis Yang Hina                           | 118 |
| 83  | Manusia Sebagai Pengemis                                    | 120 |
| 84  | Tidak Ada Milik Manusia                                     | 122 |
| 85  | Mana Milik Kita   | 124 |
| 86  | Ujian Pada Seseorang Tidak Sama Maksud                      | 125 |
| 87  | Mengekalkan Rasa Kehambaan                                  | 126 |
| 88  | Kemuliaan Hamba Apabila Dapat Mengekalkan<br>Rasa Kehambaan | 127 |
| 89  | Hamba Pilihan Tuhan   | 128 |
| 90  | Orang Bertaqwa Sentiasa Dipimpin Tuhan                      | 129 |
| 91  | Aku Datang Kepada-Mu Tuhan                                  | 130 |
| 92  | Tuhan, Aku Adalah Hamba-Mu                                  | 131 |
| 93  | Aku Tetap Hamba Yang Hina                                   | 132 |
| 94  | Aku Bahagia Menjadi Hamba-Mu                                | 133 |
| 95  | Jadikan Aku Hamba Yang Setia                                | 134 |
| 96  | Harapanku Pada-Mu Tuhan                                     | 135 |
| 97  | Tuhan, Engkaulah Harapanku                                  | 136 |
| 98  | Tuhan! Pimpinlah Aku Selalu                                 | 137 |
| 99  | Jadikanlah Air Mataku Pemadam Api Neraka-Mu                 | 138 |
| 100 | Dengarlah Doaku   | 139 |
| 101 | Jangan Pesongkan Aku Dari Menjadi Hamba-Mu                  | 140 |

## **TUJUAN IBADAH**

|     |  |     |
|-----|--|-----|
| 102 | Tujuan Ibadah                          | 141 |
| 103 | Beramal Kerana Fadhilat                | 142 |
| 104 | Cara Tuhan Murka                       | 143 |
| 105 | Tanda Rahmat Allah                     | 145 |
| 106 | Tanda Ibadah Tidak Berkesan            | 146 |
| 107 | Baikilah Ibadah                        | 147 |
| 108 | Pasang Niat Dalam Sebarang Kerja       | 148 |
| 109 | Buat Kerja Kerana Allah                | 149 |
| 110 | Carilah Pahala Yang Mudah              | 151 |
| 111 | Hiburan Orang Mukmin Adalah Ibadah     | 152 |
| 112 | Terhibur Menyembah Tuhan               | 153 |
| 113 | Setakat Ini Dapat Kusembahkan Pada-Mu  | 154 |
| 114 | Terimalah Ibadahku Yang Tidak Sempurna | 155 |
| 115 | Boleh Taat Tapi Tidak Setia            | 156 |

|     |                          |     |
|-----|--------------------------|-----|
| 116 | Aku Rasa Belum Beribadah | 157 |
| 117 | Tuhan Memanggil Aku      | 158 |

### **TUJUAN MENGENAL TUHAN**

|     |   |     |
|-----|---|-----|
| 118 | Tujuan Mengenal Tuhan                     | 159 |
| 119 | Kenal Tuhan Dahulu Barulah Syariat-Nya    | 160 |
| 120 | Beza Kenal Tuhan Dengan Kenal Syariat-Nya | 162 |
| 121 | Jiwa Liar Apabila Tidak Kenal Tuhan       | 164 |
| 122 | Segalanya Untuk Allah                     | 165 |
| 123 | Leburkan Rasa Kebesaranmu                 | 166 |
| 124 | Serius Dengan Tuhan                       | 167 |
| 125 | Marilah Bersama-Sama Mencari Tuhan        | 169 |
| 126 | Gunakanlah Akal Untuk Mengenal Tuhan      | 170 |
| 127 | Dalam Dirimu Penuh Keajaiban              | 171 |
| 128 | Apabila Rasa Bertuhan Wujud               | 172 |
| 129 | Orang Yang Rasa Bertuhan                  | 174 |
| 130 | Memiliki Tuhan                            | 175 |
| 131 | Memiliki-Mu Adalah Penting Sekali         | 176 |
| 132 | Kejarlah Tuhan Jangan Kejar Syurga        | 177 |
| 133 | Setelah Aku Kenal Tuhan                   | 178 |
| 134 | Didikan Tuhan Berbagai Cara               | 179 |
| 135 | Bila Lagi Hendak Rasa Bertuhan            | 181 |
| 136 | Larilah Kepada Tuhan                      | 183 |
| 137 | Carilah Redha Tuhan                       | 184 |
| 138 | Dengarlah Rintihanku                      | 185 |
| 139 | Jangan Tinggalkan Aku Tuhan               | 186 |
| 140 | Menuju Tuhan Perlu Pemimpin Pilihan Tuhan | 187 |

### **SEMBAHYANG**

|     |  |     |
|-----|--|-----|
| 141 | Sembahyang Tidak Mengubah Perangai             | 188 |
| 142 | Tahukah Engkau Siapa Yang Engkau Sembah?       | 189 |
| 143 | Pertemuan Dengan Raja Segala Raja              | 191 |
| 144 | Sembahyang Itu Hubungan Hamba Dengan Khaliqnya | 193 |
| 145 | Sembahyang Titik Tolak Segalanya               | 194 |
| 146 | Patutnya Engkau Disembah                       | 196 |
| 147 | Ibadah Adalah Penyembahan Kepada Tuhan         | 197 |

### **PUASA RAMADHAN**

|     |                                     |     |
|-----|-------------------------------------|-----|
| 148 | Bimbang Menyambut Ramadhan          | 198 |
| 149 | Aku Cemas Kedatangan Ramadhan       | 199 |
| 150 | Ramadhan Bulan Pesta Ibadah         | 200 |
| 151 | Ramadhan, Rahmat Allah Terbuka Luas | 201 |



## **MENJAUHI DOSA**

|   |     |
|---|-----|
| 152 Jauhilah Dosa                         | 202 |
| 153 Nafsu Puas Tapi Jiwa Derita           | 203 |
| 154 Takutilah Dosa Kecil Atau Besar       | 204 |
| 155 Pandanglah Besar Dosa Itu             | 205 |
| 156 Peringkat Manusia Terhadap Dosa       | 206 |
| 157 Takut Dengan Dosa                     | 207 |
| 158 Apabila Allah Murka                   | 208 |
| 159 Kenanglah Dosa Yang Lalu              | 209 |
| 160 Tangisilah Dosa                       | 210 |
| 161 Melupakan Dosa Adalah Satu Dosa       | 211 |
| 162 Tidak Bimbang Dengan Dosa Adalah Dosa | 212 |
| 163 Aku Sedihkan Dosa Yang Lalu           | 213 |
| 164 Dosa Memburu Di Mana-Mana             | 214 |
| 165 Kemungkaran Wajib Kita Takut          | 216 |
| 166 Pilihlah Antara Dua Jalan             | 217 |
| 167 Jalan Ke Syurga Dan Jalan Ke Neraka   | 219 |
| 168 Jalan Lurus Jelas Sekali              | 220 |
| 169 Jangan Mudah Menghina Orang           | 222 |
| 170 Mari Bersama Muhasabah Diri           | 223 |

## **TAUBAT DAN RINTIHAN**

|   |     |
|---|-----|
| 171 Ampunilah Dosa Kami                     | 224 |
| 172 Jadikanlah Derita Jiwaku Syafaat Buatku | 225 |
| 173 Matikan Aku Waktu Bertaubat             | 226 |
| 174 Allah Suka Hamba Yang Bertaubat         | 227 |
| 175 Bersegeralah Bertaubat                  | 228 |
| 176 Aku Perlukan Pimpinan-Mu                | 229 |
| 177 Harapanku Pada-Mu                       | 230 |

## **MENCARI KETENANGAN**

|  |      |
|--|------|
| 178 Manusia Ditimpa Penyakit Jiwa  | 231  |
| 179 Manusia Kehilangan Kebahagiaan                                       | 232  |
| 180 Manusia Tercari-Cari Kebahagiaan                                     | 233  |
| 181 Tenang Dan Bahagia Payah Didapat                                     | 234  |
| 182 Bahagia Itu Maknawi  | 235  |
| 183 Ketenangan Dan Kebahagiaan Jiwa Sudah Tidak Ada                      | 2363 |
| 184 Manalah Hati Tidak Gelisah   | 237  |
| 185 Ramai Orang Mengaku Islam  | 238  |
| 186 Pegangan Hidup Punca Derita  | 239  |
| 187 Nasib Manusia Bermacam-Macam Tapi Manusia<br>Tidak Belajar Dengannya | 240  |
| 188 Merendah Diri Itulah Ketinggianmu                                    | 242  |

**ILMU**

|   |     |
|---|-----|
| 189 Ilmu Penyuluh Hidup                           | 243 |
| 190 Berbuat Dahulu Baru Bercakap                  | 244 |
| 191 Berlindung Dari Ilmu Yang Tidak Bermanfaat    | 245 |
| 192 Berlindung Daripada Ilmu Yang Tidak Diamalkan | 246 |
| 193 Marilah Kita Beramal                          | 247 |
| 194 Doa Agar Diberi Ilmu Hikmah                   | 248 |

**NIKMAT DUNIA**

|  |     |
|--|-----|
| 195 Nikmat Dunia Ibarat Kuda                         | 249 |
| 196 Tidak Tahan Dengan Kelebihan Diri                | 250 |
| 197 Nikmat Tuhan Disalahgunakan                      | 251 |
| 198 Apabila Dunia Dicintai                           | 252 |
| 199 Kalau Engkau Mahu Berfikir                       | 254 |
| 200 Dunia Yang Mempesona                             | 256 |
| 201 Bukan Senang Menjaga Nikmat                      | 258 |
| 202 Kerana Cintakan Kehidupan Dunia Tolak Tuhan      | 259 |
| 203 Cinta Diri Merosakkan Diri                       | 260 |
| 204 Engkau Terlalu Cinta Dengan Diri Sendiri         | 262 |
| 205 Engkau Sangka Musuh Merosakkan Engkau            | 264 |
| 206 Tukar Dunia Kepada Akhirat                       | 266 |
| 207 Bagaimana Manfaatkan Dunia                       | 267 |
| 208 Jadikan Dunia Bernilai Akhirat                   | 268 |
| 209 Memburu Kehidupan Jangan Sampai Kehilangan Tuhan | 269 |
| 210 Jangan Sampai Kehilangan Tuhan                   | 270 |
| 211 Engkau Sibuk Dengan Dunia                        | 272 |
| 212 Apa Kita Hendak Jawab Dengan Tuhan               | 273 |
| 213 Mengapa Takut Kehilangan Barang Yang Murah?      | 275 |
| 214 Mencari Kemuliaan Akhirat Tidak Ada Rebutan      | 277 |
| 215 Nikmat Dunia Ada <i>Side Effect</i>              | 278 |
| 216 Keindahan Bukan Pada Benda                       | 280 |
| 217 Di Celah Nikmat Engkau Derhaka                   | 282 |
| 218 Anugerahkan Nikmat-Mu Bersama Rahmat-Mu          | 284 |
| 219 Selamatkan Kami Dari Tipu Daya Dunia             | 285 |

**TAQWA**

|                               |     |
|-------------------------------|-----|
| 220 Taqwa Aset Dunia Akhirat  | 286 |
| 221 Jaminan Rezeki Dari Tuhan | 288 |

**NIKMAT IMAN DAN HIDAYAH**

|  |     |
|--|-----|
| 222 Bersyukurlah Dengan Iman Dan Islam | 289 |
|--|-----|

|  |     |
|--|-----|
| 223 Nikmat Tuhan Yang Paling Berharga        | 290 |
| 224 Rahmat Dan Nikmat Tuhan Yang Tersembunyi | 292 |
| 225 Hidayah Suatu Yang Mahal                 | 294 |
| 226 Hidayah Dan Taufik Adalah Hak Tuhan      | 295 |
| 227 Patutnya Engkau Bersyukur                | 296 |
| 228 Cara Bersyukur Yang Sebenarnya           | 297 |
| 229 Syukur Atas Syukur                       | 299 |

## **MENCINTAI TUHAN**

|   |     |
|---|-----|
| 230 Aku Cuba Mencintai-Mu Tuhan                     | 300 |
| 231 Aku Belum Mencintai-Mu                          | 302 |
| 232 Kalau Tuhan Belum Engkau Cintai                 | 303 |
| 233 Mengapa Tidak Sedih Kalau Allah Tidak Kasih     | 304 |
| 234 Ramai Tersalah Memberi Takut Dan Cinta          | 305 |
| 235 Mabuk Dengan Tuhan                              | 307 |
| 236 Cinta Tuhan Cinta Yang Hakiki                   | 308 |
| 237 Pujalah Tuhan                                   | 309 |
| 238 Engkau Tidak Terasa Kasih Sayang Tuhan          | 310 |
| 239 Kekasih Allah Tidak Takut Dan Tidak Berdukacita | 312 |
| 240 Rahsia Perpaduan                                | 314 |
| 241 Cintakan Tuhan Sungguh Agung                    | 315 |
| 242 Anugerahkan Sedikit Rasa Cinta Pada-Mu          | 316 |
| 243 Engkau Patut Dirindu                            | 317 |
| 244 Orang Yang Paling Dicintai Tuhan                | 318 |
| 245 Pencinta Tuhan Di Malam Sepi                    | 319 |

## **MENJAGA MARUAH**

|   |     |
|---|-----|
| 246 Menjaga Maruah Diri                     | 320 |
| 247 Orang Yang Tidak Bermaruah              | 321 |
| 248 Diri Sendiri Menjatuhkan Maruah         | 323 |
| 249 Maruah Jatuh Tidak Terasa               | 325 |
| 250 Setiap Hari Maruahmu Jatuh              | 326 |
| 251 Maruah Diri Itulah Harga Diri           | 327 |
| 252 Meminta Kepada Allah Kita Tidak Terhina | 328 |
| 253 Sifat Malu Sudah Tiada                  | 329 |
| 254 Hilang Malu Ertinya Benteng Diri Hilang | 330 |

## **IKHLAS**

|  |     |
|--|-----|
| 255 Ikhlaskan Ibadah Dan Amal              | 331 |
| 256 Ikhlas Darjat Paling Tinggi            | 332 |
| 257 Apabila Tujuan Hidup Manusia Terpesong | 333 |
| 258 Awaslah Musuh Dalam Selimut            | 334 |
| 259 Takutilah Perosak Amalan               | 336 |

**BAIK SANGKA**

|     |   |     |
|-----|---|-----|
| 260 | Jadikan Aku Lebih Baik Dari Sangkaan Mereka | 337 |
|-----|---|-----|

**INGAT MATI**

|     |                                |     |
|-----|--------------------------------|-----|
| 261 | Cemas Menunggu Kematian        | 338 |
| 262 | Masa Berjalan Begitu Laju      | 339 |
| 263 | Setiap Detik Umur Pergi        | 340 |
| 264 | Kereta Kehidupan Berjalan Laju | 341 |
| 265 | Hidup Di Dunia Hanya Sekali    | 342 |
| 266 | Hidup Insan Yang Malang        | 343 |
| 267 | Ingatkanlah Kematian Kita      | 344 |

**INGAT AKHIRAT, SYURGA, NERAKA**

|     |                                      |     |
|-----|--------------------------------------|-----|
| 268 | Negara Yang Jauh                     | 345 |
| 269 | Perkara Yang Penting Dilupakan       | 346 |
| 270 | Engkau Pasti Pulang Ke Negara Asalmu | 347 |
| 271 | Bila Aku Lihat Lautan                | 348 |
| 272 | Usiaku Telah Lanjut                  | 349 |



## 1 | NAFSU LAKSANA ANJING GARANG

**N**AFSU yang tidak dapat dikawal  
 Atau dibiarkan menurut kehendaknya  
 Ia adalah laksana anjing  
 Anjing itu tabiatnya tamak dan pengotor  
 Menyalak dan menggigit  
 Anjing itu kerana tamaknya  
 Selalu sahaja bergaduh kerana merebut makanan  
 Kerana tabiatnya pengotor, selalu makan bangkai dan najis  
 Tabiatnya juga suka menyalak orang  
 Tidak kurang juga menggigit orang atau binatang  
 Begitulah nafsu yang tidak dapat dikawal itu  
 Merupakan tabiat macam anjing  
 Nafsu itu tamak dengan dunia dan harta bendanya  
 Kerana tamak, dunia dan harta bendanya jadi rebutan  
 Hingga membawa permusuhan dan perkelahian  
 Nafsu yang tidak dikawal, suka perkara yang haram  
 Perkara haram itu adalah kotor  
 Suka menipu, suka berbohong  
 Suka mencuri dan rasuah  
 Suka arak, suka bergaul bebas, suka zina, suka merompak  
 Suka menyalak ertinya suka bercakap yang menyakiti orang  
 Seperti menyindir, mengumpat dan memfitnah  
 Suka menuduh, menghina dan caci-maki orang  
 Macam anjing yang menggigit  
 Sakit hati dan jiwa orang dibuatnya  
 Begitulah jahatnya nafsu yang tidak terdidik  
 Macam anjing yang garang

## NAFSU DALAM DIRI ITU PALING BAHAYA

Walaupun harimau itu merbahaya  
Tapi jarang kita ketemu, ia tidak begitu membimbangkan  
Nyamuk dan lalat walaupun membawa kuman  
boleh membahayakan manusia  
Tapi masih boleh dibendung  
kerana ia adalah di luar diri kita  
Tikus juga membawa kuman  
yang boleh membahayakan manusia  
Tapi ia masih di luar diri manusia  
Mudah dijaga dan dikawal atau dibendung  
Kuman-kuman di dalam makanan dan minuman  
Juga boleh mendatangkan penyakit  
Itu pun masih tidak dianggap terlalu merbahaya  
Tapi perlu diingat!  
Bahawa nafsu di dalam dirimu itu paling bahaya  
Bahaya buat dirimu dan orang lain  
Namun tidak pernah dibising-bisingkan  
dan diheboh-hebohkan  
Tidak pernah diceritakan bagaimana menjaga  
dan mengawalinya  
Padahal nafsu di dalam diri manusia itu  
telah merosakkan manusia dan dunia  
Telah memusnahkan pembangunan, kemajuan dan tamadun  
Tidak ada pun klinik dan hospital yang merawatnya  
Ia lebih merbahaya daripada harimau, nyamuk, lalat dan tikus  
Ia telah menyerang semua orang tidak ada kecualinya  
Tapi ramai di kalangan manusia tidak memandang merbahaya  
Padahal merbahayanya hingga terjun ke Neraka

### 3 | MANUSIA BERSIFAT HAIWAN

**H**AMBA Allah itu jika sifat insaniahnya punah  
 lahirlah sifat haiwaniahnya  
 Rupanya manusia jiwanya haiwan  
 Wajahnya manusia tabiatnya binatang  
 Berbagai-bagai haiwan ada di dalam jiwa insan  
 Tabiat babi, buruk makan dan sangat membawa kekotoran  
 Tabiat anjing adalah tamak,  
     apa sahaja hendak dijadikan rebutan  
 Akhirnya berkelahi sesama insan,  
     macam anjing mendapat tulang  
 Bertabiat kuda, suka menendang  
 Menggambarkan keangkuhan dan kesombongannya  
 Bertabiat lembu atau kerbau,  
     bodohnya dan bebal payah diajar  
 Di dalam bodoh-bodoh pun  
     suka menanduk sekalipun tuannya  
 Bertabiat musang, suka menipu daya  
 Kerja musang mencuri dan mengambil ayam-ayam  
     dan buah pisang orang  
 Begitulah manusia yang bersifat musang,  
     suka sahaja menipu orang  
 Bertabiat singa, garang dan menerkam  
 Manusia yang suka menzalim dan menganiaya orang  
 Tanpa belas kasihan  
 Yang penting mendapatkan mangsanya agar perut kenyang  
 Bertabiat ular sawa, apabila kenyang aktif tiada  
 Suka tidur-tidur sahaja  
 Begitulah manusia ada yang apabila terlalu kenyang,  
     malas pun tiba  
 Suka tidur dan rehat-rehat sahaja

---

Menjelang tidur  
07 - 10 - 1999



#### 4 | BUAYA TELAH NAIK KE DARAT

**B**UAYA-BUAYA telah naik ke darat  
Berkeliaran mencari bangkai  
Ada buaya makan bangkai secara bersendirian  
Tidak kurang juga merebut bangkai secara bersama  
Mereka berkelahi merebut makanan  
Bergigitan sesama sendiri hendak monopoli  
Bertarung begitu sengit  
Yang kuat menguasai  
Yang kalah membawa diri  
Tidak puas hati  
Waktu bangkai masih mewah,  
yang lemah masih boleh cari makan  
Serpihan-serpihan bangkai sana-sini senang dicari  
Waktu bangkai terbatas  
Yang kenyang sang buaya yang gagah, seorang diri  
Yang lemah bertempiaran lari  
Kalah bertarung dengan sang gagah  
Lari membawa dendam, tidak puas hati  
Kecewa dengan sang gagah  
Menguasai bangkai tanpa berkongsi  
Malas membuat kerja  
sekalipun beribadat kepada Tuhannya

---

Selepas Asar  
08 - 10 - 1998

## SUSAHNYA MENGUBAH PERANGAI MANUSIA

**M**ERUBAH gunung lebih senang  
 daripada mengubah perangai manusia  
 Merubah hutan yang tebal menjadi pekan atau bandar  
 lebih mudah daripada merubah tabiat seseorang  
 Laut diubah menjadi daratan lebih mudah  
 daripada mengubah sifat jahat manusia kepada baik  
 Dalam masa tiga atau empat tahun di suatu tempat  
 sudah bertukar suasana  
 Suasana yang lama sudah tidak ada,  
 suasana yang baru pula menjelma  
 Kalau kita tidak balik kampung asal kita sepuluh tahun,  
 apabila balik suasana lama sudah tidak ada  
 Berubah segala-galanya, dengan wajah  
 dan suasana yang baru  
 Rupanya dunia ini lebih mudah dirubah  
 daripada penghuninya di kalangan manusia  
 Setengah orang daripada kecil kita berkawan,  
 kemudian dipisah oleh desakan hidup  
 selama tiga puluh tahun  
 Kemudian bertemu kembali setelah berpisah begitu lama  
 Kita pun terkejut perangai dan tabiat lamanya  
 yang negatif masih wujud  
 Sedangkan dunia sudah berubah, dia tidak pun berubah  
 Dunia sudah menjadi cantik dan indah  
 Manusia masih lagi berperangai buruk dan jelik  
 Kerana itulah di zaman ada rasul,  
 untuk mendidik manusia Tuhan datangkan rasul  
 Di zaman tidak ada rasul, Tuhan utus ulama  
 yang berwatak rasul  
 Ertinya untuk membangunkan dunia  
 siapa sahaja boleh lakukan  
 Tapi untuk membangunkan insan  
 bukan calang-calang orang untuk memimpin

Bahkan ada kalanya pemimpin itulah  
yang merosakkan manusia yang memang sudah rosak  
Manusia pun bertambah rosak dan jahat  
Kerana dipimpin oleh pemimpin yang rosak dan jahat  
Yang mana pemimpin itu pun  
tidak berubah perangai jahatnya sejak kecilnya  
Sedangkan alam sekitar sudah banyak kali berubah  
Sungguh susah hendak mengubah perangai manusia  
Tidak seperti alam semula jadi mudah sahaja berubah

## SETIAP HARI MENYUBUR MAZMUMAH

**S**ETIAP hari manusia menyuburkan mazmumahnya  
 Disiram, dibaja, digemburkan dan disuburkan  
 Yang aneh, pejuang-pejuang Islam juga  
 turut ikut menyuburkannya  
 Tidak kurang juga para ulama ikut serta  
 Apatah lagi ahli-ahli politik, penyanyi-penyanyi  
 dan artis-artis  
 Menghidupkan mazmumah sudah jadi budaya  
 Basahan hidup mereka setiap masa  
 Mereka suburkan mazmumah dengan berbagai-bagai cara  
 Dengan nama, dengan glamour, ingin pujian, ingin dipuja  
 Gila dunia, gila pangkat, cintakan harta,  
 cinta betina, gila kuasa  
 Mengumpat orang, menghina sesama manusia,  
 mengata-ngata di belakang  
 Dendam kesumat, hasad dengki, sakit hati  
 Menindas, menzalim, menganiaya,  
 bertindak dengan semahu-mahunya  
 Aduh! Musnah hidup rumahtangga  
 Musnah hidup bermasyarakat di kalangan manusia  
 Manusia porak-peranda, kasih sayang berkecai,  
 perpaduan punah  
 Keamanan sudah tidak wujud lagi disebabkan mazmumah  
 Manusia hidup di dalam ketakutan dan gelisah  
 Mana mahu lari, mazmumah manusia sentiasa memburu  
 Ke mana hendak pergi, mazmumah manusia  
 sentiasa menunggu  
 Punah-ranah kehidupan manusia  
 disebabkan mazmumah manusia  
 Bilakah mazmumah ini mati,  
 agar manusia aman, bahagia

---

Selepas Asar  
07 - 08 - 1999

## 7 | MAZMUMAH MENERASKAN HATI

**M**AZMUMAH itulah yang mengeraskan hati nurani  
yang bertapak di dalam hati daging yang lembut  
Apabila hati nurani menjadi keras  
Seluruh pintu kebaikan tertutup  
Tersumbatlah telinga untuk mendengar kebenaran  
Ilmu sudah tidak terjatuh ke hati,  
hanya tersangkut di dalam akal  
Mata melihat, namun kebenaran tidak juga dapat dilihat  
Pintu hati tersendat rapat  
Rasa takut, malu, cinta, bertimbang rasa,  
tabah dan redha tidak masuk lagi di hati  
Akal bukan lagi memikirkan kebaikan  
Bukan lagi memikirkan Tuhan dan perintah-perintah-Nya  
Yang difikirkan adalah makan, minum,  
pangkat, dunia dan betina  
Apabila tidak dapat, mengeluh, dukacita, kecewa,  
kemuncaknya putus asa  
Kalau dapat pula bakhil, sombong, angkuh,  
tamak, menzalim dan berfoya-foya  
Jagalah hati dengan sebaik-baiknya  
Ia adalah merupakan sumber kebaikan  
dan juga sumber kejahatan  
Kalau dia menjadi sumber kebaikan,  
sumber kejahatan tertutup  
Jika ia menjadi sumber kejahatan,  
maka sumber kebaikan pula tertutup  
Kedua-dua sifat itu tidak akan boleh bertemu  
Apabila yang satu menang, maka yang satu lagi kalah  
Kalau yang satu itu berfungsi maka yang satu lagi mati  
Jadikanlah hati itu sumber segala kebaikan  
Jangan jadikan dia sumber segala kejahatan  
Kamu akan binasa dan kecewa

---

Menjelang Maghrib  
20 - 01 - 2000  
(13 Syawal 1420)

## 8 | BOOBY TRAP

**B**OM-BOM dan *booby trap* hati meledak di mana-mana  
 Banyak lagi yang akan meledak menunggu masanya  
 Bom-bom dan *booby trap* ini ia berada di mana-mana  
 Ada di kampung, ada di bandar  
 Tidak kurang di taman-taman murah  
 dan taman mahal yang indah  
 Dia berada di bangunan-bangunan yang tinggi menjulang  
 Di gedung-gedung besar pun tidak kurang  
 Di sekolah, di pejabat merata-rata bersepah  
 Di *coffee house*, di kedai-kedai murah  
 dan *shopping centre* juga terdedah  
 Tidak kurang juga dipasang orang di rumah-rumah Allah  
 Adakalanya bom itu meledak di mimbar-mimbarinya  
 Bom-bom hati ini bermacam-macam namanya  
 Di antaranya yang popular, hasad dengki,  
 sombong, riyak namanya  
 Pemarah, adu domba, mengumpat dan memfitnah  
 Justeru bom-bom hati ini meledak merata-rata  
 seperti yang dicerita  
 Kerosakan berlaku di mana-mana  
 Kemusnahannya terjadi merata-rata  
 Huru-hara tercetus tidak kira tempatnya  
 Aduh! Tidak ada lagi tempat yang harmoni  
 Aduh! Mana pergi tidak ada yang aman lagi  
 Tidak ada keselamatan di mana-mana  
 Bilakah bom-bom dan *booby trap* hati itu dapat dimusnah  
 Bilakah masa bom-bom itu tidak akan dipasang lagi?!  
 Agar aman damai merata-rata negara dan negeri

---

 Selepas Subuh  
 05 - 05 - 1997

**B**ILA nafsu menguasai diri  
Ilmu tidak ditunjang oleh iman dan taqwa  
Jiwa atau hati menjadi buta tiada terasa  
Dunia pun dicintai, dipuji dan dipuja  
Matlamat yang diperjuangkan hanya dunia  
Rasa bangga, angkuh, mendabik dada bila berjaya  
Mengangkat diri menaikkan namanya  
Mabuk dengan pujian, alpa dengan sanjungan  
Si pengampu-pengampu yang inginkan sesuatu  
Meniup api menyemarakkan  
Di waktu itu Tuhan hanya di bibir bukan di hati  
Islam di mulut, bukan keyakinan, bukan dihayati  
Ditegur akan melenting, bahkan buat bising  
Melatah bila dinasihati  
Jiwa panas, perasaan mengganas  
Bercakap pun tidak disukai lagi  
Main lepas sahaja  
Macam atap bocor di waktu hujan  
Tanpa sekatan  
Mendengar kebenaran macam mendengar halilintar  
Takut sekali, bukan dipedulikan  
Di waktu itu tunggulah!  
Yang punya cemeti akan bertindak sesuka hati

---

## 10 | APABILA NAFSU MENGUASAI MANUSIA

**A**PABILA nafsu telah menguasai manusia  
 Dia pun bermaharajalela memperhambakan manusia  
 setiap masa  
 Kalau dia hendakkan sesuatu,  
 dia arahlah seseorang itu mendapatkannya  
 Tidak kira halal atau haram, bahayakah atau tidak bahaya  
 Jika dapat walaupun banyak, tidak juga puas-puas,  
 tidak rasa cukup  
 Tamak menyerang diri seseorang,  
 sombong pun menjadi pakaian  
 Bakhil pun datang, tidak mahu menolong orang,  
 kesenangan untuk diri sendiri  
 Jika tidak dapat banyak susah hati  
 Keluh-kesah pun datang, resah gelisah menyerang  
 Fikiran pun kusut, jiwa derita, marah-marah sahaja  
 Ketika mendapat banyak lupa diri  
 Pembaziran berlaku, membuang-buang harta terjadi  
 Di waktu susah fikiran tidak menentu, hilang pertimbangan,  
 hasad dengki dengan orang yang senang  
 Apabila senang menghina orang, orang pun membencinya  
 Apabila senang berfoya-foya dengan perempuan jalang  
 Menghabiskan masa dengan sia-sia di tempat-tempat maksiat  
 Apabila mendapat bala melolong, hilang pertimbangan  
 Jika senang lupa daratan, lupa Tuhan Rabbul'alamin  
 Pantang dilarang, dinasihat tersinggung  
 Lantas marah-marah dan menyerang  
 terus berdendam mungkin menyerang  
 Begitulah jika nafsu telah menguasai seseorang  
 Peribadi seseorang menjadi sebuah bola di padang



## MANUSIA DILETIHKAN OLEH NAFSUNYA

MANUSIA telah diletihkan oleh nafsunya  
Kerana kehendak nafsu terlalu banyaknya tanpa batas  
Kehendaknya yang halal dan yang haram setiap waktu  
Diarah-arahkannya kita ke hilir dan ke hulu  
Di waktu siang dan malam, di waktu hujan dan panas  
Mendapatnya belum tentu, dapat pula tidak puas-puas  
Diarah-arahnya kita lagi, digesa-gesanya kita selalu  
Adakalanya bangga kita mendapat bala dan kecelakaan  
Namun tidak juga hairan, dan tidak menjadi sempadan  
Direntap-rentapnya kita lagi,  
didorongnya lagi kita bertindak  
Kerana terlalu tamak mendapatkannya  
tidak fikir halal haram  
Terlanggarlah syariat, lupalah Tuhan  
Lalai berpanjangan  
Tidak ada ruang untuk Tuhan  
Tuhan dilupakan sama sekali  
Tapi apa yang diingat selalu, ialah apa hendak diburu  
Benar-benar nafsu telah mengkudakan kita  
Kita diperkotak-katik hingga tidak ada rehat-rehatnya  
Habis umur kita dipermainkan oleh nafsu  
Kita telah dijadikannya ibarat bola  
Ditendang merata padang kehidupan  
Akibatnya di dunia lagi telah menerima padahnya  
Di Akhirat lebih parah dan menderita  
yang tidak berkesudahan

## 12 | BAHAYA LIDAH

**L** IDAH yang lembut itu sepatutnya mengeluarkan  
 kata-kata yang menyejukkan hati  
 Lafaz-lafaz yang dituturkannya menjadikan  
 orang berkasih sayang  
 Bahasa yang diucapkan mendamaikan  
 dua golongan yang selisih faham  
 Tapi apa yang terjadi kepada lidah manusia hari ini  
 Ia telah merobek-robek hati dan jiwa manusia  
 Maruah manusia telah dihancurleburkannya  
 Lidah telah memecah belah di antara sesama manusia  
 Begitulah ilmu, sepatutnya menerangkan  
 kehidupan manusia di dunia  
 Tapi ilmu telah menjadikan jiwa-jiwa dan hati-hati  
 yang empunya mati atau buta  
 Ilmu pada seseorang telah mengoyak-ngoyakkan  
 Iman yang memilikinya  
 Ia telah merobek-robek taqwa seseorang  
 Hingga cacat taqwanya  
 Ilmu tidak lagi memerdekakan hamba dengan Tuhannya  
 Makin banyak ilmu semakin jauh daripada Tuhan  
 Ini adalah disebabkan niat menuntut ilmu kerana dunia  
 Atau kerana mengejar nama atau glamour  
 Sebab-sebab lain kerana yang empunya ilmu  
 rasa bertuhan sudah tidak ada  
 Atau Tuhan sudah tidak diambil pusing atau diutamakan  
 Rasa bertauhid sudah tidak ada  
 Takut dengan Tuhan sudah jauh dari hati manusia  
 Kerana inilah lidah sudah disalah guna  
 Ilmu-ilmu sudah tidak lagi berperanan di tempatnya  
 Akibatnya kerana lidah dan ilmu  
 Telah merosakkan manusia  
 Sama ada yang empunya  
 mahupun selain dirinya

---

Selepas Asar  
 29 - 10 - 1999

## LIDAH JURUBICARA PALING BAIK DAN PALING JAHAT

**L** IDAH jurubicara yang paling baik  
dan juga yang paling jahat  
Juga juruterjemah yang jujur dan khianat  
Dia ditentukan oleh raja diri  
Baik raja itu, baiklah dia, jahat raja itu jahatlah dia  
Setiap hari dia menyampaikan perintah raja  
Adakalanya memuntahkan mutiara yang berharga  
Dapat dimanfaatkan oleh manusia  
Tidak kurang juga intan berlian yang diluahnya  
Menambah kaya kepada manusia  
Tapi yang lebih banyak, perkara yang merbahaya  
dimuntahkannya  
Lahar-lahar gunung berapi mazmumah  
yang memusnah mengalir merata bumi  
Darah-darah ghodhob yang najis mengotorkan suasana  
Nanah-nanah barah dendam kesumat yang busuk,  
meloyakan tekak  
Meledak berselerak di mana-mana  
Tidak kurang bom jangka hasad dengki  
yang meletup darinya  
Banyak orang yang mati  
Apatah lagi yang patah tangan dan patah kaki  
Adakalanya lidah ini pedang yang membunuh  
Sekali-sekala sebagai perisai, menahan panah  
Selamatlah dari merbahaya yang boleh membunuh  
Begitulah peranan lidah setiap hari  
Dia berperanan bermacam-macam caranya  
Dan berbagai-bagai pula kesannya

## 14 | FUNGSI LIDAH DISALAHGUNAKAN

**L**IDAH ahli pidato dan penceramah  
 Tidak lagi mengeluarkan ilmu mempertajam minda  
 Juga tidak lagi mengeluarkan ilmu hikmah pembangun jiwa  
 Lidah tidak lagi membawa air penyejuk hati  
 Tapi lidah telah mengeluarkan panah-panah, menikam hati  
 Juga mengeluarkan racun-racun membunuh jiwa  
 Tidak kurang juga mengeluarkan peluru  
     membinasakan manusia  
 Sedangkan lidah setiap hari digunakan  
 Ia lebih merbahaya daripada senjata api  
 Senjata api tidak diguna setiap hari  
 Kalau fungsi lidah sudah disalahgunakan  
 Yang keluar adalah racun perosak hati dan jiwa  
 Yang meluncur adalah peluru  
 Yang terbit darinya adalah anak-anak panah pemusnah  
 Sedangkan ia bekerja setiap waktu  
 Apa akan jadi kepada manusia  
 Apa sudah jadi kepada pemicato bangsa kita?  
 Apa yang sudah berlaku kepada penceramah-penceramah?  
 Mengapa mereka tidak takut dengan Tuhan akibat lidah?  
 Apakah mereka tidak berfikir kerosakan kepada umat?  
 Lebih-lebih lagi mereka tidak tahukah  
     setiap perkataan akan disoal  
 Setiap lafaz akan dipertanggungjawabkan  
 Apakah mereka sudah kehilangan Tuhan?  
 Hingga bercakap hilang pertimbangan

## 15 | TUHAN JAGALAH LIDAHKU!

**K**ATAKANLAH apa yang engkau hendak kata tentangku  
Aku tidak berkecil hati

Kalau akulah yang benar ia menguatkan aku lagi

Kalau benarlah aku membuat kesalahan

Aku boleh betulkan diri

Aku bersyukur pada-Mu Tuhan

Di samping berterima kasih padamu kawan

Kalau engkau yang bersalah

Aku doakan kamu agar engkau diampunkan-Nya

Aku dapat pahala atau penghapusan dosa

Setiap kata-kata tidak percuma begitu sahaja

Semuanya Tuhan akan kira

Akan diperhitungkan di Akhirat sana

Bahkan akan dibalas Syurga atau Neraka

Tuhan jagalah lidahku

Aku juga boleh mengata

Lidah tidak bertulang

Mudah terluncur dan terlanjur

Lidah tidak ada akal

Dia tidak tahu bahaya atau tidaknya

Tuhan bantulah aku menjaga lidahku

Jangan sampai dia mengata

Macam orang lain mengata sesuka hati

Kejahatan dari lidah terlalu banyak wahai Tuhan

Perpecahan terjadi dari lidah

Badan binasa disebabkan juga

Orang teraniaya lantaran lidah

Orang tidak percaya kerana lidah

Orang sakit hati kerana lidah

Orang dipenjara kerana lidah

Orang berdendam kerana lidah

Aduh jahatnya lidah

Lebih jahat dari ular yang berbisa

---

Selepas Asar

30 - 04 - 1997

## 16 | LALAI BASAHAN MANUSIA

**L**ALAI menjadi basahan kepada manusia  
 Cuai menjadi watak manusia  
 Lupa menjadi tabiat semulajadi manusia  
 Gopoh menjadi budaya mereka  
 Tidak hairanlah lumrah berlaku  
 Sepandai-pandai manusia  
 Lupa berfikir lebih dahulu sebelum bertindak  
 Terutama di waktu dia marah  
 Dia bertindak melulu  
 Tidak sempat berfikir, meledak sahaja  
 Sudah terlajak barulah menyesal  
 Jadi cerdik tidak menjamin manusia berfikir  
 sebelum bertindak  
 Pandai tidak mesti dia berfikir sebelum berbuat  
 Justeru itulah Islam mewajibkan mendidik nafsu  
 Agar dia tenang, tindakannya tidak melulu  
 Supaya dia tidak gelojoh  
 Sempat akal berfikir sebelum melakukan sesuatu  
 Tapi manusia ghairah sangat mendidik akal  
 Mendidik nafsu tidak ada dalam kurikulum pelajaran  
 Nafsu tidak diambil kira  
 Seolah-olah nafsu tidak ada dalam diri manusia

## 17 | MANUSIA SELALU LUPA

**M**ANUSIA selalu lupa  
Lupa kepada Tuhannya  
Yang menciptanya dari tiada kepada ada  
Yang memberi nikmat bermacam-macam bentuknya  
Lupa kepada dosa  
Padahal dosa selalu memburunya  
Ia akan menghumbkannya ke dalam Neraka  
Lupa kepada ibu bapa yang memelihara di waktu kecilnya  
Dihantar ke sekolah, berpeluang menuntut ilmunya  
Dijaga kesihatannya, sihat badannya  
Setelah dewasa ilmu itulah aset dirinya  
Lupa kepada guru-guru yang membuat jasa kepadanya  
Memberi ilmu yang banyak, menjadi hartanya  
Sekadarkan menziarahi guru sekali-sekala pun tiada  
Dia lupakan gurunya sepanjang hayatnya  
Lupa kepada kawan yang pernah menolongnya  
Padahal di waktu itu dia sedang menderita  
Lupa kepada asal-usulnya, dia itu siapa sebenarnya  
Dilupakan oleh pangkat, kesenangan dan kemewahan  
Teringat sahaja kampung tempat tumpah darahnya  
Rasa tidak senang sahaja  
Malu hendak ziarah kampung asalnya  
Bahkan bermacam-macam lagi yang dilupakannya  
Padahal semuanya itu sejarah hidupnya  
Sepatutnya manusia ini bersikap:  
Tempat jatuh lagi dikenang, inikan pula tempat bermain

---

Selepas Asar  
06 - 05 - 1997  
(17 Muharram 1418)

## PERNAHKAH SEDIH TERTINGGAL SEMBAHYANG?

**P**ERNAHKAH kita bersedih tertinggal sembahyang?  
 Pernahkah susah hati terlewat mengerjakannya?  
 Pernahkah terasa rugi tertinggal jemaah mendirikan  
 sembahyang?  
 Pernahkah kita risau hati lalai di dalam sembahyang?  
 Pernahkah terasa berdosa tidak beradab menghadapi Tuhan?  
 Jawabannya ada pada diri kita sendiri  
 Setiap orang boleh menilai dirinya  
 Tanyalah diri, kita akan dapat jawabannya  
 Bila dapat jawabannya engkau kenal diri engkau  
 Bila engkau kenal diri engkau, engkau kenal siapa engkau  
 Kalau engkau kenal diri engkau  
 Engkau tidak akan nampak lagi kejahatan orang lain  
 Begitulah beberapa pertanyaan yang kita ajukan  
 Sebagai contoh untuk bertanya diri sendiri  
 Yang tidak disebutkan kita datangkan atau fikirkan  
 Tentu kita juga akan dapat jawabannya  
 Cara ini adalah salah satu cara buat kita menilai diri  
 Jika kita mahu menilai diri sendiri  
 Lebih-lebih lagi jika hendak memperbaiki diri  
 Tapi berapa ramaikah orang boleh ikut jalan ini?!



## 19 | MERAJUK JADI BUDAYA

MERAJUK telah menjadi budaya manusia  
Budaya yang sama-sama manusia tidak mahu  
Tapi sama-sama membudayakannya  
Budaya merajuk itulah yang menyusahkan manusia  
Yang menjadi racun di dalam keluarga  
Dan di dalam pergaulan mereka  
Banyak kerja terhalang, tidak kurang kerja terbengkalai  
dibuatnya  
Banyak kerja tidak sempurna  
Diganggu oleh budaya merajuk  
Buat itu tak kena, buat ini tak kena  
Serba terganggu  
Merajuk menghantui perasaannya  
Setengah jiwa yang terlalu lemah, jiwanya merana

Budaya merajuk ini berlaku setiap hari  
Di dalam rumahtangga, di tempat kerja, di dalam parti  
Di rumah Allah berlaku juga  
Tidak ada akta dan peraturan yang boleh membendungnya  
Justerulah akta dan undang-undang tidak dilagang  
Penyakit merajuk ini dia serang tidak pilih orang  
Semua golongan kena serang

Budaya merajuk ini mudah saja terjadi  
Suami lambat balik pun isteri masam muka  
Hilang manisnya  
Layanan kepada suami pun dingin aja  
Belum lagi suami kahwin dua  
Merasakan diri tidak dihormati, pertengkaran pun terjadi  
Adakalanya sampai mati  
Suami pula terpelengok  
Merajuk sakit hati  
Bertindakbalas terhadap isteri

Ibu bapa pun selalu merajuk  
 Tersinggung oleh anak-anak yang berbagai kerenah  
 Anak-anak lambat ziarah  
 Atau lambat menerima surat atau memberi pendapat  
 Tidak senang aja  
 Marah-marah aja  
 Merungut-rungut dan membebel tidak tentu hala  
 Apabila anak-anak balik kerut mukanya  
 Bila ditanya diam sahaja  
 Atau menyergah macam singa

Di pejabat-pejabat ada staf-staf merungut tidak habis-habis  
 Merasakan tertekan oleh majikan, kerana terlalu banyak kerja  
 Atau gaji tidak seimbang dengan kerja  
 Majikan tidak dihormati lagi  
 Di belakang dikata-kata dan dihina  
 Ada yang terus lari dari kerja  
 Majikan pula susah hati  
 Merajuk pula, marah-marah aja kepada staf-stafnya  
 Adakalanya nafsu tidak boleh kontrol  
 Maki hamun semahu-mahunya

Merajuk juga berlaku di dalam parti  
 Setelah jatuh dari jawatan parti oleh undi  
 Tenaga dan pengorbanan dibekukan  
 Kalau dulu aktif, sekarang pasif  
 Dahulu cergas, sekarang culas  
 Tidak terlantik di dalam pencalonan  
 Atau digugur di dalam jawatan parti atau pemerintahan  
 Hati sakit, merajuk pula  
 Muka pun tidak nampak lagi, membawa diri  
 Entah mana perginya, kalau mati ada kuburnya  
 Bila mati barulah media massa membuat berita  
 Setelah lama hilang dari gelanggang masyarakatnya

Di masjid pun berlaku budaya merajuk  
Waktu jadi imam, di masjid setiap waktu  
Macam merpati masjid  
Tidak lekang-lekang di masjid, macam rumahnya  
Bila jawatan diganti orang, di masjid tidak nampak lagi  
Bahkan waktu sembahyang pun  
    dia tidak muncul-muncul lagi  
Hanya kelihatan pada hari Jumaat  
Itupun duduk di tepi-tepi  
Mukanya masam tidak berseri  
Habis sahaja sembahyang tidak sempat sembahyang sunat  
Cepat-cepat cabut pergi  
Orang ramai hairan semua memerhati  
Imam pun boleh berlaku, kata setiap hati

---

Selepas Asar  
20 - 05 - 1997  
(12 Muharram 1418)

## 20 | SIFAT EGO

**O**RANG yang ada ego, tidak sedar yang dia ada ego  
 Ego diketahui melalui ilmunya  
 Kalau tahu pun adanya sifat ego  
 Belum tahu lagi dapat membuangnya  
 Ego adalah sifat batin  
 Tapi dapat dikesan melalui tanda lahir dan sikapnya  
 Bercakap di kalangan kawan selalu sahaja cakap besar  
 Bila berdiri selalu sahaja cekak pinggang  
 Apabila berbincang selalu sahaja tinggi suaranya  
 Apabila kebenaran itu keluar daripada mulut orang,  
 payah menerimanya  
 Kalau bercakap mahu menang sahaja  
 Bila bertemu orang, payah menegur sapa  
 kecuali orang mendahuluinya  
 Jika orang tersilap terhadapnya, mudah sahaja marah  
 dan berang  
 Selalunya serius sahaja, kurang mesra  
 Kalau hendak berkawan pilih-pilih orang,  
 biasanya orang yang setaraf dengannya  
 Bila dicabar mudah sahaja mencabar  
 Kalau bersalah susah hendak meminta maaf  
 Adakalanya orang meminta maaf, enggan menerimanya  
 Mudah marah, bahkan marahnya sangat ketara  
 Kalau ada kuasa, suka menzalim dan menindas  
 Jika tiada kuasa, selalu sahaja keras kepala  
 untuk patuh kepada ketua  
 Bertekak dan berbahas menjadi budayanya  
 Pantang ditegur oleh siapa sahaja, masam mukanya  
 Apabila ego sudah tebal, sebarang kebenaran payah diterima  
 Bila ditegur sakit hatinya, dendam pun membara  
 Jangan sebut dosa pahala, tersinggung perasaannya  
 Kalau dipuji orang lain di hadapannya, sakit hatinya  
 Sebut Syurga Neraka, amat jijik mendengarnya

Bahkan sebut nama Allah pun tersinggung jiwanya  
Jangan cuba bala bencana yang datang  
    kita kaitkan dengan kemurkaan Tuhannya  
Sakit hatinya, payah mahu menerima  
Bencana alam dianggap perkara biasa  
Itu perkara *nature*  
Jangan cuba dihubungkan dengan dosa  
Dia akan melenting menunjuk sikap tidak menerima  
Aduh dahsyat, ego amat berbahaya  
Bukan sahaja dengan manusia bahkan dengan Tuhannya  
Kebenaran payah menerima  
Selalu sahaja menolaknya,  
    bahkan dijadikan bahan perli sahaja  
Kerana ego, orang sanggup derhaka kepada Tuhannya  
Bahkan orang sanggup jadi kafir  
Lihat sahaja Namrud, Hamman dan Firaun  
Sebelum matinya berbagai bala  
    dan tanda amaran dari Tuhan  
Namun tidak boleh jadi pengajaran dan ingatan  
Akhirnya sanggup mati kafir, kerana sikap egonya  
Aduh, dahsyatnya sifat ego!

---

Menjelang tidur  
26 - 08 - 1999

## 21 | MARAH SENTIASA MEMBARA DI DADA

**M**AZMUMAH marah sentiasa membara di dada  
 Kalau tidak pandai mengawalinya  
 baranya menyala dan terus menyala  
 Jika menyala membakar apa sahaja  
 Dari nyalanya memusnahkan apa sahaja  
 sama ada manusia mahupun mata benda  
 Alangkah susahnyanya mengawal bara ghodhob  
 agar jangan menyala  
 Manusia yang berjijwa besar sahaja yang boleh menahannya  
 Siapa yang mampu menahan apinya dari menyala  
 Dia adalah seorang wira yang tiada taranya  
 Biasanya manusia itu semakin besar kedudukannya  
 semakin besar sifat marahnya  
 Lebih-lebih lagi manusia yang berkuasa  
 bara apinya sering menyala  
 Rosaklah rakyat, terzalimlah manusia  
 Aduh memang susah sekali menjaga bara ghodhob  
 agar tidak menyala  
 Menahannya terseksa jiwa  
 Menggeletar seluruh anggota  
 Apabila terlepas daripada kekangannya  
 Aduh menyesal tidak terkira  
 Fikiran terganggu, jiwa menderita  
 Akhlak musnah wibawa jatuh punah  
 Manusia benci, orang lari  
 Akhirnya susah mendapat kawan  
 Payah mendapat simpati  
 Jagalah bara api marah, jangan sampai menyala  
 Kerana ia sangat merbahaya

## 22 | MUJADALAH DAN MUBAHASAH

**B**IASANYA bermujadalah susah menjaga ego dan megah  
 Suka berbahas-bahas biasanya menebalkan ego,  
 riyak dan mencari nama  
 Selalunya di dalam bermujadalah dan bermubahasah  
 Ingin mahu menang, tidak mahu rasa kalah  
 Payah menerima kebenaran  
 Sekalipun terpaksa menegakkan benang basah  
 Begitu juga di dalam majlis forum  
 Payah hendak mengelak daripada menunjuk-nunjuk  
 dan bermegah-megah  
 Malu rasanya kalau tidak pandai berhujah  
 Berbunga hati jika pandai berhujah dan bercakap petah  
 Hadirin yang bertanya pula, menyoal kerana megah  
 Agar orang ramai menganggap dia  
 orang yang pandai mencungkil masalah  
 Kalau panel tidak pandai menjawab, itulah yang dia hendak  
 Supaya orang ramai menganggap dia lebih pandai  
 dari ahli panel atau penceramah  
 Apa sudah jadi majlis forum dan ceramah?  
 Penceramah atau ahli panel dengan para pendengar  
 Sama-sama hatinya rosak dan punah  
 Masing-masing tidak dapat menjaga dirinya  
 Daripada bermegah-megah dan riyak  
 Kerana itulah di dalam Islam  
 Bermujadalah dan bermubahasah sangat ditegah  
 Lantaran dari sinilah timbulnya riyak, megah,  
 glamour, cari nama dan berpecah-belah  
 Kerana itulah di dalam kitab dikatakan  
 “Tidak akan rosak sesuatu kaum itu  
 Kecuali apabila didatangkan mujadalah”  
 Mujadalah dan mubahasah bukan mendatangkan  
 kebaikan pada umat  
 Tapi dari sinilah akan suburnya mazmumah yang ditegah

Tapi malangnya para ulama  
Mujadalah dan mubahasah telah dijadikan budaya  
Budaya yang mengajak umat Islam berlalai-lalai  
dan bermegah-megah  
Di dalam Islam, yang disuruh bermesyuarat dan muzakarah  
Itu pun ada mempunyai disiplin, adab dan tata tertib  
Agar ia berjalan dengan penuh ukhwah  
Agar jadi ibadah



## MAZMUMAH MANUSIALAH YANG BERGADUH

**H**AKIKATNYA yang bergaduh, berkrisis,  
berkelahi dan berperang di dunia ini  
adalah sifat mazmumah manusia  
Mazmumah-mazmumah yang disuburkan  
setiap masa dan ketika  
Yang menjadi mangsa adalah manusia  
Tapi yang bergaduh dan berperang itu  
tidak nampak oleh mata  
Yang nampak adalah manusia yang menjadi senjatanya  
Setiap hari bergaduh, berkrisis, berperang,  
mazmumah manusia  
Bergaduh dan berperang  
Di antara sombong dan hasad dengki  
Di antara dendam kesumat dan sifat marah  
yang memusnah  
Di antara riyak dengan sum'ah  
yang menjadi orang sakit hati  
Di antara penghasut hati dan tamak yang dibenci  
Mazmumah-mazmumah manusia bergaduh  
dan berperang tidak henti-hentinya  
Begitulah mazmumah manusia yang bergaduh  
dan berperang setiap hari  
Mata tidak nampak  
Tapi kesannya nampak pada kehidupan manusia  
Makhluk yang berkrisis tidak nampak  
Tapi senjata yang digunakannya nampak  
Iaitu manusia yang menjadi alat kepada mazmumah  
Manusialah yang parah dan susah  
Manusialah yang menerima bahana dan padah  
Kalau manusia sedarlah siapa yang menghasut  
dan menggunakannya  
Mereka sudah tentu marah  
Sudah tentu mereka akan memerangi

berhabis-habisan mazmumahnya  
Kerana mazmumahlah punca segala petaka  
yang menimpa manusia  
Jika manusia sedarlah bahawa jahatnya mazmumah  
Mereka tidak akan bertolak ansur dengan mazmumah  
Biarlah mereka berperang dengan mazmumahnya,  
iaitu seterunya  
Daripada berperang sesama mereka

TUHAN memberitahu kita pun tahu tapi macam tak tahu  
Tuhan memberitahu tapi tak mahu tahu  
Tuhan membawa berita kita percaya  
Tapi mendengar acuh tak acuh aja  
Tuhan membawa perintah larangan dan tegah,  
    endah tak endah sahaja  
Tuhan membawa berita gembira dengan Syurga,  
    tidak pun rasa gembira  
Tuhan membawa berita ancaman dengan Neraka  
Dengar juga tapi tidak pun terasa gerun dengan berita  
Tuhan membawa syariat, peraturan  
    di semua aspek kehidupan  
Hati merasa tidak senang sahaja  
    dan membuat-buat tidak dengar  
Walaupun telah diperdengar  
Peraturan dibaca, bahkan digalakkan  
Pembaca yang berjaya diberi hadiah pula  
Namun diamalkan tidak juga  
Bahkan dianggap pengacau negara  
Begitulah Islam di mulut tidak di hati  
Tuhan disebut *fi lisan* (di lidah) tidak di hati  
Barulah kita tahu setelah pengalaman diberi  
Menjadi orang Islam mudah  
Menjadi mukmin amat sulit sekali

## SARANAN HENDAKLAH TAKUT KEPADA TUHAN

SARANAN hendaklah takut kepada Tuhan  
 Selalu sahaja di dalam ceramah-ceramah  
 Di atas mimbar hari Jumaat ketika khutbah  
 Hati tidak juga terasa, biasa aja  
 Ketika Allah disebut hati tidak terasa apa-apa  
 Takut tidak juga membara  
 Tapi apabila teringat sahaja peperiksaan akan tiba,  
     bimbang menerpa  
 Selepas periksa bimbang lagi,  
     takut keputusan tiada berjaya  
 Bila hendak bertemu bos hati gementar  
 Bila bertemu lebih-lebih lagi gementar  
 Bila ditanya oleh bos gugup-gugup sahaja  
 Dengan bini yang cerewet dan membebel  
     tidak jemu-jemunya  
 Si suami bila balik jantung berdenyut, hati bergelombang  
 Takut ditanya silap-silap jawab  
     tengking herdik yang diterima  
 Sumpah seranah mesti kena  
 Apatah lagi ketua negara  
 Bila berada dengan orang-orang pentingnya  
 Tidak ada yang sanggup berkata  
 Kalaupun berkata gugup-gugup aja  
 Bos mereka bila berkata  
 Semua mereka angguk-angguk setuju aja  
 Walaupun hati belum tahu  
 Walaupun ada yang tidak setuju  
 Semuanya membisu  
 Kalau diberi pandangan sebaliknya  
 Takut jawatan yang ada terancam  
 Tumpah pula periuk nasi  
 Padahal Allah selalu mengancam dan mengugut  
 Memberi amaran dan ingatan

Dengan azab yang dahsyat  
Dengar, macam tidak dengar  
Tahu, macam tak tahu  
Percaya, macam tidak percaya  
Justeru tidak terasa apa-apa  
Tidak tergugat pun jiwa  
Tidak gerun, tidak gentar  
Perasaan hati biasa sahaja  
Begitulah manusia banyak sangat yang ditakutinya  
Namun begitu takutkan Allah tidak juga terasa

---

Selepas Asar  
01 - 05 - 1997

## 26 | ORANG YANG MENGHINA GURU

**T**ANYALAH siapa pun, sekalipun orang jahil  
 Siapa sahaja menghina ibu dan bapa  
     tiada siapa boleh terima  
 Sekalipun dia di dalam kebenaran  
 Betapalah pula kalau dia di dalam kebatilan  
 Tiada siapa yang simpati  
 Semua orang yang tahu menjadi benci  
 Begitulah juga orang yang mengata  
     dan menghina gurunya  
 Sekalipun dia betul  
 Tiada siapa yang boleh setuju  
 Betapalah kalau dia yang bersalah apa lagilah  
 Orang akan bertambah marah  
 Wibawanya jatuh keyakinan orang hilang  
 Orang akan lari  
 Tinggallah dia seorang diri  
 Belum pernah berlaku di dalam sejarah  
     seorang itu dianggap wira  
 kerana menghina ibu bapa atau gurunya  
 Tapi apa yang terjadi atau berlaku  
 Orang itu dihina, dicerca, dibenci dan dikata  
 Orang yang menghina ibu bapa dan gurunya  
     jiwanya tiada tenang  
 Jiwa gelisah, marah-marah tidak tentu arah  
 Di dunia lagi telah menerima padah  
 Ketawanya hanya pura-pura  
 Riangnya hanya dibuat-buat sahaja  
 Kerana hendak menutup jiwa yang derita  
 Bertemu dengan orang yang tahu tentang dirinya  
     takut-takut aja  
 Mahu lari dari mereka

---

## 27 | KENAL DIRI SETELAH DIUJI

ENGKAU telah mengenal dirimu, siapa kamu  
Melalui ujian ini

Engkau mengata orang!

Kalau engkau tersedar dengan ujian

Engkau tidak mengata orang lain

Kalau engkau sedar engkau orang baik

Menunjukkan engkau belum baik

Orang baik tidak merasa dirinya baik

Kita rasa kita sudah sedar selepas ujian

Mengapa menuding jari kepada orang lain?

Menunjukkan kita belum lagi sedar

Bila menghina orang lain selepas ujian

Kita bersifat derhaka waktu teruji

Di mana kebaikan kita?

Orang yang baik bila diuji teringat dosa,

teringat kesalahan sendiri

Kita lain pula, kita teringat dosa orang lain

bukan dosa kita

Suluhlah diri kita dengan Al Quran dan Sunnah

Jangan suluh dengan akal

---

Selepas Asar  
27 - 11 - 1997

## 28 | PENGUMPAT TIDAK TAHAN DIUMPAT

**O**RANG yang selalu mengata orang  
 biasanya dia tidak tahan dikata orang  
 Orang yang selalu mengumpat orang  
 biasanya tidak suka diumpat orang  
 Walaupun dia selalu mengata dan mengumpat orang  
 dia tidak tahan diumpat dan dikata, jiwanya menderita  
 Jiwanya sangat gelisah jika dia dikata dan diumpat  
 Biasa juga orang yang tidak suka mengata dan mengumpat,  
 dia tidak begitu sedih dan tidak susah hati  
 jika dia dikata dan diumpat  
 Orang yang tidak suka mengata dan mengumpat  
 biasanya dia terlalu memikirkan dirinya sendiri  
 Dia merasakan dirinya juga sering membuat kesalahan  
 dan kesilapan  
 Kerana itulah dia tidak minat hendak mengata  
 dan mengumpat orang  
 Kalau dia dikata dan diumpat orang,  
 dia tidak begitu terasa apa-apa  
 Bahkan mungkin hati kecilnya berkata patut dia dikata,  
 kerana dia manusia yang lemah juga  
 Dengan umpatan orang itu dia bertambah lagi memperbaiki diri  
 Lantaran itulah dia tidak bertindakbalas  
 di atas kejahatan orang itu  
 Begitulah seterusnya orang yang sombong,  
 pantang orang lain sombong dengannya  
 Kesombongan orang lain terhadap dirinya,  
 dia tidak sanggup menerima cabaran  
 Di sini baru kita faham, orang yang nampaknya  
 macam berani dan garang,  
 selalu sahaja mengumpat orang  
 dan sombong dengan orang  
 Sebenarnya jiwanya tidak kuat,  
 tidak mampu kena cabar



Di sebalik nampaknya garang  
tersembunyi sifat penakut dan pengecut  
Tapi orang yang tenang, tidak nampaknya riuh-rendah  
sebenarnya jiwanya kuat  
Di sebalik ketenangannya  
tersembunyi keberanian dan ketahanan jiwanya  
Kerana itulah orang seumpama ini sabarnya luar biasa  
Mampu menerima berbagai-bagai ujian dan kesabaran

---

Selepas Asar  
29 Muharam 1421H

## **YANG SUKA DIPUJI DAN YANG SUKA MEMUJI**

**P**EMIMPIN-PEMIMPIN dunia terutama pemimpin negara  
 suka dipuji  
 Inginan kepujian menjadi budaya  
 Sesiapa memuji, ada perhatian, ada habuan  
 Bila dikritik rasa tidak senang  
 Sesiapa selalu sangat memberi nasihat hidup tidak senang  
 Di dalam Islam suka dipuji dan suka memuji  
 Terang-terangan sangat dilarang  
 Yang suka dipuji dan yang suka memuji  
 kedua-duanya berdosa  
 Justeru menghilangkan pahala segala usaha  
 Kepujian adalah kepunyaan Allah  
 Bukan milik manusia  
 Sesiapa suka dipuji telah bersekutu dengan Allah  
 Yang kena puji merosakkan jiwanya  
 seterusnya merosakkan segala usahanya  
 Yang memuji terang-terangan  
 selalunya orang yang hidup pura-pura  
 Orang yang hidup pura-pura munafik namanya  
 Suka memuji terang-terangan orang yang inginkan habuan  
 Ada keuntungan peribadi di sebalik pujian  
 Suka dipuji, suka memuji terang-terangan  
 Orang yang sudah rosak peribadinya  
 Ramai orang menjadi benci

## RAMAI ORANG MENGEJAR NAMA DAN GLAMOUR

**R**AMAI orang mengejar nama dan glamour  
Tidak fikir lagi larangan Tuhan  
Mereka menyangka glamour dan nama membawa bahagia  
Kasihannya mereka-mereka ini ditipu oleh angan-angannya  
Mereka burulah nama dan glamour  
Dengan bermacam-macam dan berbagai-bagai cara  
Orang yang ada paras rupa  
Menggunakan rupanya  
Berbagai-bagai aksi dan seksi yang digayakannya  
Orang yang ada ilmu menggunakan ilmunya  
Sibuk forum di sini forum di sana  
Motivasi di sini, motivasi di sana  
Orang yang badannya sasa, menggunakan badannya  
Begitulah orang mencari nama dan berbagai-bagai cara  
Mengikut apa yang ada pada dirinya  
Tapi mereka-mereka itulah yang ramai menderita jiwanya  
Rumahtangga mereka huru-hara bahkan porak-peranda  
Keluarga berpecah-belah, selalu sahaja bercerai-berai  
di kalangan mereka  
Apabila tua dilupakan orang, nama dan glamour  
entah ke mana  
Begitulah nasib kebanyakan orang yang mengejar nama  
dan glamour  
Gah di waktu muda, akibat buruk di waktu tua  
Tapi orang yang kemudian tidak juga  
mengambil pelajaran dari mereka

## 31 | MANUSIA PREJUDIS SESAMANYA

**K**ERANA lumrah kebanyakan jiwa manusia telah rosak  
 Maka ramai pula manusia telah menjadi prejudis  
 dengan manusia  
 Satu sama lain sudah tidak percaya-mempercayai  
 Isteri prejudis dengan suami,  
 suami juga prejudis dengan isteri  
 Kenalan dengan kenalan berlaku juga prejudis ini  
 Kenalan sekampung atau kenalan setempat kerja  
 Satu sama lain tidak percaya-mempercayai  
 Tetamu yang datang pun dicurigai  
 Tuan rumah juga dicurigai oleh tetamunya  
 Majikan tidak percaya dengan buruhnya  
 Buruh juga tidak yakin dengan majikannya  
 Pengarah tidak percaya dengan orang bawahan  
 Orang bawahan tidak percaya dengan pengarahnya  
 Apatah lagilah jika bertemu dengan orang  
 yang tidak dikenali  
 Lebih-lebih lagilah satu sama lain bimbang-membimbangi  
*Suspect* sahaja bertemu orang  
 Begitulah berlaku di dalam masyarakat manusia hari ini  
 Manusia sesama manusia telah menghantui fikirannya  
 Manusia sesama sendiri telah seksa jiwanya  
 Tidak bergaul tidak boleh hidup  
 Kerana manusia satu sama lain perlu-memerlukan  
 Tapi apabila bertemu masing-masing terseksa  
 Curiga-mencurigai menghantui manusia  
 Begitulah bila sudah ramai di kalangan manusia  
 rosak jiwanya  
 Bertemu sesama manusia tidak terasa bahagia  
 Tapi apa boleh buat, bertemu itu terpaksa juga  
 Mana manusia boleh hidup  
 tanpa bertemu sesamanya

---

Selepas Isyak  
 03 - 10 - 1999

## MANUSIA TELAH DITAWAN OLEH NAFSU

ANGKASA lepas telah ditawan oleh manusia  
Setelah bertahun-tahun mencuba tidak berjaya  
Kalau bukit tidak dapat dikira banyaknya  
yang telah ditawan oleh manusia  
Gunung Everest yang paling tinggi di dunia  
Banyak kali manusia sampai kemuncaknya  
Yang jatuh mati entah berapa banyak bilangannya  
Kutub Selatan, Kutub Utara memang sudah lama  
dijelajah manusia  
Lautan yang dalam semuanya telah ditawan  
oleh manusia  
Hutan belantara, gurun padang pasir yang kering-kontang  
perkara biasa  
Menawan di antara bangsa dengan bangsa  
sudah menjadi budaya  
Di antara negara dengan negara begitu juga  
Sudah menjadi perkara lama  
Macam-macam lagi ilmu-ilmu yang sulit dan tersembunyi  
dikuasai manusia  
Bila dilihat di sudut ini,  
masya-Allah hebat sungguh manusia ini  
Tapi bila berhadapan dengan nafsu  
manusia kalah selalu  
Di sudut-sudut lain mereka menawan  
Di sudut nafsu mereka ditawan  
Hingga nafsu jadikan manusia sebagai bola  
Ditendang ke hujung ditendang ke pangkal  
Disepak merata padang  
Atau macam daun-daun kering diterbangkan oleh angin  
merata-rata terbang  
Ada yang tercampak ke dalam longkang  
Nafsu bila menawan manusia,  
diperkotak-katiknya semahunya-mahunya

Hingga manusia hilang malu dibuatnya  
Patutlah Rasulullah bersabda:  
“Siapa dapat menawan nafsu dia adalah wira”

## NAFSU MEMPERBUDAK-BUDAKKAN MANUSIA

**E**NGKAU mengaku berkuasa  
Tapi setiap hari engkau menerima arahan nafsu engkau  
Engkau tidak mampu pun menolaknya  
Engkau diarah ke sana dan ke mari  
Tidak pula engkau sanggup membantahnya  
Hingga engkau telah menjadi budak suruhannya  
Engkau mengaku cerdik  
Tapi setiap hari nafsu menipu engkau  
Engkau tidak pun terasa kena tipu  
Nafsu engkau telah merosakkan engkau  
Namun engkau tidak terfikir dialah yang merosakkan engkau  
Padahal engkau telah menjadi sengsara  
Tapi engkau masih setia dengannya  
Tidak terfikir pun oleh engkau  
    bahawa dia adalah musuh engkau  
Engkau mengaku kuat  
Sanggup berlawan dengan siapa sahaja  
Engkau boleh menang  
Tapi dengan nafsu engkau kalah setiap masa  
Engkau telah dibelasah oleh nafsu engkau  
Engkau telah teruk dibuatnya  
Engkau pun sedar engkau bahawa engkau  
    telah dirosakkan olehnya  
Namun engkau tidak tahu  
    bagaimana hendak mengalahkannya  
Hingga jiwa engkau tidak pernah tenang dibuatnya  
Kebahagiaan engkau telah hilang olehnya  
Walaupun begitu engkau tidak tahu  
    bagaimana hendak mengalahkannya  
Begitulah nafsu telah memperbudak-budak manusia  
Sekalipun yang berkuasa, profesor,  
    dan yang gagah perkasa

---

Sebelum tidur  
14 - 11 - 2000

## 34 | MUJAHADAH JALAN MENUJU ALLAH

**M**UJAHADAH adalah satu jalan  
 untuk seseorang menuju Allah  
 Tanpa mujahadah adalah mustahil  
 seseorang hamba sampai kepada-Nya  
 Kerana yang menjadi penghalang  
 seseorang itu menuju Allah  
 ialah syaitan dan nafsunya  
 Tapi nafsu adalah lebih menghalang  
 dari syaitan laknatullah  
 Kehendak nafsu dengan kehendak Tuhan  
 biasanya selalu sahaja berlawanan  
 Di sinilah perlunya bermujahadah bersungguh-sungguh  
 dan bermati-matian  
 Bermujahadah adalah sangat menjemukan  
 Bermujahadah adalah terseksa dan menyakitkan  
 Tapi di sinilah pahalanya yang besar dari Tuhan  
 Bermujahadah adakalanya sangat susah dan payah  
 Ada juga dengan rahmat Tuhan bermujahadah  
 dipermudahkan  
 Tapi para rasul dan para nabi dengan anugerah Tuhan  
 dipelihara Tuhan  
 Mereka diberi kelebihan tanpa mujahadah menuju Tuhan  
 Mereka itu orang istimewa dan orang Tuhan  
 Terlepas daripada syaitan dan bebas daripada nafsunya  
 Mereka adalah orang pilihan Tuhan  
 Kerana mereka hendak dijadikan contoh dan ikutan  
 Mereka itu benar-benar orang Tuhan, dan wakil Tuhan  
 Untuk diikuti oleh manusia berbagai-bagai lapisan  
 Kita yang bukan rasul dan nabi ini kenalah bermujahadah  
 Di dalam bermujahadah mintalah  
 pertolongan dengan Tuhan  
 Agar dibantu Tuhan di dalam bermujahadah  
 melawan nafsu dan syaitan



Bertawasullah selalu dengan Rasul dan Mursyidnya  
Meminta tolong di dalam bermujahadah  
agar dimudahkan oleh Tuhan  
Bermujahadahlah secara istiqamah  
dan jangan jemu-jemu  
Nanti dengan rahmat Allah  
mujahadah kita dipermudahkan

---

Menjelang Tidur  
27 - 09 - 1999

## 35 | MUSUH KETATKU ADA DUA

**T**UHAN! Musuh ketatku ada dua  
 Yang kedua-duanya tidak nampak oleh mata  
 Syaitan dan nafsuku  
 Musuh yang paling hampir dan amat merbahaya ialah nafsu  
 Nafsu adalah sebahagian daripada diriku  
 Ia lebih merbahaya daripada syaitan yang terkutuk  
 Kerana dia adalah jalan atau lorong bagi syaitan  
 Ertinya syaitan tidak akan dapat menyesatkan manusia  
 kalau bukan kerjasama nafsu  
 Nafsu boleh juga dikatakan tali barut syaitan  
 Sedangkan syaitan dan nafsu *network*nya terlalu banyak  
 Bukan senang hendak dikesan  
 Jebak dan perangkapnya terlalu banyak yang direntang  
 di sekeliling kehidupan insan  
 Siapalah yang boleh terlepas daripada jebaknya?  
 Siapalah yang boleh selamat daripada termasuk  
 di dalam perangkapnya?  
 Aku tidak mungkin boleh mengawal  
 dan menjaga diriku sendiri?  
 Daripada terjebak dan terperangkap di dalam jaringnya  
 Kecuali kawalan dan pemeliharaan daripada-Mu Tuhan  
 Engkaulah yang boleh menjaga dan menolong aku  
 daripada termasuk ke dalam perangkapnya  
 Oleh itu aku memohon dengan Rahmat-Mu Tuhan!  
 Jagalah aku, peliharalah aku, lindungilah aku  
 Agar aku terselamat daripada tipu daya nafsu dan syaitan  
 Aku berlindung dengan-Mu Tuhan  
 daripada kejahatan syaitan  
 Dan aku juga berlindung dengan-Mu Tuhan  
 Daripada kejahatan nafsuku  
 Engkau sajalah yang boleh menyelamatkan aku  
 Selamatkanlah aku Tuhan

---

Selepas Asar  
 27 Muharam 1421H

**T**ELAH aku lawan nafsuku setiap waktu  
Aku cuba berkali-kali, aku kalah lagi  
Aku tidak putus asa, aku lawan lagi  
Namun aku kalah juga  
Tuhan, bantulah aku  
mudahkan aku melawan nafsu  
Aku tetap melawannya, ia tuntutan fardhu  
Agar aku tidak terhalang menuju-Mu  
Tolonglah aku Tuhan, kasihanilah aku  
Kalau Engkau biarkan aku, aku akan berterusan  
ke lembah dosa  
Tuhan, nafsuku selalu mengganggu aku  
Dia bekerjasama dengan syaitan terkutuk  
Setiap hari ia memusuhi aku  
Bila aku ingin mentaati-Mu  
Tuhan, bantulah aku  
Tuhan, kasihanilah aku  
Jangan biarkan aku keseorangan  
menghadapi syaitan dan nafsu  
Aku ingin mentaati-Mu, aku ingin keredhaan-Mu  
Kalau Engkau biarkan aku, aku akan kecewa nanti  
Tuhan, aku akan mencuba lagi melawan nafsu  
Dengan bantuan-Mu dan rahmat-Mu  
Aku tidak akan berputus asa  
Aku tetap berjuang dengan mengharap  
bantuan dari-Mu

## LEMBUTNYA HATI MAZMUMAH BOLEH MATI

**T**AKUTKAN Tuhan atau cinta kepada-Nya  
 boleh melembutkan hati  
 Lembutnya hati, mazmumah boleh mati  
 Tidak takutkan Tuhan atau tidak cinta kepada-Nya,  
 hati buta atau mati  
 Bila hati buta atau mati  
 Nafsulah yang akan menjadi raja di dalam diri  
 Nafsu menjadi raja diri akan bermaharajalela  
 Dia akan mendorong manusia membuat apa sahaja  
 Kejahatan nafsu itu dahsyat  
 Jika ia telah bermaharajalela, ia akan jadi air bah  
 melanda apa sahaja  
 Ia juga akan jadi angin yang menggila  
 memusnah segala benda  
 Atau dia akan jadi api membakar setiap yang ada  
 Aduh, dahsyatnya nafsu manusia jika tidak dijaga  
 Kejahatannya, manusia mati, cacat dan luka  
 Harta benda musnah, bangunan yang tinggi runtuh,  
 segala yang indah punah  
 Binatang-binatang yang tidak berdosa juga ikut punah-ranah  
 Tanam-tanaman untuk makanan manusia turut musnah  
 Aduh! Jahatnya nafsu, runtuh rumahtangga  
 Pecah persaudaraan, musnah kasih sayang  
 Aduh! Jahatnya nafsu manusia berkrisis dan berperang  
 Berkelahi dan berbunuh-bunuhan  
 Zina lumrah berlaku, rogol dan pencabulan  
 merobek-robek maruah manusia  
 Aduh! Merbahayanya nafsu,  
 musnah perikemanusiaan

## BERMUJAHADLAH MEMBERSIHKAN JIWA

**B**ERMUJAHADLAH membersihkan jiwa  
Dari mazmumah yang merosakkan diri dan manusia  
Bermujahadlah, jangan jemu-jemu dan kecewa  
Bermujahadah melawan nafsu memang sakit dan susah  
Bahkan meletihkan dan menjemukan  
Kalau lemah semangat akan menyerah kalah  
tanpa berjuang  
Itulah yang dikehendaki oleh syaitan  
Syaitan tahu nafsu itu adalah jalannya  
Jika manusia tidak bermujahadah melawan nafsu  
luaslah jalannya  
Bermaharajalelalah syaitan menggoda  
dan memperdaya manusia  
Manusia diperkotak-katikkan ke sini dan ke sana  
Macam bola di padang yang ditendang-tendang  
oleh manusia  
Dipermainnya manusia itu semahu-mahunya  
Diperhambanya manusia itu mengikut kehendaknya  
Berjayalah syaitan terhadap kebanyakan manusia  
Sedikit sahaja manusia yang tidak masuk perangkapnya

---

Selepas Isyak  
04 - 08 - 1999

## 39 | FITRAH MURNI TELAH PUNAH

**S**IFAT-SIFAT semulajadi telah musnah  
 Fitrah murni punah-ranah  
 Seorang ibu rasa keibuan sudah tidak ada lagi  
 Kerana itulah mengasuh anak-anaknya  
 terasa terpaksa bahkan rasa terseksa  
 Kasih sayang tidak ada  
 Seorang bapa pula rasa tanggungjawab  
 sudah tidak ada  
 Mengeluar belanja merasa terpaksa  
 Guru pun, rasa anak kepada murid-muridnya  
 sudah hilang dari jiwa  
 Dia merasakan adanya murid-murid itu  
 adalah tempat cari makan  
 Murid pula rasa sayang dan hormat kepada gurunya  
 sudah gersang  
 Jumpa guru kerana tujuan ilmu untuk cari makan  
 di masa depannya  
 Begitu juga pemimpin tidak terasa lagi rakyat-rakyatnya  
 sebagai anak-anaknya  
 Tempat rakyat dan pengikut dapat kasih sayang  
 dan bermesra  
 Tidak terasa lagi pemimpin itu  
 sebagai ibu tempat bermanja  
 Begitulah seterusnya isteri tidak terasa suami  
 sebagai kawan hidup tempat berlindung  
 Suami tidak merasakan lagi isteri  
 sebagai kawan hidup tempat belaian kasih sayang  
 Suami isteri sekadar melepaskan keperluan biologi  
 Selepas itu ikatan hati sudah tidak ada lagi  
 Hidup rumahtangga selalu sahaja tegang  
 Jadi sekarang semua golongan sudah tidak lagi  
 mendapat kasih sayang  
 Jiwa manusia sudah jadi gersang

Benci, resah, gelisah, marah-marah  
Risau, kecewa, putus asa  
Akibat fitrah semulajadi  
telah musnah dan punah  
Disebabkan kepentingan peribadi  
terlalu menjadi-jadi

---

Menjelang tidur  
02 - 10 - 1999

## 40 | HATI NURANINYA TELAH MATI

**K**ALAU dari pandangan mata  
 Terhadap gunung-ganang, lautan dan daratan,  
 langit dan bumi  
 Tidak terasa kuasa Tuhan  
 Jika setiap peristiwa dan kejadian  
 Tidak terasa kebesaran-Nya  
 Setiap nikmat tidak terasa anugerah Tuhan  
 Kejadian malam dan siang tidak terasa pentadbiran  
 dan bijaksana-Nya  
 Orang yang senang tiba-tiba jadi susah  
 Orang yang susah tiba-tiba jadi senang  
 Tidak terasa ketentuan Tuhan  
 Orang yang hina jadi mulia, yang mulia jadi hina  
 Tidak terasa Qudrat dan Iradat Tuhan  
 Air banjir, gunung berapi, gempa bumi  
 melenyapkan sekelip mata apa yang ada  
 Tidak terasa lagi hebatnya Tuhan, kemampuan,  
 Jabbar dan Qahhar-Nya  
 Kematian yang berlaku setiap hari  
 tidak diambil pengajaran  
 Apakah lagi yang boleh membangunkan  
 jiwa manusia dari tidurnya?  
 Apakah lagi yang boleh menyedarkan  
 jiwa manusia dari kelalaiannya?  
 Apa lagi agaknya dan macam mana lagi  
 gerangnya untuk menginsafkan manusia?  
 Memang tidak ada jalan lagi buat manusia  
 Segala lorong dan jalan telah buntu  
 Untuk manusia menempuh jalan kebenaran  
 Hati memang telah buta  
 Lebih-lebih lagi hati nuraninya telah mati  
 Segala yang dilihat daripada  
 berbagai-bagai peristiwa



Tidak merasa apa-apa  
Perasaan dan sensitivitinya sudah tiada  
Macamlah anggota lahir yang lumpuh  
Apa sahaja yang disentuhnya  
    sudah tidak terasa apa-apa  
Inilah akibatnya tidak menjaga mata kepala  
Menjadikan mata hati buta atau mati

---

Selepas Asar  
23 - 07 - 1999

## 41 | HATI YANG LALAI DENGAN TUHAN

**H**ATI yang lalai dengan Tuhan penuh dengan mazmumah  
 Hati yang tidak rasa bertuhan, rasa kehambaannya punah  
 Bila hati lalai, rasa bertuhan tiada, jiwa pun mati atau buta  
 Hati yang mati atau buta laksana batu yang keras  
 Batu yang keras, air pun tidak ditampungnya  
 Sebarang apa pun ditanam di atasnya  
 tidak akan mahu tumbuh  
 Begitulah hati apabila sudah keras macam batu  
 Sebarang pengajaran tidak akan boleh diterimanya  
 Jika dinasihat sakit hatinya  
 Sebut nama Tuhan tidak terasa apa-apa  
 Diingatkan dosa dan pahala,  
 acuh tak acuh sahaja mendengarnya  
 Sebut sahaja Syurga, Neraka, malu mendengarnya  
 Adakalanya mencemik mulutnya  
 Pejuang-pejuang Islam sangat dibencinya  
 Bahkan dimusuhi dan diperangnya  
 Manusia-manusia yang hatinya sudah keras inilah  
 yang menjadi bencana kepada dunia  
 Yang melahirkan penzalim dan penindas  
 Yang membuat maksiat dan onar  
 Yang meruntuhkan peri kemanusiaan  
 Yang merosakkan maruah manusia  
 Huru-hara dunia dibuatnya  
 Dahsyatnya sekali hati  
 apabila telah keras menjadi batu

## HINDARI PERKARA YANG MEMATIKAN HATI

PEMBUNUH jiwa atau mematikan hati banyak perkaranya  
 Kenalah jaga bersungguh-sungguh jangan sampai menyimpannya  
 Orang yang jiwa mati atau buta hati merosak manusia dan dunia  
 Bahkan perosak segala-galanya terutama agama  
 Di antara perkara pembunuh jiwa atau pembunuh hati  
 Mata tidak dikawal daripada dosa  
 Telinga juga suka mendengar perkara yang lucu  
 dan tidak bersopan  
 Mendengar umpatan dan perkataan yang melalaikan  
 Hati suka mengkhayalkan kecantikan perempuan  
 yang tidak halal  
 Di waktu seseorang suka berangan-angan  
 dan berkhayal-khayal  
 Apatah lagi makan minum yang syubhat dan tidak halal  
 Lebih-lebih lagilah membunuh jiwa atau mematikan hati  
 atau menghitamkannya  
 Pergaulan bebas di antara laki-laki dan perempuan  
 kenalah jaga  
 Kerana di sana boleh memberangsangkan  
 nafsu haiwan kepada manusia  
 Dari rangsangan nafsu yang jahat merosakkan jiwa  
 Apabila jiwa rosak berbagai-bagai mazmumah  
 akan menyimpannya  
 Di waktu itu tidak mampu untuk mengontrolnya  
 Lahirlah berbagai-bagai maksiat  
 dan kemungkaran oleh manusia  
 Gejala masyarakat pun bermaharajalela  
 Punah-ranahlah pergaulan manusia  
 Di waktu itu hilanglah keamanan dan keharmonian  
 di dalam masyarakat manusia  
 Maka menjadi balalah kepada kehidupan manusia  
 Di Akhirat masuk Neraka

---

Selepas Isyak  
 15 - 10 - 1999

## 43 | SUSAH MENGENAL DIRI

**O**RANG lain susah mengenal diri kita  
 Sepertimana kita juga susah mengenal diri orang lain  
 Lebih-lebih lagi orang itu atau kita tidak selalu bergaul dari dekat  
 Bahkan kalau selalu bergaul seseorang itu  
     dengan seseorang yang lain pun  
 Sesetengah orang payah mengenal orang yang digaulinya  
 Sekiranya ilmu seseorang cetek terutama cetek  
     di bidang ilmu kerohanian  
 Ilmu tentang hati dan nafsu berdasarkan syariat Islam  
 Bukan sekadar itu, ada manusia yang dia tidak kenal  
     hakikat diri sendiri  
 Apakah dia orang baik atau orang jahat  
 Di sini saya ingin memaparkan kepada pembaca  
     beberapa soalan atau pertanyaan  
 Kemudian kita ukur dengan diri kita sendiri  
 Dengan menilai hati, nafsu dan akal kita  
 Nanti kita sendiri akan sedar dan dapat jawapan  
     siapa sebenarnya diri kita  
 Kita sendiri boleh menghukum diri kita  
 Kita boleh menentukan kita ini siapa  
 Apakah kita hamba Allah yang telah dapat  
     mengekalkan sifat kehambaan  
 Atau kita sebagai hamba telah memakai sifat ketuanan  
 Yang lebih parah lagi kita memakai sifat ketuhanan,  
     waliyazubillah  
 Selepas ini nanti terpulanglah kepada kita  
     apakah kita sanggup mengubah sikap kita  
 Kepada seorang hamba yang dapat mengekalkan  
     sifat kehambaan yang kita ini memang hamba  
 Seperti rasa takut kepada Tuhan, hina, malu,  
     lemah, harap, menyerah diri, kesal  
 Syukur, redha, rasa bersalah  
     dan lain-lain lagi sifat kehambaan

---

8.22 pagi Selasa  
 25 - 02 - 1997  
 (17 Syawal 1417H)

## 44 | SUDAHKAH KENAL DIRI?

SUDAHKAH engkau kenal diri engkau?  
Menenal secara maknawi dan rohani  
Kerana mengenal diri secara fizikal  
    mungkin mudah dan senang  
Dapatkah engkau kesan ilmu yang engkau miliki itu  
    sejauh mana nilainya mengikut Tuhan  
Sudahkah engkau dapat membaca  
    ilmu yang engkau miliki itu sejauh mana  
    memberi manfaat kepada agama dan dunia  
Apa engkau rasa dengan ilmu engkau?  
Engkau berbanggakah atau bersyukur  
    dan merendah diri?  
Lebih-lebih lagi engkau kenalkah  
    jiwa atau hati engkau?  
Engkau dapat kesankah jiwa engkau  
    tentang mazmumah dan mahmudahnya  
Bolehkah engkau menilai apakah yang engkau  
    lintaskan di dalam hati engkau?  
Kebesaran apa yang engkau rasa  
    di dalam jiwa engkau?  
Apa engkau rasa bila berbagai-bagai perubahan  
    yang engkau lihat dan rasa  
Kalau engkau tidak perasan ini semua  
Atau ia berlalu begitu sahaja,  
    engkau belum kenal diri engkau  
Jika diri engkau tidak kenal,  
    lebih-lebih lagi diri guru engkau  
    sudah pasti engkau tidak kenal?!  
Kalau guru engkau sendiri engkau tidak kenal  
Wah, lebih-lebih lagi Tuhan engkau  
    belum engkau kenal lagi  
Oleh itu mengapa engkau membesarkan diri  
    tidak mahu dipimpin lagi?

Diri engkau sendiri pun engkau belum kenal?  
 Engkau mahu berjalan sendiri tanpa pimpinan?  
 Lebih-lebih lagi engkau ada cita-cita  
     hendak pimpin orang lain?  
 Jangan! Jangan! Nanti engkau akan sesat  
     dan menyesatkan orang lain  
 Nilailah diri engkau!  
 Engkau patut jadi pengikut atau menjadi pemimpin?  
 Kalau engkau hendak jadi pemimpin,  
     engkau mesti kenal sungguh diri engkau  
 Jika tidak bagaimana engkau  
     hendak kenal diri orang lain

---

Menjelang Maghrib  
 14 - 12 - 1999  
 (06 Ramadhan 1420H)

## ENGKAU JAGA SANGAT JASAD LAHIR

ENGKAU jaga sangat jasad lahir engkau  
Engkau jaga dan belai muka engkau  
agar licin dan cantik  
Engkau gunakan berbagai-bagai jenis krim  
dan losyen untuk menjaga kulit badan  
Agar kulit sentiasa licin dan tegang  
Engkau makan berbagai-bagai makanan awet muda  
Untuk menjaga keteguhan dan kesihatan badan engkau  
Semua yang engkau jaga itu adalah nilai dunia  
Kerana badan lahir ini bukan ada perasaan mengenal Tuhan  
Jauh sekali rasa kehambaan  
Lantaran itu apabila mati dibaham  
oleh ulat dan jadi tanah  
Ertinya ia tidak kekal abadi  
Tapi malang sekali anggota batin engkau  
yang boleh jadi nilai Akhirat  
Engkau abaikan  
Akal yang menjadikan engkau mukallaf  
Jiwa atau hati yang boleh mengenal Tuhan  
engkau cuaikan  
Nafsu yang boleh dididik dan dilatih untuk taat  
Kepada Tuhan semesta alam  
Engkau tidak ambil peduli pun  
untuk bermujahadah terhadapnya  
Padahal semuanya ada nilai Akhirat  
Dia adalah kekal abadi di Akhirat kelak  
Sama ada ke Syurga atau ke Neraka  
Sebenarnya akal, jiwa, nafsu  
inilah hakikat diri engkau  
Badan lahir kalau engkau abaikan  
Hanya menderita di dunia sahaja  
Tapi jasad batin iaitu hakikat diri engkau,  
jika engkau abaikan

Dia akan menderita di Neraka  
Engkau abaikan hakikat diri engkau  
Engkau termasuk orang yang sangat zalim  
Tapi engkau tidak nampak engkau menzalimi  
diri engkau sendiri  
Yang engkau nampak orang lain menzalimi diri engkau  
Orang menzalimi diri engkau, engkau dapat pahala  
Tapi engkau menzalimi diri engkau sendiri,  
dapat bala dan Neraka



46 **ENGKAU BIARKAN BATINMU**

**E**NGKAU jaga sangat diri lahirmu  
Sama ada cantik atau buruk, cacat atau tidak  
Engkau hias selalu, engkau jaga kesihatan  
Setengah orang kerana terlalu memikirkan diri yang lahir  
Untuk kecantikannya, dia membuat pembedahan/*surgery*  
Membetulkan hidung yang peset menjadi mancung  
Pipi yang berkedut menjadi licin  
Buah dada yang lembik menjadi tegang  
Engkau sanggup bayar kerananya berjuta-juta ringgit  
Padahal diri engkau yang hakiki yang kekal abadi,  
    engkau sia-siakan  
Engkau tidak ambil peduli pun  
Berbagai-bagai penyakit kronik yang telah menimpa  
    jasad batinmu  
Tidak pernah pun engkau hendak mengubatnya  
Padahal hakikat diri engkau  
    yang engkau tidak ambil kisah itu  
Telah merosakkan dirimu sendiri  
Bahkan telah merosakkan kehidupan orang lain  
Jasad batin engkau telah menghuru-harakan orang  
Dunia telah menjadi haru-biru  
Disebabkan diri yang kekal abadi itu  
Tapi masih engkau tidak ambil pusing lagi  
Engkau masih memikirkan benda-benda luaran sahaja  
Jasad batin engkau biar ditimpa berbagai-bagai penyakit  
Padahal engkau telah menerima risikonya  
Bahkan engkau telah melihat bagaimana  
    ia telah merosakkan orang lain  
Hal ini segala-galanya berlaku  
    kerana engkau tidak kenal Tuhan  
Dan tidak rasa bertuhan

---

Menjelang Maghrib  
05 - 11 - 1999

## ANGGOTA LAHIR CACAT KITA TERASA

**A**NGGOTA lahir kalau dia cacat kita terasa  
 Atau dia sakit kita terasa juga  
 Cacat atau sakit disebabkan kena duri,  
 kena kayu, terpijak paku  
 Terjatuh atau terantuk  
 Kerana cacat atau sakit kita terasa,  
 cepat-cepat kita mengubatnya  
 Anggota batin atau hakikat diri engkau cacat  
 atau sakit tidak terasa  
 Kerana itulah engkau tidak terfikir untuk mengubatnya  
 Cacat atau sakit disebabkan ilmu, kedudukan atau harta  
 Juga disebabkan oleh pujian,  
 kecantikan muka atau sasa badannya  
 Atau dia rosak disebabkan oleh bala bencana  
 yang kita tidak sabar menanggungnya atau tidak redha  
 Adakalanya dia cacat dikeranakan oleh ibadah yang banyak,  
 hati pun berbunga  
 Rasa takut dengan Allah pun hilang bahkan terasa aman  
 Tidak kurang juga ia cacat rasa bertuhan  
 Juga tidak rasa kehambaan merosakkan hati dan jiwa  
 Rosak anggota lahir, habis di dunia sahaja  
 Bahkan ia boleh mendapatkan pahala  
 kepada seseorang hamba, ia masih untung juga  
 Rosak hati atau jasad batin, ia jadi derhaka  
 Bala bencananya lebih besar lagi,  
 kerana berdosa akhirnya ke Neraka  
 Jagalah jasad batin jangan sampai ia cacat  
 Lebih-lebih lagi rosak  
 Ia adalah hakikat diri kita  
 Ia kekal abadi hingga ke Akhirat  
 Dialah yang akan diazab  
 atau menerima rahmat di Syurga

---

Menjelang Maghrib  
06 - 11 - 1999

**D**EMI nama dan glamour  
Gunung yang tinggi sanggup engkau daki  
Sekalipun nyawa menjadi tebusannya  
Gaung yang dalam engkau terjun  
Walaupun patah kaki  
Atau mungkin mati  
Lautan yang luas sanggup engkau jelajahinya  
Padang pasir engkau terokai  
Hutan belantara engkau harungi  
Susah dan payah tidak ada di dalam kamus hidupmu  
Penderitaan mudah engkau lalui  
Demi mengejar nama  
Demi mengharumkan negara  
Tapi demi untuk Allah  
Sembahyang Subuh dua rakaat tidak mampu  
    engkau melakukannya  
Tudung berat hendak diletak di atas kepala  
Menegakkan kebenaran tidak mampu  
    engkau melakukannya  
Takut apa orang kata  
Memperjuangkan kebenaran apatah lagi  
Tidak sanggup menerima risikonya  
Tapi demi nama  
Sekalipun risikonya tinggi  
Engkau sanggup melakukannya

## 49 | APABILA HATI SUDAH BUTA

**A**PABILA hati manusia telah buta  
 Atau jika hati manusia telah mati  
 Perasaannya yang positif sudah tidak ada lagi  
 Kasih sayangnya hilang, rasa simpatinya gersang  
 Bertimbang rasa sesama manusia lenyap sama sekali  
 Belas kasihannya tercabut sama sekali dari jiwanya  
 Maaf-bermaafan tidak akan berlaku sesama manusia  
 Di waktu itu hatinya kejam, jiwanya keras  
 Kalau dia menzalim atau menganiaya manusia,  
     terhibur hatinya  
 Kalau dia disinggung orang, sangat berdendam  
 Jika orang mendapat kesusahan gembira hatinya  
 Puas hatinya melihat orang di dalam penderitaan  
 Dia jadi orang pemarah, emosional dan pemberang  
 Jangan ada orang yang mencabarnya, dia tidak sabar  
 Dia akan bertindak balas kepada orang itu  
 Kalau mendapat pangkat, kekayaan, sombongnya terserlah  
 Jika mendapat kesusahan atau ujian,  
     aduh sungguh derita jiwanya  
 Sentiasa sahaja keluh-kesah, resah dan gelisah  
 Marah-marah pun tiba, hingga sikap tidak normal lagi  
 Pantang diberi ingatan dan nasihat  
 Payah mahu menerima bahkan dia tersinggung  
 Sakit hati pun membara kepada orang itu  
 Begitulah jika hati manusia sudah buta  
 Atau kalau jiwa manusia telah mati  
 Oleh itu hati kenalah jaga  
 Jangan biarkan ia buta atau mati

---

Menjelang Maghrib  
 23 - 12 - 1999  
 (16 Ramadhan 1420H)

**A**PABILA hati lapang, rumah yang sempit terasa lapang  
Apabila hati sempit, rumah yang luas terasa sempit  
Dada rohaniah kita kenalajah jaga  
Senang, susah dialah yang menentukan  
Bila dada lapang, hidup yang susah terasa senang  
Hidup payah, terasa mewah  
Miskin terasa kaya bahkan bahagia  
Apabila dada rohaniah sempit  
Di mana sahaja pergi terasa terhimpit  
Tempat yang lapang terasa sempit  
Kaya terasa miskin, ada terasa tiada  
Makan rasa tidak sempurna  
Padahal di hadapannya bermacam-macam jenis lauknya  
Bila dada sempit dia tidak tahu apa yang hendak dicarinya  
Seolah-olah mencari barang yang tiada dimilikinya  
Dia tidak terasa memiliki apa-apa  
Rasa tiada sepanjang masa, rasa kurang sahaja  
Justeru itulah rasa tidak senang, menusuk dadanya  
Rasa tidak tenang merobek hatinya  
Macam ditimpa kanser di dada  
yang tidak dapat dilihat oleh mata  
Hanya yang terasa sakitnya

---

Selepas Asar  
06 - 05 - 1997

## 51 | PENYAKIT JIWA BILA PARAH

**P**ENYAKIT jiwa apabila parah,  
 lahir penyakit putus asa  
 Putus asa, segala yang dimiliki tiada berguna  
 Segala kemewahan, kebahagiaan, semua kekayaan  
 tidak dapat mengubatnya  
 Akhirnya kalau tidak dikawal dia akan bunuh diri  
 Itulah jalan keluar baginya  
 Dia lupa, dia lari dari penderitaan yang maha kecil  
 Kepada penderitaan yang maha besar  
 Tetapi dia jahil hakikat Akhirat, dia terjerat  
 Perbandingan penderitaan dunia  
 dengan penderitaan Akhirat  
 Macam gigitan semut dengan gigitan singa garang  
 yang membaham dengan taringnya  
 Penyakit jiwa bukan kerana tiada harta  
 atau tiada bintang di dada  
 Tidak juga kerana tiada pangkat  
 atau tiada nama dan glamour  
 Penyakit jiwa ialah penyakit tiada percaya  
 kepada Tuhan yang Maha Esa  
 Atau percaya tapi tiada pautannya  
 Qadha dan qadar dari Tuhan tiada dihayati  
 Penyerahan diri kepada Tuhan tiada  
 Bantuan Tuhan tiada diharapnya  
 Untuk mengubat penyakit jiwa  
 bukan dengan harta  
 Tidak juga dengan betina,  
 tidak juga dengan nama  
 Bukan juga dengan makan minum,  
 menjamu selera  
 Tidak juga dengan melancong  
 ke Barat dan ke Timur  
 Hiburan, tonton wayang,

pergi disko bukan caranya  
Tidak juga melihat hutan, mandi-manda  
di tepi pantai atau melihat air terjun  
Ubatnya tanamkan keyakinan kepada Allah  
yang Maha Esa  
Redha menerima qadha dan qadar-Nya  
Berserah diri kepada Allah dan baik sangka kepada-Nya  
Penyakit jiwa tidak berlaku pada orang yang beriman  
betapalah penyakit putus asa

---

Selepas Isyak  
26 - 05 - 1997  
(18 Muharram 1418H)

## ALANGKAH PAYAHNYA MENJAGA HATI

**A**LANGKAH payahnya menjaga hati  
 Sekalipun berhati-hati  
 Bila orang puji berbunga  
 Apabila orang keji, aduh sakitnya macam kena cucuk  
 atau kena tusuk  
 Apabila membuat kebajikan  
 Mendesak-desak sahaja hendak bercerita  
 Jika tidak bercerita rasa terseksa  
 Di sini ada glamour  
 Di sinilah ada nama  
 Oh, ruginya kalau tidak dicerita  
 Bila berpidato, orang mengangguk-angguk  
 Boleh tahan juga aku ini, bisiknya  
 Kalau melihat orang lain ada mempunyai kelebihan  
 Aduh, macam makan buah pahit rasanya  
 Hati kerut membawa ke muka  
 Atau muka masam macam cuka  
 Apabila melihat kawan-kawan mempunyai  
 kelemahan-kelemahan  
 Hati mendesak-desak hendak mengata atau menghina  
 Aduh, susahnya menjaga hati!  
 Aduh, di manakah keikhlasan?!  
 Sedangkan hati adalah tempat pandangan Tuhan



## WARNA HATI SENTIASA BERUBAH

SUSAH sungguh hendak meluruskan hati  
Berubah sahaja situasi dia pun berubah pula  
Payah sangat hendak dicorakkan di dalam satu warna  
Warna hati sentiasa berubah  
Dia tidak mahu istiqamah  
Mudah sahaja tergugat oleh suasana  
Apabila mendapat ujian kesusahan dia mula gelisah  
Jika bertambah lagi ujian jiwa bertambah parah  
Manakala mendapat kesenangan dia pun berbunga  
Kalau bertambah lagi kesenangan,  
    bunganya bertambah merah dan cerah  
Dia terlonta-lonta kegembiraan, lupa daratan  
Dia terasa orang istimewa  
Orang lain semuanya malang  
Tuhan! Luruskanlah hatiku  
Di dalam sebarang situasi  
Di waktu susah dan senang  
Di masa sempit dan lapang  
Engkau jadikanlah hatiku di dalam sebarang waktu  
    tidak cacat dengan-Mu  
Bahkan setiap kejadian yang berlaku  
    menguatkan imanku

---

Selepas Asar  
14 - 11 - 1998

## 54 | RENUNGLAH SELALU HATI KITA

**R**ENUNGLAH selalu hati kita  
 Kerana ia merupakan sumber kebaikan dan kejahatan  
 Wadah kekufuran dan keimanan  
 Rebutan di antara malaikat dan syaitan  
 Hati perasaannya halus  
 Sentuhannya tiada terasa  
 Tapi sangat memberi kesan di dalam kehidupan kita  
 Siapa yang arif perjalanan hatinya  
 Faham kebaikan dan kejahatannya  
 Bersungguh-sungguh bermujahadah  
     membuang kejahatannya  
 Diganti segera dengan kebaikan  
 Orang itu akan selamat dari tipu daya  
     syaitan dan dunia  
 Ramai orang tidak faham perjalanan hatinya  
     sekalipun ulama  
 Terima sahaja yang baik dan yang buruknya  
 Kemudian merasakan baik semuanya  
 Tiada terasa lagi membuat dosa  
 Di sinilah perlu pimpinan guru  
     yang mengenal hati manusia

---

Selepas Subuh  
 19 - 11 - 1998

## MENGENAL HATI DAN KEAJAIBANNYA

HATI daging adalah sarang atau rumah bagi hati nurani  
 Hati nurani boleh juga dipanggil hati batin  
 Hati daging adalah bersifat lahir  
 Ia merupakan kajian para doktor perubatan  
 Hati nurani yang boleh juga dipanggil roh  
 Ia adalah merupakan bahan kajian  
 para doktor kerohanian  
 Seperti para rasul, nabi-nabi,  
 para wali dan ulama-ulama sufi  
 Perbahasan kita di sini adalah hati nurani atau roh  
 Kerana ia menjadi pandangan Tuhan  
 Apakah seseorang itu taat atau derhaka  
 Ia merupakan penentu apakah seseorang itu  
 ke Syurga atau ke Neraka  
 Ia dianggap raja di dalam diri manusia  
 Baik raja diri maka baiklah seluruh anggota  
 Jika raja itu jahat maka jahatlah seluruh anggota  
 Kalau ia bersih daripada segala godaan mazmumah,  
 mendapat kemenanganlah manusia  
 Sekiranya ia digoda oleh mazmumah,  
 gagal dan kecewalah yang empunya diri  
 Sungguh ajaib hati di segi sifatnya  
 dan rohaninya serta peranannya  
 Penuh rahsia, penuh misteri,  
 jarang manusia dapat menyelaminya  
 Ia merupakan khazanah ilmu dan hikmah yang tersimpan  
 Yang datang daripada saluran-saluran jawarih insan  
 Seperti mata, telinga, tangan dan lain-lain anggota badan  
 Marilah seterusnya kita mengenal hati nurani  
 Dengan cara kita membuat perumpamaan-perumpamaan  
 dan ibarat-ibarat  
 Sebagai pendekatan-pendekatan untuk mudah kita faham  
 Hati ibarat perigi atau kolam yang amat jernih

Dia akan terus jernih jika dijaga  
 bahkan akan bertambah jernih  
 jika dimasukkan tawas di dalamnya  
 Badan menjadi sihat dan segar  
 jika diminum dan dibuat mandi  
 Tapi ia akan menjadi kotor atau keruh  
 kalau dibiarkan masuk benda-benda  
 yang mengotorkannya  
 Akan mendatangkan penyakit jika digunakan  
 Hati ibarat tanah yang subur,  
 jika digemburkan bertambah subur  
 Boleh menumbuhkan berbagai-bagai jenis tanaman  
 yang memberi faedah  
 Tetapi jika ia menjadi kemarau dan gersang  
 Tiada kehidupan yang boleh hidup  
 Yang tiada memberi apa-apa faedah  
 kepada makhluk Tuhan

TUHAN menganugerahkan kepada engkau  
hati atau jiwa sebagai wadah  
Ia adalah anggota yang paling penting  
di dalam diri manusia  
Tapi malang, atau sungguh sayang  
Engkau tidak jadikan wadah menerima hidayah  
Wadah engkau tidak pun engkau isi dengan kasih sayang  
Hati sebagai wadah, engkau tidak isi rasa bertuhan  
Jiwa engkau sebagai wadah, tidak engkau isi rasa kehambaan  
Wadah engkau, engkau kosongkan  
daripada timbang rasa dan peri kemanusiaan  
Engkau kosongkan wadah engkau  
daripada perasaan-perasaan yang mulia  
Tapi apa yang engkau isikan?  
Engkau isikan dengan racun-racun mazmumah  
yang merosakkan manusia  
Bahkan yang menghancurkan dunia  
Hati engkau tidak engkau jadikan cermin melihat kebenaran  
Engkau butakan hati engkau  
Hingga tidak ada lagi rasa bertuhan  
Setidak-tidaknya engkau merabunkan  
Hingga engkau ragu dengan kebenaran  
Sayang, hati atau jiwa yang paling berharga  
Yang menentukan engkau manusia yang ada kemanusiaan  
Tapi engkau abaikan  
Tapi yang engkau urus sangat dan engkau belai  
Anggota lahir engkau, jawarih engkau  
Anggota yang akan dimakan ulat dan binasa  
Anggota yang kekal abadi yang akan dipersoalkan,  
engkau abai dan biarkan  
Padahal hati tempat pandangan Tuhan

## BERSIHKANLAH JIWA KERANA IA ADALAH WADAH

**B**ERSIHKANLAH jiwa kerana ia adalah wadah  
 Tempat Allah mengisi iman dan keyakinan  
 Bersihkanlah jiwa ia ibarat cermin  
 Jangan sampai ia kotor dan kabur  
 Jika ia kotor atau kabur tidak nampak lagi kebenaran  
 Bersihkanlah jiwa, ia laksana radar menangkap apa sahaja  
 Apabila jiwa kotor macam radar yang telah rosak  
 Ia tidak dapat lagi mengesan apa-apa  
 Ertinya jiwa tidak akan boleh menerima pengajaran  
 Bersihkanlah jiwa ia ibarat kamera  
 Boleh menggambar apa sahaja secara tepat  
 Jika jiwa kotor, ibarat kamera yang tidak berfungsi  
 Tidak dapat menggambarkan secara tepat kebenaran agama  
 Apa yang ditangkapnya tidak jelas  
 Ia jadi ragu-ragu dan mengelirukan

**R**UPANYA kalau barang-barang murah  
 atau mata benda yang murah  
 Sama ada tidak dimiliki atau ada dimiliki,  
 semua manusia terasa  
 Atau setiap orang yang empunya  
 atau tidak mempunya itu sedar  
 Orang yang kaya dengan harta  
 dia sedar yang dia kaya  
 Orang yang miskin juga dia sedar  
 yang dia tidak empunya  
 Orang yang berumah besar dan cantik  
 dia sedar memiliki itu semua  
 Juga orang yang rumah kecil dan buruk  
 dia juga sedar yang demikian itu  
 Begitulah seterusnya orang yang bermuka cantik  
 dia sedar yang dia cantik  
 Orang yang muka buruk juga sedar  
 yang dia bermuka buruk  
 Tapi malang sekali, orang yang tidak dapat hidayah,  
 dia tidak sedar tidak dapat petunjuk-Nya  
 Orang yang tidak miliki iman  
 tidak terasa tidak punya iman  
 Juga orang yang tidak terasa tidak bertuhan,  
 ia tidak terasa dia tidak merasa bertuhan  
 Begitu juga orang yang hatinya penuh mazmumah  
 seperti sombong, riyak, ujub  
 Dia tidak terasa ia miliki itu semua  
 Rupanya di dalam hidup ini  
 benda yang zahir mudah dikesan  
 Perkara-perkara yang maknaawi dan rohani  
 payah diketahui  
 Kerana itulah lumrah manusia di dunia ini  
 sibuk dengan soal-soal lahiriah

Sama ada yang positif mahupun yang negatif  
Perkara-perkara maknawi dan rohani  
    manusia tidak mempedulikan  
Kerana itulah persoalan iman, hidayah dan taqwa  
    kurang dipersoalkan  
Persoalan mazmumah jarang diambil perhatian  
Orang hanya sibuk-sibuk dengan persoalan luaran  
Soal-soal di dalam terabai dan dicuaikan  
Kerana itulah penyakit masyarakat  
    susah hendak ditumpaskan



**Y**A Allah! Engkau celikkanlah rohku  
Agar jasad lahirku patuh kepada-Mu  
Hidupkanlah jiwaku agar jawarikhku  
Taat dan setia kepada-Mu

Tuhan!

Hidupkanlah rohku dengan mengingati-Mu

Tuhan!

Hidupkanlah jiwaku dengan rasa bertuhan  
Bangunkanlah jiwaku dengan rasa kehambaan  
Agar fitrahku dapat dikembalikan kepada asal kejadian  
Fitrah semulajadi sebelum dirosakkan  
Dia telah kenal Tuhan  
Dia telah berjanji kepatuhan dan ketaatan

Tuhan!

Janganlah Engkau biarkan rohku di dalam kebutaan  
Nanti kelak dia tidak akan kenal lagi kebenaran  
Janganlah Engkau tinggalkan jiwaku buta  
Hingga dia tidak kenal lagi Tuhan dan kebenaran

Tuhan!

Peliharalah fitrahku  
Janganlah sampai ada yang merosakkannya  
Jagalah fitrahku agar ia tetap dengan sifat asalnya

Tuhan!

Rosak fitrahku  
Maka rosaklah jawarikhku  
Rosak fitrahku, rosak pulalah syariatku  
Yang paling aku takut, jangan sampai rosak  
Perhubunganku dengan Tuhan  
Kalau berlaku, punahlah kehidupanku  
Dunia dan Akhirat  
Sia-sialah umur dan kehidupanku

Malanglah aku dan binasalah aku  
Oleh itu sekali lagi harapanku kepada-Mu  
Jagalah fitrah semulajadiku  
Aku tidak mampu menjaganya kerana banyak ujian  
Engkau sajalah yang mampu menjaganya

KALAU jiwa manusia itu sentiasa hidup  
Dan hati manusia itu sentiasa jaga  
Manusia boleh belajar dengan rasa hati  
Itulah yang dikatakan fitrah semula jadi  
Cuma Islam itu menguatkannya sahaja  
Saya bawa beberapa contoh:  
Setiap jiwa manusia ingin disayangi  
Kalau begitu dia tentulah akan menyayangi manusia lain  
Kerana kemahuan manusia itu sama  
Setiap insan suka kalau orang pemurah dengannya  
Itukan menyedarkan kita bahawa kita juga  
patut pemurah dengan manusia,  
kemahuan manusia itu serupa  
Manusia itu suka ia ditolong terutama di masa susah  
Perasaan itu sebenarnya mengajar kita,  
kita juga patut menolong orang lain  
Kerana kehidupan manusia itu sama sahaja  
Setiap jiwa suka kalau dia diberi kemaafan  
Itu memberi tahu kita sepatutnya kita juga  
memberi kemaafan kepada orang lain  
Kerana perasaan manusia itu adalah sama  
Setiap insan suka kalau dia diberi keadilan  
Ia menyedarkan bahawa setiap orang patut  
menegakkan keadilan kepada manusia  
Setiap orang tidak suka kalau dia difitnah,  
dizalimi dan disusahkannya  
Kalau begitu setiap manusia tidak akan memfitnah,  
menzalimi dan menyusahkan orang lain  
Tapi realiti di dalam kehidupan manusia tidak jadi begitu  
Kerana hidup manusia itu sama  
Setiap orang itu hanya suka kalau dia diberi kasih sayang  
dan diberi perhatian  
Dia suka dibantu, ditolong, diberi keadilan

Tapi dia sendiri tidak mahu melakukannya  
Dia suka tidak diganggu, difitnah,  
dizalimi dan disusahkan  
Tapi dia suka menimpakan kesusahan  
kepada orang lain  
Mengapa terjadi begitu?  
Kerana jiwa manusia sudah buta  
dan terlalu mementingkan diri

## HAMBA YANG JIWANYA BERSIH

JIKA seorang hamba itu ilmunya cukup  
Jiwanya bersih hingga hatinya terpimpin  
Kelihatan orangnya tenang  
Ibadahnya terutama sembahyang, sangat berdisiplin  
Berhadapan dengan orang, penuh bijaksana  
dan lemah lembut  
Wibawanya tinggi, akhlaknya mulia  
Hingga disenangi oleh orang  
Kalau dia pemimpin, sangat dikasihi dan disayangi  
Kerja-kerja tersusun dan teratur  
Tenang, tidak gopoh, berdisiplin  
Pandai bergaul dengan manusia  
Sangat beradab dengan Tuhannya  
Redha dengan ketentuan Tuhan, sabar dengan ujian  
Mengutamakan orang lain dari dirinya  
Bertimbang rasa dengan manusia  
Sangat bersimpati dengan orang yang susah  
dan mendapat kesusahan  
Ingatannya dengan Tuhan sentiasa hidup  
Jiwanya hidup, sangat peka,  
suka khidmat dengan manusia

---

Menjelang tidur  
08 - 10 - 1999

## 62 | APABILA JIWA HIDUP

**A**PABILA jiwa hidup atau jiwa jaga  
 Apa sahaja yang dilihat, dirasa, didengar,  
 disentuh menambahkan iman  
 Orang yang jiwanya hidup sangat sensitif  
 dengan Tuhan  
 Segala apa yang dialami terhubung terus  
 dengan Khaliqul Alam  
 Tuhan sentiasa mengusik-usik perasaannya  
 Apatah lagi setiap yang hebat terasa olehnya  
 kehebatan Tuhan  
 Setiap kebesaran yang dilihat terasa olehnya  
 kebesaran Tuhan  
 Perjalanan malam dan siang terasa olehnya  
 pentadbiran pencipta alam  
 Air bah, gunung berapi yang meletup, gempa bumi  
 terasa olehnya kekuasaan dan qudrat Tuhan  
 Setiap yang berlaku terasa olehnya kehendak Tuhan  
 Begitulah orang yang jiwanya hidup  
 Rasa bertuhan sentiasa subur  
 Buahnya lahiriah rasa kehambaan yang mendalam  
 Tapi apabila jiwa mati atau jiwa buta,  
 apa yang dilihatnya, didengar, dirasa  
 dan sebarang kejadian  
 tidak terasa apa-apa lagi  
 Bahkan makin membunuh rasa bertuhan  
 Rasa bertuhan terus mati  
*Side effect*nya ialah rasa kehambaan hilang  
 Maka berlakulah satu malapetaka yang besar  
 kepada manusia di dunia  
 Apabila rasa bertuhan subur, tidak ada berlaku  
 berbagai-bagai gejala yang tidak sihat  
 Penipuan, penzaliman, rasuah, pembohongan,  
 pembunuhan, penzinaan, perogolan,

pencerobohan, pecah-belah di kalangan manusia  
di semua peringkat menjadi-jadi  
Akhirnya dunia jadi neraka, yang menderita  
manusia juga  
Maka musnahlah seluruh kehidupan manusia  
Segala kesenangan dan kemewahan  
sudah tidak ada erti apa-apa lagi

---

Selepas Asar  
20 Muharam 1421H

## 63 | APABILA MEMPERTAJAMKAN HATI

**A**PABILA seorang mukmin itu mempertajam hati atau jiwanya  
 Ditajamkan dengan rasa bertuhan dan rasa kehambaan  
 Kemudian dibawa berfikir dan berfikir  
 Dia akan jadi orang yang cepat cerdik dan pandai  
 Lihatlah apa yang telah dilakukan oleh Rasulullah SAW  
 Bangsa Arab yang tidak tahu menulis  
 dan membaca dididik olehnya  
 Berhadapan dengan bangsa Rom dan Parsi  
 yang bertamadun, yang menguasai dunia di waktu itu  
 Sedangkan bangsa Rom dan Parsi  
 hanya mengasah akal nya semata-mata  
 Maka menjadilah mereka orang yang pandai  
 Tapi Rasulullah mengasah akal dan jiwa bangsa Arab  
 dan bangsa-bangsa yang mengikutnya  
 Maka dengan masa yang singkat sahaja,  
 iaitu selama 23 tahun  
 Umat Islam menjadi umat yang cepat pandai dan cerdik  
 Akhirnya di dalam masa 30 tahun  
 umat Islam menguasai 3/4 dunia  
 Fakta sejarah ini patut orang Islam mengetahui  
 dan mengambil pengajaran daripadanya  
 Untuk mengejar tamadun Barat dan Timur iaitu komunis  
 Tajamkan jiwanya dan akal nya serentak  
 Umat Islam akan cepat menjadi cerdik dan pandai  
 Mengatasi Timur dan Barat yang hanya semata-mata  
 mempertajam akal nya  
 Tapi malang umat Islam jiwanya sudah buta  
 Akal nya pula tidak digunakan seperti apa yang digunakan  
 oleh orang Barat dan Timur  
 Sedangkan mereka di waktu itu sudah lebih maju  
 dan bertamadun dari umat Islam  
 Bagaimanakah umat Islam hendak mengalahkan mereka  
 Maka oleh itu umat Islam kenalah ubah sikapnya



Jangan hanya mempertajamkan akal  
seperti yang sedang hendak dilakukan sekarang  
Tapi yang lebih utama jadikan tapaknya itu  
mempertajamkan jiwa lebih dahulu  
Di atas ketajaman jiwa itulah bawalah berfikir  
dan terus berfikir  
Natijahnya nanti sangat luar biasa  
Iaitu akan melahirkan ilmu-ilmu yang dalam dan seni  
yang menakjubkan dunia

---

Menjelang Zuhur  
29 - 08 - 2000

## LAHIR BATIN HENDAKLAH SELARAS

**L**AHIR dan batin kita biarlah sama  
 terhadap pegangan kita terhadap Tuhan  
 Janganlah satu membohongi yang lain  
 Janganlah akal mempercayainya, lisan kita mengakui  
 tapi jiwa kita tidak menghayati  
 Kita yakin dengan Tuhan,  
 lidah kita selalu menyebut-Nya,  
 tapi jiwa kita tidak rasa bertuhan  
 Akal kita yakin Tuhan itu berkuasa  
 tapi kita tidak terasa Dia menguasai kita setiap masa  
 Kuasa Tuhan itu hanya akal sahaja tahu,  
 mulut selalu berkata, namun hati tidak terasa  
 Begitulah akal juga percaya Tuhan itu melihat,  
 lisan juga kalau ditanya dia mengiakan,  
 tapi hati tidak terasa dilihat  
 Seterusnya sifat mendengar Tuhan diterima akal,  
 lidah juga tidak membohonginya  
 namun hati tidak sedar Tuhan mendengar  
 Sifat mendengar Tuhan hanya diketahui  
 di dalam pengetahuan, akal tidak menolaknya,  
 tapi hati tidak terasa  
 Kerana itulah kita boleh bercakap bohong  
 Percakapan kita selalu sahaja sia-sia  
 yang tidak memberi apa-apa faedah  
 Percakapan kita selalu sahaja membohongi  
 pengetahuan kita  
 Sikap dan pengetahuan kita tidak sama  
 Sikap kita membohongi akal kita  
 Orang mukmin sejati  
 akal, hati dan tindakannya sama  
 Ketiga-tiga anggota manusia itu selaras  
 Tidak membohongi satu sama lain  
 Jujur di luar, jujur di dalam

Apa yang nampak di luar, itulah sifat batinnya  
Tidak bertentangan satu sama lain  
Ciri-ciri nifak tidak wujud  
Sama ada terang-terangan  
    mahupun yang tersembunyi  
Lahir dan batin sama-sama lurus  
Tidak bercangah satu sama lain  
    yang lahir dengan yang batin  
Begitulah sikap mukmin sejati

## 65 | PELIHARALAH HATIKU!

**T**UHAN! Luruskanlah hatiku!  
 Agar syariatku lurus dan sikapku berlaku lurus selalu  
 Bersihkanlah hatiku!  
 Agar keihklasanku kepada-Mu kental dan jitu  
 Juga supaya kebbaikanku tidak bercampur dengan kejahatan  
 Supaya tidak bercampur di antara ketaatan dan kederhakaan  
 Tuhan! Engkau jatuhkanlah selalu di dalam hatiku  
 ilmu dan hikmah  
 Pengajaran dan ingatan  
 Gerakkanlah hatiku sesuatu yang sesuai  
 dengan kehendak-kehendak-Mu  
 Aku berlindung dengan-Mu daripada gerakan hati  
 daripada ilham syaitan  
 Ingatan-ingatan hati yang inginkan kejahatan  
 Tuhan peliharalah hatiku!  
 Kerana ia adalah wadah tempat rebutan malaikat dan syaitan  
 Biarlah malaikat yang mengisinya  
 Kerana pengisian daripada malaikat  
 adalah daripada-Mu Tuhan  
 Pengisian daripada syaitan tiada lain  
 melainkan kejahatan dan keraguan  
 Tuhan! Selamatkanlah hatiku daripada cintakan dunia  
 Kerana ia adalah ibu segala kejahatan  
 Agar Engkau kucintai dengan sepenuh hati  
 Cintakan Engkau adalah ibu segala kebaikan  
 Tuhan! Jauhkan hatiku daripada angan-angan  
 Kerana ia adalah perkara yang sia-sia  
 dan membuang masa  
 Tapi isilah hatiku selalu mengingati-Mu  
 Agar aku tidak terlalai-lalai

## 66 | LURUSKAN HATIKU

**Y**A Allah, dengan berkat Nabi-Mu  
 dan berkat Imamul Mahdi-Mu  
 Luruskanlah hatiku agar agamaku lurus  
 Betulkanlah hatiku agar aku ikhlas selalu  
 Tetapkanlah hatiku agar aku tidak tergugat  
 oleh ujian yang menimpaku  
 Ya Allah, Tuhan yang mencipta hati!  
 Bersihkanlah hatiku agar mazmumahku  
 tidak merosakkan agamaku  
 Dan juga tidak merosakkan kehidupan orang lain  
 Wahai Tuhan yang membolak-balikkan hati  
 Kuatkanlah hatiku agar keyakinanku tidak mudah berubah  
 Supaya aku sentiasa tabah  
 Tuhan! Engkau rasakanlah selalu hatiku, sentiasa bersama-Mu  
 Supaya aku rasa ada kawan yang melindungiku  
 Agar aku tidak rasa sepi di dalam hidupku  
 Dan aku akan merasa malu melanggar perintah-Mu  
 Dan aku sentiasa siap-siaga menunaikan suruhan-Mu  
 Ya Allah, Tuhan yang menjaga hati!  
 Baikilah hatiku agar seluruh hidupku menjadi baik  
 Supaya tidak khianat, tidak hasad,  
 dan tidak berdendam sesama manusia  
 Tuhan, limpahkanlah selalu ke dalam hatiku,  
 ilmu dan hikmah  
 Hingga aku dapat menyuluh hatiku  
 dan menyuluh kehidupanku  
 Supaya lahir dan batinku sentiasa bersyariat  
 Agar lahir batinku menjadi taat  
 Tuhan, aku harap Engkau kabulkanlah doaku ini

---

Menjelang tidur  
 16 - 09 - 1999

## 67 | HATI MUKMIN

**M**ENGALIRLAH air mata mukmin  
 atau mengalirlah air mata hatinya  
 bila mengingat Tuhannya  
 Malunya hati mukmin bila mengenang  
 Rahim dan Rahman Tuhan,  
 anugerah dan pemberian-Nya  
 Remuk-redamlah hatinya bila teringat  
 Qahhar dan Jabbar-Nya  
 Kecut perutnya bila teringat hukuman dan azab-Nya  
 Resah gelisah jiwanya bila melakukan dosa  
 Sedih hatinya bila lalai dengan Tuhannya,  
 kemudian sedar semula  
 Tidak tentu arah rasa hatinya  
 bila terbuat kesalahan dan kesilapan  
 Hati mukmin tidak pernah tenang dengan Tuhannya,  
 tapi tenang dengan dunianya  
 Jiwanya sentiasa sahaja bergelombang terhadap Tuhannya  
 Jiwanya bagaikan air lautan tidak pernah tenang  
 Kalaulah bukan kerana ada kewajipan masyarakat  
 yang patut dipertanggungjawabkan  
 Sudah tentu mereka suka bersendirian  
 Atau membawa diri berkelana bersama Tuhannya  
 Atau menyisihkan dirinya dari masyarakatnya  
 Kerana terlalu memikirkan diri terhadap Tuhannya  
 Begitulah hati seorang mukmin  
 Sentiasa gundah-gulana  
 Oleh itu mereka tidak sempat memikirkan hal orang lain  
 Kerana terlalu memikirkan nasib dirinya

## HATI MUKMIN TIDAK TENANG DENGAN TUHAN

**O**RANG mukmin bagaimanalah hatinya  
hendak tenang dengan Tuhannya!  
Apa yang dilihat, apa yang dirasa  
Apa sahaja yang dimakan dan minum  
Apa sahaja yang didengarnya,  
semuanya mengusik-ngusik jiwanya  
Menyentuh perasaan dan hati nuraninya  
Adakalanya kebesaran Tuhan dan keagungan-Nya  
yang dia rasa  
Ada ketikanya sayu hatinya dan sedih mengenang dosa  
Waktu-waktu tertentu rasa gerun dan hebat dengan Tuhannya  
Ada masanya malu dengan Penciptanya  
Di waktu-waktu tertentu terlalu hina dirinya dia merasa  
Begitulah seterusnya berbagai-bagai rasa hatinya  
yang silih berganti di dalam hidupnya  
Bertukar yang dilihat, bertukar apa yang disentuh  
dan yang dimakan dan yang diminum  
Bertukar pula perasaannya terhadap Tuhannya  
Orang mukmin yang jiwanya sentiasa hidup  
kerana mengingat Tuhannya  
Dunia dan nikmatnya tidak dapat melalaikannya  
Keindahan hidup tidak mempesonanya  
Bahkan nikmat dan keindahan hidup itu  
makin mengingatkannya terhadap Tuhannya  
Begitulah hati dan jiwa mukmin  
Setiap yang dilihat, dirasa, dimakan dan diminum  
Dia merasakan ayat-ayat Tuhannya

---

Selepas Zuhur  
31 - 08 - 1999

## ORANG MUKMIN YANG BAIK ITU UNIK

ORANG mukmin yang baik itu hidupnya luar biasa Unik dan berbeza sangat dengan manusia yang lain Dia berhadapan dengan kehidupan penuh tenang Kejahatan orang tidak dibalas dengan kejahatan Bahkan didoakan orang yang membuat jahat dengannya Berhadapan dengan ujian dia tenang Berhadapan dengan nikmat dia bersyukur Jadual waktunya dengan Tuhan tetap dan istiqamah Walau di dalam keadaan susah dan senang Bermesra dengan orang Tetamu yang datang dihormati sesuai dengan kedudukannya Tidak boleh mendengar orang mendapat kesusahan Selagi tidak dapat ditolongnya, menderita jiwanya Merendah diri adalah budaya hidupnya Setiap orang yang meminta pertolongan jarang tidak ditunaikannya Pemurah sangat terserlah di dalam kehidupannya Tidak pernah mengeluh berhadapan dengan penderitaan Tapi dia mengeluh dengan dosa-dosanya Atau mengeluh bila berhadapan dengan kelemahan dan kecuaiannya Rasa kehambaan tampak kelihatan pada mukanya Tuhan selalu sahaja disebut-sebut di dalam perbualannya Nampak sangat bahawa Tuhan itu adalah sandaran hidupnya Gembira tidaklah sampai ketawa berdekah-dekah Kesusahannya tidaklah sampai muram di mukanya Lebih-lebih lagi tidak rasa kecewa dan putus asa berhadapan dengan kesusahannya Tawakal, sabar dan redha adalah menjadi budaya hidupnya

---

Menjelang tidur

26 - 12 - 1999

(19 Ramadhan 1420H)



## 70 | TABIAT ORANG MUKMIN

**T**ABIAT orang mukmin itu dia tidak malas  
Tidak juga agresif  
Tapi cergas dan tenang  
Cergas tapi tidak merempuh orang  
Cergas dengan agresif tidak sama  
Cergas, aktif membuat kebaikan tapi berdisiplin  
Cergas membuat khidmat tapi tidak melanggar tata-susila  
Agresif, cergas yang melulu  
Aktif yang tidak berdisiplin  
Cergas disertai dengan kekasaran dan merempuh orang  
Sekalipun niatnya baik  
Orang mukmin itu walaupun cergas tapi tidak gopoh  
Sekalipun rajin tapi berdisiplin  
Cergasnya penuh dengan hikmah dan berstrategi  
Aktifnya tidak merosakkan orang  
Agresif, cergas merempuh orang  
Orang melihat menjadi benci dan tidak senang  
Cergas membawa kepada gopoh-gapah  
Hilang sopan-santun di dalam bertindak  
Selalunya tindakan tidak berpandukan ilmu pengetahuan  
Mengikut nafsu yang melulu dan perasaan barannya  
Sibuknya tidak sedap mata memandang

## 71 | DISIPLIN DIRI ORANG MUKMIN

**S**UDAHKAH kita mendisiplinkan diri  
 Sampai waktunya kita sembahyang  
 Bila sembahyang bolehkah mendisiplinkan diri  
 tidak sembahyang seorang  
 Di dalam pergaulan sanggupkah kita  
 mengutamakan orang  
 Orang yang tersilap dan tersalah dimaafkan  
 Orang yang bercakap kita sanggup mendengarnya  
 Kita tidak akan bercakap kalau tidak ada manfaatnya  
 Kalau orang menghina, kita diam sahaja  
 atau tidak menjawabnya  
 Inilah di antara disiplin di dalam pergaulan  
 Waktu lapang adakah kita berfikir  
 Atau membaca atau menulis pengalaman  
 Atau ilmu pengetahuan atau berzikir  
 Agar masa tidak sia-sia dan terbuang  
 Mampukah kita mendisiplinkan diri  
 Tidak mengata orang kecuali di sudut yang dibenarkan  
 Kalau kita hendak tidur  
 mampukah kita tidak tidur selepas Subuh  
 dan selepas Asar  
 Kedua-dua waktu ini adalah dilarang tidur  
 sebagai kebiasaan  
 Tapi tidur di waktu siang iaitu waktu qailullah  
 sebelum Zuhur digalakkan  
 Apabila makan tidak suka makan seorang  
 Bila mencari rezeki cari yang halalnya  
 Tolak yang haram sekalipun banyak untungnya  
 Bila berpakaian di hadapan ramai, bersopan  
 Tertutup aurat badannya  
 Sifat-sifat mazmumah dijauhi

Terutama sombong dan dengki  
Bakhil dan tamak ditakuti  
Menzalim dan sewenang-wenang sangat dibenci  
Itulah sebahagian disiplin orang mukmin  
Banyak lagi  
Setakat ini sudahkah kita mendisiplinkan diri?  
Inilah dia disiplin yang sejati

---

Selepas Subuh  
03 - 06 - 1997

## 72 | KEPENTINGAN BERDOA

**B**ERDOALAH kepada Tuhan tanda merendah diri  
 kepada-Nya  
 Memintalah kepada-Nya di dalam sebarang hal  
 Untuk menghilangkan kesombongan dan ketakburan  
 Memohonlah kepada Tuhan,  
 itu adalah salah satu sifat kehambaan  
 Berdoalah kepada-Nya tanda kita hamba yang lemah  
 Meminta kepada Tuhan tanda kita hamba kepada-Nya  
 dan baik sangka  
 Memohonlah kepada Tuhan,  
 Dia tetap mengabulkannya sekalipun di Akhirat  
 Berdoa ertinya kita bermesra dengan Tuhan  
 Berdoa ertinya kita bermunajat dengan Tuhan  
 Berdoa ertinya kita bercakap-cakap dengan Tuhan  
 Mengadukan hal kita  
 Meminta itu dan ini  
 Bukankah itu satu keindahan dan kelazatan  
 Berdoa adalah satu ibadah  
 Bahkan ia dianggap otak ibadah  
 Doa adalah senjata orang mukmin  
 Berdoa adalah satu harapan  
 Berdoa termasuk perhubungan di antara hamba  
 dengan Khaliqnya  
 Orang yang tidak berdoa ertinya  
 dia sombong dengan Tuhan  
 Dia merasakan ada kuasa,  
 tidak perlu lagi kepada Tuhannya  
 Ini termasuk orang yang telah putus rahmat  
 dengan Tuhan

## 73 | HAKIKAT DIRI

**B**AGAIMANAPUN besar kekuasaan engkau  
 Namun tidak akan merubah hakikat diri engkau  
 Diri engkau tidak akan jadi emas, intan atau berlian  
 Mengapa daripada tawadhuk engkau bertukar sikap  
 kepada angkuh dan sombong  
 Walau bagaimana kaya sekalipun,  
 biologi engkau tidak akan berubah  
 Engkau tetap insan  
 Perlu makan minum, ditimpa sakit, ditimpa bencana,  
 buang air kecil dan buang air besar  
 Mengapa pula engkau menukar maknawi dan rohani engkau  
 Apa logiknya engkau menukar jiwa engkau  
 kepada megah, sum'ah dan riyak  
 Engkau adalah insan macam lain-lain insan juga  
 Bila engkau pandai namun kejadian engkau  
 sama sahaja seperti insan yang lain  
 Kejadian engkau yang asal adalah tanah  
 Kejadian engkau yang kedua adalah  
 daripada air mani yang hina  
 Kepandaian engkau tidak mengubah biologi engkau  
 Tapi mengapa engkau mengubah sikap engkau?  
 Daripada kasih sayang dan mesra,  
 menjadi manusia yang terasing daripada manusia  
 Engkau merasakan tidak layak lagi bergaul  
 dengan manusia biasa  
 Mengapa engkau adakan *gap* di antara diri engkau  
 dengan manusia?  
 Apabila engkau ada mempunyai kelebihan,  
 apakah tidak perlu lagi kepada manusia?  
 Apakah engkau mampu tanpa orang lain boleh menyediakan  
 keperluan-keperluan hidup engkau  
 di dalam semua perkara?

---

Menjelang tidur  
 15 - 10 - 1999

## 74 | MARI MENGENAL INSAN

**M**ARI kita mengenal manusia (insan)  
 Kejadiannya yang pertama daripada tanah  
 Kejadiannya yang kedua daripada mani,  
 air yang hina dan meloyakan  
 Keluar daripada tempat yang hina  
 dan menjijikkan lagi memalukan  
 Fizikalnya lebih lemah daripada haiwan  
 Seperti anjing, kucing, harimau, singa dan gajah  
 Tercucuk duri yang kecil sahaja pun terasa sakitnya  
 sudah mengganggu dan menyusahkan  
 Anjing atau kucing kalau patah kaki sebelah  
 masih mampu berjalan bahkan masih boleh  
 berlari ke sana ke mari  
 Kalau manusia tidak payah patah  
 kalau tergeliat pun sudah berpapah  
 Selalu sahaja makan banyak mengundang penyakit  
 Kalau sedikit makan badan pula lemah  
 Terlalu sejuk pun tidak tahan, terlalu panas pun tidak tahan  
 Mudah sahaja ditimpa penyakit atau demam  
 Terlalu banyak kerja meletihkan badan,  
 Tidak bekerja pun melesukan badan, kecerdasan hilang  
 Bila berhadapan dengan udara tidak bersih  
 Mudah sahaja diserang penyakit  
 Selalu bergaul dengan orang yang berpenyakit  
 lebih-lebih lagi, penyakit menjangkit  
 Lambat makan beberapa jam sahaja sudah terasa lapar,  
 Lebih daripada itu melemahkan badan  
 Padahal binatang beberapa hari tidak makan  
 belum begitu terjejas  
 Begitulah satu hari tidak dapat air sudah haus  
 Kalau beberapa hari tidak dapat lemah terus  
 Apa yang keluar daripada badannya  
 Lebih-lebih lagi daripada rongga-rongganya  
 semuanya menjijikkan

Baunya busuk lagi meloyakan  
Seperti yang keluar daripada lubang telinga, mata,  
hidung, daripada rongga-rongga bulu roma  
Apatah lagi yang keluar daripada dua jalan  
    depan dan belakang  
Jika diserang kudis danur dan nanahlah yang keluar  
Bahkan ulat pun boleh keluar juga  
Sangat jijik dan meloyakan  
Itu baru jasad lahir manusia yang kita perkatakan  
Belum lagi jasad batin atau yang bersifat maknawiyah  
    yang akan kita sebutkan  
Juga ketahanannya tidak ada atau rapuh,  
Sangat sensitif yang menyusahkan,  
    boleh menggugat kebahagiaan dan ketenangan  
Kita datangkan beberapa contoh untuk pengetahuan  
Sedikit sahaja orang kata atau cerca sudah menyakitkan hati  
Belum lagi orang benci, menghina, memfitnah  
Aduh lebih-lebih lagilah, menderita dan tergugat diri,  
    hilang ketenangan  
Kalau bertembung serentak  
    dengan kesusahan-kesusahan yang lahir  
    seperti miskin, sakit  
Setengah orang kecewa bahkan putus asa  
Melihat orang kaya atau senang, hati sakit pula  
Datang penyakit hasad dengki  
    lebih-lebih lagi bertambah jiwa sakit  
Apabila masyarakat manusia sudah rosak  
Berbagai-bagai gejala masyarakat yang menakutkan terjadi  
Seperti jenayah pergaduhan, pencurian,  
    rompakan, perogolan, pembunuhan, peperangan  
Maka jiwa pun sentiasa diburu oleh ketakutan,  
    musnah kebahagiaan  
Kemudian manusia ada nafsu yang sangat menyusahkan

Ditahan kehendak-kehendaknya menysahkan  
 Diturutkan sangat kehendak-kehendaknya  
     merbahaya dan memudharatkan  
 Memudharatkan diri sendiri dan merosakkan orang lain  
 Juga manusia ada perasaan  
 Perasaan ini juga sangat menyusahkan diri seseorang  
 Melihat sahaja benda yang kotor menjijikkan dan meloyakan  
 Setengah orang selepas itu hilang selera hendak makan  
 Melihat sahaja benda yang menakutkan timbul rasa seram  
 Badan pun lemah longlai  
 Setengah orang kerana terkejut terus pengsan  
     atau hilang akal  
 Oleh itu patutkah manusia sombong dan bangga?!  
 Cuma manusia ada untung sedikit, adanya akal  
 Dengan akal manusia boleh berfikir,  
     dapat pengalaman, dapat ilmu pengetahuan  
 Boleh maju, boleh membangun dan bertamaddun  
 Tapi kalau akal sahaja yang dibangunkan,  
     roh tidak dibangunkan  
 Manusia boleh maju tapi bersama dengan kerosakan  
     yang berbagai-bagai bentuknya  
 Akibatnya untung sekarung, rugi seguni  
 Negara cantik, tapi hidup di dalam ketakutan  
 Oleh itu di manalah istimewanya manusia?  
 Di manakah kehebatannya?  
 Hingga menjadi sombong, bangga dan riyak  
 Kalau tidak ada sifat taqwa  
     maka tidak ada apa-apa keistimewaan manusia  
 Di Akhirat terjun pula ke Neraka  
 Wal 'iyazubillah



## 75 | DI MANA MULIANYA MANUSIA

**S**IAPALAH manusia ini?!  
 Kejadian yang pertama dari tanah, hina  
 Tempat pijakan segala makhluk yang melata  
 Kejadian yang kedua dari air mani yang terpancar  
 dari saluran yang menjijikkan  
 Hina juga mengaibkan  
 Kalau ia terbuang tiada siapa yang mengutip  
 untuk diletakkan di tempat yang mulia  
 Peluhnya, baunya meloyakan  
 Siapa dekat jiwanya menderita  
 Yang keluar dari hidung dan telinga, semuanya menjijikkan  
 Yang keluar dari kedua jalan lagi buruk  
 dan busuk dan memalukan  
 Dia dibuang di jamban  
 Tempat yang hina dan menjijikkan  
 Lidahnya juga selalu digunakan untuk merosakkan,  
 bukan kebaikan  
 Memfitnah, mengumpat, mengadu domba, memaki, mencerca  
 Semuanya merupakan najis-najis maknawi dan rohani  
 Najis-najis maknawi dan rohani ini merbahaya sekali  
 Perosak masyarakat manusia  
 Akalnya, padanya kecerdikan, kepandaian dan ilmu  
 Lumrahnya untuk menipu, untuk kepentingan diri  
 Nafsunya lagilah, penjahat di dalam diri yang memusnah  
 Hatinya selalunya dikuasai nafsu  
 Raja di dalam kerajaan diri yang dikuasai musuhnya  
 Raja yang jahat inilah yang mengarah dan melarang  
 Rosaklah kehidupan manusia seluruhnya  
 Di mana mulianya manusia?!  
 Di mana keutamaan manusia?!  
 Mulianya, utamanya jika beriman dan bertaqwa  
 Jika tidak, busuk sahaja yang ada  
 pada manusia

---

Selepas Asar  
 01 - 05 - 1997

## 76 | KUALI TETAP KUALI

**K**UALI itu diletakkan di tempat mana pun  
 dan di dalam keadaan apa pun ia tetap kuali  
 Kuali itu tetap hitam legam  
 Beralih-alih tempat dan suasana  
 ia tidak akan mengubah hakikatnya  
 Kuali tetaplah kuali, ia tidak akan jadi intan berlian  
 Letak di dapur pun kuali, letak di serambi pun kuali  
 Sekalipun diletakkan di pelamin,  
 tempat yang indah dan mulia, ia tetap juga kuali  
 Begitulah manusia, hamba Allah di mana pun dia berada  
 Di dalam suasana apa pun dia berada, dia tetap hamba  
 Ia tidak akan bertukar menjadi makhluk lain  
 Hamba tetap hina, hamba tetap lemah,  
 hamba memerlukan pertolongan dan bantuan  
 Kalau dia petani, tetap juga hamba  
 Jika dia guru, tetap juga ia seorang hamba  
 Walaupun dia seorang kaya, ia tetap juga hamba yang hina  
 Sekalipun dia raja, menteri dan orang besar,  
 nama hamba tidak akan berubah  
 Jika dia menteri, dia adalah salah seorang  
 orang besar hamba-hamba  
 Orang kaya pun hamba yang kaya di kalangan hamba  
 Tapi manusia hamba Allah itu sungguh pelik  
 Bila jadi raja atau menteri, orang besar atau kaya,  
 mereka sudah berpelajaran  
 Berubah sikap dan bertukar watak hidupnya  
 Dia merasa luar biasa, ego dan sombong pun tiba  
 Orang lain dipandang hina  
 Inilah dia hamba-hamba yang tidak sedar diri  
 Awak hina merasa mulia

---

Selepas Asar  
 31 - 08 - 1999

## KITA HAMBA YANG TIDAK ADA KUASA

**M**ANUSIA apabila ada kuasa, lupa yang Maha Kuasa  
Seolah-olah dia mampu membahagiakan dirinya  
Adakalanya orang yang berilmu tinggi, merasa diri luar biasa  
Dia merasakan akan bahagia sepanjang masa  
Tidak kurang pula orang yang kaya, wah sombongnya  
Merasa diri istimewa  
Orang-orang lain hina belaka  
Betulkah kita ada kuasa?! Betulkah kita istimewa?!  
Betulkah kita luar biasa?!  
Mampukah kita membendung  
isteri tidak derhaka dengan kita?!  
Mampukah kita menundukkan anak  
mendengar kata, taat dan setia  
Apakah kita memburu sakit atau sakit memburu kita  
Ertinya adakah kuasa mengelak sakit?!  
Dapatkah kita membendung rakyat jangan derhaka  
Tidak mengata dan tidak menghina kita di belakang kita  
Apabila berlaku bencana alam  
dapatkah mengelak diri daripadanya?!  
Kita orang istimewa tidak pernah kena  
Yang kena orang miskin dan papa, yang tidak ada kuasa  
dan yang bodoh-bodoh sahaja  
Bencana alam tidak kenal siapa  
Dia tidak memilih bulu, orang istimewa kena juga  
Baru kita tahu kuasa mutlak di tangan Tuhan  
yang Maha Kuasa  
Kita adalah hamba yang tiada kuasa  
Yang hina-dina memerlukan Tuhan sepanjang masa

## 78 | KEMBALI KEPADA FITRAH HAMBA

**S**EORANG hamba itu kalau dia kembali  
 kepada fitrahnya  
 Di situlah ketenangan dan kebahagiaannya  
 Dia merasa dirinya hina  
 Kerana kejadiannya memang hina  
 Kejadian yang pertama dari tanah  
 yang tidak ada nilainya  
 Kejadian yang kedua dari air mani  
 yang menjijikkan dan amat hinanya  
 Kerana sedar dirinya hina rasa malunya terbawa  
 di mana-mana  
 Dia rasa tidak ada harga diri  
 Kalau orang hendak menghinanya,  
 hinalah tidak mengapa, memang aku hina  
 Jika orang memujinya terseksa dirinya,  
 dia rasakan orang memakinya  
 Kerana kemuliaan itu tidak patut dia terima  
 Orang yang hina dimuliakan  
 Kerana dia sedarkan diri kemuliaan itu  
 amat menyeksakan  
 Bukan satu keseronokan  
 Dihina dia lebih merasa dimuliakan  
 Dimuliakan dia merasa satu penghinaan  
 Penghormatan yang tidak patut diberi, dianugerahkan  
 Seolah-olah dia merasakan manusia memerli-merlinya  
 Orang yang sedar dirinya hamba  
 Dia tidak terfikir ingin menagih sanjungan dan pujian  
 Tapi kalau manusia yang tidak sedarkan dirinya  
 Dia rasa tuan patut dimuliakan  
 Di mana-mana pergi patut mendapat penghormatan  
 Manusia macam ini kalau dihina terseksa jiwanya  
 Kalau dipuji berbunga hatinya  
 Terasa pula manusia luar biasa

Orang ini tidak payah dihina  
Kalau tidak diberi penghormatan  
    pun sudah cukup menyeksakan  
Orang yang rasa dirinya tuan  
Ke mana pergi jiwa tidak tenang  
    kalau tidak diberi penghormatan  
Mana hendak dapat penghormatan setiap masa?!

---

Menjelang tidur  
02 - 10 - 1999

## 79 | SIKAP SEORANG HAMBA

SEORANG hamba menyembah Allah Taala tanda dia hamba  
 Hamba patut memperhambakan diri kepada-Nya  
 Seorang hamba meminta dan memohon  
 kepada Tuhan kerana lemah  
 Dan bukti dia lemah, perlu meminta dan mengadu  
 Kepada TuhanYang Maha Kaya dan Berkuasa  
 Disuruh sabar kerana itulah mujahadah  
 Kerana inginkan keredhaan Allah  
 Disuruh redha kerana inginkan baik sangka kepada-Nya  
 Jahat sangka tidak patut bagi seorang hamba  
 Melupakan apa sahaja ujian dari Allah  
 Ini adalah darjat yang paling tinggi  
 Selain nabi dan rasul  
 Disuruh bertawakal agar menyerahkan nasib  
 Kepada Tuhan yang Maha Tahu dan Maha Berhikmah  
 Di samping hati lapang dan tenang  
 Keluh-kesah adalah dilarang  
 Disuruh berkasih sayang kerana Tuhan itu  
 kasih sayang dengan hamba-hamba-Nya  
 Sedangkan Tuhan boleh kasih kepada hamba-hamba-Nya  
 Mengapa kita tidak boleh memberi kasih sayang  
 sesama hamba  
 Kita disuruh pemurah sesama makhluk Allah  
 Bukankah Allah pemurah dengan kita setiap masa  
 Disuruh takut kepada Allah, itulah perisai kita  
 Di samping nasib kita di tangan-Nya  
 Tidak tahu bagaimana kesudahannya  
 Nasib kita ibarat telur di hujung tanduk  
 Mudah sahaja tergelincir jatuh  
 Ingatlah rahmat Allah kepada kita banyak salurannya  
 Agar tindakan kita ada perimbangan  
 antara harap dengan takut

---

Selepas Zuhur  
 25 - 10 - 199

## SIKAP SEORANG HAMBA YANG SEBAIK-BAIKNYA

**B**AGAIMANA sikap seorang hamba yang sebaik-baiknya  
 Iaitu beribadahlah sebanyak-banyaknya  
 dan buatlah kebaikan semampu yang termungkin  
 Kemudian rasakanlah ibadah dan kebaikan itu tidak sempurna  
 Atau merasakan waktu mengerjakannya di dalam derhaka  
 Oleh itu tentu dia merasa sentiasa sahaja berdosa  
 selepas mengerjakan ibadahnya  
 Setiap lepas mengerjakan ibadah  
 hatinya sentiasa sedih dan susah  
 Sedih dia merasakan kerana derhaka kepada Allah  
 di dalam ibadahnya  
 Setiap lepas beribadah dia pun memohon ampun kepada Tuhan  
 Hatinya menangis atau matanya menangis  
 Kerana itulah hamba ini dia lupakan sahaja  
 ibadah dan amalan kebbaikannya  
 Dia merasakan belum beribadah dan belum membuat kebaikan  
 Kalau dia terbuat dosa, aduh, terseksa jiwanya  
 Hatinya menderita setiap kali mengingatkan dosa-dosanya  
 Dengan dosa-dosanya tidak pernah dilupakannya  
 Bahkan dengan dosa-dosa itu selalu mengganggu fikirannya  
 Taubatnya kepada Allah Taala pun tidak pernah putus-putus  
 Untuk mengambus dosa-dosanya  
 Dia tambahkan lagi dengan berbagai-bagai bentuk  
 kebaikan dan kebajikan  
 Moga-moga kebaikan itu boleh menghapuskan dosa-dosanya  
 Kerana terlalu bimbang dengan diri sendiri  
 Tidak sempat dia melihat kejahatan orang lain,  
 apatah lagi untuk menyebutnya  
 Maka dia baik sangka sahaja dengan orang  
 Tetapi jahat sangka dengan diri sendiri  
 Begitulah sikap seorang hamba yang baik

---

Selepas Asar  
 04 Safar 1421H

## 81 | KEKALKAN RASA KEHAMBAAN

**S** EORANG hamba mengekalkan rasa kehambaannya  
 itulah kemuliaannya  
 Rasa hina seorang hamba di situlah darjatnya  
 Rasa lemah, rasa bersalah, di situlah keindahannya  
 Rasa malu, rasa berdosa walaupun tidak buat dosa  
 bukan pula satu kehinaan  
 Seorang hamba yang merendah diri,  
 di situlah dia dipandang tinggi  
 Pangkat diberi di hadapan manusia, di situlah kehinaannya  
 Orang ramai memandang benci kerana ingin dimuliakan  
 Seorang hamba yang sedarkan diri, di situlah nilai dirinya  
 Ke mana pergi Tuhan suka, manusia juga ikut suka  
 Setiap kesalahan yang dilakukan dengan manusia,  
 segera memohon maaf  
 Di situlah kebesaran dan keagungannya  
 Indah sekali seorang hamba  
 yang mengekalkan rasa kehambaan  
 Di situlah letaknya kasih sayang Tuhannya  
 Hamba yang mengangkat diri atau membesarkan diri  
 dipandang hina  
 Allah menghina, Rasul menghina, manusia juga  
 turut membencinya  
 Hamba yang tidak sedarkan diri orang benci  
 Kekalkanlah rasa kehambaan  
 Memang kita hamba yang hina  
 Kalau ada orang memuliakan, hati jangan berbunga  
 Lahirnya terimalah kerana hajat manusia  
 Kerana mereka ingin mendapat pahala  
 Menghormati manusia memang diperintah  
 tapi jangan dipinta  
 Hormat-menghormati sesama manusia  
 tidak ada salahnya  
 Mengagungkan manusia itulah yang salah

---

Selepas ekspedisi  
 06 - 10 - 1999



## MANUSIA ADALAH PENGEMIS YANG HINA

SEMUA manusia atau hamba Allah adalah pengemis  
Manusia datang ke dunia tidak punya apa-apa  
Untuk keperluannya, dia meminta atau tidak  
Tuhanlah yang memberinya  
Sama ada Tuhan beri dengan rahmat-Nya  
Mahupun diberi dengan ghodhob-Nya atau istidraj  
atau murka-Nya  
Ada yang dapat banyak, ada yang dapat sedikit  
Pengemis itu ada yang tidak dapat,  
tidak pula merungut dan marah-marah  
Tapi tidak kurang, ramai yang tidak dapat,  
marah-marah dan membentak-bentak  
Ada yang dapat, bersyukur kepada Allah,  
malu dan menyembah-Nya  
Yang lebih ramai, tidak tahu pun untuk bersyukur  
Bahkan kebanyakannya mereka sombong  
dan bermegah-megah  
Dapat pemberian dari Allah tidak pun mahu  
menyembah-Nya  
Pengemis atau si fakir itu tidak sadar  
diri mereka fakir atau peminta sedekah  
Terus lupa kepada Allah  
Mereka menjadi sombong, megah  
Dan menghina si fakir yang dapat sedikit  
Si pengemis yang dapat sedikit sakit hati  
dengan pengemis yang dapat banyak  
Timbullah di dalam masyarakat pengemis itu  
dua kelompok yang sentiasa berbalah  
Satu golongan sakit hati dapat sedikit  
Yang satu golongan lagi bermegah-megah  
dapat banyak  
Pertarungan ini semakin ke hujung  
semakin tajam dan sengit

Mereka berbalah hasil mengemis tidak sama banyak  
Golongan ini sepatutnya malu  
Awak pengemis hina, terbuang, tiba-tiba diberi  
Kemudian bergaduh sesama sendiri  
di hadapan Tuhan yang memberi  
Tidak malukah peminta sedekah bergaduh sesama sendiri  
di hadapan pemberi sedekah?

**A**PA perasaan orang kaya  
 Di waktu mengagih-agihkan pemberian  
 kepada peminta-peminta sedekah  
 Atau di waktu ia memberi  
 kepada orang-orang yang susah  
 Peminta-peminta sedekah itu atau orang yang susah itu  
 berebut-rebut menerimanya  
 Bahkan ada yang berkelahi sesama sendiri  
 Ada yang sudah dapat merebut pula hak orang lain  
 Orang lain itu pula bertindak pula dengan kasarnya  
 atau merebut pula  
 Ada yang tidak senang kerana ada yang dapat banyak  
 Yang dapat banyak pula di hadapan pemberi  
 menunjukkan kesombongan  
 Maka berlaku pergaduhan dan perkelahian  
 dan berbunuh-bunuhan  
 Keadaan begini si pemberi tentu sakit hati  
 Kerana yang menerima tidak beradab di hadapannya  
 Begitulah Tuhan berhadapan dengan manusia  
 Sebagai pengemis dan peminta sedekah  
 Manusia ini berhasad dengki sesama sendiri  
 Kerana merebut rezeki dari Tuhan  
 Yang dapat banyak sombong dan angkuh  
 Yang dapat sedikit sakit hati  
 Akhirnya bergaduh dan berkelahi  
 Darah tumpah ke bumi, banyak orang  
 yang luka-luka dan mati  
 Tidak pernah rehat bumi daripada pergaduhan  
 Kerana pengemis rezeki dari Tuhan  
 Keadaan ini sudah tentulah Allah Taala  
 marah dan benci

Mereka pengemis dari Tuhan  
Tetapi tidak beradab dengan Tuhan  
Orang yang fikirannya tajam, jiwanya bersih  
Sudah tentu malu di hadapan Tuhan  
Mereka tidak akan bergaduh di hadapan Tuhan  
Bahkan redha kalau tidak diberi

---

Menjelang Maghrib  
10 - 12 - 1999  
(02 Ramadhan)

## 84 | TIDAK ADA MILIK MANUSIA

**T**IDAK ada milik manusia  
 Pijaklah bumi, di mana sahaja,  
 bumi kepunyaan Tuhan  
 Dongaklah ke langit,  
 lihatlah bulan dan bintang-bintangnya,  
 semuanya ciptaan Tuhan  
 Hiruplah udara di waktu bila pun,  
 udara kepunyaan Tuhan  
 Dengarlah apa sahaja, lihatlah kecantikan alam,  
 semuanya Tuhan punya  
 Makanlah apa sahaja yang lazat, yang masam,  
 yang manis nikmat dari Khaliqul Arzaq  
 Lihatlah diri sendiri  
 Adakalanya kita hairan diri sendiri  
 kerana kebolehannya  
 Bukankah diri dan kemampuannya ciptaan Tuhan?  
 Lebih-lebih lagi jika seseorang itu dirinya cantik  
 Dia terpesona dengan kecantikannya  
 Apakah diri sendiri memberikannya kecantikan itu?  
 Sudah tentu Tuhan yang Maha Berkuasa  
 menganugerahkannya  
 Duduklah di dalam rumah besar atau istana namanya  
 Bahan-bahan rumah itu siapa yang punya?!  
 Pembangun rumah itu  
 siapakah yang memberi ilmu senibina itu?  
 Hingga mampu membina rumah  
 yang indah tersergam gagah  
 Bukankah ilmu Tuhan yang diberikan  
 sedikit kepadanya?  
 Isteri yang cantik, barang ciptaan Tuhan  
 Suami yang tampan anugerah-Nya juga  
 Bahkan apa sahaja yang kita lihat, dengar,  
 rasa, sentuh, makan, minum

Semuanya milik Tuhan Rabbul 'alamin  
Oleh itu mana milik kita?  
Tidak ada milik kita!  
Mengapa tidak bersyukur kepada-Nya?!  
Patutnya kita tersungkur sujud kepada-Nya  
Merendah dan menghina diri kepada-Nya  
tanda bersyukur kepada-Nya

**M**ANA milik kita! Tidak ada milik kita  
Semua yang ada, Allah yang punya  
Tidak ada kita punya, kita hanya mengusahakannya saja  
Apa yang kita dapat Allah sudah sediakan

Kita Allah punya, bumi langit ciptaan-Nya  
Milikilah apa saja tidak terlepas dari ciptaan-Nya  
Mana kita punya, tidak ada kepunyaan kita  
Kita hanya mengusahakan apa yang telah ada

Mengapa kita sombong miliki Tuhan punya  
Mengapa tidak malu kepada Tuhan yang Empunya  
Patut bersyukur kepada Tuhan yang memberi segala-galanya  
Malulah kepada Tuhan kerana miliki Dia punya

Janganlah berbangga apa yang ada pada kita  
Kalau Tuhan tidak beri, kita tidak punya apa-apa  
Janganlah mengungkit-ungkit jasa kita  
Jasa kita nisbi saja, yang sebenar Tuhan punya

Bersyukurlah, bukan berbangga  
Bersyukurlah bukan mengungkit-ungkit jasa  
Gunakanlah nikmat Tuhan itu untuk khidmat  
Lepas itu lupakan saja, agar tidak mengungkit-ungkitnya

## UJIAN PADA SESEORANG TIDAK SAMA MAKSUD

**U**JIAN yang ditimpakan pada seseorang  
 maksudnya tidak sama  
 Adakalanya ujian yang Allah timpakan itu  
 kerana kutukan-Nya  
 Kerana sudah terlalu derhaka  
 Adakalanya dengan tujuan penghapusan dosanya  
 Kerana sudah cuba mujahadah, terlibat juga  
 Adakalanya dengan maksud  
 hendak meningkatkan darjat seseorang  
 Kerana taqwanya dan imannya yang begitu teguh  
 Tidak kurang juga dengan ujian itu untuk menyedarkan  
 Untuk memberi petunjuk dan hidayah kepadanya  
 Jika ujian itu ditimpa kepada kita  
 Kita tidak tahu maksud yang mana satu  
 Oleh itu sebagai beradab dengan Tuhan  
 Kerana kita adalah hamba-Nya  
 Kita kaitkanlah ujian itu dengan sebab dosa kita  
 Atau kerana kemurkaan-Nya  
 Agar kita sentiasa bertaubat kepada-Nya  
 Inilah jalan selamat buat kita



**K**EMULIAAN seseorang itu apabila dia  
 dapat mengekalkan rasa kehambaannya  
 Mengekalkan rasa kehambaan bukan pula satu kehinaan  
 Makin tinggi kedudukannya,  
 semakin terserlah sifat kehambaannya  
 Mengekalkan sifat kehambaan di situlah keindahannya  
 Senang dan tenang manusia melihatnya  
 Allah Taala suka, Rasul suka, manusia pun suka  
 Siapa yang dapat mengekalkan sifat kehambaannya  
 Dia dihormati di sebarang pergaulannya  
 Makin tinggi kedudukannya,  
 semakin sayang orang kepadanya  
 Itulah yang dimaksudkan tidak akan hina  
 orang yang merendahkan dirinya  
 Tidak akan mulia orang yang meninggikan dirinya  
 Di sinilah silapnya orang yang salah berfikir  
 Apabila meninggikan diri dia akan dimuliakan orang  
 Jika merendah diri dihina orang  
 Merendah dirilah di situ kemuliaan engkau  
 Kekalkanlah sifat dan rasa kehambaan engkau  
 Kerana itulah hakikat diri engkau  
 Mengekalkan sifat dan rasa kehambaan  
 di situlah kemuliaan engkau  
 Di situlah wibawa engkau dan hakikatnya akhlak engkau  
 Menukar sifat kehambaan bukan kemuliaan  
 Bahkan satu kehinaan dan dibenci pula oleh orang

## KEMULIAAN HAMBA APABILA DAPAT MENGEKALKAN RASA KEHAMBAAN

**K**EMULIAAN seorang hamba di sisi Allah Taala ialah manakala dia dapat mengekalkan rasa kehambaannya  
 Rasa malu, rasa hina diri, rasa tidak sempurna, rasa tidak berguna  
 Tidak pernah memandang besar dengan amal ibadah dan kebbaikannya  
 Bahkan dia lupakan sahaja  
 Tidak merasa dirinya baik lebih-lebih lagi tidak merasa diri istimewa dan luar biasa  
 Dia merasa di dalam kesalahan dan dosa  
 Tidak pernah dia merasa dirinya mulia  
 Begitu juga kehinaan seorang hamba itu ialah apabila merasa diri mulia  
 Dia rasa orang istimewa dan luar biasa  
 Dia rasa baik, rasa pandai, rasa berjasa dan tidak berdosa  
 Rasa kehambaan sudah tidak ada atau hilang dari perasaannya  
 Dia rasa tuan, dia rasa perlu dihormati dan dibesar-besarkan  
 Kalau orang tidak hormat, sangat tersinggung perasaannya  
 Bahkan ke mana sahaja dia pergi memang minta dihormati  
 Jika tidak dihormati sakit hati  
 Jasa atau kebbaikannya selalu sahaja dikenang, bahkan minta dikenang  
 Kejahatan dan kecuaiannya selalu sahaja dilupakan  
 Kebbaikannya selalu sahaja diingatnya  
 Kelebihannya selalu sahaja minta dipuji  
 Kalau dipuji, wah, berbunga hatinya  
 Kalau dikeji atau dicaci terseksa jiwanya  
 Hatinya sakit, benci kepada orang itu pun bermula  
 Jadi, kemuliaan seseorang itu bukan minta dimuliakan  
 Tapi merasa diri hina  
 di situlah kemuliaan di sisi Tuhan

---

Selepas Asar  
04 Safar 1421H

## 89 | HAMBA PILIHAN TUHAN

S IAPA yang mampu menerima ujian?  
Dan jiwanya tidak rosak  
Siapa yang redha dengan ketentuan, hatinya  
tetap tenang?  
Siapa yang mampu bermujahadah  
dan tidak jemu-jemunya?  
Siapa yang terseksa dengan pujian?  
Kerana merasa tidak layak menerimanya  
Kerana pujian itu adalah hak Tuhan  
Siapa yang mampu menerima penghinaan?  
Kerana sedar bahawa itulah hakikat dirinya  
Dan dia boleh menerima kerana begitulah kejadiannya  
Tuhan adalah idolanya  
Cinta agung, yang disanjung dan dipuja  
Dibesarkan dan disembahnya  
Ini adalah manusia yang luar biasa  
Dia adalah hamba pilihan Tuhan di mayapada  
Rezeki manusia ada padanya  
Pertolongan dan bantuan Tuhan dari sisinya  
Hamba ini telah menyelamatkan seluruh manusia  
dari berkatnya  
Cuma manusia tidak mengetahuinya  
Kerana ia berlaku secara ghaib atau secara rohaniah  
Kalaupun manusia tahu  
Sudah tentu manusia terhutang budi kepadanya  
Kerana dia adalah penyelamat manusia

---

Menjelang tidur  
25 - 11 - 1999

## ORANG BERTAQWA SENTIASA DIPIMPIN TUHAN

**O**RANG yang bertaqwa sentiasa sahaja dipimpin Allah  
 Justeru mereka adalah kekasih-Nya  
 Sekali-sekala disusahkan-Nya untuk naik pangkat  
 Hati mereka tetap redha  
 Sekali-sekala dimewahkan kehidupannya,  
 untuk dapat pahala syukur  
 Ya, dia tetap bersyukur  
 Dia tidak tersungkur jatuh oleh kemewahannya  
 Adakalanya dia ditekan oleh musuh-musuhnya  
 Mungkin dizalimi, dengan berbagai-bagai caranya  
 Agar dia bertambah berpaut dengan Tuhannya  
 Supaya dia merasakan Tuhan dekat dengannya  
 Rasa kehambaannya bertambah-tambah menebal di jiwanya  
 Dia juga tidak lekang dari pujian dan cacian  
 Memang Allah lakukan demikian rupa  
 Agar dia merasa malu dengan Tuhan dari pujian  
 Rasa tidak layak menerimanya  
 Kerana itu milik Tuhan, bukan miliknya  
 Dengan cacian menyedarkan dirinya memanglah demikian  
 Hamba patut menerima kejian  
 Kerana hamba mempunyai kelemahan dan kesalahan  
 Dia berusaha memperbaiki dirinya  
 Sesiapa yang mencacinya dan menghinanya didoakannya  
 Moga-moga Allah ampunkan dosa-dosanya,  
 dosa-dosa kita pun diampun  
 Rasa berdendam dan bertindak tidak dilakukannya  
 Kalaupun ada rasa hendak marah,  
 dia boleh membendungnya  
 Begitulah orang yang bertaqwa  
 Dia sentiasa di dalam pimpinan Tuhan-Nya

---

 Selepas Asar

22 - 05 - 1997

(15 Muharram 1418H)

**A**KU datang kepada-Mu Tuhan dengan penuh kehinaan  
 Memanglah secara fizikalnya sudah memang hina  
 Dijadikan daripada tanah,  
 kemudian air mani yang menjijikkan  
 Kemudian dihinakan lagi pula oleh lumpur-lumpur dosa  
 yang setiap hari terpalit  
 Di samping kesalahan dan kesilapan  
 yang merupakan kelemahan peribadi  
 Aku memohon dengan rahmat-Mu  
 Ampunkan aku Tuhan  
 Aku meminta belas kasihan-Mu maafkan aku  
 Aku amat takut dengan dosa-dosa itu Tuhan  
 Kerana ia adalah kemurkaan-Mu  
 Ia adalah hijab di antara hamba dengan Engkau  
 Wahai Tuhan, Engkau Rahman terhadap hamba-hamba-Mu  
 Di atas Rahman-Mu itulah aku datang kepada-Mu  
 meminta maaf  
 Aku kesal dengan dosa-dosa itu  
 Aku sedih dengan kesalahan dan kesilapan-kesilapan itu  
 Tapi aku ini hamba-Mu, lemah mengontrol diri  
 daripada kesalahan  
 Bantulah aku Tuhan  
 Bentenglah diriku dengan pemeliharaan-Mu  
 Kalau mengharapkan kekuatan diri,  
 memang tidak mampu  
 Tapi kalau Engkau mengawal dan menjaganya  
 Sudah tentu aku selamat dari dosa-dosa itu  
 Kawallah aku dan jagalah aku daripada dosa-dosa  
 Itulah yang aku harapkan  
 Wahai Tuhan Rahman

## 92 | TUHAN, AKU ADALAH HAMBA-MU

**T**UHAN, aku adalah hamba-Mu  
 Aku adalah hamba, hanya orang biasa sahaja  
 Aku bukan nabi dan tidak juga rasul  
 Ertinya aku bukan maksum  
 Aku sentiasa terdedah dengan dosa  
 Walaupun aku berhempas pulas melawan hawa nafsuku  
 Sekali-sekala aku kalah juga atau kecundang dengan nafsu  
 Di waktu itu sudah tentu syaitan  
     mengambil peluang menggodaku  
 Maka sudah tentu aku pun terbuat dosa  
 Tapi aku tetap mengaku bersalah  
     dan memohon ampun kepada-Mu Tuhan  
 Begitulah selalunya berlaku kepadaku  
     di dalam kehidupanku ini  
 Aku bukan tidak sedih dengan dosa  
 Tapi dengan kelemahan aku, aku terbuat lagi dosa  
 Namun begitu aku tetap memohon keampunan-Mu  
 Oleh itu aku harap pada-Mu janganlah biarkan aku  
     dengan dosa-dosa tidak berampun  
 Dengan rahmat-Mu aku harap ampunkanlah dosa-dosaku  
 Dengan kasih sayang-Mu maafkanlah  
     kesalahan-kesalahan aku itu  
 Aku bukan seronok dengan dosa bahkan terseksa dengannya  
 Tapi aku lemah, kerana itu selalu saja terbuat dosa  
 Kalau Engkau tidak pimpin aku,  
     begitulah yang selalu berlaku kepadaku  
 Pimpinlah aku Tuhan agar aku selamat  
     dari dosa-dosa dan noda-noda  
 Jika aku terbuat juga dosa-dosa aku harap Engkau  
     ampunkanlah dosa-dosaku itu

---

Selepas ekspedisi  
 18 Muharam 1421H

**E**NGKAU sanjunglah aku  
 Aku tetap hamba yang hina  
 Engkau puji-puji aku, aku tetap hamba  
 yang lemah dan tidak sempurna  
 Sanjungan tidak akan boleh menukar sifat kehambaan  
 Ia hamba tetap hina, ia hamba tetap lemah  
 Engkau muliakan aku  
 Mungkin engkau dapat pahala  
 Kerana baiknya sangka engkau terhadapku  
 Aku hamba, salah dan silap pasti berlaku  
 Aku memohon maaf kepada Tuhan terhadap kata-katamu  
 Kerana puji dan puja yang tidak sepatutnya kuterima  
 Tapi aku tidak boleh menghalang siapa sahaja  
 yang hendak memujiku  
 Seperti jugalah aku tidak dapat menghalang  
 siapa yang hendak menghinaku  
 Tuhan, aku memohon ampun terhadap pujian  
 dan sanjungan ini  
 Aku bukan mahu pujian ini  
 Bahkan aku terseksa mendengarnya  
 Engkau lebih maklum tentang diriku  
 Ada yang suka, dia pujilah  
 Tapi aku tetap hamba yang hina  
 Tidak kurang ada orang yang tidak suka,  
 dia menghinalah  
 Hina itu sifat hamba, aku terimalah  
 Aku boleh menerimanya,  
 kerana itulah aku tidak membalasnya  
 Jagalah hatiku Tuhan  
 Puji dan puja aku tidak dapat elakkan  
 Moga-moga hatiku tidak cacat  
 oleh sanjungan

---

Selepas Zuhur  
 05 - 10 - 1999

## AKU BAHAGIA MENJADI HAMBA-MU

**T**UHAN! Rezekikan aku rahmat-Mu selalu  
 Di mana sahaja bumimu aku pijak mendapat keredhaan-Mu  
 Ke mana sahaja aku pergi, mengutip pahala-Mu  
 Di waktu bila aku bersalah, Engkau ingatkan aku  
 Aku pun memohon ampun, Engkau terima selalu  
 Tuhan aku adalah hamba-Mu  
 Jangan Engkau ungkai rasa kehambaan dari jiwaku  
 Engkau sematkanlah di dadaku  
 Agar aku bawa ke mana-mana  
 Itulah bintang kehormatan-Mu  
     yang Engkau anugerahkan padaku  
 Alangkah indahnya aku merasa diri ini hamba  
 Sungguh bahagia bintang kehambaan tersemat di dada  
 Itulah yang akan aku bawa menemui-Mu  
 Ya Allah, Engkau adalah Tuhanku yang Maha Pengampun  
 Aku adalah hamba-Mu, pohon ampun  
 Alangkah bahagia aku menjadi hamba-Mu  
 Alangkah mulianya aku, Engkau menjadi Tuhanku  
 Berilah aku rezeki yang halal di mana aku berada  
 Berilah aku kawan yang setia di bumi mana aku tinggal  
 Janganlah tinggalkan aku keseorangan tanpa-Mu  
 Perhatikanlah aku di mana-mana  
 Pimpinlah aku di mana berada  
 Aku adalah hamba-Mu  
 Janganlah Engkau tarik rasa kehambaan dari jiwaku  
 Kerana itulah kebahagiaan yang menjadi keredhaan-Mu



## JADIKAN AKU HAMBA YANG SETIA

A KU tidak menyesal tidak menjadi kaya-raya  
Itu kemudahan hidup, belum terjamin terhindar dari Neraka  
Aku tidak bersedih tidak mendapat ilmu yang banyak  
Ia juga belum menjamin untuk ke Syurga

Aku tidak iri hati dengan mereka yang popular  
Apakah dia pemimpin atau bintang filem yang dipuja  
Semua itu belum menjamin dapat bahagia sekalipun di dunia  
Di dunia lagi kita lihat mereka di waktu tua telah dilupa

Begitu jugalah keistimewaan-keistimewaan hidup  
yang mempesona  
Kalau aku dapat aku tidak menolaknya  
Jika berlaku sebaliknya aku tidak kecewa  
Semuanya itu tidak menjamin hidup di Akhirat sana

Yang aku takut tidak dapat menjadi hamba Allah  
yang taat setia  
Tidak dapat mengikut Nabi peri hidupnya  
Memburu dunia setiap masa hingga derhaka  
Melupakan Akhirat hidup yang abadi buat selama-lamanya

Tuhan, jadikanlah aku hamba yang taat setia  
Jadikanlah Sunnah Nabi pakaian aku di dunia  
Engkau cinta agungku jangan dilupa  
Keredhaan-Mu yang aku pinta bila aku ke Akhirat sana

## 96 | HARAPANKU PADA-MU TUHAN

**H**ARAPANKU pada-Mu Tuhan  
 Dengan nikmat-Mu jadikan aku orang yang bersyukur  
 Dengan bala-Mu jadikan aku orang yang bersabar  
 Dengan ketentuan-Mu jadikan aku orang yang redha  
 Dengan masa depanku jadikan aku orang yang bertawakal  
 Tuhan, Engkau cinta agung  
 Masukkanlah ke dalam hatiku rasa mencintai-Mu  
 Peliharalah hatiku daripada segala sifat yang keji  
 Ampunlah dosa-dosaku di hari  
     segala kesalahan didedahkan  
 Dan Engkau hapuskanlah segala kesalahanku  
     di Hari Pembalasan  
 Orang yang macamku ini tidak mungkin terlepas  
     daripada dosa  
 Kesalahan dan kesilapan selalu sahaja  
     tidak dapat dielakkan  
 Lebih-lebih lagi dosa bertaburan  
     di merata-rata bumi-Mu  
 Ke mana pergi pun tidak terlepas  
     daripada terjebak dengannya  
 Aduh, kotoranya jasadku ini Tuhan  
     dengan najis dosa-dosa  
 Aku tidak mahu tapi dia sentiasa memburuku  
 Bantulah aku lari dari dosa-dosaku Tuhan,  
     dengan rahmat-Mu  
 Alangkah indahnya Tuhan,  
     jika cintaku adalah pada-Mu  
 Segala mazmumah hatiku dapat dihapuskan  
 Penyerahan diriku tiada lain melainkan pada-Mu  
 Segala dosa-dosaku dengan rahmat-Mu Kau ampunkan

## 97 | TUHAN, ENGKAULAH HARAPANKU

**T**UHAN Engkau harapanku!  
 Tiada tempat bergantung melainkan Engkau  
 Engkau pembela, Engkau penyelamat,  
 pada-Mulah Tuhan aku berlindung  
 Rahmat-Mu luas, waktu aku berdosa,  
 dengan rahmat-Mu ampunkanlah aku  
 Engkau cahaya langit dan bumi  
 Petunjuk sekalian makhluk  
 Kalaulah bukan petunjuk-Mu sudah tentu tersesatlah aku  
 Di waktu Engkau mendidik aku dengan penderitaan  
 Bantulah aku di dalam kesabaran  
 Di waktu Engkau mendidik aku dengan kesenangan  
 Bantulah aku untuk bersyukur  
 Di waktu orang memujiku  
 Ingatkanlah aku puja dan puji kepunyaan-Mu  
 Agar hatiku tidak berbunga dan bangga  
 Di waktu aku dihina  
 Ingatkanlah aku, bahawa memang aku hamba  
 yang hina, patut dihina  
 Agar aku redha menerimanya  
 Tuhan Engkau adalah segala-galanya!  
 Patut Engkau dipuji dan dipuja  
 Patut Engkau disanjung dan diagung  
 Engkau adalah cinta agung semua makhluk-Mu  
 Siapa mencintai-Mu,  
 moga-moga Engkau mencintai mereka

---

Selepas Subuh  
 15 - 05 - 1997  
 (07 Muharram 1418H)

## 98 | TUHAN! PIMPINLAH AKU SELALU

**T**UHAN! Pimpinlah aku selalu di dalam kehidupanku  
 Aku lemah kalau Engkau tidak memberi kekuatan  
 Aku hamba-Mu memanglah sentiasa lemah  
 Lemah fizikal dan lemah jiwa  
 Dengarlah selalu, bisikan hatiku  
 Itulah harapanku Pada-Mu  
 Rintihan hamba-Mu yang selalu membuat dosa  
 Mengharapkan keampunan dari-Mu  
 Tuhan, masukkanlah di dalam hatiku tenang dengan ujian  
 Kerana mengharapkan keredhaan-Mu  
 Masukkanlah ke dalam hatiku takut dengan kemewahan  
 Kerana takut disalahgunakan  
 Masukkanlah di dalam hatiku rasa cinta pada-Mu  
 Agar rasa lezat menyembah-Mu  
 Rahmat-Mu yang aku harapkan  
 Amal ibadahku, tidak memberi jaminan  
 Atau kemaafan-Mu yang aku pinta  
 Sekalipun aku tidak layak  
 Aku ini hamba-Mu Tuhan!  
 Tidak berguna, kerana membuat dosa setiap masa  
 Kutiplah aku dengan rahmat-Mu  
 Dan sandarkanlah aku dengan berkat sesiapa  
     yang boleh menyelamatkan aku  
 Rahmat-Mu luas  
 Berkat melimpah-ruah kepada sesiapa sahaja  
     yang Engkau mahu anugerahkan

---

Sebelum Zuhur  
 21 - 10 - 1998

## JADIKANLAH AIR MATAKU PEMADAM API NERAKA-MU

**Y**A Allah ya Tuhanku!  
Jadikanlah air mataku  
di waktu takut dengan-Mu  
Pemadam api Neraka-Mu  
Jatuhnya air mataku  
Menggugurkan dosa-dosaku  
Tuhan! Kalau bukan dengan rahmat-Mu  
aku tidak akan selamat  
Setidak-tidaknya kalau bukan kemaafan-Mu  
aku tidak terlepas daripada azab  
Aku lemah, bantulah aku  
Nafsuku serakah  
Bantulah aku bermujahadah selalu  
Syaitan selalu menipu dayaku  
Lindungilah aku darinya  
Jalan kesesatan terlalu banyak  
Ada yang jelas, ada yang kesamaran  
Kalau bukan pimpinan-Mu aku tersesat jalan  
Pimpinlah aku selalu  
Agar aku selamat menuju-Mu

---

Selepas Asar  
24 - 11 - 1998

## 100 | DENGARLAH DOAKU

**T**UHAN! Setiap doaku Engkau dengarlah  
 Setiap permintaanku Engkau terimalah dengan redha  
 Setiap rintihanku dengan sebab dosa,  
     hapuskanlah dosaku  
 Penderitaan jiwaku memang dosa,  
     kasihanilah aku  
 Setiap kesungguhanku bermujahadah,  
     Engkau kiralah  
 Walaupun aku lemah, memanglah hamba-Mu lemah,  
     maafkan aku  
 Kelemahan itu memang sifat hamba  
 Di sinilah dengan rahmat-Mu Engkau maafkan selalu  
 Atau setidak-tidaknya dengan kemaafan-Mu  
     Engkau gugurkanlah dosa-dosaku  
 Aku bukan gembira dengan dosa-dosa yang aku lakukan  
 Tidakkah pula aku bangga dengan kebaikan yang aku buat  
 Apa yang berlaku itu ada maksud dari-Mu  
 Dengan dosa disuruh dukacita,  
     begitulah sifat hamba  
 Dengan kebaikan disuruh bersyukur  
     kerana itulah anugerah kepada hamba  
 Pimpinlah aku selalu di dalam kehidupan ini  
 Kerana kehidupan di dunia selalu sahaja menipu  
 Kalau Engkau tidak pimpin aku  
     tidak ada ertinya hidup ini  
 Dan kecundanglah aku di sana

---

Selepas Asar  
 22 - 10 - 1998

101

## JANGAN PESONGKAN AKU DARI MENJADI HAMBA-MU

TUHAN, janganlah pesongkan aku menjadi hamba selain-Mu  
Aku bangga bahawa aku menjadi hamba-Mu  
Tanamkanlah di dalam hatiku redha dengan-Mu  
Aku harap Engkau juga redha denganku  
Redha-Mu itulah yang sentiasa kucari  
Janganlah Engkau biarkan aku mencari keredhaan selain-Mu  
Apabila aku tersilap cepat-cepat ingatkan aku  
Agar aku tidak terpisah dari-Mu  
Terpisah daripada-Mu adalah bala yang paling besar  
Terpisah daripada-Mu adalah paling hina  
Aku inginkan pimpinan-Mu selalu  
Apabila aku tersasar, letakkan kembali kepada landasan  
Janganlah biarkan aku terpesong jauh  
Kalau berlaku alangkah hinanya  
Itulah yang aku takut  
Itulah yang selalu mengganggu fikiranku  
Tuhan, itulah harapanku pada-Mu  
Itulah yang aku pinta selalu  
Tuhan, janganlah kecewakan aku

---

Menjelang Tidur  
05 - 08 - 2001

## 102 | TUJUAN IBADAH

**T**UJUAN berbagai ibadah  
 Hendak melahirkan rasa kehambaan  
 Kerana dari ibadah itulah akan lahir rasa bertuhan  
 Dari rasa bertuhan akan lahir rasa kehambaan  
 Dari rasa kehambaan akan lahir sifat-sifat kehambaan  
 Seperti malu, merendah diri, berkasih sayang  
 Bertimbang rasa, mengutamakan orang  
 Takut hendak membuat dosa dan kesalahan  
 Sabar, redha, memberi dan meminta maaf, membantu orang  
 Dan lain-lain lagi sifat-sifat kehambaan  
     yang tidak perlu dinyatakan  
 Tapi hari ini ramai orang beribadah,  
     tidak lahir rasa kehambaan  
 Yang lahir dari ibadah ialah sifat sombong, hasad dengki  
 Bermegah-megah, sum'ah, gila nama,  
     memfitnah, mengadu domba  
 Berdendam sesama manusia, jahat sangka,  
     bermusuhan sesama sendiri  
 Mengapa ibadah tidak mencapai matlamatnya?  
 Itulah merbahayanya orang beribadah secara tradisi  
 Dan juga beribadah kerana ganjaran dan fadhilat-fadhilatnya  
 Atau ibadah inginkan berkat, agar murah rezeki  
 Orang yang beribadah begini ghurur di dalam ibadahnya  
 Merasa dirinya membuat baik  
 Sebenarnya derhaka kepada Tuhannya  
 Di Akhirat nanti akan jadi muflis  
 Harapkan Syurga, Neraka yang menantinya  
 Kerana itulah beribadah jangan kerana fadhilat  
 Fadhilat itu biarlah hak dan ketentuan Tuhan  
 Tapi kita beribadah kerana hendak  
     melahirkan rasa kehambaan  
 Kerana kita memang hamba

---

Menjelang Maghrib  
 11 - 12 - 1999  
 (03 Ramadhan 1420H)



**B**IASANYA orang yang membuat amal ibadah  
 kerana mengejar fadhilat, banyak ibadahnya  
 Tapi rasa bertuhan sudah tiada  
 Dari ibadahnya tidak lagi lahir rasa kehambaannya  
 Dia membuat amal ibadah bukan kerana cinta  
 dengan Tuhan atau takut  
 Tapi cinta dengan fadhilat atau takut tidak dapat fadhilat  
 Biasanya golongan ini rasa takut atau cinta  
 dengan Tuhan sudah tidak ada  
 Walaupun banyak amal ibadah tapi tidak mengubah perangai  
 Mazmumahnya sama naik dengan amal ibadahnya  
 Ibadah pun banyak, cinta dunia pun banyak  
 Amal ibadah pun bertambah, cintakan dunia pun bertambah  
 Golongan yang mengejar fadhilat ini  
 selalunya rasa aman dengan Tuhan  
 Merasa tenang dengan amal ibadah  
 Itulah orang yang beramal ibadah derhaka dalam taat  
 Membuat dosa atau derhaka tapi tidak sedar  
 berlakunya kederhakaan itu  
 Mereka itu tertipu dengan amal ibadahnya yang banyak  
 Tapi rasa bertuhan tidak ada  
 Tapi rasa kehambaan sudah hilang  
 Sedangkan rasa bertuhan itu adalah wajib  
 Merasa kehambaan itu adalah diperintah  
 Beramal ibadah dengan tujuan untuk memperdalamkan  
 rasa bertuhan dan rasa kehambaan  
 Kalau beramal ibadah sudah tidak rasa bertuhan  
 dan tidak rasa kehambaan  
 Fungsi dan peranan ibadah itu sudah tersalah  
 Maka tidak ada nilai lagi di sisi Allah SWT

---

Menjelang tidur  
 05 - 11 - 1999

## 104 | CARA TUHAN MURKA

**D**I ANTARA cara Tuhan murka  
 pada seseorang hamba itu  
 ialah apabila dia membuat amalan ibadah  
 atau kebajikan dia memandang besar  
 dengan ibadah dan kebajikannya  
 Apabila membuat dosa dan kesalahan  
 dia memandang kecil sahaja bahkan dilupakan  
 Dia merasakan ibadah dan kebajikannya  
 boleh menghapus atau menutup dosa-dosanya  
 Kerana banyak ibadah yang dibuat  
 dia terasa aman dengan Tuhannya  
 Bahkan rasa senang dan tenang  
 dengan amal ibadah dan kebajikannya  
 Dengan amal ibadah dan kebajikan yang dibuatnya,  
 takut dengan Tuhan sudah tidak ada  
 Dia sudah merasakan Tuhan sudah redha  
 Dia yakin dia akan selamat dengan ibadah  
 dan kebajikan yang dibuat  
 Apabila Tuhan bertambah murka  
 Dengan amal ibadah dan kebajikan  
 yang dibuatnya datang pula ujub dan riyak  
 Kemudian timbul pula sum'ah dan sombong  
 dengan amal ibadahnya  
 Jika dia tidak sedar juga  
 Tuhan tambah lagi kemurkaan-Nya,  
 dengan cara dia memandang orang yang kurang ibadahnya  
 dengan pandangan hina  
 Dia pula mulalah mengata dan mengumpat orang lain  
 Kejahatan orang lain dia nampak,  
 kejahatan diri sendiri makin tidak nampak  
 Dia pun terus mengerjakan ibadah dan kebajikan  
 di atas sifat-sifat yang disebutkan tadi  
 Hinggalah ke akhir hayat umurnya

Dia pun mati di atas sikapnya  
yang diceritakan tadi  
Maka dia pun mati di dalam su'ul khatimah  
Mati di dalam kemurkaan Allah  
bersama-sama amal ibadahnya  
Maka dia pun masuk Neraka dengan penuh terkejut,  
waliyazubillah

---

Selepas Asar  
04 Safar 1421H

## 105 | TANDA RAHMAT ALLAH

**D**I ANTARA rahmat Allah Taala  
 kepada seorang hamba-Nya  
 Kerana hendak menyelamatkan hamba itu  
 daripada kemurkaan dan Neraka-Nya  
 Setiap kali dia beribadah dia merasakan tidak sempurna  
 Dia merasakan terlalu banyak cacat celanya  
 Lantaran itu hatinya sentiasa susah atau cemas  
 dari ibadah ke ibadahnya  
 Dia merasakan ibadahnya fardhu dan sunat  
 tidak pernah sempurna  
 Begitu juga dia merasakan diri sentiasa berdosa  
 Hingga jiwanya tidak pernah tenang dengan Tuhannya  
 Apatah lagi kalau dia sedar terbuat dosa  
 Aduh, jiwanya parah, hatinya gundah-gulana  
 Jiwanya bertambah terseksa dan derita  
 Dia sentiasa menangis  
 Kalau matanya tidak menangis, hatinya menangis  
 Kesalnya tidak pernah putus-putus  
 Memohon ampun kepada Tuhannya terus-menerus  
 Dia tidak pernah rasa aman bila berhadapan  
 dengan Tuhannya  
 Begitulah apabila Tuhan hendak menyelamatkan  
 seseorang hamba-Nya  
 Cara itulah Tuhan memberi rahmat kepada hamba  
 yang dikehendaki-Nya  
 Rasa takut kepada Tuhan itulah yang dikehendaki oleh Tuhan  
 Kerana seorang hamba itu dapat mengekalkan  
 rasa kehambaannya  
 Maka di situlah jatuhnya keredhaan Tuhan  
 Keredhaan Tuhan itu menyelamatkan  
 seseorang itu dari Neraka

---

 Selepas Asar  
 04 Safar 1421H

**TANDA IBADAH  
TIDAK BERKESAN**

**K**ETENTUAN dan takdir Allah kita tidak suka  
Ujian-Nya kita benci menerimanya  
Masa depan kita bimbang sahaja  
Dapat nikmat bakhil pula  
Bertambah nikmat bertambah tamaknya  
Apabila dinasihat marah-marah aja  
Ketika memberi mengaku ikhlas  
Inilah menunjukkan ibadah-ibadah kita tidak berkesan  
Kerana ibadah-ibadah tidak ada jiwanya  
Apakah yang hendak kita sembahkan kepada Tuhan kita?!

---

Selepas Subuh  
26 - 04 - 1997

**B**ERSUNGGUH-SUNGGUHLAH beramal ibadah  
 Laksanakan secara istiqamah setiap masa  
 Kemudian koreksilah ibadah di mana kekurangannya  
 Kemudian lupakan sahaja  
 Bersungguh-sungguhlah meninggalkan dosa  
 Muhasabahlah diri setiap masa tentang dosa  
 Kemudian rasakan diri kita berdosa  
 Begitulah sifat seorang hamba  
 Pandang kecilah dengan ibadah kita  
 Kerana masuk ke Syurga itu dengan rahmat-Nya  
 Pandang besarlah dengan dosa kita  
 Agar kita takut membuatnya  
 Dan masuk ke Neraka dengan keadilan-Nya  
 Panjatkanlah doa selalu kepada-Nya  
 Pintalah taufiq dan hidayah dari-Nya  
 Kerana itulah jalan kepada-Nya  
 Kita hamba, haraplah selalu kepada-Nya  
 Dan baik sangka kepada-Nya

## PASANG NIAT DALAM SEBARANG KERJA

**K**ALAU engkau keluar rumah  
tidak memasang apa-apa niat  
Rugi sekali  
Kalau engkau membuat sebarang kerja  
tidak ada niat apa-apa  
Engkau membuang masa  
Jika engkau membaca tidak ada apa-apa matlamat  
hanya sekadar ingin ilmu  
Termasuk mensia-siakan umur engkau  
Sekali-sekala engkau rehat-rehat tidak mempunyai niat  
Terbuang sahaja masa engkau  
Engkau makan, minum, berpakaian  
hanya berlaku begitu sahaja  
Engkau telah merugikan kebiasaan  
Engkau berseronok-seronok dengan anak isteri  
tidak ada tujuan apa-apa  
Masa engkau percuma sahaja  
Sekalipun apa yang engkau buat, usaha,  
makan dan minum belum termasuk kawasan dosa  
Tapi engkau telah mensia-siakan itu semua  
Kalau engkau pasang niat dihubungkan dengan Tuhan,  
bukankah ia jadi ibadah  
Berapa banyak ibadah-ibadah tambahan  
yang engkau perolehi  
Jika di dalam satu perkara itu memasang  
niat yang banyak, lebih-lebih lagi  
bertambah banyak pahala engkau  
Hanya yang engkau pasang niat ibadah-ibadah asas  
Selain itu engkau membuatnya bersahaja  
tanpa apa-apa matlamat  
Kalau begitu apa matlamat hidup engkau sebenarnya?  
Mengapa matlamat hidup engkau,  
engkau bataskan

Sedangkan apa yang engkau buat  
 terlibat dengan masa  
 Padahal sebahagian kecil amalan engkau  
 yang mempunyai niat  
 Ertinya berapa banyak masa engkau  
 yang terbangun begitu sahaja  
 Di sinilah nanti engkau akan menyesal  
 tidak sudah-sudah di Akhirat kelak  
 Itu kalau masa yang terbangun itu  
 tidak di dalam lingkungan dosa  
 Jika sudah termasuk kawasan dosa  
 lebih-lebih lagilah engkau akan menyesal  
 dan menderita  
 Kerana itulah apa sahaja yang hendak kita buat  
 biar ada matlamat  
 Kerana kita datang ke dunia ini dengan tujuan  
 beribadah kepada Allah Taala  
 Kalau begitu biarlah seluruh hidup kita  
 menepati ibadah

---

Selepas Zuhur  
 30 - 12 - 1999  
 (22 Ramadhan)



**M**EMBUAT kerja dengan terpaksa memang menderita  
Bahkan menjemukan dan mudah meletihkan  
Seperti membuat kerja yang dia tidak suka  
Tapi dipaksa membuatnya  
Atau kerja itu tempat dia dapat gaji sedangkan hati tidak suka  
Kalau dia kerja bertahun-tahun lamanya  
Akan kelihatan nanti umur muda tapi muka nampak tua  
Mudah bencinya dan boring dengan kerja  
Jemunya menghilangkan kebahagiaan jiwanya  
Biasanya ini akan membangunkan emosi manusia  
Mudah marah-marah, mudah tersinggung dengan manusia  
Kerana itulah buat kerja biarlah kerana Allah  
Buat kerja itu untuk keredhaan  
Rasakan di situlah ibadah tambahan kita  
Buat kerja kerana Allah tidak jemu, bahkan menggembirakan  
Adakalanya telah meletihkan badan tapi jiwa masih tahan  
Begitulah kerja dengan Tuhan tidak menjemukan  
Kerja dengan manusia menjemukan  
Jiwa gelisah, resah dan parah  
Hilang ceria di muka, macam orang ada masalah  
Mudah meletihkan, mudah menjemukan

---

Selepas Asar  
04 - 10 - 1999

## 110 | CARILAH PAHALA YANG MUDAH

**D**I SAMPING ibadah yang berat lagi khusus,  
 carilah pahala atau keredhaan Allah yang mudah  
 Bertemu orang Islam berilah salam sebagai mendoakannya  
 Senyumlah selalu apabila bertemu, ia dianggap sedekah  
 Apabila keluar rumah, niat hendak membuat  
 berbagai-bagai kebaikan seperti ziarah atau khidmat  
 Tidak sampai maksud pun tidak mengapa, ia tetap diberi pahala  
 Hadis ada memberi keterangan, niat orang Mukmin itu  
 lebih baik daripada amalannya  
 Apabila membawa kereta di simpang-simpang jalan  
 berilah laluan kepada orang lebih dahulu  
 Ia diberi pahala kerana mengutamakan orang  
 daripada diri sendiri  
 Kesalahan kawan maafkan sahaja walaupun tidak diminta  
 Amat besar pahalanya, bahkan mengembirakan kawan pula  
 Duri-duri atau benda-benda yang menghalang di jalan  
 dibuang segera  
 Ia memberi mudah orang ramai lalu-lalang  
 dengan tidak merbahaya  
 Ia diberi pahala sama dengan orang yang bersedekah  
 Waktu tidur malam niatlah hendak bangun beribadah  
 Pahala tetap diperolehi sekalipun tidak sempat bangun  
 kerana terlajak tidur  
 Ia tetap diberi pahala kerana niatnya suci  
 Berpakaian, niat bercantik-cantik kerana Tuhan itu cantik  
 Di sini pahalanya tetap ada  
 Yang salah itu, berpakaian kerana bermegah-megah  
 dan menunjuk-nunjuk  
 Yang sebenarnya untuk mendapat pahala  
 atau keredhaan yang mudah terlalu banyaknya  
 Tanpa memerlukan korban masa atau harta  
 Tapi kita telah mensia-siakannya

---

Selepas Zuhur  
 17 - 10 - 1999

## HIBURAN ORANG MUKMIN ADALAH IBADAH

**H**IBURAN orang mukmin itu adalah beribadah  
Mengingat Tuhan dan mengagungkan-Nya  
Berkhidmat dengan manusia  
Memberi, bersedekah, menolong dan membantu  
hamba-hamba Allah  
Mengagih-agihkan harta di kalangan  
yang patut menerimanya  
Kalau dia tidak dapat menolong orang, hatinya susah  
Kerana menolong orang itu adalah hiburannya  
Mendamaikan orang yang berbalah, hobinya  
Dia terhibur dengan mendamaikan orang yang bermusuhan  
Kalau ada orang yang memberi nasihat  
Atau ada orang mengingatkannya, suka sungguh hatinya  
Lantas dia sayang kepada orang itu  
Kalau dia tidak boleh berkhidmat dengan orang  
Lebih-lebih lagi di waktu orang perlukan khidmatnya,  
susah hatinya  
Dia terasa sangat bersalah dan berdosa  
Kerana hiburan terputus atau tidak bersambung  
Kalau didapati ada orang lain mendapat nikmat  
Dia pula yang terhibur  
Jika ada orang yang mendapat kesusahan  
Hatinya susah, jiwanya derita dan gelisah  
Dia bersungguh-sungguh cuba mengatasinya  
Dia merasa penderitaan orang lain itu  
adalah penderitaannya  
Kesenangan orang lain adalah kesenangannya  
Begitulah hati orang mukmin  
terhibur dengan berkhidmat kepada orang lain

---

Menjelang Maghrib  
23 - 12 - 1999  
(16 Ramadhan)

## 112 | TERHIBUR MENYEMBAH TUHAN

**O**RANG yang bertaqwa menunggu ibadah  
 daripada satu ibadah itu kegembiraan  
 Yang hendak ditunggu itu ialah cinta agungnya  
 iaitu Tuhan Penciptanya  
 Agar dari satu waktu ke satu waktu  
 hendak disembah dan disanjung  
 Alangkah terhiburnya memuja dan menyembah  
 idolanya yang dirindunya  
 Menunggu cinta dari satu waktu ke satu waktu  
 sangat ditunggu-tunggu  
 Tidak sabar rasa hendak menyembah dan memuja-Nya  
 Kerana di dalam penyembahan itu  
 dia dapat bercakap-cakap dengan Tuhannya  
 Meminta, mengadu, bermesra dan bermanja-manja  
 Banyak persoalan hidup yang perlu diberitahu  
 Agar Tuhan selesaikan segala yang terbuka  
 Banyak perkara yang merbahaya minta dilindungi  
 Yang sedang terjadi minta diungkapkan  
 Di masa hadapan minta pimpinan  
 Yang tidak tahu baik buruknya minta dijelaskan  
 Orang mukmin, sungguh penting Tuhan itu  
 di dalam kehidupannya  
 Kerana itulah ibadah, munajat,  
 berdoa sesuatu yang didulukan  
 Di sanalah segala persoalan dirafa'kan kepada Tuhan  
 Mereka merasakan tanpa Tuhan tidak boleh hidup  
 Kepada mereka Tuhan sangat diperlukan

## SETAKAT INI DAPAT KUSEMBAHKAN PADA-MU

SETAKAT inilah yang dapat kusembahkan pada-Mu, Tuhan!  
Sudah tentu terlalu banyak kekurangannya  
Aku terlalu sedih sebenarnya, wahai Tuhan  
Menganugerahkan sesuatu kepada-Mu yang tidak sepadan  
Tapi apakan daya, setakat inilah yang aku mampu  
Sudah kulakukan sedaya yang termampu  
Ia masih setakat ini sahaja  
Engkau tahu betapa sedihnya aku  
Jiwaku merintih selalu  
Jiwaku derita Engkau pun tahu  
Mengenangkan ibadahku terlalu kurang  
Bagaimanapun kuharap terimalah  
Walaupun serba kekurangan  
Aku sangat malu dengan-Mu, Tuhan  
Nikmat yang Engkau kurniakan banyak  
namun ibadahku kurang  
Tuhan, maafkanlah aku! Dengan rahmat-Mu!  
Ampunkanlah dosaku  
Janganlah Engkau bertindak ke atasku  
Aku bukan suka setakat yang ada ini  
Aku bukan tidak sedih dengan kekurangan ini  
Tapi setakat inilah yang aku terdaya  
Maafkan aku Tuhan!  
Di samping kuharapkan pimpinan-Mu lagi  
Agar aku dapat berbuat lebih baik dari ini  
Untuk kusembahkan kepada-Mu

---

## TERIMALAH IBADAHKU YANG TIDAK SEMPUrna

**T**UHAN, terimalah ibadahku  
 yang tidak sepertinya ini  
 Ia serba kekurangan  
 Banyak cacat-celanya  
 Tapi apakan daya, inilah yang aku terdaya  
 mempersembahkannya  
 Aku sudah mencuba sungguh hati  
 Tapi masih tidak mampu juga dengan sempurna  
 Aku harap dengan rahmat-Mu terima jugalah  
 Atau dengan kemaafan-Mu terimalah kekurangannya  
 Walaupun tidak sempurna ibadahku, aku tidak jemu  
 Aku tetap teruskan  
 Sekalipun tidak meningkat aku tetap istiqamah  
 Kasihanilah aku Tuhan hamba-Mu yang lemah ini  
 Keampunan-Mu yang Aku harapkan  
 Kalau Engkau tidak membelaku  
 Siapa lagilah yang akan membelanya  
 Kalau aku diazab, aku kan hamba-Mu jua  
 Aku adalah ciptaan-Mu  
 Kalau Engkau selamatkan aku  
 Engkau pun tidak rugi  
 Kebesaran-Mu tetap sempurna

**A**DA orang tidak taat dan tidak setia  
Sama ada dengan Tuhan atau dengan manusia  
Itu perkara biasa  
Tapi adakalanya kita tidak sedari di dalam kehidupan ini  
Sering berlaku kepada orang yang agak beragama  
Boleh taat tapi tidak setia  
Sanggup menerima arahan tapi tidak ada tanggungjawab  
Boleh beribadah tapi derhaka  
Boleh menerima suruhan tapi tidak beradab  
Teringat dosa kemudian melakukannya  
Boleh berbuat tapi tidak sempurna  
Atau sanggup berkhidmat tapi tercacat dan tercela  
Atau boleh taat tapi jiwa menderita  
Keindahan di dalam ketaatan tidak ada  
Lazat di dalam beramal belum dirasa  
Kerana itulah iman sentiasa yazid wa yankus  
Adakalanya bertambah, adakalanya berkurang  
Dia tidak mahu bertambah dan terus bertambah  
Tapi janganlah berputus asa  
Lepas berbuat mengaku berdosa  
Setelah berbuat mintalah ampun dan maaf  
Mintalah kepada Tuhan dengan rahmat-Nya terima jugalah  
Pohonlah kepada Tuhan Ar Rahman  
Dengan rahmat-Nya yang cacat itu tampunglah

---

## 116 | AKU RASA BELUM BERIBADAH

**A**DUH, bila aku menghadap-Mu Tuhan di waktu ibadah  
 Hatiku pun mula rasa susah dan gelisah  
 Aku pun mula bimbang bagaimana nanti  
 aku menyembah-Mu, bersopankah atau sebaliknya  
 Kalau aku lakukan juga, jawapannya tentu sama  
 Macam-macam rasa di dalam jiwaku  
 Takut, bimbang, gelisah dan resah  
 Apabila selesai, aku rasa belum beribadah  
 Hatiku susah dan gundah-gulana  
 Tapi apakan daya, setakat itulah yang terdaya  
 Takkan aku hendak mengulangnya sekali lagi  
 Nilai ibadahku  
 Macam tadi juga  
 Kerana itulah Tuhan, setiap kali lepas sembahyang  
 Aku dahulukan memohon ampun kepada-Mu  
 terhadap sembahyangku  
 selepas itu barulah dosa-dosaku  
 Begitulah juga Tuhan selepasku membuat dosa  
 Hatiku lagi parah, susah dan gelisah  
 Tapi aku ini lemah bermujahadah  
 Selepas itu aku ulangi lagi membuat salah  
 Hatiku susah lagi dan gundah  
 Tuhan! Engkau tampunglah ibadahku mana yang kurang  
 Maafkan aku yang tidak sempurna  
 Ampunkan aku mana yang terlanjur  
 Kerana hal itu bukan aku suka  
 Itulah kelemahanku  
 Engkau pun tahu  
 Rahmat-Mulah yang aku pinta



117 **TUHAN MEMANGGIL AKU**

**T**UHAN memanggil aku  
Aku menerima panggilan-Nya  
Setelah aku menunaikan panggilan, aku menderhakai-Nya  
Tuhan menyuruh aku  
Aku mendengar dan mentaati-Nya  
Setelah suruhan itu aku terima  
Aku mencuaikannya  
Tuhan panggil lagi aku  
Aku tidak menolaknya  
Setelah aku menerimanya  
Di situ aku tidak beradab kepada-Nya  
Tuhan suruh lagi aku  
Aku tidak pula menolak suruhan-Nya  
Setelah aku menerima suruhan-Nya  
Aku tidak bersungguh-sungguh mengerjakannya  
Begitulah aku ini  
Setiap kali Tuhan panggil  
Aku menerimanya  
Setiap aku disuruh  
Aku tetap tunaikannya  
Tapi di dalam ketaatan itulah aku derhaka kepada-Nya  
Bilakah aku ini dipanggil dengan setianya  
Entah bila lagi jika aku disuruh  
Aku tidak khianat suruhan-Nya  
Begitulah aku ini sentiasa taat di dalam derhaka  
Begitulah aku ini mengikut perintah tidak beradab  
Tuhan, aku harap  
Di dalam menunaikan panggilan dan suruhan, tidak beradab  
Aku memohon maaf dan ampun kepada-Mu  
Ampunkanlah dan maafkanlah aku wahai Tuhan

---

Menjelang tidur  
14 - 09 - 1999

## 118 | TUJUAN MENGENAL TUHAN

**M**ENGENAL Tuhan tujuannya agar segala usaha dan ibadah  
 ada tempat tujuan yang hendak disembahkan  
 Agar segala usaha dan ibadah tidak disia-siakan  
 Mengikut syariat itulah disiplin hidup dan syiar-Nya  
 Sekaligus nampak kelihatan di dalam kehidupan insan,  
 ayat-ayat dan tanda-tanda kebesaran Tuhan  
 Akhlak yang mulia pula itulah dia bunga-bunga  
 yang indah pada diri-diri insan  
 Dari situlah di dalam pergaulan manusia  
 di antara satu sama lain senang menyenangkan  
 Bahagia membahagiakan, rindu-merindui untuk berjumpa  
 Dari sinilah indahnya pertemuan di dalam pergaulan  
 Kerana masing-masing di dalam diri membawa bunga  
 Satu sama lain hibur-menghiburkan  
 Suka-menyukakan dan menggembirakan  
 Memanglah tabiat bunga sama ada bunga yang lahir  
 mahupun bunga yang maknawi dan rohani  
 Ia menyukakan, menghiburkan, menyenangkan  
 dan menyejukkan mata dan hati  
 Kalau bunga diri atau bunga-bunga maknawi  
 dan rohani tidak ada  
 Pertemuan manusia sesama manusia sangat menjemukan  
 Bahkan di dalam setengah-setengah hal pertemuan itu  
 sangat menakutkan  
 Akibatnya pertemuan dan pergaulan itu  
 dibuat sebab terpaksa  
 Tidak bergaul, manusia tidak boleh hidup bersendirian  
 Kerana manusia itu satu sama lain perlu-memerlukan  
 Tapi kerana masing-masing bunga diri sudah tidak ada  
 Pertemuan dan pergaulan secara terpaksa itu  
 sangat menyakitkan

---

Menjelang Maghrib  
16 - 10 - 1999

## KENAL TUHAN DAHULU BARULAH SYARIAT-NYA

**D**I DALAM ajaran Islam, mengenal Tuhan lebih dahulu  
 adalah perkara yang pertama dan utama  
 Selepas itu barulah mengenal syariat-Nya pula  
 Tujuan mengenal Tuhan agar hamba-hamba-Nya  
 di kalangan manusia cinta kepada-Nya  
 Pepatah Melayu ada berkata: Tidak kenal maka tidak cinta  
 Percaya sahaja adanya Tuhan tapi tidak kenal Tuhan  
 sudah tentu cinta tidak berbunga  
 Tidak cinta kepada Tuhan,  
 syariat-Nya orang tidak akan menghormati  
 Mari kita mengenal Tuhan agar kita cinta kepada-Nya  
 Tuhan adalah Allah yang mencipta dunia Akhirat  
 dan seluruh isinya  
 Mencipta manusia bahkan mencipta segala-galanya  
 Dia adalah Maha Berkuasa, Maha Mengetahui,  
 Maha Melihat, Maha Mendengar,  
 Maha Berkehendak dan kehendak-Nya  
 tertunai segala-galanya  
 Tuhan adalah mengadakan dan mentiadakan,  
 mematikan dan menghidupkan  
 Menghukum sama ada di dunia mahupun di Akhirat  
 kerana keadilan-Nya  
 Tuhan adalah segala-galanya  
 Dialah yang memberi makan dan minum,  
 Dialah yang menyakitkan dan menyembuhkan  
 Dia juga menyenangkan dan menyusahkan,  
 memiskinkan dan mengkayakan  
 Menjatuhkan dan menaikkan seseorang  
 atau sesuatu bangsa  
 Memberi rahmat dan nikmat, memberi niqmat  
 dan bala bencana  
 Mendidik, mengasuh, menjaga dan memberi keselamatan  
 Memberi petunjuk dan menyesatkan sesiapa yang Dia suka

Tapi semuanya berlaku dengan ketentuan dan hukuman-Nya  
 Siapa yang masuk Neraka adalah dengan keadilan-Nya  
 Siapa yang masuk Syurga adalah dengan rahmat-Nya  
 Tuhan adalah Zat yang Maha Esa,  
     tidak ada bandingan dan tandingan  
 Tidak ada penyamaan dan penyerupaan  
 Maha Suci daripada penyerupaan dan Maha Suci  
     daripada dapat dilintaskan  
 Hakikat Zat-Nya Dia sahaja yang mengetahui  
 Tiada di kalangan makhluk-Nya yang mengetahui  
 Sekalipun para malaikat yang suci  
     daripada dosa dapat mengetahui  
 Kuasa atau Qudrat-Nya bukan dengan tenaga,  
     kehendak-Nya bukan dari perasaan-Nya  
 Tuhan tidak ada perasaan macam manusia  
 Yang berkuasa dan berkehendak adalah Zat-Nya  
 Begitu juga melihat, mengetahui, mendengar,  
     adalah Zat-Nya  
 Yang mempunyai sifat-sifat itu semuanya  
 Maha Pengasih lagi Maha Penyayang  
 Maha Qahhar dan Jabbar

## BEZA KENAL TUHAN DENGAN KENAL SYARIAT-NYA

TIDAK sama Islamnya seseorang yang dimulai  
dengan mengenal Tuhan dengan yang dimulai  
menenal syariat-Nya  
Golongan yang pertama kalau bersyariat  
sangat dihayatinya hingga rasa bertuhan  
sangat menunjangi jiwanya  
Hasil bersyariat lahirilah sifat-sifat kehambaan  
yang begitu ketara  
Seperti kasih sayang, tawadhuk, pemalu, sabar, pemurah,  
mengutamakan orang lain dan maaf bermaafan  
Puak kedua mungkin ibadahnya baik  
tapi penghayatannya tidak ada  
Mereka bersyariat, rasa bertuhan tidak ada  
Natijah daripada ibadahnya tidak lahir rasa kehambaan  
Bahkan dari ibadahnya subur sifat-sifat mazmumah  
Seperti pamarah, bakhil, keras hati, mementingkan diri,  
sombong dan riyak  
Seolah-olah mereka beribadah atau bersyariat  
terputus hubungannya dengan Allah  
Mereka bersyariat sudah sama tarafnya  
dengan ajaran ideologi  
Ajaran ideologi mana ada bertunjangkan iman  
atau terhubung dengan Allah  
Begitulah orang mengamalkan Islam  
yang dimulai mengenal syariat  
Sedangkan Tuhan tidak diperkenalkan  
dengan mendalam kepadanya  
Akibatnya orang yang bersyariat tidak cinta  
dan takut dengan Tuhan  
Di dalam mereka bersyariat pada masa yang sama  
kemungkaran dibuatnya  
Syariat yang diamal tidak membuahkan  
akhlak yang mulia

Hingga Islam yang diamalkan tidak kelihatan indah  
dan cantik di dalam kehidupan  
Kerana itulah orang lain tidak minat kepada Islam  
Apatah lagi yang bukan Islam ingin masuk Islam  
jauh sekali  
Kerana pengamal-pengamal dan pejuang-pejuang Islam  
sangat menakutkan mereka  
Keindahan Islam tidak dapat dilihat  
di dalam kehidupan mereka

## JIWA LIAR APABILA TIDAK KENAL TUHAN

J IKA lemah iman atau tidak kenal Tuhan dengan sempurna  
jiwa kita menjadi liar  
Liarnya jiwa itu satu penderitaan  
Penderitaan jiwa menjadikan hilang kebahagiaan  
Apa maksud jiwa kita yang liar?  
Apabila mendapat sedikit ujian seperti kesusahan jiwa  
menderita hingga tidak sabar  
Apabila mendapat kesenangan berbunga pula jiwa,  
lupa daratan  
Dinasihat atau dikata orang jiwa rasa berang,  
mungkin sampai menyerang  
Jika orang lebih sedikit sakit pula hati,  
menimbul hasad dengki  
Apabila orang mendapat penderitaan jiwa rasa senang  
Jika kehendak tidak dikabul  
aduh jiwa keluh-kesah dan gelisah  
Jika hajat dapat berbunga pula jiwa  
mungkin menghina orang  
Begitulah jika iman lemah atau tidak kenal Tuhan,  
jiwa tidak stabil  
Berubah keadaan yang menimpa berubah pula jiwa  
Berlainan suasana berlainan pula perasaannya  
Jiwa sentiasa berombak dan bergelombang  
Macam lautan yang tidak pernah rehat dari gelora  
Kalau begitu mana hendak mendapat  
ketenangan dan kebahagiaan  
Kerana jiwa mudah saja tergugat oleh kejadian  
Padahal peristiwa ada dalam kehidupan  
mana ada renti-rentinya  
Dia datang silih berganti berbagai-bagai keadaan  
Orang mukmin jiwanya sentiasa tenang

---

Selepas Asar  
22 Muharam 1421H

## 122 | SEGALANYA UNTUK ALLAH

**B**ERFIKIRLAH seperti yang Allah mahu  
 Berperasaanlah seperti yang Tuhan setuju  
 Berkehendaklah seperti yang Tuhan redha  
 Ertinya fikiranmu, jiwamu dan nafsumu semuanya  
 untuk Tuhan yang Esa  
 Setelah tiga anggota batin itu selaras  
 Semuanya bertindak mengikut kehendak Tuhan  
 Maka jawarih ini mudah sahaja, ia sudah tentu taat setia  
 Jawarih ini ia akan mengikut sahaja  
 Tanpa bangkang dan tanpa bantah ia akan bersetuju sahaja  
 Sikap begini adalah manusia luar biasa  
 Inilah hamba Allah yang seluruh hidup dan matinya  
 kerana-Nya  
 Selaras dengan pengakuan di dalam sembahyang lima waktu  
 “Hidupku dan matiku adalah kerana Allah”  
 Oleh itu pimpinlah akal fikiran dengan ilmu wahyu  
 Didiklah hati atau jiwa dengan rasa bertuhan  
 Bermujahadallah melawan nafsu,  
 arahkan kemahuannya kepada Tuhan yang Esa  
 Bersandarlah kepada pemimpin yang ‘arifbillah  
 Beristiqamahlah dan berdoalah kepada Allah  
 Agar kita selamat menuju ke arah-Nya  
 Insya-Allah hidayah dan taufik-Nya akan dianugerah  
 Dengan rahmat dan kasih sayang-Nya

---

 Selepas Zuhur  
 30 - 09 - 1999



LEBURKAN rasa kebesaranmu di dalam kebesaran Tuhan  
 Agar engkau akan merasakan dirimu hina dan terlalu kecilnya  
 Supaya sifat hamba engkau dapat kekalkan semula  
 Engkau memang hamba,  
 mana ada kebesaran yang engkau punya  
 Begitulah juga engkau cairkan rasa kekayaan yang ada padamu  
 Agar kekayaan itu engkau rasa lambang kekayaan Tuhan  
 Memang engkau mana ada kekayaan  
 kalau bukan anugerah Tuhan  
 Segala yang ada dimiliki oleh Tuhan  
 Hanya Allah menumpangkan sementara  
 untuk hendak diagih-agihkan kepada yang memerlukan  
 Sepatutnya kita rasa kekayaan yang ada terasa beban  
 Kerana kita berkewajipan dan menjadi tanggungjawab  
 mengagih-agihkan  
 Sepatutnya kekayaan yang Allah tumpangkan itu  
 kita rasa susah hati  
 Apakah kita boleh amanah untuk menyampaikan  
 Orang yang arif, tidak ada lebih dirasakan lega  
 Daripada ada yang dia rasa menyusahkan  
 Tidak diagih-agihkan adalah satu kesalahan  
 Kita sudah tidak amanah dengan Tuhan  
 Kekayaan itu adalah ujian  
 Mampukah kita bertanggungjawab mengagih-agihkan  
 Ramai orang kaya gagal menerima ujian  
 Kekayaan itu hendak diagih-agihkan kepada yang memerlukan  
 Tapi apa yang terjadi bahawa kekayaan yang diberi itu  
 dijadikan milik peribadi  
 Nanti di Akhirat kelak hartanya itu dipanas dan dicairkan  
 kemudian disapu ke seluruh badan  
 Akibat tidak amanah daripada pemberian Tuhan

124 | **SERIOUS DENGAN TUHAN**

**A**DA orang setelah dia dapat menunaikan yang fardhu  
 dan yang sunat secara lahir  
 Dapat pula meninggalkan maksiat secara lahir  
 di dalam kehidupannya  
 Dia merasakan bahawa dia telah serius dengan Tuhan  
 Dia sebenarnya belum serius dengan Tuhan Penciptanya  
 Orang yang serius dengan Tuhan disertakan sekali  
 sentiasa takut dengan-Nya  
 Hatinya sentiasa bergelombang dengan kebimbangan  
 Setiap kali selepas mengerjakan ibadah  
 Hatinya rasa kesal kerana dirasakan  
 ibadahnya tidak sempurna  
 Dia pun memohon ampun kepada Tuhan  
 Lebih-lebih lagi sekali-sekala terbuat dosa  
 Aduh, jiwanya sangat derita  
 Kerana terbuat dosa dia pun bersedekah  
 Atau berkhidmat kepada ibu atau guru  
 atau kawan-kawannya  
 Atau membaca Al Quran atau dia berzikir  
 Atau berselawat sekian-sekian banyaknya  
 untuk ibu bapa atau gurunya  
 Jika amalan kebiasaannya tertinggal dia gelisah  
 Dia mesti bayar umpamanya menghadaiahkan Fatimah  
 Atau selawat dan lain-lain lagi kepada gurunya  
 Atau hari itu dia bersedekah atau berkhidmat  
 dengan manusia  
 Fikirannya sentiasa ke hadapan  
 Apa lagilah kebaikan yang hendak dicetuskan  
 Kalau dia masbuk sahaja dengan imam  
 Hatinya tidak tenang pada hari itu  
 Untuk memujuk hatinya dia akan bayar dengan sedekah  
 Atau sembahyang sunat atau khidmat  
 dan mendoakan gurunya

Kalau dia hendak membuat kerja yang besar  
atau apa-apa hajat  
Dia mesti mengadu dengan Tuhan terlebih dahulu  
Ia akan bertawasul dengan gurunya  
Setiap kali dia membuat kejahatan  
Dia akan tutup dengan membuat kebaikan  
Di samping hatinya sedih dan terseksa  
Dia tidak boleh mendengar ada orang yang susah  
Hatinya gelisah dan dia mesti berusaha menolongnya  
Kalau dia bersalah cepat-cepat memohon maaf  
Dan memberi maaf  
Di atas kesalahan orang kepadanya  
Begitulah orang yang serius dengan Tuhan

---

Menjelang Maghrib  
14 - 12 - 1999  
(06 Ramadhan 1420H)

## MARILAH BERSAMA-SAMA MENCARI TUHAN

**M**ARILAH kita bersama-sama mencari Tuhan  
 Carilah Tuhan hingga dapat  
 Kita jadikan Tuhan kawan setia  
 Bersama-sama mencari Tuhan tidak akan timbul pergaduhan  
 Bahkan akan terjadi satu haluan sesama insan  
 Akhirnya setelah bersama mendapat Tuhan  
 Akan terjadi berkasih sayang sesama manusia  
 Bersama mencari Tuhan tidak ada pertarungan  
 Tidak seperti manusia memburu dunia dan nikmatnya  
 Sentiasa sahaja bertarung, bersaing dan bermusuhan  
 Hasad dengki, tekan-menekan, jatuh-menjatuhkan  
 Ia tidak akan terjadi pada manusia  
     bersama-sama memburu Tuhan  
 Memburu dunia tidak semua dapat  
 Ada yang dapat ada yang tidak  
 Memburu Tuhan sama-sama dapat, tidak ada yang kecewa  
 Memburu dunia banyak yang kecewa  
 Hatta yang dapat dunia dan nikmatnya juga kecewa  
 Mendapat dunia menjemukan  
 Mendapat Tuhan tidak menjemukan  
 Dapat dunia tidak membahagiakan  
 Dapat Tuhan dapat segala-galanya  
 Dapat dunia hanya sebahagian  
 Mendapat Tuhan mendapat Zat yang kekal abadi  
 Mendapat dunia mendapat sesuatu yang binasa  
 Sama ada kita meninggalkan dia  
 Atau dia meninggalkan kita  
 Mendapat dunia ia sentiasa menipu kita  
 Mendapat Tuhan, ertinya kita mendapat kawan setia

## GUNAKANLAH AKAL UNTUK MENGENAL TUHAN

**G**UNAKANLAH akal untuk mengenal Tuhan dan juga  
memikirkan kebesaran-Nya, keagungan dan kekuasaan-Nya  
Agar Dia dicintai dan ditakuti setiap masa  
Gunakanlah akal untuk mengetahui syariat  
dan hukum-hakam-Nya  
Kerana syariat dan hukum-hakam-Nya itu  
adalah jalan kepada Tuhan  
Kalaupun kita telah mengetahui dengan akal akan ilmu-ilmu  
dunia selain ilmu ketuhanan dan syariat-Nya  
Fikirkan pula bagaimana ilmu itu untuk dijadikan alat  
untuk membangunkan syariat Tuhan  
Begitu juga selaraskan kehendak nafsu  
dengan kehendak Tuhan  
Agar kehendak Tuhan dengan kehendak nafsu  
selari dan sejalan  
Supaya nafsu tidak lagi dijadikan tunggangan  
atau *highway* syaitan  
Selarinya kehendak Tuhan dan nafsu di situlah  
ketenangan dan kebahagiaan  
Seterusnya jadikanlah hati untuk Tuhan  
Jangan jadikan hati untuk selain-Nya  
Seperti, jadikan hati selalu mengingati-Nya  
Suburkan hati rasa bertuhan setiap masa  
Agar rasa kehambaan kepada Tuhan bertambah tajam  
Apabila hati rasa kehambaan bertambah subur  
Cinta dan takut dengan Tuhan bertambah mendalam  
Cintakan Tuhan itu amat patut  
Kerana Dia adalah sumber segala kebaikan  
Takut dengan Tuhan juga patut  
Kerana kita adalah hamba ciptaan-Nya  
Bila-bila masa sahaja Tuhan boleh melakukan  
apa sahaja kepada kita

---

Selepas Asar  
19 Muharam 1421H

## DALAM DIRIMU PENUH KEAJAIBAN

**K**ALAU engkau perhati!  
 Dan jika jiwamu hidup  
 Juga kalau akal engkau berperanan  
 Engkau tentu sedar, bahawa di dalam dirimu  
 penuh dengan keajaiban dan hikmah  
 Bahkan di dalam dirimu lahir dan batin,  
 ia adalah sumber segala-segalanya  
 Sumber kekayaan dunia dan Akhirat  
 Pada anggota-anggotamu adalah sumber ilmu  
 dan pengalaman  
 Ia juga sumber hiburan dan kebahagiaan  
 Ia adalah sumber kekayaan dunia yang berbentuk material  
 dan kemajuan fizikal  
 Juga ia adalah sumber iman dan taqwa yang membawa  
 kekayaan Akhirat  
 Sumber mengenal Tuhan pencipta alam dan dirimu sendiri  
 Sumber segala kebaikan dunia dan Akhirat  
 Di dalam dirimu sumber kajian  
 Padanya ada ayat daripada ayat Allah  
 Di sini nampak kekuasaan dan kehendak Allah Taala  
 Dapat dilihat kebesaran dan pentadbiran-Nya  
 Dapat dirasakan ilmu-Nya  
 Di dalam diri engkau dapat dirasakan rahmat dan nikmat Tuhan  
 Kalaulah hal-hal yang tersebut engkau sedar  
 Aduh! Malunya engkau dengan Tuhan  
 Terasa hinanya diri engkau  
 Syukur tidak terhingga  
 Cinta dan takut kepada-Nya  
 Rasa bertuhan tidak mungkin dilupakan  
 Ke mana sahaja engkau pergi  
 terasa engkau hamba yang hina yang perlu  
 kepada perlindungan Tuhan-Nya

**A**PABILA rasa bertuhan wujud  
Pasti rasa kehambaan ada  
Bila rasa kehambaan ada  
Automatik rasa bertuhan wujud  
Dua perasaan ini tidak boleh berpisah  
Salah satu perasaan itu membuahkan  
    salah satu yang lain  
Jika rasa bertuhan tidak wujud  
Rasa kehambaan juga tidak akan wujud  
Begitulah sebaliknya jika rasa kehambaan tidak wujud  
Rasa bertuhan pun tidak akan wujud  
Apabila rasa bertuhan tidak ada,  
    akan wujudlah rasa ketuanan  
Kalau dibiarkan hingga subur dan kuat  
Akan lahirlah rasa ketuhanan  
    macam Firaun dan Namrud  
Syirik dan kafirlah dia wal'iyazubillah  
Rasa ketuanan atau rasa ketuhanan  
Inilah yang melahirkan sifat ego dan sombong  
Merasa diri luar biasa dan orang lain dipandang hina  
Pemarah dan kejam, pantang ditegur  
    dan dicabar atau ada tandingan  
Kalau dia ada kuasa,  
    dia akan bertindak dan menghukum  
Kalau tidak ada kuasa mungkin dendam kesumat  
    berpanjangan  
Menunggu peluang untuk bertindak atau membinasa  
Begitulah jika seseorang itu tidak ada rasa bertuhan  
Sekalipun banyak beribadah dan bersembahyang  
Bahkan ibadah yang banyak dan sembahyangnya  
    itulah yang membangunkan kesombongannya  
Di sini kita nampak bahawa rasa bertuhan itu  
    amat penting

Atau rasa bertuhan itu perlu wujud  
di setiap jiwa manusia  
Dari perasaan inilah lahir sifat-sifat kehambaan  
Apabila lahir sifat kehambaan,  
sifat-sifat ketuanan pasti hilang  
Sifat-sifat ketuanan itulah yang membinasa diri  
seseorang dan manusia  
Yang menjadikan dunia ini tidak pernah rehat  
daripada huru-hara

---

Selepas Zuhur  
26 - 10 - 1999



**O**RANG yang rasa bertuhan  
 ialah orang yang merasa dirinya  
 sentiasa di dalam kekuasaan Tuhan  
 Dia sentiasa sedar bahawa dia di dalam pengetahuan-Nya  
 Di dalam penglihatan-Nya dan di dalam pendengaran-Nya  
 Jarang sekali dia melupakan-Nya  
 Dia merasakan Tuhan boleh berbuat apa sahaja ke atas dirinya  
 Nasibnya bergantung kepada Tuhan  
 Baik buruknya ditentukan oleh Tuhan  
 Hidup matinya ditentukan oleh Khaliqnya  
 Merasakan dirinya tidak ada kuasa langsung  
 Lantas dengan itu datang rasa takutnya  
 kepada Allah penciptanya  
 Kebimbangannya terbawa-bawa ke mana-mana  
 Dan di waktu bila pun  
 Dengan itu lahir di dalam hati inginkan kasih sayang  
 dari Tuhan  
 Agar dia diberi hidayah dan taufiq  
 Supaya dia diberi keselamatan dan kawalan  
 Dia pun menyembah-Nya dan membesarkan-Nya  
 Memanjatkan doa kepada-Nya agar dipimpin selalu  
 Kesalahannya dia memohon ampun  
 Kesilapannya dia memohon maaf  
 Dengan nikmat dia bersyukur  
 dan dengan ujian dia bersabar  
 Redha dengan ketentuan Tuhan  
 Apa sahaja yang dia hendak buat  
 dia tanya Tuhan lebih dahulu  
 Dia takut hendak memandai-mandai  
 Tuhan adalah tempat rujuknya  
 Begitulah orang yang rasa bertuhan

---

Menjelang tidur  
 15 - 01 - 2000  
 (08 Syawal 1420H)

## 130 | MEMILIKI TUHAN

**O**RANG yang tidak merasa bangga bahawa Allah itu  
 adalah Tuhannya  
 Dan tidak merasa lagi nikmat bertuhan  
 Memanglah hati telah mati, jiwanya telah buta  
 Bukankah malang sekali,  
 Tuhan yang memiliki segala-galanya  
 Sudah tidak dimilikinya  
 Apalah ertinya memiliki yang dimiliki oleh Tuhan  
 Sedangkan Tuhan tidak dimilikinya  
 Padahal memiliki Tuhan ertinya memiliki segala-galanya  
 Memiliki Tuhan kita merasa kuat dan puas  
 Memiliki Tuhan ertinya kita mempunyai pelindung  
 Kita ada mempunyai kawan yang Maha Tinggi  
 dan Maha Agung  
 Yang sangat menyayangi kita dan sangat setia  
 Memiliki Tuhan ertinya kita ada tempat rujuk  
 Ada tempat mengadu dan bertanya  
 yang dibawa ke mana-mana  
 Kita ada pembela yang akan menyelesaikan urusan kita  
 Memiliki Tuhan kita tidak sunyi  
 dan sepi di waktu keseorangan  
 Mendapatkan Tuhan ertinya ada tempat bermanja  
 Tempat hendak mencurahkan kasih dan sayang  
 Tempat mencurahkan rasa cinta  
 Mendapatkan Tuhan hilang rasa takut dengan makhluk  
 Sepatutnya kita bangga mendapat Tuhan  
 Kita rasa bahagia sepatutnya mempunyai Tuhan  
 Sepatutnya kita rasa mulia bahawa Allah itu  
 adalah Tuhan kita

## MEMILIKI-MU ADALAH PENTING SEKALI

**B**IARLAH seluruh dunia manusia membenci aku  
Asalkan jangan Engkau benci padaku Tuhan  
Biarlah aku kehilangan kasih sayang dari manusia  
Tapi jangan kehilangan kasih sayang dari-Mu  
Tidak mengapa aku tidak memiliki apa-apa  
Memiliki-Mu Tuhan ertinya memiliki segala-galanya  
Tanpa-Mu Tuhan aku kehilangan segala-galanya  
Apalah ertinya seluruh manusia kasih padaku  
Engkau yang mencipta manusia membenci aku  
Tanpa-Mu Tuhan runtuhlah kehidupan dunia dan Akhiratku  
Apa yang aku miliki tidak ada erti apa-apa  
Ia hanya ibarat habuk yang berterbangan sahaja  
Tidak memberi guna apa-apa  
Kerana itulah aku memiliki-Mu adalah penting sekali  
Buat duniaku dan Akhiratku  
Tuhan, berilah aku sedikit kasih sayang dari-Mu  
Agar memberi guna untuk kehidupanku  
Dunia dan kehidupan Akhiratku

---

Selepas Asar  
04 - 04 - 1999

## KEJARLAH TUHAN JANGAN KEJAR SYURGA

**K**EARLAH Tuhan janganlah kejar Syurga-Nya  
 Tuan Syurga lebih utama daripada Syurga-Nya  
 Carilah Tuhan, janganlah cari fadhilatnya  
 Dapat Tuhan, dapatlah segala-galanya  
 Cari Tuhan kerana kita hendak  
     memperhamba diri kita kepada-Nya  
 Cari Syurga atau fadhilatnya, ertinya hendak  
     membesarkan nikmat Tuhannya  
 Mengapa hendak memperbesarkan diri kepada makhluk  
 Memperhambakan diri kepada Khalik kan lebih utama  
 Mengejar fadhilat, rasa bertuhan tidak ada  
 Jika rasa bertuhan tidak ada, rasa kehambaan pun tidak ada  
 Sedangkan fungsi hamba hendak melahirkan rasa kehambaan  
 Kalau rasa kehambaan tidak ada,  
     mazmumah tidak akan dapat dimusnahkan  
 Kerana itulah orang yang beribadah kerana Syurga atau fadhilat  
 Perangainya tidak berubah  
 Bahkan adakalanya ibadahnya itulah  
     yang menyuburkan mazmumahnya  
 Mengapa beribadah kerana Syurga dan fadhilat  
 Syurga dan fadhilat adalah hak Tuhan  
     yang memang telah ditentukan-Nya  
 Carilah Tuhan  
 Dapat Tuhan, Syurga dan fadhilat dapat sama  
 Kerana itulah Syurga dan fadhilat tidak perlu difikirkan  
 Cari Syurga atau fadhilat, Syurga atau fadhilat belum tentu dapat  
 Tuhan sudah tentu tidak dapat  
 Yang hendak kita cintai adalah Tuhan  
 Kerana Dia pencipta kita  
 Bukan Syurga dan fadhilat yang hendak kita cintai  
 Betulkan semula fungsi ibadah kita  
 Agar matlamat ibadah itu  
     tepat kepada sasarannya

---

Menjelang tidur  
12 - 11 - 1999

## 133 | SETELAH AKU KENAL TUHAN

**S**ETELAH aku kenal Engkau Tuhan,  
 tidak ada lagi erti Syurga dan Neraka-Mu  
 Kalau tidak ada Syurga dan Neraka pun  
 aku tetap menyembah-Mu  
 Menyembah dan mengingati-Mu itu adalah kebahagiaan  
 Menyembah dan mengingati-Mu aku rasa patut buatku  
 Makin aku kenal-Mu, fadhilat-fadhilat tidak ada erti padaku  
 Aku rasa, beribadah kepada-Mu kerana fadhilat  
 menghilangkan keikhlasanku pada-Mu  
 Aku merasa aku telah tercatat dengan-Mu  
 Siapa yang mengenal-Mu,  
 Engkau adalah sumber kebahagiaan  
 Kalau begitu apalah ertinya Syurga dan Neraka-Mu  
 Setelah aku mengenal-Mu keredhaan-Mulah  
 yang aku cari  
 Bahkan aku mengingini keredhaan-Mu  
 Mendapat keredhaan-Mu,  
 ertinya mendapat segala-galanya  
 Mendapat keredhaan-Mu adalah mendapat ibu  
 segala kebahagiaan  
 Ingin keredhaan-Mu di sinilah datangnya  
 cinta dan takut  
 Cinta kerana Engkau patut dicintai  
 Takut kerana hamba perlu takut dengan Tuannya  
 Takut adalah sifat hamba yang perlu dikekalkan  
 Makin bertambah lagi aku mengenal-Mu  
 Maka segala-galanya tidak ada ertinya lagi bagiku  
 Kerana Engkau adalah segala-galanya

---

Selepas Asar  
 19 Muharam 1421H

## 134 | DIDIKAN TUHAN BERBAGAI CARA

**A**LLAH mendidik manusia atau hamba-hamba-Nya  
berbagai-bagai caranya  
Agar manusia menerima-Nya sebagai Tuhan  
Dan patuh kepada syariat-Nya  
Adakalanya Dialihatkan kebesaran-Nya  
Melalui kejadian langit dan bumi  
Agar manusia mengakui kewujudan-Nya  
Adakalanya dipujuk manusia dengan Syurga-Nya  
Betapa indahnya Syurga serta kelazatan nikmatnya  
Dan kecantikan bidadarinya  
Pada masa yang lain ditakutkan dengan Neraka-Nya  
Betapa dahsyatnya Neraka dan azabnya  
yang maha pedih amat ngerinya  
Tidak kurang pula diceritakan kehidupan  
orang-orang yang soleh  
Di dunia lagi mendapat bahagia  
walaupun di dalam cabaran  
Orang-orang kafir atau yang toleh  
Di dunia lagi tidak bahagia walaupun kaya  
Betapalah di Neraka  
Allah juga menyedarkan manusia  
dengan nikmat-nikmat-Nya  
Diberitahu manusia ini daripada tiada kepada ada  
Dicipta manusia begitu cantiknya  
Dicipta mata, kepala, mulut, kaki dan tangan  
sesuai di tempatnya  
Mempunyai peranan yang berbeza untuk faedah mereka  
Disedarkan lagi dengan nikmat-nikmat  
di luar diri manusia  
Dia Tuhan, menganugerahkan biji-bijian,  
buah-buahan bertangkai  
Kegunaan hamba-hamba-Nya

Selanjutnya Tuhan insafkan lagi manusia itu  
dengan lain cara  
Dengan perintah siapa menurunkan air hujan?  
Siapa cipta udara, kamu boleh hidup dengannya?  
Begitulah Tuhan mendidik manusia  
berbagai-bagai jalan  
Manusia menerima bermacam-macam cara  
dan berbagai-bagai sikapnya  
Ada yang terus menolak kewujudan Tuhan,  
percaya dunia jadi dengan sendirinya  
Ada yang menerima kewujudan-Nya  
tapi membuat pembohongan tentang Zat-Nya  
Digambarkan bermacam-macam rupa  
Tidak kurang yang percaya keesaan-Nya  
tetapi menolak syariat-Nya  
Ada yang tepat aqidahnya tapi acuh tidak acuh  
dengan syariat-Nya  
Dalam pada itu ada yang beriman  
namun memilih-milih syariat-Nya  
Sedikit sekali yang beriman dan patuh  
kepada syariat-Nya

---

Selepas Asar  
14 - 05 - 1997  
(06 Muharam 1418H)

## BILA LAGI HENDAK RASA BERTUHAN

WAHAI jiwa!  
 Bila lagi engkau hendak merasa bertuhan  
 Atas dasar ilmu engkau percaya  
 Tapi jiwamu tidak terasa Tuhan ada  
 Justeru itulah ke mana engkau pergi  
 Takut dengan Tuhan tidak ada  
 Padahal Dia telah berpesan takutkanlah  
     akan-Nya di mana saja berada  
 Apabila rasa bertuhan tidak ada pada jiwamu  
 Sudah tentu rasa takut kepada Tuhan tidak ada  
 Rasa dilihat, rasa didengar, rasa diketahui,  
     rasa dikuasai pasti tidak merasa

Wahai jiwa!  
 Bila lagi engkau hendak merasakan Allah itu Besar,  
     Agung dan patut dicintai  
 Bila lagi engkau hendak khusyuk mengingati-Nya?!  
 Kebesaran Allah kan terserlah,  
     mengapa tidak terasa?!  
 Kekuasaan Allah bukankah nampak dilihat,  
     mengapa tidak gerun?!  
 Nikmat-Nya berlaku setiap detik,  
     tidak nampakkah agar bersyukur?!  
 Bila lagi wahai jiwa engkau hendak  
     memandang tembus?!  
 Bila lagi?! Bila lagi?!  
 Masa tidak menunggu kita!  
 Dia tetap berjalan terus  
 Kalau kamu mati di dalam jiwamu lalai  
 Kamu tidak termasuk jiwa yang dipanggil oleh Tuhan:  
 “Wahai jiwa yang tenang,  
     kembalilah kepada Tuhanmu dengan hati yang puas  
     lagi diredhai-Nya. Maka masuklah



ke dalam jemaah hamba-hamba-Ku.

Dan masuklah ke dalam Syurga-Ku.”

(*Al Fajr*: 27 - 30)

Apabila engkau tidak dipanggil oleh Tuhan

Syurga tidak ada ruangan untukmu

Nerakalah bagimu, wal-iyazubillah

---

Selepas Asar

20 - 05 - 1997

(12 Muharam 1418H)

## 136 | LARILAH KEPADA TUHAN

**D**ARIPADA hendak lari dari Tuhan  
 Lebih baik lari kepada Tuhan  
 Ke mana engkau hendak lari?  
 Langit dan bumi seluruhnya di bawah kuasa  
 dan pentadbiran-Nya  
 Tidak mungkin engkau boleh terlepas  
 daripada kuasa-Nya  
 Setakat mana kemampuan engkau untuk lari dari-Nya?  
 Engkau tidak akan terlepas daripada diburu oleh Tuhan  
 Daripada engkau kena buru,  
 lebih baik engkau memburu-Nya  
 Engkau lari dari-Nya, ertinya engkau derhaka  
 Engkau lari kepada-Nya,  
 ertinya engkau hendak kepada-Nya  
 Engkau memburu Tuhan lebih selamat  
 daripada kena buru  
 Engkau lari kepada Tuhan, engkau akan bahagia  
 Engkau lari daripada Tuhan, engkau akan celaka  
 Sekarang engkau boleh membuat pilihan  
 Hendak lari kepada Tuhan  
 atau hendak lari daripada Tuhan?  
 Hendak memburu Tuhan  
 atau engkau akan diburu Tuhan?  
 Buatlah pilihan dari sekarang  
 sebelum engkau diburu Tuhan  
 Engkau belum lagi terlambat  
 Larilah kepada Tuhan, jangan lari dari Tuhan  
 Engkau akan kecundang  
 Sebenarnya Tuhan hendak kepada engkau  
 Mengapa engkau tidak hendak Tuhan?  
 Bertindaklah sebelum terlewat!

---

 Selepas Zuhur  
 08 - 12 - 1999

137 **CARILAH REDHA TUHAN**

CARILAH redha Tuhan, kita tidak akan kecewa  
Carilah redha Tuhan, kita akan tenang  
Janganlah cari redha manusia, kita akan kecewa  
Suka manusia kepada kita bukan berpanjangan  
Adakalanya dia suka kepada kita, sukanya pura-pura  
Suatu hari nanti akan nyata juga  
Adakalanya redhanya kepada kita di waktu kita senang  
Setelah kita susah, kita dibuang dan ditendang  
Janganlah membuat sesuatu kerana keredhaan manusia  
Kerana manusia ramai yang tidak mengenang jasa  
Buatlah sesuatu untuk keredhaan Tuhan  
Manusia suka atau benci tak usah dipedulikan  
Yang penting kita buat itu Tuhan suka  
Yang penting usaha kita itu Tuhan redha  
Dengan manusia tak usah ambil kira  
Manusia hendak puji atau manusia hendak caci  
Itu soal dia  
Yang penting apa kata Tuhan  
Keredhaan Tuhan itu penting  
Redha-Nya adalah balasan  
Balasan-Nya adalah berkekalan  
Carilah keredhaan Tuhan, hati senang

---

Selepas Asar  
16 - 09 - 1999

## 138 | DENGARLAH RINTIHANKU

**T**UHAN, Engkau tarik kesihatanku tidak mengapa  
 Tapi jangan tarik hidayah dan petunjuk dari-Mu  
 Aku akan kehilangan-Mu  
 Menjadikan segala yang ada padaku  
 tidak mempunyai erti apa-apa  
 Kalau aku kaya, engkau hendak ambil kekayaanku,  
 aku tidak menderita  
 Tapi jangan ambil ilmuku untuk mengenal-Mu  
 Aku akan kehilangan rasa bertuhan  
 Kehilangan rasa bertuhan aku terdedah  
 kepada kederhakaan dan kemungkaran  
 Kalau engkau hendak ambil apa sahaja,  
 tapi jangan ambil iman  
 Aku akan kehilangan segala-galanya  
 Tuhan, kalau hilang kawan pun tidak mengapa  
 asalkan jangan kehilangan Engkau  
 Kehilangan Engkau musnahlah seluruh kehidupanku  
 Aku akan menjadi manusia terhina di dunia dan di Akhirat  
 Inilah harapanku pada-Mu Tuhan  
 Dengarlah rintihanku  
 Kabulkanlah permintaanku dengan rahmat-Mu  
 atas nama kebesaran Nabi-Mu dan Imam Mahdi-Mu  
 Janganlah Engkau kecewakan permintaanku  
 Engkau adalah Tuhanku, Pelindungku  
 Engkau adalah tempat mengadu,  
 dengarlah rintihan hamba-Mu  
 Engkau adalah Penyelamatku  
 Selamatkanlah aku Tuhan!  
 Inilah harapanku!

## JANGAN TINGGALKAN AKU TUHAN

TUHAN jangan tinggalkan aku  
Sekalipun aku selalu derhaka kepada-Mu  
Aku tidak mampu tanpa-Mu Tuhan  
Kalau Engkau tinggalkan aku  
Aku kehilangan segala-galanya  
Kalau aku bersama-Mu aku mendapat segala-galanya  
Aku tidak sanggup kehilangan-Mu  
Biarlah aku kehilangan segala-galanya  
Jangan sampai kehilangan-Mu  
Kehilangan segala-galanya akan mendapat semula  
Jika tidak kehilangan-Mu  
Tolonglah aku Tuhan, aku hamba-Mu yang dhaif ini  
Yang selalu derhaka dengan-Mu  
Selamatkan aku Tuhan!  
Di bawah lindungan-Mu  
Lindungi aku Tuhan  
Di bawah jagaan-Mu  
Siapa lagilah yang boleh menjagaku  
Kalau bukan Engkau yang menjaga segala-galanya  
Aku bimbang selalu, kalau Engkau tinggalkan aku  
Aku harap sangat wahai Tuhan  
Jangan tinggalkan aku  
Punahlah seluruh kehidupanku  
Itulah harapanku pada-Mu Tuhan  
Jangan tinggalkan aku

## MENUJU TUHAN PERLU PEMIMPIN PILIHAN TUHAN

JALAN kepada Tuhan adalah bersifat maknawi dan rohani  
 Mata tidak dapat melihatnya  
 Yang melihat dan menilai adalah akal dan hati  
 Sedangkan jalan raya yang bersifat maddi  
 Boleh dilihat oleh mata, ramai orang yang terjatuh  
 Atau tersasar ke kiri atau ke kanan  
 Oleh itu jalan kepada Tuhan tidak semua orang  
   boleh memimpin ke arahnya  
 Sekalipun dia seorang yang dikatakan ulama  
 Mungkin yang bersifat maknawi, akal boleh menyuluhnya  
 Tapi apabila yang bersifat rohani, ia lebih tersembunyi  
 Dan ia adalah peranan hati  
 Jalan kepada Tuhan itu terlalu seninya  
 Kalau seseorang itu bukan pemimpin yang hatinya bersih  
 Yang dia dipimpin oleh Allah dan diberi ilham  
 Tidak mungkin dia boleh memimpin manusia  
   menuju Tuhannya  
 Sekalipun ulama  
 Kerana kebanyakan ulama,  
   pakar di dalam memahami lafaz dan ayat yang lahir  
 Memahami yang batin itu adalah ulama pilihan Tuhan  
 Ia merupakan pilihan di kalangan ulama  
 Ia adalah rasul yang bukan rasul atau nabi yang bukan nabi  
 Kalau ulama yang bukan bersifat rasul atau nabi  
 Mereka juga perlukan pimpinan  
 Betapalah orang awam lebih perlu lagi adanya pemimpin  
 Janganlah anggap jalan kepada Tuhan itu boleh baca sendiri  
 Boleh pimpin diri sendiri tanpa pemimpin  
 Kita akan tersesat jalan  
 Kenalah ambil perhatian tentang ini

---

Selepas Zuhur  
 09 - 12 - 1999  
 (01 Ramadhan)

## SEMBAHYANG TIDAK MENGUBAH PERANGAI

**K**ETIKA engkau bersembahyang atau menyembah Allah  
Fizikal engkau berdiri tapi dia tidak tahu apa-apa  
Anggota lahir engkau rukuk tapi dia tidak faham apa-apa  
Juga anggota lahir engkau sujud, perlu diingat  
ia tidak mengerti apa-apa  
Bahkan walaupun lidah engkau membaca  
tapi dia tidak faham apa-apa  
Oleh itu kalau fikiran engkau tidak berdiri sama-sama  
Engkau belum bercakap apa-apa dengan Tuhan  
Jika jiwa engkau tidak rukuk sama  
Engkau belum rasa bertuhan  
Bila hati engkau dan jiwa engkau tidak sujud sama  
Apa yang engkau bisik dan cakapkan kepada Tuhan engkau?  
Kalau engkau tidak bercakap apa-apa  
di dalam menyembah Allah  
Jika engkau tidak rasa bertuhan, kerana hati dan jiwa engkau  
tidak ikut berdiri rukuk dan sujud  
Engkau di waktu itu tidak merasa kehambaan  
Jadi kalau ketika menyembah Allah  
Berbisik-bisik dan bercakap-cakap dengan Tuhan pun tidak  
Rasa bertuhan pun tidak ada di waktu itu  
Rasa kehambaan pun tidak wujud ketika sembahyang  
Tidak rasa memohon dan meminta  
Tidak terasa merendah diri dan menghina diri  
di hadapan Tuhan  
Engkau belum bersembahyang  
Engkau tidak bersembahyang di waktu itu  
Engkau hanya bersenam dan beriadhah untuk Allah  
Patutlah perangai engkau tidak berubah  
Engkau bukan menyembah Allah  
Tapi riadhah

---

Selepas Asar  
01 - 11 - 1999

## TAHUKAH ENKAU SIAPA YANG ENKAU SEMBAH?

TAHUKAH engkau siapa yang engkau sembah?  
 Dengan siapa engkau kerjakan, meminta,  
 bermunajat dan meluahkan rasa hati engkau  
 di waktu sembahyang?  
 Iaitu Tuhan yang menjadikan engkau  
 dan menentukan hidup mati engkau  
 Tuhan yang menentukan nasib engkau,  
 nasib di dunia mahupun di Akhirat  
 Tuhan yang menentukan rezeki engkau  
 berapa banyak sepanjang umur engkau  
 Allah yang menjadi Tuhan yang menentukan  
 sakit dan sihat engkau  
 Sakit ringan atau sakit berat, berapa kali sakit  
 dan berapa kali sihat sepanjang hayat engkau  
 Tuhan yang mentakdirkan engkau miskin atau kaya,  
 setakat mana kemiskinan itu dan setakat mana kaya  
 Tuhan yang menentukan berapa kali mendapat ujian  
 dan berapa kali pula mendapat nikmat atau rahmat  
 Ujian yang macam mana dan nikmat dan rahmat  
 yang macam mana pula  
 Tuhan yang mentakdirkan setakat mana ilmu engkau  
 dan ilmu apa yang diberi kepada engkau  
 Tuhan yang menentukan engkau berkahwin atau tidak,  
 kalau berkahwin dengan siapa dan berapa orang anak  
 Isteri itu pula taat atau derhaka begitu juga anak-anak  
 Tuhan yang menentukan senang dan susah  
 sepanjang hidup engkau  
 Senang setakat mana dan susah pula setakat mana  
 Tuhan itulah juga yang menentukan  
 tempat tinggal engkau di bumi mana,  
 dan di negara mana  
 Rumah yang selesa atau rumah yang sebaliknya



Tuhan itulah yang mencatu berapa bilion kali  
nafas engkau turun naik  
Dan Tuhan itulah juga akhirnya menentukan  
kematian engkau di mana dan bagaimana  
Mati kerana apa, kerana sakit, terjatuh, lemas,  
dilanggar kereta, ditembak petir, kena bom  
Mati di dalam beriman, mati kafir atau mati fasik  
Kalau engkau sedarlah yang engkau sembah itu  
begitulah kekuasaan, kehendak  
dan pentadbiran Tuhan engkau  
Apakah perasaan engkau di waktu itu?  
Tidak kecutkah hati engkau?  
Tidak bimbangkah jiwa engkau?  
Tidak rusuhkah perasaan engkau?  
Kalau engkau tidak terasa apa-apa  
di waktu engkau menyembah-Nya  
Ertinya engkau hanya membawa badan  
tidak membawa jiwa bersama  
Kalau begitu engkau bukan menyembah tapi bersenam  
Engkau bukan beribadah tapi engkau beriadah

---

Selepas Asar  
28 Muharam 1421H

## PERTEMUAN DENGAN RAJA SEGALA RAJA

**S**EMBAHYANG adalah ibu segala ibadah  
Ibadah rasmi dari Tuhan kepada hamba-hamba-Nya  
seluruhnya

Ia merupakan pertemuan rasmi  
Lima kali sehari semalam dengan Allah  
Ertinya pertemuan rasmi dengan Raja  
yang Maha Agung, Raja Segala Raja  
Umpama pertemuan rasmi raja manusia  
Sesama rakyat jelatanya  
Bagaimana keadaan kita, apa yang kita rasa  
Apa persiapan yang sepatutnya?  
Kita siapkan pakaian yang cantik  
Kita bersihkan badan kita  
Kita berwangi-wangian, pergi dengan kenderaan  
sampai istana  
Di istana kita duduk dengan penuh tertib  
berhadapan dengan raja  
Kita duduk dengan penuh tawadhuk  
Bahu membongkok mata ke lantai dan khudhuk  
Kita tidak pandang kiri dan kanan  
Penuh bimbang, malu dan takut  
Tidak ada seorang yang berani bercakap-cakap  
Dan bersebang-sembang  
Menunggu dengan penuh takut akan perintah raja  
Apa titah raja, apa pesanan, apa amanahnya  
Dan apa nasihatnya  
Begitulah sembahyang, pertemuan dengan Allah  
Secara rasmi, Ia adalah Raja Segala Raja  
Raja yang bukan jenis manusia  
Raja yang mempunyai Zat yang Maha Suci  
daripada segala penyerupaan  
Pengetahuan-Nya tembus, penglihatan-Nya tembus,  
pendengaran-Nya tembus

Sepatutnya pertemuan kita lebih serius  
Lebih beradab, bertertib dan takut  
Di waktu itu kita menyediakan diri kita  
Bersih lahir dan batin  
Menunggu penyembahan itu dengan penuh takut  
Malu, khusyuk, tadharuk  
Takut dan malu hendak bercakap-cakap dan berbual  
Kecuali yang ada hubungkait dengan Tuhan  
Kita menyembah, seluruh fikiran, hati dan jiwa  
Seluruhnya tertumpu kepada Tuhan  
Fizikal ikut rukuk  
Fikiran ikut rukuk, hati ikut rukuk  
Fizikal ikut sujud, fikiran ikut sujud dan jiwa ikut sujud  
Waktu berdiri dirasakan seolah-olah  
    kita berada di Padang Mahsyar  
Sedangkan Tuhan sedang melihat  
Aduh kecutnya perut, menggeletar sepatutnya jiwa kita  
Di waktu itu sepatutnya tidak ada apa yang kita ingat  
Kecuali sepenuh hati dan jiwa raga dan fikiran kita  
    hanya kepada Allah semata-mata  
Tapi ramai manusia tidak begitu  
Berhadapan dengan raja jenis manusia lebih terasa gerun,  
    malu dan beradab  
Dari berhadapan dengan Tuhan pencipta manusia  
Kerana manusia belum kenal Tuhan Khaliqnya

## SEMBAHYANG ITU HUBUNGAN HAMBA DENGAN KHALIQNYA

**A**PABILA sembahyang ditinggalkan  
 Atau sembahyang dengan kejahilan  
 Atau sembahyang di dalam kelalaian  
 Hubungan hamba itu dengan khaliqnya sangat cacat  
 Atau terus terputus  
 Kutuk dan laknat pun berlaku ke atas kepalanya  
 Oleh Allah, para malaikat, seluruh makhluk Allah  
 kecuali jin dan manusia  
 Kalau begitu apalah ertinya kekayaan?  
 Tiada erti lagi kebesaran dan kekuasaan!  
 Nama dan glamour tiada berguna  
 Bintang kehormatan yang akan menempa celaka  
 Dirikanlah sembahyang di atas waktunya  
 Di awal waktunya  
 Pertahankanlah jemaah setiap waktu  
 Betulkan dan luruskan saf-safnya  
 Betulkan bacaannya  
 Hadirkan hati  
 Fahamkan maksudnya  
 Hayatilah tuntutan-tuntutannya  
 Rasakan kehebatan Allah  
 Menghina dirilah di hadapan-Nya  
 Agungkan dan besarkan zat-Nya  
 Hilangkan segala yang ada  
 Hanya kewujudan-Nya sahaja yang kita rasa ada  
 Ingatlah sembahyang adalah amalan  
 yang mula-mula diperiksa  
 Dirikanlah sembahyang,  
 jangan hanya bersembahyang  
 Agar seluruh amalan kita diterima

KEBAIKAN seseorang hamba itu  
 Bermula daripada membaiki sembahyangnya  
 Dari sembahyanglah titik tolak segala-galanya  
 Apabila sembahyang itu sempurna lahir batinnya  
 Khususuk, khuduk, tadharuk  
 dan faham apa yang dibaca  
 Selepas itu rahmat dan berkat daripada Tuhan  
 pun mencurah-curah  
 Dianugerahkan kepadanya  
 Allah Taala akan bersihkan jiwanya  
 Tuhan akan masukkan hidayah ke dalam hatinya  
 Cinta, takut, kasih sayang, pemurah,  
 bertimbang rasa, sabar, redha, tawakal,  
 pemaaf pun berbunga  
 Kelihatan pula kepada peribadinya  
 syariatnya sangat dijaga  
 Akhlak mulianya, disiplin peribadinya ketara  
 Kerana itu betulkan sembahyang kita  
 Hayati sembahyang hingga kita terasa  
 bahawa kita menyembah-Nya  
 Janganlah kita anggap jiwa boleh dibersihkan  
 tanpa sembahyang  
 Atau boleh jiwa kita dimurnikan  
 dengan sembahyang yang lebih kurang  
 Sembahyang adalah ibu ibadah  
 Sembahyang adalah sumber segala kebaikan  
 Di dalam Islam sembahyang sangat diambil perhatian  
 Apabila baik sembahyang  
 segala-galanya akan menjadi baik  
 Jika sembahyang sudah dicuainya  
 Atau bersembahyang tidak ada penghayatan  
 Maka seluruh pintu kebaikan akan tertutup

Kalau ada juga orang boleh buat kebaikan  
tanpa sembahyang  
Ini adalah kebaikan bukan bertunjangkan iman  
Boleh jadi kebaikan itu secara kebetulan  
atau ikut-ikutan  
Haraplah diambil perhatian tentang sembahyang

**Y**A Allah! Kerana terlalu banyaknya rahmat dan nikmat-Mu  
 Melimpah-ruahnya kurniaan-Mu setiap waktu  
 Payah lidah hendak menyebutnya  
 Tidak mampu hendak menghitungnya  
 Sekalipun dengan alat yang canggih  
 Kalaulah takdirnya Engkau tidak wujudkan  
 Syurga dan Neraka  
 Bahkan kalau sekiranya Engkau tidak mewajibkan  
 Kepada hamba-hamba-Mu menyembah-Mu  
 Namun bagi hati yang murni, fitrah yang suci  
 Jiwa tetap rasa bersalah jika Engkau tidak disembah  
 Fitrah semula jadi merasa tidak patut  
 kalau Engkau tidak disembah  
 Bahkan hati ini tetap merasa bersalah  
 Jika tidak membesar dan mengagungkan-Mu  
 Betapa pulalah Engkau telah mewajibkan  
 Hamba-hamba-Mu menyembah-Mu  
 Lebih patut lagilah Engkau diagung dan disembah  
 Kerana itulah siapa sahaja tidak menyembah-Mu  
 Melupakan, tidak mengingati dan membesarkan-Mu  
 Jiwa orang ini sentiasa gelisah  
 Jiwa tidak tenang, resah tidak menentu arah  
 Kerana fitrah, itu tabiatnya  
 Secara kita tidak sedar tetap rasa bersalah  
 Lantaran itulah kita boleh lihat di dalam pergaulan kita  
 Jika seseorang itu tidak mempedulikan Allah  
 Sekalipun kaya, berkuasa, berilmu  
 Namun jiwanya sentiasa gelisah  
 Dia akan jadi orang pemaarah  
 Atau emosinya tinggi  
 Mudah sahaja tersinggung  
 dan marah-marah

---

Selepas Zuhur  
 20 - 09 - 1999

## IBADAH ADALAH PENYEMBAHAN KEPADA TUHAN

IBADAH adalah satu penyembahan kepada Tuhan  
 Menyembah ertinya memuja, membesarkan  
 Mengagungkan, menyanjung  
 Meminta, mengharap  
 Memuji, berbual, munajat, berbisik-bisik  
 Dan bermanja-manja dan meminta  
 Ini bermaksud beribadah kepada Tuhan  
 Berbagai-bagai perasaan yang dirasa oleh jiwa  
 Kalau ibadah tidak dihayati,  
     jiwa tidak merasa berbagai-bagai rasa  
 Ibadah yang tidak dijiwai,  
     sudah tentu tidak merubah perangai manusia  
 Oleh itu ibadah kenalah tertib  
 Mutmainnah, tenang dan faham  
 Tidak boleh gopoh-gapah  
 Kenalah berlambat-lambat rukuk dan sujud  
 Rasakan kehebatan Allah, rasakan keagungan-Nya  
 Rasakan juga kasih sayang-Nya  
 Rasakan juga kuasa dan Iradah-Nya  
 Qahhar dan Jabbar-Nya  
 Rasakan Dia mendengar, mengetahui dan melihat  
 Begitulah kita beribadah kepada Allah  
 Bukan setakat fizikal yang bergerak  
 Tidak setakat lidah yang melafaz  
 Tapi yang penting hati dan jiwa yang bergerak  
 Hingga mempengaruhi fikiran dan sikap kita  
 Hingga membangun peribadi dan akhlak  
 Begitulah kesan dari ibadah yang dijiwai  
 Sangat mempengaruhi peribadi dan kehidupan kita



**T**UHAN!

Aku tidak tahu mengapa aku ini  
Aku berlainan sekali dari orang  
Setiap kali kedatangan Ramadhan  
mereka menyambut dengan gembira  
Muka-muka mereka kelihatan ceria  
Tapi aku berlainan pula  
Kedatangan Ramadhan penuh dukacita  
Bukan aku benci dengan bulanmu  
Yang penuh dengan rahmat dan berkat  
Tapi aku benci dengan diriku  
Aku bimbang Ramadhan-Mu  
aku tidak dapat mengisinya dengan sebaik-baiknya  
Aku rasa puasaku tidak sempurna  
Bahkan adakalanya aku rasa puasaku terbatal selalu  
Sembahyang yang aku bina tidak sah  
Tarawikh dan bacaan Al Quranku tidak sampai ke mana

Tuhan!

Inilah yang menyelubungi hatiku  
Setiap kali kedatangan Ramadhan  
Aku tidak tahu apakah ini satu kesalahan  
Ampunkan aku Tuhan!  
Maafkan aku!  
Kalau ini satu kesalahan  
Pimpinlah aku  
Dan betulkanlah sikapku  
Sekali lagi aku memohon ampun dari-Mu

## 149 | AKU CEMAS KEDATANGAN RAMADHAN

**A**DUH! Susahnya hatiku bila berhadapan  
 dengan Ramadhan  
 Macam ada benda yang tidak kena  
 Aku cemas selalu dengan kedatangannya  
 Kalau aku tidak menyambut kedatangannya  
 dengan sebaik-baiknya  
 Padaku kedatangan Ramadhan  
 macam kedatangan tetamu yang sangat mulia  
 Kedatangan seorang yang mulia dan terhormat  
 Ketibaan seorang yang dikenali dan dihormati  
 Seorang yang disayangi dan dipuja  
 Idola semua dan bersama  
 Aduh orang macam ini bagaimana aku hendak  
 menyambutnya?!  
 Serba tidak kena  
 Aduh bimbangnye, cara mana dan bagaimana  
 aku hendak memuliakannya  
 Sesuai dengan kebesarannya  
 Secucuk dengan mulia dan kemasyhurannya  
 Kerana itu kedatangannya aku cemas selalu  
 Kalau aku tidak beradab dengannya  
 Aku takut mencacatkan maruahnye  
 Dia adalah orang besar  
 Yang patut kita sambut sesuai dengan kebesarannya  
 Kalau dia tidak datang lebih baik rasanya  
 daripada kedatangannya  
 Tapi sudah ketentuan Allah  
 setahun sekali dia mengunjungi kita  
 Kita sambutlah dia dengan penuh kecemasan  
 dan bimbang

---

 Selepas Asar  
 19 - 12 - 1998

## RAMADHAN BULAN PESTA IBADAH

JANGANLAH jadikan Ramadhan bulan pesta makan minum  
Ramadhan bukan bulan pesta makan dan menjamu selera  
Ramadhan adalah bulan pesta ibadah  
Ibadah bukan setakat memeriahkan lahirnya sahaja  
Hati juga perlu meriahkan dengan rasa kehambaan  
Janganlah lahirnya sahaja cerah  
Tapi hati kita gelap-gelita  
Di masjid di bulan Ramadhan jangan dimeriahkan  
dengan berbual-bual dan gelak ketawa  
Membawa cerita yang sia-sia  
Ia adalah bulan menebalkan rasa tauhid kepada Tuhan  
Mempertajam rasa kehambaan di dalam jiwa  
Lahirnya meriahkan dengan sedekah  
Terutama kepada fakir miskin  
Menolong orang yang susah dan derita  
Batinnya menanamkan rasa bertuhan yang Maha Kuasa

---

Selepas Asar  
30 - 12 - 1998

## RAMADHAN, RAHMAT ALLAH TERBUKA LUAS

**B**ULAN Ramadhan rahmat Allah segala-galanya terbuka luas  
 Berkatnya terbuka luas di mana-mana  
 Keredhaan-Nya terbuka sepanjang Ramadhan  
 Keampunan-Nya terbuka siang dan malamnya  
 Pahalanya mencurah-curah bagaikan hujan lebat  
 Ia diganda-gandakan dibandingkan di bulan biasa  
 Rahmatnya melimpah ruah  
 Kepada sesiapa sahaja yang menginginkannya  
 Tapi mampukah kita memperolehi itu semua?  
 Layakkah kita mendapatkannya?  
 Kitakah orangnya yang memperolehi keistimewaan itu?  
 Kalaulah di bulan Ramadhan itu lahir kita sahaja yang meriah  
 Disambut pula dengan pesta makan minum  
 Fikiran dan jiwa kita tidak pun berubah  
 Maka keistimewaan Ramadhan bukan untuk kita  
 Keistimewaan itu adalah untuk orang yang bertaqwa

---

Selepas Asar  
30 - 12 - 1998

JAUHILAH dosa!  
Dosa adalah kemurkaan Tuhan  
Tinggalkanlah dosa kerana ia adalah hijab  
di antara hamba dengan Tuhan  
Larilah dari dosa!  
Kerana ia menghijab rahmat dari Tuhan  
Jangan sekali-kali buat dosa  
Di dalam perjuangan terhibab bantuan  
Kita akan berhadapan dengan dua kehinaan  
Kemurkaan Tuhan dan kekalahan  
Orang yang berdosa  
Orang yang sedang karam di dalam lautan  
Bukan senang hendak diselamatkan  
Orang yang berdosa  
Seperti ular besar yang sedang membelit seseorang  
Menunggu hendak ditelan  
Orang yang berdosa  
Laksana singa yang galak hendak menerkam  
Bukan senang hendak melepaskan diri dari cengkamannya  
Orang yang berdosa  
Seorang yang sedang dipeluk oleh seseorang yang hodoh  
Seluruh badan penuh dengan kudis  
Nanah dan darahnya sedang mengalir  
dengan ulat-ulatnya yang menjijikkan  
Baunya terlalu busuk, meloyakan tekak dibuatnya  
Sekali-kali jangan buat dosa  
Ia adalah perbuatan hina dan sangat memalukan  
Mungkin amal ibadah kita tidak ada nilainya di sisi Tuhan  
Tidak mengapa amal ibadah yang sedikit tapi tidak buat dosa  
Allah Taala tetap redha  
Apa ertinya ibadah banyak bersama dosa  
Tuhan tetap murka

---

Selepas Zuhur  
19 - 09 - 1999

## 153 | NAFSU PUAS TAPI JIWA DERITA

**E**NGKAU lepaskan kehendak nafsumu  
 Engkau rasa puas tapi ingat jiwamu tetap tidak puas  
 Hatimu tetap gelisah dan parah  
 Kerana hati tidak berbohong, bahkan tidak tahu berdusta  
 Mulut boleh berbohong, sikap kita boleh berpura-pura  
 Kita boleh berlagak macam orang tidak ada apa-apa masalah  
     demi menjaga wibawa  
 Tapi hatimu tidak boleh berpura-pura  
 Jiwamu tidak boleh berlagak macam orang tidak ada masalah  
 Masalah tetap tersimpan di dalam lubuk hatimu  
 Engkau tidak boleh melupakannya  
 Sebagai contoh, untuk memuaskan nafsu engkau maki ibumu  
 Tapi hatimu menjerit melolong merasa bersalah  
 Engkau tempeleng isterimu untuk memuaskan hati  
 Memuaskan hati itu istilah sahaja  
 Hatimu tetap menjerit kerana kesalahan itu  
 Engkau kata dan hina gurumu  
 Untuk memuaskan nafsu  
 Engkau rasa nafsu puas  
 Tapi jiwamu menjerit, jiwamu menderita,  
     hatimu menangis  
 Hati tidak boleh berbohong  
 Hati tidak pandai berlakon dan berdusta  
 Kalau yang betul dia tetap terasa betul  
 Yang salah tetap dia terasa bersalah  
 Hati satu-satunya anggota  
     yang tidak boleh menyorokkan hakikat kebenaran  
 Akhirnya engkau menderita  
     dengan kesalahan engkau sendiri  
 Walaupun luarnya semua engkau boleh berlakon  
     menutup-nutupnya

---

 Selepas Asar  
 27 - 09 - 1999

## TAKUTILAH DOSA KECIL ATAU BESAR

**T**AKUTILAH dosa, kecil atau besar  
Ia adalah bala bencana yang paling besar  
di dunia dan di Akhirat  
Kerana dosa-dosa terputus hubungan dengan Allah  
yang Maha Esa  
Kemurkaan Allah pun menimpa kita  
Dengan dosa-dosa terhibab kita dengan Allah  
yang Maha Berkuasa  
Tertolak doa kita, ibadah tidak ada lagi berharga  
Lantaran dosalah segala bentuk kesusahan  
dan yang menakutkan berlaku di dunia  
Sebagai hukuman kepada manusia  
Di Akhirat apatah lagi Neraka padahnya  
Penderitaan yang tiada bandingan dan tiada taranya  
Takutilah dosa walaupun sekecil-kecilnya  
Ia adalah menjadi hibab di antara hamba-hamba  
dengan Tuhannya  
Kerana dosa-dosa hamba-hamba Allah  
pemimpin yang zalim Tuhan beri kuasa  
Sebagai hukuman kepada mereka  
Agar manusia kembali kepada Tuhannya  
Dosa-dosa kecil dan besar adalah amat dahsyat  
Lebih dahsyat daripada segala bala bencana  
Jauhilah dosa kecil atau besar  
Apabila berlaku bertaubatlah segera  
Sebelum Tuhan membalas ke atas kita  
Jauhilah dosa, kerana ia adalah merupakan  
kemalangan yang paling besar dan dahsyat  
Prihatinlah dengan dosa  
Agar kita sentiasa mengawasinya  
Moga-moga kita terhindar darinya

## 155 | PANDANGLAH BESAR DOSA ITU

**P**ANDANGLAH dosa itu amat besarnya  
 sekalipun dosa kecil sahaja  
 Kerana kalau Allah tidak ampunkan ia tetap ke Neraka  
 Dosa adalah kemurkaan Tuhan  
 Selagi di dalam kemurkaan-Nya menjadi hijab  
 pada seseorang hamba  
 Oleh itu jika terbuat dosa  
 cepat-cepat memohon ampun kepada-Nya  
 Kalau tidak, ia tetap menjadi hijab  
 untuk mendapat hidayah daripada-Nya  
 Rahmat dan kasih sayang-Nya terputus darinya  
 Tapi mungkin kita tidak terasa  
 Selagi di dalam dosa, tetap di dalam kemurkaan Tuhan  
 Selama di dalam kemurkaan Tuhan,  
 segala yang diberi adalah istidraj dari-Nya  
 Atau sepanjang masa itu apa yang diberi  
 adalah di dalam kemurkaan-Nya  
 Apabila apa yang kita dapat di waktu kemurkaan-Nya  
 Segala apa yang kita miliki sudah hilang berkatnya  
 Bila sudah hilang keberkatannya  
 Ia akan menjadi bala kepada hamba-Nya  
 Ketenangan tidak ada, keharmonian rumah tangga hilang  
 Jiwa sentiasa sahaja hendak berang  
 Walaupun kaya, macam ada benda yang tidak ada  
 Sekalipun pandai jiwa panas, gelisah sahaja  
 Apa sahaja yang dibuat rasa serba tidak kena  
 Gelak ketawanya hanya pura-pura, bila keseorangan, jiwa  
 gelisah mula tiba  
 Keseronokannya hanya luar-luarnya sahaja,  
 dalam menderita  
 Begitulah kesan dari dosa  
 yang tidak dibersihkan

---

 Selepas Asar  
 27 - 09 - 1999



## PERINGKAT MANUSIA TERHADAP DOSA

ORANG-ORANG Islam terhadap dosa berbagai-bagai peringkat  
 Ada yang terlalu menjaga daripada membuat dosa  
 Sekalipun sekecil-kecilnya  
 Mereka itulah golongan Muqarrobin  
 Di kalangan mereka itu ada yang golongan Assiddiqin  
 Tapi sedikit sekali  
 Ada yang meninggalkan membuat dosa  
 Kecuali sedikit sangat daripada dosa-dosa kecil  
 Mereka itu golongan Solehin atau Ahlilyamin  
 Ada di kalangan mereka baru peringkat mujahadah dengan dosa  
 Adakalanya dapat ditinggalkan  
 Adakalanya terbuat juga  
 Tarik tali di antara meninggalkan dengan membuat  
 Adakalanya menang dan adakalanya kalah  
 Di waktu kalah itu masih merasa sedih  
 Golongan ini terpulanglah kepada Allah  
 Dia mengampunkan siapa yang Dia kehendaki  
 Ada golongan yang tidak dapat mengawal hawa nafsunya  
 Sentiasa saja membuat dosa  
 Bahkan dia membuat dosa dilupakannya dosa-dosa itu  
 Itulah golongan yang derhaka atau lalai  
 Ada satu golongan lagi mereka membuat dosa  
 Dia membuat dosa dengan bangga  
 Kerana bangganya selalu diceritakan kepada orang lain  
 Kalau ditegur sakit hatinya  
 Dia bertambah banyak lagi membuat dosa  
 Sanggup isytihar dia membuat dosa secara terang-terangan  
 Untuk menyakitkan hati orang yang menegurnya  
 Ini adalah golongan yang derhaka yang sombong  
 Adakalanya golongan ini jatuh kepada kekufuran  
 secara tidak sedar  
 Wal'iyazubillah

---

Menjelang tidur  
 05 - 11 - 1999

## 157 | TAKUT DENGAN DOSA

**O**RANG mukmin yang sejati itu  
 Jika terbuat dosa  
 Hatinya luka, punah, sedih dan derita  
 Jiwanya parah, dia tidak boleh melupakannya  
 sepanjang masa  
 Kalau anggota lahir, sudah tentu nampak berdarah  
 Kalaupun sembuh dari lukanya  
 Namun parutnya ada  
 Begitulah halus perasaan seorang hamba yang berdosa  
 Dia tidak boleh melupakannya sepanjang masa  
 Bagaimana dia boleh melupakannya  
 Kerana parutnya masih ada  
 Ertinya ingatannya kepada dosa tidak boleh dilupakan  
 Teringat sahaja jiwanya terseksa  
 Teringat sahaja hatinya derita  
 Payah sekali dia mahu melupakannya  
 Perasaan ini adalah anugerah dan nikmat dari Tuhannya  
 Takut dengan dosanya itu adalah buat syafaat kepadanya  
 Terseksa dengan dosa, derita dengan kesalahan  
 Dianggap oleh Allah itulah hukuman  
 kepada hamba-hamba-Nya  
 Moga di Akhirat kelak terlepas  
 Daripada seksa Neraka  
 Begitulah hati seorang mukmin  
 Sentiasa sahaja bergelora  
 Kerana takut dengan Tuhannya  
 Lebih-lebih lagi setelah terbuat dosa  
 Kalaulah Allah perlihatkan kepada manusia  
 Sudah tentu manusia akan mengatakan dia telah gila  
 Kerana keluh-kesahnya sentiasa bergelombang  
 di dalam jiwanya  
 Kerana takut sangat dengan Tuhannya

---

 Selepas Zuhur  
 11 - 11 - 1999

158 | **APABILA ALLAH MURKA**

**A**PABILA Allah telah murka pada seseorang  
Selalu dia melupakan dosa  
Apabila membuat dosa jiwa tidak menderita  
Apabila membuat baik kecil sahaja terasa besar  
Membuat kebaikan berat terasa  
Apabila membuat kesalahan, tidak terasa apa-apa  
Kalaupun teringat, mudah sahaja padanya  
Allah Maha Pengampun  
Mudah sahaja meringan-ringan dengan dosa  
Setiap percakapan, sikap, perbuatan nampaknya sombong  
tapi tidak terasa  
Apabila diingatkan mengapa tidak buat begini  
dan tidak buat begitu  
Ada sahaja jawapannya  
Jawapan hendak mengelak bukan hendak bertindak  
Dengan syariat makin ke hujung, makin longgar  
Dengan anak-anak dan isteri masing-masing jaga diri  
Kuliah-kuliah, nasihat, usrah-usrah di rumah  
sudah tiada lagi  
Tapi rajin membuat motivasi di luar rumah  
Kalau orang tidak tahu, wah dia pejuang yang gigih  
Anak-anak isteri terbiar, bertempiran tidak tentu arah  
Itulah tandanya membuat motivasi kerana kehidupan  
Bukan kesedaran beragama, untuk keredhaan Tuhan

---

Selepas Isyak  
20 - 10 - 1998

## 159 | KENANGLAH DOSA YANG LALU

**K**ENANGKANLAH dosa-dosa yang lalu  
 dan mohon ampun kepada Tuhan  
 Kerana Tuhan tidak melupakannya  
 Awas, janganlah membuat dosa di masa depan  
 Kerana di waktu ini kita mungkin hampir kepada Tuhan  
 Sepatutnya makin hampir kepada Tuhan,  
 makin bersih daripada dosa  
 Jagalah masa yang sudah tinggal sedikit  
 Isilah dengan perkara-perkara yang memberi faedah  
 Tanda kita menyesal dengan masa yang sudah  
 Ingatlah Tuhan setiap waktu  
 Kerana kematian kita tidak tahu  
 Jika tiba kematian, kita tidak lupa dengan Tuhan  
 Janganlah menzalimi manusia kerana penzaliman  
 di dunia lagi dibalas oleh Tuhan  
 Apatah lagi di Akhirat, memang tidak lepas  
 daripada hukuman  
 Buatlah berbagai-bagai bentuk kebaikan  
 sekalipun kecil kerana ia lebih ikhlas  
 Selalunya kita lupakan  
 Kerana amal kebaikan disuruh lupakan  
 Tapi amal kejahatan kenalah kita ingatkan  
 Agar kita menyesal dan bertaubat  
 Siap-siagalah selalu berhadapan dengan kematian  
 Kerana kematian itu bila-bila masa boleh berlaku  
 Dan kedatangan mati tidak pilih umur  
 Dan janganlah kita berangan-angan  
 untuk panjang umur

---

Menjelang tidur  
08 - 10 - 1999

TANGISILAH dosa-dosa  
Agar air mata berguguran  
Gugurnya air mata boleh menggugurkan dosa-dosa  
Sekaligus boleh memadamkan api Neraka  
Takutilah Allah dengan sepenuh hati  
Ia akan menjadi syafaat di Akhirat nanti  
Jangan putus asa dengan banyaknya dosa  
Sebanyak mana pun dosa Allah akan ampunkan  
Asalkan *surrender* dan berjuang kepada-Nya  
Iringilah kejahatan itu dengan kebaikan  
Ia akan menghapuskan dosa-dosa  
Menyesallah di atas keterlanjuran  
Jangan ulang lagi apa yang telah dilakukan  
Beristiqamahlah dengan kebaikan  
Muhasabahlah selalu setelah dilakukan  
Berdoalah selalu, agar mendapat pimpinan-Nya

---

Selepas Asar  
27 - 11 - 1998

## MELUPAKAN DOSA ADALAH SATU DOSA

**M**ELUPAKAN dosa adalah satu dosa  
 Kemudian tidak pun takut dengan dosa  
 yang telah dibuat adalah satu dosa pula  
 Kalau berbangga dengan dosa itu lebih-lebih lagi  
 kesalahan itu bertambah membesar  
 Dosa itu bertambah besar dan bertimbun-timbun pula  
 Jika tidak takut dengan dosa sekalipun belum berbuat  
 pun satu dosa satu kesalahan  
 Yang belum melakukannya satu kesalahan juga  
 Dosa itu bukan kerana sudah membuat kesalahan atau dosa  
 Tapi kerana tidak takut atau tidak bimbang terbuat dosa  
 adalah satu kesalahan pula  
 Sebagai seorang hamba sepatutnya sentiasa takut  
 dengan dosa  
 Sekalipun belum terbuat dosa  
 Begitulah sifat seorang hamba yang sepatutnya  
 Apatah lagi setelah membuat dosa  
 Lebih-lebih lagi takutnya membara  
 dan jiwanya keluh-kesah dan hatinya dukacita  
 Melupakan dosa, tidak takut dengan dosa yang dibuat  
 Dan tidak takut dengan dosa yang belum dibuat  
 Adalah seorang hamba yang sombong dan angkuh  
 Kerana dia telah membuang sifat kehambaannya  
 Membuang sifat kehambaan adalah satu kesombongan  
 Sombong bererti membesarkan diri  
 Membesarkan diri adalah satu kesalahan atau satu dosa  
 Kerana dia telah mengambil sifat Tuhan  
 Yang tidak sepatutnya dia memakai sifat itu  
 Itu adalah pantang larang Tuhan yang tidak patut dipakai  
 oleh seorang hamba

## TIDAK BIMBANG DENGAN DOSA ADALAH DOSA

**E**NGKAU tidak bimbang akan berlakunya dosa  
di masa-masa depan  
Itulah menunjukkan engkau telah berdosa  
Kerana engkau yakin dengan diri engkau sendiri,  
bahawa engkau akan selamat dengan dosa dan kesalahan  
Yakin engkau dengan diri engkau itu  
engkau sudah tidak beradab dengan Tuhan  
Sepatutnya engkau mengharapkan pemeliharaan  
dari Tuhan terhadap diri engkau  
Sebenarnya engkau mana ada kuasa  
Kerana itulah engkau perlu kepada penjagaan dari Tuhan  
Tuhanlah yang boleh menjaga diri engkau dan diri kita semuanya  
Perlunya kepada Tuhan itu amat penting  
Ini menunjukkan kelemahan kita dan ingin pertolongan Tuhan  
Rasa seumpama ini adalah sangat disukai oleh Allah  
Kerana kita masih dapat mengekalkan rasa kehambaan  
Tuhan sangat suka seseorang hamba itu dapat merasa kehambaan  
Seorang hamba dia tidak boleh rasa aman  
Dia sepatutnya selalu bimbang jika terbuat dosa  
atau melakukan kesalahan  
Dia selalu runsing dengan kelemahannya dan kecuaianya  
Bila-bila sahaja dia boleh melakukan kesalahan dan kesilapan  
Begitulah sifat orang mukmin itu,  
dia tidak pernah merasa aman  
Kerana itulah rasa bertuhan begitu menebal  
Dia mengharap selalu hidayah dan taufik dari Tuhan  
Dia tidak merasa selamat tanpa Tuhan  
Kerana itulah Tuhan sentiasa dalam ingatannya  
Dia yakin Tuhan sahaja yang boleh menyelamatkannya  
Memang Tuhan itu salah satu sifatnya  
adalah penyelamat

---

Selepas Asar  
29 Muharam 1421H

## 163 | AKU SEDIHKAN DOSA YANG LALU

**H**ATIKU tidak susah di waktu aku dihina  
 Aku tidak bersedih di waktu aku menderita  
 Aku tidak sedih di waktu aku disisih  
 Jiwaku tidak menderita ketika aku ditohmah  
 dan difitnah  
 Aku tahu itu semua pembersihan dosa  
 Tapi aku sedihkan dosa-dosaku yang kulakukan  
 Orang yang macamku ini sudah pasti  
 tidak terlepas daripadanya  
 Yang aku sedihkan kesalahan dan kesilapanku  
 Bahkan dosa-dosaku itu setiap hari memburuku  
 Aku takut pintu Syurga tertutup bagiku  
 Pintu Neraka terbuka untuk aku  
 Aduh! Tuhan, tidak ada erti kekayaan, kesenangan  
 Kalau dosa tidak diampunkan  
 Itulah yang mengganggu aku selalu wahai Tuhan  
 Jiwaku tidak tenang dibuat oleh dosa  
 Dosa-dosa itulah yang mengganggu fikiranku  
 Tuhan, maafkan aku!  
 Tuhan, ampunkan aku!  
 Kalaupun bukan dengan rahmat-Mu,  
 tapi dengan kemaafan-Mu

---

Selepas Subuh  
 15 - 05 - 1997  
 (07 Muharam 1418H)



**T**UHAN! Dosa memburu di mana-mana sahaja  
 Ia memburu tidak kira masa dan tempat  
 Sasaran buruannya adalah manusia  
 sebagai hamba-hamba-Mu  
 Aku adalah salah seorang buruannya  
 Aku selalu sahaja menjadi mangsanya  
 Dosa ibarat semut berada di mana-mana  
 dan setiap masa ada  
 Siapalah yang dapat melarikan diri  
 daripada buruannya  
 Kalau kita berhati-hati pun tidak dapat dielak  
 daripada digigit semut  
 Betapalah kita tidak mempedulikannya  
 lebih-lebih lagi menjadi sasaran serangannya  
 yang lebih lagi kerap berlaku  
 Aku sedih Tuhan, aku bimbang selalu  
 Jiwaku tidak tenang, gelisah selalu  
 Bukan sahaja dosa-dosa menimpa aku di jalan-jalan,  
 di pasar-pasar, bahkan di rumah  
 dan di masjid pun berlaku  
 Di dalam sembahyang pun dosa memburu aku  
 Waktu berpuasa, membaca Al Quran,  
 bercakap tentang ilmu  
 Bahkan sedang memperkatakan tentang dosa  
 pun terjatuh di dalam dosa  
 Aduh di mana aku hendak lari dari dosa Tuhan!  
 Dosa ibarat semut berada di mana-mana  
 dan berada di setiap masa  
 Kalau di dalam sembahyang,  
 di waktu membaca Al Quran,  
 di dalam majlis ilmu dosa tetap memburu aku  
 Bagaimanakah jiwa aku mahu tenang

Bagaimana aku mungkin boleh terlepas  
daripada kebimbangan?!

Justeru itu lepas sembahyang aku bimbang  
Selepas membaca Al Quran aku tidak tenang  
Bahkan selepas bangun tidur pun  
Aku merasakan aku sedang diburu dosa  
Aduh kalau bukan dengan rahmat-Mu Tuhan  
Aku pasti binasa

---

9.50 pagi  
Selepas ekspedisi  
07 - 12 - 2001

## KEMUNGKARAN WAJIB KITA TAKUT

KEMUNGKARAN dan maksiat wajib kita takut  
Kita mesti cemburu selalu dengan kemungkaran  
dan maksiat itu  
Justeru itulah jalan-jalan dan lorong-lorongnya  
kena kita tutup dan sekat  
Menjaga dari penyakit lebih baik dari mengubat penyakit  
Penyakit rohani lebih merbahaya dari penyakit jasmani  
Penyakit jasmani penghapusan dosa  
Penyakit rohani membawa ke Neraka  
Awaslah dengan penyakit rohani!  
Kerosakannya merata, merbahayanya  
menjerumuskan orang ke Neraka  
Ia merosakkan agama, bangsa dan negara  
Jika dibiarkan gejala masyarakat bermaharajalela  
Di waktu itu pembangunan akan sia-sia belaka  
Kemajuan tidak mempunyai erti apa-apa  
Kerana pembangunan insan jatuh tertiarap separas bumi  
Insan lebih penting dari kemajuan dan pembangunan benda  
Apabila insan telah rosak, kemajuan dan pembangunan  
akan menjadi alat perosak  
Yang menggerakkan pembangunan  
dan kemajuan adalah insan  
Jika insan telah rosak, pembangunan  
dan kemajuan akan disalahgunakan  
Bangunkanlah insan sebelum membangunkan  
kemajuan dan pembangunan

---

Selepas Asar  
30 - 05 - 1997

## 166 | PILIHLAH ANTARA DUA JALAN

**D**I HADAPAN kita ada dua jalan, pilihlah!  
 Satu ke Syurga, satu lagi ke Neraka  
 Kedua-duanya itu jalannya jelas,  
 tidak ada kesamarannya  
 Terpulanglah kepada kita memilihnya  
 Jalan ke Syurga ditabur orang dengan duri, batu kerikil,  
 ranjau-ranjau yang menyusahkan  
 Jalan ke Neraka dihampar orang  
 dengan permaidani empuk  
 Di kiri kanan jalan ada gerai-gerai makanan  
 yang lazat rasanya  
 Melihat sahaja sudah mengiurkan  
 Belum lagi memakannya, wah lazatnya  
 Dialu-alukan pula oleh gadis-gadis cantik  
 Melambai-lambai kedatangan kita  
 Mengiringi perjalanan kita  
 Sedangkan jalan ke Syurga tidak ada makanan  
 di kiri kanannya  
 Jauh sekali gadis-gadis manis mengalu-alukan  
 Apa yang ada hutan kiri dan kanan  
 Tidak ada satu pun yang menarik  
 dan yang menggembirakan  
 Perlu diingat dia telah diberitahu  
 Di hujung Neraka gaung yang dalam,  
 yang mengeri dan menyeksakan  
 Siapa menempuh jalan itu pasti terjatuh  
 ke gaung yang menakutkan  
 Di hujung jalan ke Syurga pun telah diberitakan  
 Ada taman yang indah, istana mewah  
 Makanan yang lazat rasanya  
 Gadis-gadis cantik yang menunggunya  
 Siapa menempah jalan ke Syurga,  
 menderita dahulu, senang kemudian

Siapa menempuh jalan ke Neraka,  
senang dahulu, menderita kemudian  
Pilihlah mana satu  
Kedua-dua jalan terbentang  
di hadapan kehidupan kita  
Kedua-dua jalan sangat jelas  
tidak ada kesamarannya  
Terpulanglah kepada kita,  
pilihlah mana yang kita suka

## JALAN KE SYURGA DAN JALAN KE NERAKA

**D**I AKHIRAT, Tuhan wujudkan Syurga dan Neraka  
 Untuk manusia yang dihidupkan lebih dahulu di dunia  
 Di dalam diri manusia kejadian semulajadi ada dua anasir  
 Ada anasir-anasir baik, ada anasir-anasir jahat  
 Ada benih-benih baik, ada benih-benih jahat  
 Untuk kebaikan ada jalan-jalannya,  
     untuk kejahatan ada jalannya  
 Itulah keadilan Tuhan pada manusia  
 Sesiapa yang berjaya menyuburkan anasir-anasir kebaikan  
 Mereka akan menempuh jalan kebaikan,  
     ke Syurgalah tempatnya  
 Sesiapa yang berjaya menyuburkan  
     anasir-anasir kejahatannya  
     ke Neraka pula tempatnya  
 Manusia bolehlah pilih mana satu anasir-anasir  
     yang hendak disuburkan  
 Maka ramailah manusia menyuburkan  
     anasir-anasir kejahatan  
 Ramailah mereka ke Neraka  
 Sedikit sekali manusia yang menyuburkan  
     anasir-anasir kebaikan  
 Sedikit sangat manusia yang ke Syurga  
 Rupanya menyuburkan anasir-anasir kejahatan  
     lebih mudah  
 Kerana menyuburkan tanpa perlu kepada mujahadah  
 Tapi menyuburkan anasir-anasir kebaikan  
     perlu kan mujahadah  
 Kerana itulah manusia membuat kebaikan  
     amat susah

**A**S SIRATAL Mustaqim jelas sekali,  
 tiada samar-samarnya  
 Macam *highway* yang lurus, terbentang luas,  
 menuju ke destinasiya  
 Jalannya yang cantik dan indah itu  
 Senang mata memandang, sangat meyakinkan  
 Setiap orang sepatutnya ingin berjalan di atasnya  
 Justeru ia sangat menyelamatkan  
 Aneh sekali ramai orang yang berjalan di atasnya  
*accident* selalu  
 Tidak kurang yang jatuh di kiri kanan  
 di dalam gaungnya  
 Yang melanggar dinding jalan pun  
 tidak kurang ramainya  
 Kemudian keretanya terjatuh di tengah jalan  
 mengganggu orang yang lalu pula  
 Mengapa terjadi ini semua?!  
 Di mana salahnya?!  
 Apakah jalannya yang salah atau orangnya?!  
 Jalan tiada salahnya  
 Ia jalan yang lurus, di atasnya bersih  
 daripada segala yang merbahaya  
 Tanahnya pula amat teguhnya  
 Tiada lekak-lekuk, tiada batu kerikil  
 yang mengganggu orang yang lalu  
 Tapi mengapa kereta jatuh?!  
 Kenapa *accident* selalu?!  
 Jalannya memang lurus  
 Orang yang membawa kereta,  
 tidak berjalan lurus  
 Tidak kurang yang memandang kiri kanan  
 yang mempesona

Disiplin jalan raya tidak diendahkan  
 Maka terjadilah rempuh-merempuh  
 Atau terjatuh di dalam jurang di kiri kanannya  
 Begitulah syariat Islam itu amat cantiknya  
 Ia ibarat jalan yang lurus  
 Cantik, menarik, selesa dan meyakinkan  
 Tapi penganutnya tidak berlaku lurus  
 Tidak mengikut disiplin syariatnya  
 Tidak kurang yang terpengaruh  
     oleh dunia di sekelilingnya  
 Yang mempesona penganut-penganutnya  
 Yang menggamit-gamit bak gadis cantik  
     yang mempesona  
 Maka tersesatlah mereka di atas jalan  
     yang lurus tadi



## JANGAN MUDAH MENGHINA ORANG

JANGAN mudah menghina orang  
Jangan mudah menjatuhkan air mukanya  
Jangan mudah memalukan orang  
Lebih-lebih lagi jangan mudah menghukum  
dan menyeksanya  
Jauhilah menzalim orang  
Kalau boleh tolonglah orang yang kena zalim  
Ingatlah kita semuanya makhluk Allah  
Ciptaan-Nya, semua di dalam kuasa-Nya  
Kita hidup di dunia ini ibarat roda  
Sekali di atas sekali di bawah  
Bukan istimewa sepanjang masa  
Sekali-sekala tercium juga tahi lembu  
Terpijak juga kekotoran dan najis-najis yang menjijikkan  
Hendaklah kita takut kepada Allah setiap waktu  
Agar kita insaf dan sedar selalu  
Bahawa kita adalah hamba yang hina  
Dijadikan daripada air yang hina dan menjijikkan  
Moga-moga dengan itu kita tidak menjadi manusia  
yang menzalim dan menghina

---

Selepas Asar  
22 - 09 - 1999

## MARI BERSAMA MUHASABAH DIRI

**W**AHAI insan di waktu engkau menghina  
 Sedarkah engkau itu siapa?  
 Wahai manusia di waktu engkau menzalim  
 Tahukah engkau, siapakah engkau sebenarnya?  
 Wahai hamba Allah di waktu engkau seronok  
 memalukan orang  
 Engkau fahamkah siapa diri engkau?  
 Engkau yakinkah, hidup istimewa sepanjang masa?  
 Yakinkah engkau hidup luar biasa sepanjang hidup?  
 Di waktu melakukan sewenang-wenang di dunia  
 Tidak teringatkah engkau juga makhluk Allah?!  
 Dirimu juga di dalam kekuasaan-Nya  
 Tidak takutkah kamu kepada-Nya?  
 Satu masa nanti engkau akan mati?!  
 Engkau akan pergi ke Akhirat  
 Di sana ada Syurga dan Neraka  
 Apakah kamu yakin, perbuatanmu itu  
 akan pergi ke Syurga?  
 Marilah kita bersama muhasabah diri  
 Agar menjadi hamba Allah yang sejati

171 | AMPUNILAH DOSA KAMI

**A**MPUNKAN dosa kami Tuhan!  
Kami selalu membuat dosa  
Maafkan kami Tuhan!  
Agar selamat kami dari Neraka

Anugerahkanlah kami taubat Tuhan!  
Engkau adalah penerima taubat  
Kami tidak mampu masuk Neraka-Mu  
Kerana azabnya gerun dan dahsyat tidak terperikan

Dengan rahmat-Mu ampunkanlah kami  
Atau dengan kemaafan-Mu ampunkanlah kami  
Kalau Engkau azab kami,  
Kami kan hamba-Mu jua Tuhan

Engkau ampunkan kami, kebesaran-Mu tetap tidak jejas  
Engkau ampunkan kami, keagungan-Mu tetap tidak tergugat  
Kerana tiada siapa yang boleh menggugat  
Kerana setiap itu adalah ciptaan-Mu

Kami sentiasa mengharap, kami sentiasa meminta  
Kami tidak akan putus asa dengan-Mu selama-lamanya  
Kami tidak jemu-jemu meminta  
Hinggalah dengan rahmat-Mu dosa kami Engkau ampunkan

## JADIKANLAH DERITA JIWAKU SYAFAAT BUATKU

**E**NGKAU tahu kesedihanku  
 Kerana dosa-dosaku yang aku lakukan  
 Adakalanya jiwa tidak tenang  
 Tapi orang tidak tahu  
 Aku menyembunyikannya dari orang  
 Kalau mereka tahu, sudah tentu ikut derita  
 Biarlah aku tanggung sendiri  
 Dengan mereka, mukaku tetap ceria  
 seolah-olah tidak ada apa-apa  
 Seolah-olah jiwaku tidak terganggu  
 Mereka menyangka aku orang yang paling bahagia  
 Matakु jarang menangis, tapi hati menangis selalu  
 Selalu sahaja aku ingat mati, bagaimana kesudahannya  
 aku tidak tahu  
 Apakah aku selamat, menempuh ujian ini  
 Apabila mengenangkan ibadahku  
 Tidak sebanyak ibadah para Sahabat  
 Apakah yang menjamin aku selamat  
 Apabila mengenangkan rahmat-Mu luas sekali  
 Jiwaku yang bergelora reda sedikit  
 Aku harap kepada-Mu Tuhan,  
 derita jiwaku dengan dosa-dosaku  
 Jadikanlah syafaat buat aku di Akhirat  
 Itulah bekalanku menemui-Mu  
 Namun ibadah memanglah tidak sampai ke mana

173

## **MATIKAN AKU WAKTU BERTAUBAT**

**Y**A ALLAH! Matikan aku di waktu aku bertaubat  
Atau matikan aku di waktu di dalam mengerjakan kebaikan  
Atau matikan aku di waktu aku takutkan-Mu  
Atau matikan aku di dalam aku merindui-Mu  
Di waktu Engkau redha, ambillah aku  
Jangan Engkau ambil di waktu Engkau murka  
Tuhan, aku adalah hamba-Mu  
Memerlukan pimpinan  
Pimpinlah aku ke jalan kebenaran  
Tuhan! Di waktu orang mengejar dunia  
Biarlah dunia mengejar aku  
Aku akan mengenakan syarat-syaratnya  
Kalau dia mahu, aku akan menerimanya  
Kalau dia menolaknya aku persetan sahaja

---

Selepas Asar  
04 - 11 - 1998

## ALLAH SUKA HAMBA YANG BERTAUBAT

**A**LLAH Taala sangat suka apabila seseorang membuat dosa  
 menyesal dan memohon ampun  
 Kemudian dosa-dosa ini tidak pernah digunakannya  
 seumur hidupnya  
 Dia terasa terseksa dengan dosa-dosa yang telah berlaku  
 Adakalanya mengenangkan dosa air matanya  
 menitis berguguran  
 Begitu juga Tuhan sangat suka pada seseorang  
 apabila membuat kebaikan, dilupakan  
 Dia merasakan tidak pernah berbuat dan melakukan  
 Yang dia anggap belum berbuat,  
 yang dia rasa adalah hamba yang berdosa  
 Tuhan juga suka apabila orang membuat baik kepadanya,  
 tidak dilupa  
 Ingin membalas jasanya atau mendoakan  
 Juga kesalahannya kepada orang tidak pernah dilupakan  
 Dia teringat sepanjang masa  
 Bahkan dengan kesalahannya itu jiwanya terseksa dan menderita  
 Dia memohon maaf kepada orang ini  
 Kalau orang itu sudah tidak mungkin ditemuinya  
 Dia doakan selalu, kalau dia membuat kebaikan  
 pahalanya dihadiahkan kepadanya  
 Begitulah juga Tuhan sangat suka kepada seseorang hamba  
 yang merasa dirinya hina  
 Hina dengan kejadian, hina dengan kelemahan,  
 hina dengan kecuaiian, hina dengan dosa-dosanya  
 Hinggakan kebbaikannya sudah tidak lagi dilihatnya  
 Yang dilihat dosa-dosanya dan kesalahan-kesalahannya  
 Yang dia lihat adalah kelemahan dan kelalaiannya  
 Hingga tidak ada lagi ruang hatinya untuk bergembira  
 Kerana hatinya telah dipenuhi dengan dukacita

---

Menjelang tidur  
 11 - 10 - 1999

175 **BERSEGERALAH BERTAUBAT**

**M**ARILAH kepada-Ku wahai hamba-hamba-Ku  
 Bersegeralah pulang ke pangkuan-Ku  
 Bersegeralah bertaubat selalu  
 Aku tetap menerimamu, percayalah  
 Aku tahu kamu hamba-hamba-Ku, ciptaan-Ku  
 Kamu adalah lemah, kelalaian dan kealpaan adalah watakmu  
 Aku mahu akuilah kelemahan itu  
 Setiap kali bersalah kamu datang pada-Ku  
 Kemudian mengakulah bersalah  
 Menangislah di depan-Ku tanda penyesalan yang tidak sudah  
 Kalau engkau lakukan lagi tanpa nawaitu  
 Datang lagi kepada-Ku  
 Mengakulah salah  
 Menyesallah, merintihlah, menangislah  
 Ketahuilah wahai hamba-hamba-Ku  
 Rintihan orang yang berdosa  
 Lebih Aku cintai daripada tasbih para auliya'  
 Wahai hamba-hamba-Ku  
 Jangan bertangguh-tangguh lagi  
 Siapalah yang tidak bersalah  
 Kamu adalah hamba  
 Tapi Aku suka orang yang mengaku salah  
 Aku cinta kepada orang yang bertaubat  
 Minta ampunlah kepada-Ku wahai hamba-hamba-Ku  
 Aku tetap menerimamu  
 Bukankah Aku Tuhanmu  
 Kasih-Ku kepada hamba-hamba-Ku  
 Lebih daripada seorang ibu yang kasih kepada anak-anaknya  
 Begitu lah kehendak Allah kepada hamba-hamba-Nya  
 Mengikut keterangan Al Quran dan As Sunnah

---

Selepas Subuh  
 30 - 04 - 1997

## 176 | AKU PERLUKAN PIMPINAN-MU

**Y**A ALLAH! Ya Tuhanku  
 Aku perlu kepada pimpinan-Mu  
 Di atas jalan yang lurus  
 Tidak mungkin aku boleh hidup tanpa pimpinan-Mu  
 Aku mengadu kepada-Mu Tuhan!  
 Tidak mungkin aku terlepas daripada salah dan silap  
 Tapi apa yang aku harap pada-Mu Tuhan  
 Di waktu aku mendapat kesenangan,  
     ingatkan aku bahawa nikmat itu daripada-Mu  
 Agar aku bersyukur kepada-Mu di atas nikmat itu  
 Ketika aku mendapat ujian kesusahan,  
     ingatkan aku bahawa itu adalah hukuman ke atas diriku  
 Di atas dosa-dosa dan kesalahan-kesalahan yang aku buat  
 Agar aku bertaubat dan bersabar di atas ujian-ujian itu  
 Masukkanlah ke dalam hatiku  
 Aku tenang dengan kehidupan dunia,  
     dan aku bimbang dengan kehidupan Akhirat  
 Masukkanlah juga ke dalam hatiku,  
     Engkaulah yang paling aku cinta dan takut  
 Selain Engkau adalah cinta sampingan,  
     dan takut fitrah semata-mata  
 Tuhan! Di dalam memimpin,  
     Engkau pimpinlah aku lebih dahulu  
 Supaya pengikut-pengikut aku dapat aku pimpin



## I HARAPANKU PADA-MU

KUHARAP pada-Mu Tuhan  
Di waktu kulalai, ingatkan aku  
Ketika aku beramal, ikhlaskan hatiku  
Agar amalku diterima  
Di masa aku diuji, kuatkan jiwaku  
Agar aku sabar menerima ujian itu  
Supaya iman aku tidak terkorban  
Di waktu-waktu aku senang  
Jangan lalaikan aku, agar aku bersyukur  
Masukkanlah ke dalam hatiku cinta dan takut pada-Mu  
Supaya aku tidak cinta dan tidak takut selain dari-Mu  
Hiburkanlah hatiku selalu dengan mengingati-Mu  
Engkau sangat aku perlu  
Janganlah tinggalkan aku  
Engkau adalah hidup matiku  
Janganlah biarkan aku  
Pimpinlah aku selalu  
Agar hidup matiku, mendapat keredhaan-Mu

---

Menjelang Tidur  
05 - 08 - 2001

## 178 | MANUSIA DITIMPA PENYAKIT JIWA

**D**I AKHIR zaman banyak manusia ditimpa penyakit jiwa  
 Jiwa tidak tenang sekalipun sudah berkuasa dan kaya  
 Sudah ternama, sudah berglamour, sudah dikenal  
 Di waktu itu segala yang dimiliki  
 tiada memberi faedah apa-apa

Duduk di rumah gelisah, duduk di pejabat resah  
 Salah sedikit orang lain, mudah marah-marah  
 Segala yang dilihat tiada yang indah  
 Fikiran berserabut, jiwa parah

Yang tiada beriman bunuh diri  
 Yang lemah iman terlibat dengan bermacam-macam jenayah  
 Rasuah, arak, judi, zina, menzalim manusia  
 Di dalam rumah tiada ukhwah, tiada harmoni, tiada sekata

Mereka ditimpa neraka dunia  
 Sebelum Neraka di Akhirat sana  
 Aduh kalau di dunia tiada bahagia  
 Apakah di Akhirat nanti dapat bahagia

Pada Tuhan ada kebahagiaan, pada Tuhan ada ketenangan  
 Serahlah diri kepada-Nya, redhalah dengan ketentuan-Nya  
 Buanglah mazmumah, hiasilah diri dengan mahmudah  
 Di sinilah rahsia kebahagiaan, di sinilah rahsia keindahan

## MANUSIA KEHILANGAN KEBAHAGIAAN

DI ANTARA yang sudah hilang di sisi manusia ialah kebahagiaan  
 Orang kaya sudah hilang kebahagiaan,  
 orang miskin pun sudah hilang kebahagiaan  
 Orang yang berilmu sudah tidak bahagia  
 orang jahil pun tidak bahagia  
 Yang ada nama dan glamour pun tidak ada bahagia  
 yang tidak ada pun tidak ada bahagia  
 Orang yang berpangkat pun sudah kehilangan kebahagiaan,  
 yang tidak ada pangkat pun sudah kehilangan kebahagiaan  
 Kerana kebahagiaan itu adalah makanan jiwa  
 Kalau tidak ada manusia menderita  
 Setiap insan berusaha mencari  
 Orang bandar pergi ke kampung mencari bahagia  
 Orang kampung pergi ke bandar mencari bahagia  
 Yang tinggal di tepi laut pergi ke darat mencari bahagia  
 Orang yang tinggal di darat pergi ke tepi laut mencari bahagia  
 Bahkan berbagai cara manusia mencari bahagia  
 Ada yang pergi ke hutan ada yang pergi melihat air terjun  
 Ada yang pergi ke padang pasir,  
 ada yang pergi ke tempat banyak bahaya  
 Bahkan ada orang yang mendaki gunung menurun lurah  
 hingga terjatuh  
 Namun kebahagiaan tidak juga diperolehi  
 Manusia lupa kebahagiaan itu bukan benda luaran  
 Kebahagiaan itu ada di dalam diri manusia itu sendiri  
 Hidupkan hati rasa bertuhan, bangunkan jiwa rasa kehambaan  
 Cintakan Tuhan setiap ketika dan masa  
 Sembah, sanjung dan besarkan Dia setiap masa  
 Jadikan Tuhan kawan setia  
 Bawa dia ke mana-mana dan meminta  
 dan bermanja-manjalah dengan-Nya  
 Itulah dia rahsia kebahagiaan  
 setiap insan

---

Menjelang Maghrib  
 21 - 02 - 2000

## MANUSIA TERCARI-CARI KEBAHAGIAAN

**K**EBAHAGIAAN adalah penyelamat hidup manusia  
 Ingin kan kebahagiaan adalah fitrah semula jadi setiap insan  
 Kehilangan kebahagiaan pada manusia ertinya kehilangan  
 segala-galanya sekalipun ada pangkat dan harta  
 Walaupun begitu manusia tidak pandai mencari kebahagiaan  
 Padahal anak kunci kebahagiaan itu apabila dapat Tuhan  
 dan mencintai-Nya  
 Kehilangan Tuhan ertinya kehilangan kebahagiaan  
 sekalipun segala-galanya ada  
 Hari ini hampir semua manusia di dunia kehilangan kebahagiaan  
 Kerana itulah manusia setiap bangsa mencari-cari kebahagiaan  
 Sedangkan dunia telah membangun, maju dan bertamadun  
 Namun manusia tidak dapat juga kebahagiaan  
 Orang-orang Barat pergi ke Timur dan orang-orang Timur  
 pergi ke Barat mencari kebahagiaan  
 Orang kampung pergi ke bandar, orang bandar pergi ke kampung  
 Namun kebahagiaan belum juga diperolehi  
 Orang darat pergi ke laut, orang laut pergi ke darat  
 Yang dicari belum juga dapat  
 Akhirnya manusia pergi ke hutan-hutan, ke gunung-gunung  
 Namun kebahagiaan makin jauh  
 Yang lebih hebat dari itu pergi ke Kutub Utara  
 dan ke Kutub Selatan  
 Mencari kebahagiaan yang belum jumpa-jumpa  
 Padahal kebahagiaan itu ada di dalam diri manusia itu sendiri  
 Iaitu hidupkan jiwa rasa bertuhan  
 Jadikan Tuhan cinta agung  
 Jadikan Tuhan idola dan tempat rujuk segala perkara  
 Di sinilah rasa kebahagiaan akan diperolehi  
 Bukan di hutan, bukan di gunung  
 dan bukan di mana-mana

---

Selepas Asar  
 20 Muharam 1421H

## TENANG DAN BAHAGIA PAYAH DIDAPAT

UNTUK mendapat kesenangan mudah  
 Untuk mendapat ketenangan amat payah  
 Mendapatkan harta atau kekayaan mudah sahaja  
 Tapi untuk mendapatkan kebahagiaan sangat susah  
 Untuk kemudahan hidup tidaklah terlalu payah  
 Namun untuk mendapatkan ketenangan dan kebahagiaan,  
 jauh sekali apa yang diharapkan  
 Kesenangan adalah perkara luaran, tidak mesti tenang  
 Kemudahan hidup juga adalah perkara lahiriah,  
 tidak mesti bahagia  
 Tenang dan bahagia adalah perkara dalaman  
 Tenang dan bahagia adalah sifat hati atau jiwa  
 Tenang dan bahagia tidak mungkin dapat dari harta  
 Atau didapati melalui pangkat, nama dan glamour  
 Bahkan orang yang berharta, berpangkat,  
 ada nama dan glamour  
 Selalu sahaja sakit jiwa  
 Hidup gelisah, resah dan keluh-kesah,  
*effectnya* marah-marah  
 Tenang dan bahagia itu adalah cintakan  
 Zat yang Maha Agung  
 Tuhan pencipta manusia, yang mempunyai  
 segala-galanya  
 Siapa yang dapat mencintai-Nya tidak ada kecewanya  
 Mencintai-Nya tidak menjemukan  
 Mencintai dunia dan nikmatnya  
 sudah tidak ada ertinya  
 Kerana Tuhan itu adalah segala-galanya  
 Mendapatkan Tuhan ertinya  
 mendapatkan segala-galanya

---

Selepas Zuhur  
 21 - 11 - 1999

## 182 | BAHAGIA ITU MAKNAWI

**B**AHAGIA itu maknawi juga bersifat rohaniah  
 Rasa senang bukan bahagia sekalipun ia berharta  
 Kerana semua itu bersifat lahiriah  
 Ia bukanlah hakikat bahagia  
 Tenang itulah tanda bahagia  
 Tiada tenang kan keluh kesah  
 Bila tiada kebahagiaan hidup penuh kepuraan  
 Mazmumah punca tiada bahagia  
 Kerana terus mengekalkannya  
 Hasad dengki, gila dunia  
 Sombong, bongkak merosakkan segala  
 Carilah tenang dapat bahagia  
 Cintakan Allah setiap masa  
 Bila zikrullah dihayati  
 Barulah bahagia diperolehi

## KETENANGAN DAN KEBAHAGIAAN JIWA SUDAH TIDAK ADA

**F**ITRAH semula jadi manusia inginkan ketenangan jiwa  
 Juga kebahagiaan jiwa menjadi idaman manusia  
 Kalau ketenangan dan kebahagiaan telah tergugat  
 di dalam kehidupan manusia  
 Manusia *tension*, gelisah, marah-marah dan resah  
 Tapi bagaimana ketenangan dan kebahagiaan  
 hendak wujud di dalam jiwa?!

Kalau rasa bertuhan sudah tidak ada di dalam jiwa manusia  
 Bertindak di dalam menghadapi kehidupan  
 tidak kira lagi dosa pahala  
 Nafsu haiwan disuburkan, cintakan dunia dipertajam  
 Kedua-duanya ini adalah pembunuh jiwa  
 Apabila jiwa mati atau buta, hilanglah ketenangan  
 dan kebahagiaan

Di zaman ini seluruh dunia manusia resah dan gelisah  
 Ketenangan dan kebahagiaan jiwa sudah tidak ada  
 Manusia kecewa, manusia putus asa  
 Bertemu di antara satu sama lain rasa tegang sahaja  
 Bahkan benci dan membenci serta prejudis sesama manusia  
 Manusia sudah bingung tidak tahu lagi  
 untuk mengubat penyakit jiwa  
 Kerana seluruh manusia sudah ditimpanya  
 Termasuk cerdik pandai dan profesor-profesornya  
 Maka hiduplah manusia tidak tentu matlamat dan tujuannya  
 Mundar-mandir tidak tentu hala  
 Kakinya berjalan mengikut perasaannya  
 Keadaan manusia sudah macam orang gila tapi tidak gila  
 Akibat ketenangan dan kebahagiaan sudah tidak ada

---

Selepas Isyak  
 16 - 10 - 1999

## 184 | MANALAH HATI TIDAK GELISAH

**M**ANALAH hati tidak gelisah  
 Risau, resah, gundah, sedih dan kecewa  
 Kerana ke mana sahaja pergi, di mana sahaja berada,  
 ingin orang ambil hati  
 Inginan dipuja dan dipuji, dihormati,  
 disanjung dan diambil perhati  
 Lebih-lebih lagi kalau kaya, ingin disebut-sebut kekayaannya  
 Kalau pandai ingin dipuji dan dihormati  
 Kalau berpakaian ingin sangat orang mengambil perhatian  
 Paling tidak, walaupun orang tak puji dan hormati,  
 jangan ada orang yang mencaci  
 Kehendak-kehendak ini tidak mungkin didapati setiap hari  
 Kemahuan itu tidak semua diperolehi  
 Kerana manusia lain juga kebanyakan perasaannya  
 macam itu juga  
 Semua orang merasa lebih patut dia dihormati  
 daripada menghormati  
 Setiap orang berkehendak dipuji lebih daripada memuji  
 Paling tidak dia tidak dibenci dan dicaci, walaupun tidak dihormati  
 Kehendak-kehendak macam inilah yang bila tidak tertunai  
 Manusia gelisah  
 Mana pergi hati susah, sedih, resah  
 Keinginannya itulah apabila tidak diperolehi, aduh sakit hati  
 Jiwa tercabar, hati tercalar  
 Tapi kalau manusia itu sedar dirinya hamba yang hina  
 Segala puja dan puji tidak layak dia terima  
 Dia rasa tidak perlu itu semua  
 Bahkan terseksa kalau dia mendengarnya  
 Ke mana dia pergi, dia tidak perlu meminta  
 manusia menghormatinya  
 Orang yang jiwanya begini,  
 dia tidak akan susah hati dan gelisah  
 Yang dia rasa susah hanya dengan Allah

---

 04 - 10 - 1999



RAMAI orang mengaku Islam  
Tersinggung kalau dikatakan dia bukan orang Islam  
Tapi persoalan iman mereka tidak dipedulikan  
Syariat mereka abaikan, akhlak dipandang kecil sahaja  
Sebut utamakan Akhirat rasa tersinggung  
Menyebut Allah Taala sebagai budaya sahaja  
Bukan dari hati yang takut, atau bukan menjiwai  
    rasa bertuhan  
Atau Tuhan disebut buat penyedap kata  
    semata-mata sebagai budaya  
Yang difikir dan diperkatakan hanya kemajuan-kemajuan  
Pembangunannya, pembangun dan kekayaan  
Seolah-olah kemajuan, pembangunan dan kekayaan  
    adalah segala-galanya  
Padahal beberapa ramai orang yang maju dan kaya  
Rumahtangga huru-hara  
Anak, isteri tidak seia dan sekata  
Kasih sayang tidak ada, keharmonian hidup  
    tidak ada di dalam keluarga  
Tidak pernah rasa bahagia  
Jiwa kosong, fikiran berserabut  
Side-effectnya, mudah marah, mudah tersinggung,  
    mudah merajuk  
Rupanya pembangunan, kemajuan, kekayaan  
    tidak menjamin membawa kasih sayang  
Kemewahan hidup tidak menjamin keharmonian  
    di dalam keluarga  
Pada kekayaan belum menjamin  
    membawa bahagia ....

## 186 | PEGANGAN HIDUP PUNCA DERITA

**B**AGAIMANA jiwa engkau tidak derita,  
 ketentuan Tuhan engkau tidak redha  
 Dengan ujian, kesabaran engkau tidak ada  
 Apa sahaja engkau buat minta pujian manusia  
 Bukan semua manusia yang boleh memujimu  
 Jika tidak dipuji sudah tentu jiwa derita  
 Engkau sentiasa memburu nama  
 Tidak mungkin engkau mudah mendapatkannya  
 Jika tidak engkau memperolehinya,  
     sudah tentu engkau kecewa  
 Lebih-lebih lagi jiwa engkau tidak tenang  
 Kerana engkau mempertajam hasad dengki dengan manusia  
 Tidak boleh engkau lihat orang lebih daripada engkau  
 Jiwa engkau menderita, dan engkau dengki dengannya  
 Kalau dengki engkau itu tidak berjaya  
 Sudah tentu jiwa engkau lebih lagi derita  
 Kalau orang itu makin senang  
 Engkau lebih-lebih lagi tidak tenang  
 Apa sahaja engkau usahakan  
 Semuanya engkau sandarkan kepada diri engkau  
 Bukan engkau sandarkan kepada Tuhan yang Maha Kuasa  
 Mana engkau ada kuasa  
 Jika usaha engkau gagal tentu engkau kecewa,  
     jiwa pun menderita  
 Kalau engkau berjaya, engkau sombong pula  
 Kerana engkau merasai engkau adalah luar biasa  
 Bukan kuasa Tuhan yang menjayakan  
     usaha-usaha engkau itu  
 Jadi pegangan hidup engkau itulah  
     yang menjadikan engkau selalu sahaja menderita

---

 Menjelang tidur

26 - 12 - 1999

(09 Ramadhan 1420H)

## NASIB MANUSIA BERMACAM-MACAM TAPI MANUSIA TIDAK BELAJAR DENGANNYA

DI MUKA bumi bermacam-macam etnik dan bangsa  
 Bermacam-macam bahasa dan warna kulit  
 di kalangan manusia  
 Nasib manusia bermacam-macam bentuknya  
 Kehidupan mereka bermacam-macam caranya  
 Ada yang kaya-raya, rumah tangga huru-hara  
 Justeru tidak seia-sekata  
 Ada yang berkuasa di negara, di rumah tiada kuasanya  
 Bini atau betinalah yang berkuasa  
*Queen control* namanya  
 Ada yang alim atau berilmu, miskin pula  
 Tidak kurang yang kaya-raya  
 Dibunuh orang atau *dikidnap* diminta wang tebusan  
 Ada yang kaya-raya atau berpangkat tinggi,  
 sakit-sakit sahaja  
 Bermacam-macam jenisnya pula  
 Ada yang jahil tiada berpangkat, miskin pula  
 Ada yang miskin, sakit-sakit sahaja  
 Tiada yang membela  
 Tidak kurang badan yang sihat, merempat pula  
 Ada yang jutawan, krisis rumah tangga jadi budaya  
 Bini di sini suami di sana  
 Bila bertemu bergaduh sahaja  
 Juga tiada kurang yang miskin, ilmu sederhana,  
 tenang dan bahagia  
 Ada yang baik orang ramai senang, tiada kuasa tiada harta  
 Orang jahat diberi kuasa, orang ramai benci merata-rata  
 Namun demikian pengaruh kuasa dan harta kekayaan,  
 disokong juga  
 Jadi manusia di dunia sentiasa diburu takut kerana tergugat  
 Fikiran serabut, jiwa tidak tenang keluh-kesah sahaja  
 Digugat oleh bini, oleh krisis rumah tangga  
 Ditakutkan oleh miskin dan papa kedana

Dibimbangkan oleh sakit yang bermacam-macam jenisnya  
 Dikecewakan oleh kejahilan dan oleh tiada pangkat  
 yang dibanggakan  
 Dihantui oleh bila kena *kidnap* atau orang akan samun  
 Tidak kurang susah hati bilakah peluru  
 hendak meledak membunuhnya  
 Sedikit sahaja yang tenang dan bahagia  
 Kerana kuat imannya sekalipun miskin papa  
 Tapi manusia tiada belajar dengan peristiwa  
 Di manalah hebatnya kita?  
 Di manalah kuasa kita?  
 Di mana kemegahan kita?

## MERENDAH DIRI ITULAH KETINGGIANMU

MERENDAH diri itu, di sanalah letaknya ketinggianmu  
Engkau pandai atau berilmu, banyak orang  
mendapat manfaat darimu  
Engkau rasa dirimu tidak berguna  
atau tiada jasa apa-apa di sinilah kemuliaanmu  
Pandai engkau bergaul di semua golongan masyarakat  
Engkau meletakkan diri pada tempatnya  
Di sanalah semua golongan boleh menghormatimu  
Pemurahnya engkau, di situlah rezekimu di dunia  
Ertinya engkau tidak akan papa  
Di Akhirat kelak harta dan kekayaan bagimu  
Engkau tidak suka nama dan glamour  
Kalau engkau orang yang berjasa  
Banyak orang mendapat faedah dari pertolonganmu,  
dari jasamu  
Nama dan glamour tetap ada walaupun tidak dipinta  
Nama yang bersih tanpa diminta  
Nama dan glamour yang diminta lambat-laun orang benci  
Setiap kali pula Tuhan mengangkat darjatmu di sisi-Nya  
Kalau engkau sentiasa baik hati dengan manusia  
Dengan manusia engkau baik sangka  
Tidak pernah berdendam dan dengki dengan insan  
Mudah engkau memaafkan orang  
Di situlah ketenangan dan kebahagiaan jiwamu  
Jika engkau sentiasa bertawakal dengan Allah  
Engkau tidak akan risau dengan masa depanmu

## 189 | ILMU PENYULUH HIDUP

**B**AGI orang mukmin, ilmu adalah penyuluh hidupnya!  
 Pengalamannya adalah pengajaran, iktibar dan penasihatnya  
 Takutnya kepada Tuhan adalah pengawal diri  
 Sabarnya adalah perisai hidupnya  
 Redha dengan Tuhan kerana baik sangka dengan Tuhannya  
 Tawakalnya adalah harapan masa depannya  
 Bacaan Al Quran adalah hiburannya  
 dan bercakap-cakap dengan Tuhan  
 Juga perbualannya dan bercakap  
 dengan Tuhan Pencipta manusia  
 Selawat adalah penyejuk dan pelembut hatinya  
 Doa dan permintaannya kepada Tuhannya tanda dia hamba  
 Hamba adalah hina, lemah, memerlukan  
 pertolongan Tuhannya  
 Sembahyang adalah pembaharuan ikrar  
 dan membaharukan syahadah  
 Serta membersihkan jiwa dari mazmumah  
 Begitulah peranan setengah daripada sifat-sifat mahmudah  
 Juga setengah daripada peranan mendirikan solat  
 Kalau begitu cuba gambarkan orang yang  
 tidak bersembahyang  
 Yang juga memiliki sifat-sifat mazmumah  
 Ertinya segala masalah berkumpul di kepala dan jiwanya  
 Bagaimana tidak menderita dan terseksa  
 Mampukah menanggungnya?!

190

## BERBUAT DAHULU BARU BERCAKAP

**B**ERBUATLAH lebih dahulu baru bercakap  
Kerana buah ilmu itu adalah amalan yang sudah dibuat  
Janganlah bercakap dahulu baru berbuat  
Lebih-lebih lagi bercakap langsung tidak berbuat  
Ilmu yang tidak diamalkan macam senjata tidak digunakan  
Ia akan berkarat  
Apa ertinya simpan senjata sebanyak-banyaknya  
tidak digunakan  
Ia akan menjadi bebanan  
Begitulah ilmu yang banyak tidak diamalkan  
ia akan jadi beban di Akhirat  
Orang yang berilmu tidak mengamalkan ilmu,  
masuk Neraka lebih dahulu daripada orang kafir  
Ilmu adalah panduan jalan kehidupan  
Atau penyuluh jalan kehidupan untuk menuju matlamat  
Alangkah anehnya orang yang ada lampu suluh di tangan  
Berjalan di waktu malam lampu suluh tidak digunakan  
Ertinya walaupun ada lampu di tangan  
tapi dia masih di dalam bahaya  
Berjalan di dalam gelap tidak menggunakan lampu  
Padahal lampu ada di tangan  
Lampu itu semata-mata hendak ditunjuk kepada orang  
Begitulah ahli ilmu yang tidak beramal,  
padahal ilmu diperkatakan  
Itu tentulah semata-mata hendak tunjuk pandai  
kepada orang ramai  
Bermegah-megah dengan ilmu,  
tidak ghairah beramal

---

Selepas Zuhur  
18 - 08 - 2001

## BERLINDUNG DARI ILMU YANG TIDAK BERMANFAAT

**M**ARILAH kita berlindung dengan Allah  
 daripada ilmu yang tidak memberi manfaat  
 Kerana ia akan menjadi beban di Akhirat  
 Bahkan ia akan melaknat  
 Sohibul ilmi masuk ke dalam Neraka 500 ratus  
 lebih dahulu daripada penyembah berhala  
 Ilmu yang tidak memberi manfaat, niat bukan kerana Allah  
 Bila diperolehinya hanya untuk mujadalah  
 dan bermegah-megah  
 Untuk diforum-forumkan dan disyarah-syarahkan,  
 bukan diamalkan, tapi penuh dengan ujub dan riyak  
 Mementingkan kertas kerja jadi budaya,  
 kemudian mesti diberi upah  
 Setiap apa yang hendak disampaikan mesti ada ganjarannya  
 Kalau tidak, ilmu tidak akan disampaikan  
 Makin bertambah ilmu,  
 makin nampak bongkak dan sombongnya  
 Dan terasa 'orang luar biasa' dengan ilmunya  
 Jika ada orang yang lebih darinya, sakit hatinya  
 Bila berbincang dia sahaja mahu menang  
 Kalau kebenaran itu datang daripada orang lain,  
 susah mahu menerimanya  
 Gambaran peribadi Rasulullah SAW tidak ada pada dirinya  
 Peribadinya macam orang biasa, bahkan nampak angkuhnya  
 Orang ini tidak akan bergaul dengan orang  
 yang dipandang rendah  
 Kecuali keadaan memaksanya  
 Inilah dia *ulama us suk* yang disabdakan oleh Rasulullah  
 Kita disuruh jauhi mereka  
 Bahkan disuruh takut lebih daripada  
 seekor singa yang galak  
 Kerana ia akan melalaikan,  
 boleh jadi menyesatkan

---

Selepas Zuhur  
15 - 09 - 1999



## BERLINDUNG DARIPADA ILMU YANG TIDAK DIAMALKAN

Y A ALLAH! Aku berlindung dengan-Mu  
daripada ilmu yang tidak diamalkan  
Aku berlindung dengan-Mu daripada ilmu untuk kemegahan  
Tuhan, ilmu itu adalah cahaya penyuluh kehidupan  
Jangan pula kehidupan orang tersuluh,  
kehidupanku kegelapan  
Tuhan aku memohon kepada-Mu  
janganlah ilmu itu menjadi beban  
Di Akhirat kelak menjadi hujah dan saksi  
mengapa aku tidak amalkan  
Ya Allah, aku memohon kepada-Mu bertambah ilmu,  
bertambah amalku  
Jangan sampai usahaku orang lain selamat, aku tidak  
Biarlah usahaku ini selamat menyelamatkan  
Ya Allah, aku berlindung dengan-Mu  
daripada ilmu untuk mujadalah  
Bukan membantuku untuk beribadah dan bertaqwa  
Tuhan aku berlindung dengan-Mu  
jangan sampai ilmuku melaknatku semula  
Kerana bermegah-megah dan tidak mengamalkan  
Jadikanlah aku bertambah ilmu,  
bertambah dekat dengan Tuhan  
Bertambah ilmu, bertambah ibadah dan amalan  
Tuhan! Jadikanlah ilmuku mensyafaatkan aku di Akhirat kelak  
Bukan melaknatku  
Ya Allah! Jadikanlah ilmuku boleh memimpin diri  
dan orang lain  
Boleh menyuluh kehidupanku dan kehidupan orang  
Mampu menyuluh hatiku dan menyuluh hati orang  
Seterusnya jadikanlah ilmu ini  
sentiasa memberi manfaat dan syafaat

---

Selepas Isyak  
03 - 09 - 1999

## 193 | MARILAH KITA BERAMAL

**M**ARILAH kita mengkota Islam  
 Kerana sudah banyak kita berkata  
 Marilah kita beramal  
 Lantaran sudah banyak mengenal  
 Marilah kita berbuat  
 Berkata sudah banyak  
 Marilah kita melaksanakan  
 Saranan telah merata  
 Marilah kita membina keperluannya  
 Sudah selalu diperkata  
 Marilah kita bertindak  
 Huraianya telah banyak  
 Sampai bila Islam ini hendak diperkata  
 Sedangkan dikotakan sedikit sahaja  
 Apakah Islam sekadar program semasa  
 Bukan amal setiap masa?!  
 Cukupkah Islam itu untuk perayaan?  
 Bukan tuntutan amalan dan perlaksanaan?  
 Islam bukan untuk slogan-slogan, tapi tindakan  
 Bila lagi Islam hendak bersifat diri bukan tersendiri  
 Marilah kita jadikan Islam tabiat diri  
 Sebagai ilmu sudah lama kita ketahui  
 Agar kita membawanya ke mana-mana kita pergi

---

 Selepas Asar  
 16 - 05 - 1997

**T**UHAN! Dengan kebesaran Nabi-Mu  
 dan kemuliaan Imam Mahdi-Mu  
 Ajarkanlah aku ilmu Islam yang seni-seninya  
 Tuhan! Fahamkan aku ilmu-ilmu  
 yang tersirat untuk dapat disuratkan  
 Anugerahkanlah aku sedikit ilmu rahsia  
 yang ada di dalam ilmu  
 Terutama ilmu mengenai hati  
 Hati adalah makhluk-Mu yang mengandungi  
 banyak rahsia  
 Darinyalah lahirnya ilmu hikmah  
 Ilmu hikmah sedikit sekali manusia yang tahu  
 Sekalipun para ulama-ulamanya  
 Kecuali mereka yang hatinya terlalu bersih dan murni  
 Ilmu itulah yang Engkau maksudkan di dalam Al Quran  
 Pertama: Takutilah Allah nescaya Allah akan ajar kamu  
 Kedua: Siapa yang diberi ilmu hikmah,  
 sesungguhnya diberi sesuatu yang banyak  
 Tuhan! Ilmu ini sangat aku perlukan  
 Untuk aku memperbaiki diriku dan pengikut-pengikutku  
 Terutama di zaman yang telah Engkau janjikan  
 Islam akan kembali gemilang  
 Tuhan, aku sungguh mengharapkan ilmu ini  
 Iaitu ilmu di dalam ilmu  
 Ajarlah sedikit ilmu ini kepadaku  
 Atas nama khalifah-Mu akhir zaman  
 Agar aku mampu memimpin diriku dan pengikutku  
 Ya Allah! Istajib do'aii

---

Selepas Zuhur  
 28 - 08 - 1999

## 195 | NIKMAT DUNIA IBARAT KUDA

**T**IDAK salah mendapat nikmat  
 Yang mana satu pun tidak mengapa  
 Tapi hendaklah curiga selalu dengannya  
 Kerana ia ibarat mendapat kawan yang tidak setia  
 Prejudislah dengannya  
 Jahat sangkalah dengan nikmat dunia  
 Ia selalu sahaja melalaikan kita  
 Awaslah selalu dengan nikmat dunia  
 Kalau tidak ia selalu sahaja mengkhianati kita  
 Berhati-hatilah dengan nikmat  
 Kerana dia boleh merosakkan kita  
 Kita awasilah selalu  
 Kerana dia boleh menjatuhkan maruah kita  
 Nikmat dunia itu ibarat kuda  
 Kita akui kuda mudah membawa kita ke mana-mana  
 Tapi ingat, dia selalu sahaja tidak setia dengan kita  
 Kita selalu sahaja dijatuhkannya atau ditendangnya  
 Kita selalu mendisiplinkan diri kita terhadap nikmat dunia  
 Jangan sampai dia mendisiplinkan diri kita  
 Akibatnya kita akan dijadikan kuda tunggangannya  
 Maka kita pun menjadi hambanya  
 Jatuhlah wibawa kita  
 Maka kita pun terhina

---

 Menjelang tidur  
 10 - 11 - 1999

## TIDAK TAHAN DENGAN KELEBIHAN DIRI

**B**ERAPA ramai orang apabila Tuhan pakaikan sedikit kebesaran kepada orang itu dia tidak tahan  
 Dia pun membesarkan diri, sombong pun datang  
 Dia pun rosak dan merosakkan  
 Berapa banyak manusia apabila kekayaan dialirkan padanya dia pun lupa  
 Bakhil pun datang, sombong pun terjadi  
 Dia merasakan kekayaan itu dia yang punya  
 Tidak kurang pula apabila Tuhan memberi sedikit kekuasaan pada seseorang  
 Dia pun lupa diri  
 Dia rasa, manusia luar biasa  
 Megah pun menimpa dirinya,  
 sombong tak usah dikira  
 Dia pun menzalim orang  
 Dia pun menyalahi kuasanya  
 Banyak pula orang teraniaya  
 Tapi apabila Tuhan menimpakan seseorang kesusahan  
 Kesusahan yang berbagai bentuknya  
 Ramai pula yang tidak tahan  
 Tidak tahan menderita  
 Ada yang kecewa sepanjang masa  
 Bahkan ada yang putus asa  
 Begitulah seseorang yang jiwanya sudah rosak  
 Rasa bertuhan tidak ada  
 Rasa kehambaan tidak ada di dalam jiwa  
 Apa pun Tuhan timpakan kepada dirinya  
 Semuanya merosakkan dirinya  
 Oleh itu rasa bertuhan perlu ada,  
 rasa kehambaan perlu mendalam di dalam jiwa

---

Selepas Zuhur  
26 - 07 - 2001

## NIKMAT TUHAN DISALAHGUNAKAN

**A**PA sudah jadi kepada manusia?!  
 Masing-masing menyalahgunakan nikmat Tuhan  
 yang ada padanya  
 Hingga mereka derhaka kepada Tuhannya  
 Di samping merosakkan kehidupan manusia

Ada yang muka cantik, terpesona dengan kecantikannya  
 Dia pun menyalah guna kecantikannya  
 Ramai manusia yang rosak imannya kerana kecantikannya  
 Ada yang kaya sombong dengan kekayaannya  
 Dia pun berfoya-foya dengan kekayaannya itu  
 Hanya senang untuk sendiri tidak pun menolong fakir miskin

Ada yang pandai, kagum dengan kepandaiannya  
 Menyalahgunakan pula dengan ilmunya  
 Untuk nama dan kesenangan hidup semata-mata  
 Tuhan tidak ada di dalam kamus hidupnya

Ada pula orang sedikit sahaja diberi kuasa oleh Tuhannya  
 Menyalahgunakan kuasa yang ada padanya  
 Dia menzalim dan menghukum manusia sesuka hatinya  
 Ramai manusia yang teraniaya

Di sini baru kita tahu ramai orang yang kufur  
 dengan nikmat Tuhannya  
 Yang merosakkan diri sendiri dan merosakkan diri orang lain  
 Hanya sedikit sahaja manusia yang bersyukur  
 Iaitu orang yang takut dengan Tuhannya,  
 dan mengambil berat kehidupan di Akhirat

198 | APABILA DUNIA DICINTAI

**A**PABILA dunia dicintai  
 Maka ia akan dijadikan matlamat hidup  
 Dunia pun menjadi buruan dan rebutan  
 Bila ia dijadikan rebutan timbullah saingan  
 dan perlawanan  
 Saingan dan perlawanan itu akan membawa  
 perbalahan dan permusuhan  
 Di dalam perebutan timbullah hasad dengki,  
 jatuh-menjatuhkan, khianat-mengkhianati  
 Kemuncaknya pergaduhan,  
 membunuh dan peperangan  
 Lebih-lebih lagi yang merebut itu para ulama,  
 pemimpin dan orang-orang kaya  
 Maka krisis kerana dunia lebih hebat lagi  
 berlaku di dalam kehidupan  
 Maka punahlah kasih sayang,  
 hilanglah timbang rasa  
 Persaudaraan hilang, simpati gersang,  
 kerjasama terpaksa  
 Hidup nafsi-nafsi pun subur dan menjadi budaya  
 Masing-masing menjaga kepentingan diri sendiri  
 Hidup harmoni, kasih sayang,  
 bertimbang rasa hilang  
 Akhirnya semua manusia di dunia hidup  
 di dalam ketakutan dan penderitaan  
 Cuma ketakutan dan penderitaan  
 di antara satu sama lain tidak sama  
 Orang miskin susah kerana tidak ada  
 yang hendak dipakai dan yang hendak dimakan  
 Yang sakit terbiar tidak ada wang untuk berubat  
 Ulama-ulama dihina dan tidak dihormati lagi  
 Guru-guru ibu bapa tidak dikasihi  
 Anak-anak atau rakyat jelata tidak akan disayangi

Orang-orang kaya dibenci, harta mereka  
akan dirompak dan dicuri  
Nyawa mereka sentiasa terancam  
Para-para pemimpin tidak dihormati dan ditaati  
Bahkan menjadi sasaran permusuhan dari rakyatnya  
Maka dunia pun menjadi neraka,  
kerana penyakit cinta dunia



PAGI-PAGI engkau keluar rumah, untuk tugas harian  
Mula-mula sekali bumi (tanah) yang engkau pijak  
Itulah dia kejadian engkau yang pertama  
Kejadian engkau yang kedua lebih lagi hinanya  
Kalau engkau orang yang insaf,  
    engkau malu dengan diri engkau  
Sombong engkau sudah tentu hilang  
Engkau pun merendah diri di muka bumi Tuhan  
Apabila engkau berhadapan dengan makanan  
    yang sedang dihidang  
Makanan dan lauk-pauknya pula  
    berbagai-bagai jenisnya  
Ada sayur, ada ikan, ada daging bukan engkau  
    yang mengusahakannya  
Engkau hanya memilih bahan mentahnya  
Kalau mata hati engkau celik  
Engkau akan terasa wah ramai sungguh orang  
    yang memberi khidmat kepada engkau  
Sama ada engkau sedar ataupun tidak,  
    kenal atau sebaliknya  
Secara langsung mahupun secara tidak langsung  
Biasanya mereka itu adalah buruh-buruh,  
    nelayan-nelayan dan tenaga orang susah  
Engkau akan terasa sedih waktu hendak makan  
Pasti engkau akan simpati kepada mereka itu  
Jangan-jangan mereka tidak pun memakan  
    seperti yang engkau memakan makanan  
    yang sedap-sedap itu  
Padahal merekalah yang menghasilkan semua itu  
Tentulah engkau akan sentiasa mengambil berat  
    mereka-mereka yang miskin dan susah  
Kerana mereka setiap hari memberi khidmat  
    kepada engkau

Begitulah seterusnya setiap apa sahaja  
 yang engkau gunakan, miliki dan pakai  
 Berapa ramai pula yang terlibat menjayakannya  
 Lagilah ramai orang yang telah berjasa kepada engkau  
 Apakah engkau boleh berfikir semacam ini?!  
 Kalau engkau berfikir semacam ini  
 Engkau tidak akan sombong, pasti engkau merendah diri  
 Kalau engkau boleh berfikir semacam ini  
 Sudah pasti engkau sentiasa simpati  
 dengan golongan yang susah  
 Engkau tidak akan menghina mereka  
 Tapi engkau tidak berfikir semacam ini  
 Maka engkau pun sombong,  
 dan fakir miskin engkau tidak peduli

**A** LANGKAH indahny dunia ini  
 Di sudut mana pun dia mempesona  
 Makan minum lazatnya dirasa  
 Mempengaruhi fikiran dan jiwa  
 Perempuan cantik memperdaya  
 Banyak laki-laki yang binasa  
 Pangkat dan darjat menjadi rebutan  
 Kerana di sana ada habuan  
 Berfikirlah manusia siang dan malam ke arah itu  
 Segala tenaga dikerah mencapainya,  
 sekalipun letih kerananya  
 Sesungguhnya manusia telah menjadi hamba  
 kepada dunia  
 Di sanalah manusia dianggap mulia  
 Siapa tiada diperhina  
 Nafsu merangsang setiap waktu ke arah itu  
 Ditariknya kita, dituntunnya kita memburunya  
 Hingga kebanyakan manusia tidak mampu  
 menahan kemahuan nafsunya  
 Hilang pertimbangan, lupa agama,  
 porak-peranda manusia dibuatnya  
 Dibantu pula oleh syaitan  
 pendorong manusia memburunya  
 Syaitan membisik-bisik: Buatlah apa saja  
 yang menguntungkan  
 Terutama di masa muda jangan sia-siakan  
 Gunakan tenaga itu untuk keseronokan  
 Tua nanti bertaubatlah, Tuhan kan Maha Pengampun  
 lagi Maha Penyayang  
 Begitulah bisikan syaitan  
 Terlupalah manusia dengan Tuhan  
 Syariat Tuhan diabaikan

Tuhan tidak diambilkira  
Akhirat dibenci bahkan dilupakan  
Siapa yang mengajak kepada Tuhan  
dianggap ketinggalan zaman  
Tenggelamlah manusia lemas  
di dalam dosa

## BUKAN SENANG MENJAGA NIKMAT

**B**UKAN senang menjaga nikmat  
Nikmat yang mana satu pun susah menjaganya  
Kaya, berbangga, sombong setiap masa  
Pembazirannya begitu ketara  
Kewajipan terhadap Tuhan dilupakannya  
Muka cantik, hati sentiasa berbunga  
Bunga megah, bunga ujub, suka dipuji  
Terasa diri makhluk kayangan  
Orang yang buruk sentiasa dicaci  
Sedap suara terasa luar biasa  
Pandang orang lain rendah dan hina  
Juallah suara ke mana-mana  
Terlonjak di sini, terlonjak di sana  
Ingin nama, ingin glamour  
Sekalipun yang diucapkan itu khabaran Tuhannya  
Bahasa yang dituturkan selawat nabi  
Namun hatinya memuja kebesaran dirinya  
Berjawatan tinggi terasa *superman*  
Duduk dengan golongan bawah rasa tidak selesa  
Hati bangga dibawa ke mana-mana  
Sombong dan membesar diri ketara sekali  
Mengugut-ugut dan menakutkan rakyat jelata jadi budaya  
Ditegur dan dinasihat pantang dirinya  
Berhati-hatilah berhadapan dengan nikmat  
Jangan sampai lupa dengan Tuhan  
Bersyukurlah kepada Tuhan sebanyak-banyaknya  
dengan nikmat  
Agar kita tetap dapat mengekalkan sifat kehambaan

## KERANA CINTAKAN KEHIDUPAN DUNIA TOLAK TUHAN

**D**I DALAM kehidupan di dunia  
 sangat banyak yang diperlukan oleh manusia  
 Keperluan itu ada yang pertama dan utama  
 Ada yang penting dan ada yang sampingan  
 Keperluan yang pertama dan utama adalah Allah Taala  
 pencipta alam yang Maha Esa dan Maha Berkuasa  
 Kerana Dia adalah segala-galanya  
 Kemudian yang penting agar hidup berdisiplin  
 adalah syariat Tuhan  
 Itulah jalan menuju Tuhan, iaitu jalan keredhaan-Nya  
 Keperluan sampingan adalah makan, minum,  
 tempat tinggal, pakaian, kenderaan  
 Kemudian perempuan sebagai isteri atau laki-laki sebagai suami  
 Agar dapat berhibur dan bertolong bantu di dalam kehidupan  
 Apabila kita dapat yang pertama dan utama,  
 kemudian yang penting  
 Di situlah kehidupan dan ketenangan hidup  
 Yang lainnya hanya setakat tambahan sahaja  
 atau tambahan semata-mata atau sampingan  
 Tapi oleh kerana manusia ramai yang buta hati  
 walaupun celik mata  
 Kerana cinta makan, minum, tempat tinggal, pakaian,  
 kenderaan, tolak Tuhan  
 Lantaran perempuan tinggalkan Tuhan Rabbul 'Alamin  
 Ingin kebebasan tolak syariat Tuhan pentadbir alam  
 Akhirnya apa sudah jadi? Atau apa kesudahannya?  
 Manusia hidup porak-peranda sekalipun kaya dan berkuasa  
 Apatah lagi yang miskin menderita dan sengsara lagi terhina  
 Kembalilah kepada Tuhan, syariat jadikan jalan kehidupan  
 Di situlah rahsia kebahagiaan dan ketenangan  
 Mendapat pula keredhaan Tuhan  
 Di Akhirat selamat pula  
 daripada api Neraka

---

Menjelang Tidur  
26 - 08 - 2001

CINTANYA engkau pada diri engkau  
 Hingga engkau mementingkan diri  
 Hakikatnya engkau merosakkan diri engkau sendiri  
 Tapi engkau tidak sedar menjadi perosak diri sendiri  
 Engkau mementingkan diri, hakikatnya  
 engkau membenci diri engkau tanpa engkau sedari  
 Engkau tamak dan bakhil hingga  
 tidak mempedulikan fakir miskin  
 Mereka membenci diri engkau  
 Padahal tentu engkau tidak suka orang lain benci  
 Lebih-lebih lagi jika engkau menjadi sombong  
 dengan keistimewaan engkau  
 Kebencian bertambah-tambah lagi  
 Jika engkau mendapat kesusahan orang akan  
 membiarkan engkau keseorangan  
 Kerana orang membalas dendam dan sakit hati selama ini  
 Selalunya orang yang tamak mengumpulkan kekayaan  
 menjadi sasaran para perompak dan pencuri  
 Ini baru berlaku di dunia sudah menyusahkan  
 diri engkau sendiri  
 Yang lebih dahsyat dari itu Tuhan sangat membenci  
 Nabi Muhammad Rasul akhir zaman  
 tidak menganggap sebagai umatnya  
 Para-para malaikat dan seluruh makhluk  
 selain manusia dan jin mengutuknya  
 Azab kubur pula sedang menunggu engkau  
 Penderitaan Mahsyar juga engkau tidak terlepas  
 yang sedang menanti  
 Kemuncak dari segala penderitaan  
 adalah Neraka yang membakar  
 Kalau begitu apalah erti engkau cintakan diri engkau  
 Apalah faedahnya yang engkau dapat  
 kerana mementingkan diri

Sepatutnya kasihkan diri dan mementingkan diri  
menguntungkan  
Tapi engkau merugikan diri engkau sendiri  
Bahkan merosakkan dan membinasakan diri engkau  
Ubahlah sikap sebelum terlambat  
Jika sayang pada diri sendiri  
Janganlah campakkan diri sendiri kepada kebinasaan



## ENGKAU TERLALU CINTA DENGAN DIRI SENDIRI

ENGKAU terlalu cinta dengan diri engkau sendiri  
 Maka engkau pun mementingkan diri  
 Engkau dahulukan kehendak-kehendak engkau  
 daripada kehendak-kehendak Tuhan  
 Hak-hak Tuhan engkau kemudiakan,  
 hak-hak engkau, engkau dahulukan  
 Bahkan adakalanya kerana mempertahankan  
 hak engkau, hak Tuhan terus diabaikan  
 Sebenarnya engkau lupa, engkau mementingkan  
 diri engkau  
 Hakikatnya engkau tidak cinta dengan diri engkau  
 Engkau membelakangkan hak Tuhan, ertinya engkau  
 mengabaikan hak engkau sendiri  
 Padahal hak-hak yang engkau pertahankan  
 walaupun engkau memperolehinya  
 Dia bukan boleh buat apa-apa kepada engkau  
 Ia tidak akan boleh menghalang engkau daripada sakit  
 Juga ia tidak boleh membendung engkau  
 daripada berbagai-bagai bala bencana  
 dan kesusahan  
 Walaupun engkau boleh menghasilkan,  
 tapi tidak dapat mempertahankan engkau  
 Tapi kalau engkau miliki Tuhan, engkau memiliki  
 segala-galanya  
 Tuhan boleh melakukan apa sahaja kepada diri engkau  
 Dia boleh menyenangkan engkau  
 dengan tujuan engkau bersyukur  
 Kemudian engkau dapat pahala syukur  
 Kalau dia susahkan engkau, agar engkau sabar,  
 supaya engkau dapat pahala sabar  
 Jadi kalau engkau mendahulukan hak Tuhan  
 Semuanya adalah kebaikan kepada engkau,  
 kalau engkau faham

Yang penting Allah hendak menyelamatkan engkau  
 di Akhirat sana  
 Akhirat negara yang kekal abadi  
 Allah Taala mahu engkau bahagia di sana  
 Kerana itulah kalau engkau mendahulukan hak Tuhan  
 ertinya engkau sayang pada diri engkau sendiri  
 Jika engkau mendahulukan hak engkau, tanpa engkau sedar,  
 engkau merugikan diri engkau sendiri  
 Oleh itu utamakanlah hak Tuhan,  
 untuk kepentingan engkau  
 Janganlah utamakan diri engkau  
 Cara itu engkau akan merugikan diri engkau sendiri

205

## ENGKAU SANGKA MUSUH MEROSAKKAN ENGKAU

ENGKAU selalu menyangka orang lain  
akan merosakkan engkau  
Engkau selalu sahaja prejudis dengan  
musuh-musuh engkau  
Engkau merasakan musuh-musuh engkau  
akan membinasakan engkau  
Rupa-rupanya musuh-musuh engkau  
sekali-sekala sahaja merosakkan engkau  
Orang lain, adakalanya engkau terselamat  
daripada kejahatannya  
Tapi engkau sama ada disedari atau tidak  
setiap hari dirosakkan oleh perkara yang  
sangat rapat dengan diri engkau  
Setiap hari engkau dirosakkan oleh ilmu  
dan kepandaian engkau  
Setiap masa engkau dirosakkan oleh nama,  
glamour engkau  
Sering sahaja engkau dirosakkan oleh harta  
dan kekayaan engkau  
Jawatan dan kekuasaan engkau itulah  
yang selalu merosakkan engkau  
Amanah yang diberikan kepada engkau  
itulah yang selalu merosakkan engkau  
Cara engkau berfikir itulah yang merosakkan engkau  
Keyakinan engkau itulah yang banyak  
merosakkan engkau  
Ideologi yang ada di kepala engkau itulah  
yang merosakkan engkau  
Sedangkan kalau musuh engkau merosakkan engkau  
mudah engkau sedar  
Orang lain merosakkan engkau cepat engkau  
dapat mengesannya

Tapi kalau ilmu, harta, pangkat, kekuasaan,  
 nama dan glamour yang merosakkan engkau  
 Payah engkau hendak insaf dan sedar  
 Engkau tidak terasa dirosakkan olehnya  
 Engkau terasa itu semuanya adalah kejayaan engkau  
 Itu semuanya adalah kemajuan yang engkau tempa  
 dan kejayaan yang engkau buat  
 di dalam kehidupan engkau  
 Engkau rasa telah berjaya di dalam kehidupan engkau  
 Kerana itulah payah engkau hendak sedar  
 Engkau rasa itu adalah satu kejayaan bukan kerosakan  
 Engkau tertipu di dalam kehidupan engkau

DUNIA ini yang mana satu ada nilai di sisi Allah?  
 Harta, pangkat, wang ringgit, kebun, rumah  
 Tidak ada harganya pada Tuhan  
 Ia ibarat kalau di dunia ini adalah wang ringgit  
 Wang itu walaupun ada nilainya berdasarkan angka  
 yang ada di atas duit  
 Ia tidak dapat memberi faedah apa-apa  
 Kalau tidak ditukar dengan benda-benda lain  
 Setelah ditukar, baru ada nilainya dan berfaedah  
 Apabila ditukar, baru duit itu bukan duit lagi  
 Kalau duit itu disimpan sahaja  
 Tidak pun ditukar dengan sebarang benda  
 Tidak ditukar dengan pakaian, makanan, minuman,  
 kenderaan dan sebagainya  
 Nasibnya sama sahaja dengan kertas biasa  
 Tidak ada nilai apa-apa, tidak bermakna adanya duit  
 Walaupun di atas duit-duit itu ada nilainya  
 Berdasarkan yang tertulis angka-angkanya  
 Jadi, baru kita faham duit itu memberi faedah  
 setelah kita tukar nilai  
 Begitulah nikmat di dunia ini  
 Jika kita tidak tukar nilai dengan nilai Akhirat  
 Seperti harta, untuk menolong orang yang susah  
 dan dikorbankan fisabilillah  
 Tenaga, untuk berkhidmat kepada orang  
 atau hamba-hamba Allah  
 Ilmu, untuk memimpin manusia di dunia agar agama  
 dan kehidupan mereka betul  
 Pangkat dan jawatan, untuk membela orang ramai  
 Maka dunia telah jadi nilai Akhirat  
 Dunia telah ditukar dengan Akhirat  
 Kalau tidak ditukar, dunia hanya  
 akan jadi bangkai

---

Menjelang Maghrib  
 07 - 11 - 1999

## 207 | BAGAIMANA MANFAATKAN DUNIA

**H**AKIKATNYA dunia ini adalah kotor  
 Ia adalah ibarat najis dan bangkai  
 Najis dan bangkai benda yang busuk dan menjijikkan  
 Kalau orang fahamlah bahawa najis itu adalah najis  
 Bahawa bangkai itu adalah bangkai, siapa hendak?  
 Tapi Tuhan telah takdirkan manusia hidup di dunia  
 Hidup di dunia sementara waktu  
 Akhirnya ke Akhirat semuanya  
 Tuhan menyuruh hamba-hamba-Nya  
 Pandai-pandailah menggunakan najis dan bangkai  
 Bagaimana menggunakan najis dan bangkai itu?  
 Kita gunakan najis dan bangkai itu untuk membaja pokok Akhirat  
 Ertinya kita jadikan dunia itu Akhirat  
 Maka dia telah bernilai Akhirat, bukan nilai dunia lagi  
 Kerana itu Rasulullah SAW bersabda:  
 “Dunia itu adalah tanam-tanaman ke Akhirat.”  
 Maksudnya dunia yang asalnya bangkai dan najis  
 Kita jadikan baja untuk tanaman Akhirat  
 Ertinya bangkai dan najis telah dimanfaatkan  
 Kalau ia tidak dijadikan baja untuk tanaman Akhirat  
 Ia tidak jadi Akhirat  
 Ia tetap jadi dunia semata-mata yang tidak ada harga  
 Alangkah jeliknya dunia yang tidak jadi Akhirat  
 Adalah najis dan bangkai  
 Manusia berebut-rebut hingga bergaduh  
 Merebut najis dan bangkai  
 Kerana itulah kitab ada menyatakan:  
 “Dunia yang tidak jadi Akhirat, ia adalah bangkai,  
 Yang menuntut bangkai itu adalah anjing.”  
 Ertinya, manusia yang memburu dunia  
 yang tidak jadi Akhirat  
 Seperti anjing memburu bangkai

---

Menjelang tidur  
 01 - 11 - 1999

DUNIA yang nampaknya hebat  
 Cantik dan indah mempesona setiap manusia  
 Kita manusia sahaja yang merasa cantik dan indah  
 Pada Tuhan tidak ada nilainya sekalipun senilai habuk  
 Atau senilai sebelah sayap nyamuk  
 Kalau dunia ini ada nilai pada Tuhan walaupun seberat habuk  
 Nescaya Tuhan tidak akan memberinya kepada orang kafir  
 Begitu juga kalau orang Islam  
 Di waktu taat Tuhan beri, di waktu derhaka Tuhan tarik  
 Adakalanya Tuhan beri, adakalanya Tuhan tahan  
 Nescaya parahlah manusia ini  
 Tapi pada Tuhan, dunia sedikit pun tidak ada nilai  
 di sisi-Nya  
 Orang kafir pun Allah Taala beri makan  
 dan berbagai-bagai nikmat lagi  
 Bahkan adakalanya orang kafir lebih banyak diberi  
 daripada orang beriman  
 Begitulah nilai Tuhan terhadap dunia  
 Oleh kerana dunia ini tidak ada nilainya di sisi Allah  
 Tuhan menyuruh kita berilah dunia ini nilai Akhirat  
 Jadikan dunia ini jambatan ke Akhirat  
 Jual dunia ini untuk beli Syurga  
 Kalau tidak begitu, dunia ini tidak ada harga  
 Dunia ini kalau tidak dijadikan Akhirat  
 Kita hidup sia-sia, dunia akan binasa  
 Kalau kita gunakan dunia untuk Akhirat  
 Dunia sudah ada nilai Akhirat,  
 ia kekal abadi di sana

## MEMBURU KEHIDUPAN JANGAN SAMPAI KEHILANGAN TUHAN

**T**IDAK ada manusia yang tidak hendak hidup sempurna  
 Ingin kaya, ingin rumah besar, ada kereta, ada harta  
 Memperolehi pakaian yang cantik, pakaian mewah,  
 perabot rumah yang mahal  
 Dapat pangkat yang besar, gaji yang lumayan,  
 alat-alat hidup yang canggih  
 Ini adalah benda-benda atau perkara yang lahir  
 Yang bersifat maknawi dan rohani tidak kurang pula  
 diperlukan oleh manusia  
 Ingin ilmu yang banyak, pengalaman yang luas,  
 jiwa yang bahagia  
 Tapi Tuhan tidak akan memberi manusia  
 serba lengkap dan sempurna  
 Begitulah yang terjadi di dalam kehidupan manusia  
 Manusia perlu ingat, di dalam memburu kehidupan  
 yang sempurna jangan sampai kehilangan Tuhan  
 Di dalam apa keadaan pun Tuhan mesti dipertahankan  
 Kerana Tuhan itu adalah segala-galanya  
 Tidak ada erti mendapat segala-galanya  
 kalau kehilangan Tuhan  
 Biarlah segala-galanya itu di dalam kekurangan  
 tapi jangan kehilangan Tuhan  
 Tuhan adalah hidup mati kita  
 Yang lain adalah untuk sementara sahaja  
 Rugi besarlah manusia kerana inginkan kesempurnaan  
 dan kemewahan hidup tertinggal Tuhan  
 Apabila kehilangan Tuhan, manusia tidak akan hidup bahagia  
 Kerana Tuhan itu adalah sumber kebahagiaan  
 Kehilangan Tuhan, kehilangan sumber kebahagiaan  
 Ini terbukti orang yang tidak mempedulikan Tuhan  
 walaupun serba ada tetapi tidak tenang  
 dan tidak bahagia

---

Selepas Asar  
20 Muharam 1421H



**K**ALAU engkau kehilangan harta atau barang  
 mungkin engkau dapat pahala  
 jika engkau sabar atau redha  
 Atau boleh jadi darjat engkau hendak ditinggikan  
 oleh Tuhan  
 Jika engkau kehilangan anak yang disayangi,  
 boleh jadi ia penebus dosa engkau di Akhirat  
 Oleh itu janganlah susah hati kematiannya  
 Jika engkau kehilangan kawan,  
 tidak mesti engkau berdosa  
 Bahkan boleh jadi engkau akan mendapat kawan  
 lebih baik dari itu  
 Tapi perlu engkau ingat, jangan sampai engkau  
 kehilangan Tuhan atau iman  
 Jangan engkau biarkan kehilangan Tuhan dan iman  
 Kehilangan Tuhan dan iman bererti  
 engkau kehilangan segala-galanya  
 Tuhan dan iman sesuatu yang paling berharga  
 Hilangnya Tuhan dan iman, pangkat dan  
 harta kekayaan engkau tidak berguna apa-apa  
 Engkau akan rugi di dunia dan Akhirat  
 Kerana itulah engkau kenalah berjuang  
 bersungguh-sungguh  
 Jangan sampai engkau kehilangan Tuhan dan iman  
 Kalau engkau boleh mendapatkan Tuhan dan iman  
 dengan apa sahaja, berbuatlah!  
 Engkau korbanlah apa sahaja  
 Gunakanlah masa, carilah peluang,  
 gunakanlah seluruh fikiran dan tenaga  
 Demi mencari Tuhan dan iman  
 Kalau perlu nyawa engkau diminta  
 untuk mendapat Tuhan dan iman

Korbankanlah nyawamu, kerana Tuhan dan iman  
adalah aset dunia Akhirat  
Tidak ada yang lebih berharga dari iman dan Tuhan  
Kerana itulah di dalam mendapatkan Tuhan dan iman  
Jangan takut korbankan apa sahaja  
Tuhan dan iman adalah segala-galanya

## 211 | ENGKAU SIBUK DENGAN DUNIA

**E**NGKAU sibuk dengan dunia  
Dunia tidak sibuk dengan engkau  
Mengapa engkau tidak sibuk dengan Tuhan  
yang punya dunia  
Dia adalah sibuk menguruskan hal engkau  
Engkau kejar dunia, dunia belum tentu kepunyaan engkau  
Sedangkan Tuhan telah engkau tinggalkan  
Kalaupun engkau memiliki dunia  
Apa ertinya engkau tidak memiliki Tuhan yang punya dunia  
Tapi jika engkau memiliki Tuhan  
Dunia kepunyaan Tuhan akan menjadi milik engkau  
Engkau tersilap hal, engkau tersalah fikiran  
Dunia yang akan ditinggalkan ini pun belum tentu  
di dalam milik engkau  
Padahal Tuhan engkau telah tinggalkan  
Macam mana engkau berfikir,  
bagaimana engkau membuat keputusan  
Bersibuklah dengan Tuhan yang sibuk dengan urusan engkau  
Janganlah sibuk-sibuk dengan dunia  
yang tidak sibuk pun terhadap engkau  
Engkau bersibuk-sibuk dengan Tuhan  
Tuhan tidak akan mengecewakan engkau  
Engkau sibuk dengan dunia belum tentu milik engkau  
Kalaupun engkau boleh miliki dunia  
Namun satu ketika ia dunia tetap  
akan mengecewakan engkau

---

Menjelang tidur  
30 - 09 - 1999

## APA KITA HENDAK JAWAB KEPADA TUHAN?

**A**PAKAH yang kita hendak jawab kepada Tuhan?!  
 Apakah kita boleh berdalih besok di depan Tuhan?!  
 Jawapan kita itu bolehkah diterima?  
 Kita berkata: Tuhan, susahnya beragama waktu di dunia  
 Harta terkorban, badan letih, orang menghina,  
 kehilangan kawan!  
 Aku tiada mampu melaksanakannya  
 Kalau Tuhan bertanya begini bagaimana?  
 Bolehkah kita menjawab?  
 Mana susah, sembahyang Subuh  
 dengan sebelum Subuh turun ke laut menjadi nelayan?  
 Dilambung, dihempas oleh ombak,  
 adakalanya ditelan laut atau ditelan ikan?!  
 Berhari-hari, bermalam-malam hingga badan berbau laut?!  
 Orang yang buru dunia, buru nama, buru glamour,  
 buru pangkat bukankah lebih menderita?  
 Tidak terkorban harta?!  
 Tidak buang masa?!  
 Tidak orang kata?!  
 Orang tidak menghina?!  
 Bukan setakat itu  
 Bukankah kerana dunia ramai kena bunuh?!  
 Kalau yang luka, cacat, sengsara, tidak terhitung!  
  
 Manusia!  
 Kerana dunia, kerana nama, kerana glamour,  
 kerana negara, kerana bangsa lebih sengsara!  
 Justeru itu semua bermacam-macam usaha,  
 bermacam-macam cara, bermacam-macam helahnya  
 dibuat oleh manusia!  
 Cubalah sebut di sudut-sudut yang mana  
 amalan agama lebih menderita mengerjakannya!  
 Dari gila dunia?

Adakah lebih susah dari mendaki gunung Everest?!  
Adakah lebih payah dari naik ke angkasa?!  
Bukankah urusan agama tidak sepayah itu!  
Bukankah urusan agama tidak sebanyak itu terkorban masa!  
Bahkan tidak sebanyak itu terkorban harta!  
Memperjuangkan dunia lebih banyak terkorban nyawa!  
Dibandingkan berjuang kerana agama?!  
Bolehkah ditolak atau dinafikan ini semua?!  
Kalau setakat itu pun pertanyaan Tuhan  
    sudah cukup membungkamkan mulut yang kena tanya,  
Kelu lidah hendak menjawab, patah lidah hendak berhujah  
Terhadap agama mahu berhelah?!  
Dengan agama seribu dalih?!  
Apakah bila hendak mengamalkan Islam  
    hendak cari jalan keluar?!  
Apakah bila diajak kepada Islam,  
    macam-macam alasan untuk meninggalkannya?!  
Terhadap kepentingan dunia, masya-Allah!  
Tidak ada dalih, tidak ada alasan, tidak ada helah,  
    semuanya o.k.  
Mati pun tidak apa

## MENGAPA TAKUT KEHILANGAN BARANG YANG MURAH?

**E**NGKAU risau sangat barang engkau yang hilang  
 Atau engkau takut sangat kalau-kalau  
 ada barang-barang engkau yang akan hilang  
 Padahal barang yang hilang mungkin boleh  
 berjumpa kembali  
 Atau barang yang hilang itu berkemungkinannya  
 boleh diganti, boleh jadi lebih baik lagi  
 Bahkan barang yang hilang itu satu masa nanti  
 ia akan hilang juga iaitu binasa  
 Mana ada barang yang kekal di dunia ini  
 Padahal ada perkara yang patut engkau takut kehilangannya  
 engkau tidak pun takut kehilangannya  
 Yang pertama engkau tidak takut kehilangan iman engkau  
 Sedangkan iman adalah harta dunia Akhirat  
 Itu adalah merupakan kebahagiaan kamu di dua negara  
 Lebih-lebih lagi engkau tidak takut langsung  
 kehilangan Tuhan  
 Kehilangan Tuhan ertinya kehilangan keredhaan-Nya,  
 kehilangan kecintaan-Nya dan kehilangan  
 keampunan-Nya  
 Kehilangan barang engkau walaupun susah sedikit  
 hanya di dunia  
 Di Akhirat kalau engkau sabar atau redha  
 ia memberi keuntungan kepada engkau di Akhirat  
 Tapi kalau engkau kehilangan iman  
 dan kehilangan Tuhan aduh binasalah engkau  
 di dunia lebih-lebih lagi di Akhirat  
 Kehilangan keduanya bererti engkau malang  
 sepanjang umur engkau di dunia dan kemalangan  
 yang kekal sepanjang masa di Akhirat  
 Mengapa engkau takut sangat kehilangan barang  
 yang murah?  
 Barang yang adakalanya menyusahkan engkau sendiri

Tapi mengapa engkau tidak takut kehilangan  
perkara yang paling berharga  
Iaitu kehilangan iman dan kehilangan Tuhan  
Bagaimana kamu berfikir? Siapa mengajar kamu  
berfikir begitu?  
Di mana salahnya ilmu engkau hingga  
ilmu engkau tidak boleh menilai?  
Sedangkan engkau ahli ilmu!

---

Selepas Asar  
30 Muharam 1421H

## MENCARI KEMULIAAN AKHIRAT TIDAK ADA REBUTAN

**M**ENCARI kemuliaan dan kebesaran Akhirat  
 tidak ada rebutan  
 Tidak ada saingan, dan tidak ada pertembungan  
 Makin dicari semakin aman damai  
 Makin kuat mengusahakannya terasa tenang dan bahagia  
 Mencari kemuliaan dan kebesaran dunia ada rebutan  
 Ada saingan dan perlumbaan  
 Kerana kemuliaan dan kebesarannya ada batasnya  
 Terjadilah jatuh-menjatuhkan  
 Berlakulah tekan-menekan  
 Hasad dengki pun datang menyerang  
 Berlakulah permusuhan di dalam mengejanya  
 Bersakit-sakit hati di dalam memburunya  
 Makin ke hujung semakin tegang  
 Berlakulah krisis di mana-mana  
 Kerana berebut kemuliaan dan kebesaran dunia  
 Kemuncaknya berlakulah peperangan  
 Dunia binasa, manusia hidup menderita  
 Akibat cinta dunia dan kebesarannya



215 **NIKMAT DUNIA ADA *SIDE EFFECT***

**N**IKMAT dunia ada *side effect*nya  
 Tidak macam Syurga  
 Ada pangkat besar banyak yang hasad dengki  
 Kerja banyak rehat tiada  
 Kekayaan melimpah ruah, takut sahaja  
 Bila orang mahu *kidnap*  
 Bilakah orang akan tipu?  
 Mengurus hingga kurang tidur, rehat pun tiada  
 Banyak ilmu dipanggil profesor  
 Mudah cari duit orang jemput merata-rata  
     membentang kertas kerja  
 Badan letih, tidak rehat juga  
 Adakalanya orang mengata  
 “Ah, mengada-ngada!”  
 “Ah, ada fulus bolehlah!”  
 “Ini semua cari nama!”  
 “Cakap bolehlah, buat tiada!”  
 Muka cantik potongan badan ada  
 Jadilah bintang filem atau pramugari atau penyanyi  
 Banyak yang tukang hasad dengki  
 Banyak laki-laki hidung belang yang memburu  
 Susah hati mana satu pilihan  
 Dibawa orang ke sana ke sini  
 Ada yang jual diri  
 Jika orang tahu malu pula  
 Nak kahwin orang tak mahu  
 Orang suka bawa-bawa saja  
 Duit banyak jiwa derita  
 Bila sudah tua lagi tiada harga  
 Kumbang tidak menyeri lagi  
 Kawan-kawan lari, tinggallah sendiri seorang diri  
 Mungkin duit banyak tapi apa guna?!  
 Begitulah nikmat dunia

Di dalam untung ada rugi  
Di dalam indah ada padahnya  
Di dalam keseronokan ada momokan-momokan  
Di dalam glamour ada cemasnya  
Adakalanya ruginya lebih banyak daripada untungnya  
Untung sekarung rugi seguni  
Bukan macam nikmat Syurga  
Untung sepanjang masa

KEINDAHAN itu bukan melihatnya  
 Tidak juga melihat benda-benda yang kehijauan  
 pada pandangan mata  
 Juga tidak pada melihat awan yang berarak  
 dan beralih di angkasa  
 Keindahan itu bukan melihat kebun  
 Yang mengalir di dalamnya air-air yang jernih  
 Ada ikan yang bermain-main dan berlari-lari  
 Tidak juga melihat laut  
 Yang airnya sentiasa bergelombang menghempas  
 dan memulas  
 Kalaulah keindahan itu pada bunga  
 Orang yang ada kebun bunga atau bekerja  
 di kebun bunga paling bahagia  
 Orang yang tinggal di tempat yang banyak  
 kehijauan-kehijauan tentu bahagia  
 Orang yang selalu merenung awan macam  
 golongan sasterawan sudah tentu bahagia  
 Orang yang bekerja di kebun juga termasuk  
 orang yang bahagia  
 Bahkan orang yang paling bahagia sepatutnya  
 yang tinggal di tepi laut  
 Tapi realitinya tidak begitu  
 Hakikatnya tidak terjadi  
 Sebenarnya keindahan itu bukan benda luaran  
 Keindahan itu di dalam jiwa, ia bertempat di hati  
 Apabila jiwa subur rasa bertuhan,  
 di situlah keindahannya  
 Dia adalah pelindung dan pembela,  
 di sanalah keindahannya  
 Jadi keindahan itu bukan kepada benda  
 Bukan benda luaran yang menjemukan  
 kalau selalu dilihat dan dirasa

Tapi keindahan itu adalah di dalam diri yang hakiki  
Di dalam hati dan jiwa yang rasa bertuhan  
Sedangkan Tuhan itu sangat dicintai  
Kerana itulah orang yang beragama  
Terlalu sedikit hiburannya di luar dirinya

## DI CELAH NIKMAT ENKKAU DERHAKA

**S**ETIAP detik engkau diberi oksigen oleh Tuhan  
 Hingga dari detik ke detik engkau dapat  
 menyambung hidup  
 Tapi malang, di celah-celah itulah engkau derhaka  
 kepada Allah Taala  
 Tuhan yang mencipta engkau  
 Dengan engkau membuat dosa dan meninggalkan  
 perintah-Nya  
 Selagi engkau hidup di waktu perlu makan,  
 Tuhan masih memberi engkau makan  
 Adakalanya makanan engkau begitu lazat dan berzat  
 Tapi di waktu-waktu itulah engkau melupakan  
 Tuhan yang memberi engkau makan  
 Di waktu engkau sakit kemudian Tuhan sembuhkan  
 Maka badan engkau sihat semula dan segar-bugar  
 Engkau boleh aktif berusaha dan bekerja seperti biasa  
 Dari usaha dan kerja itu engkau maju dan membangun  
 Di dalam maju dan membangun itulah  
 engkau menderhakai Tuhan  
 Di waktu engkau hendak berhibur diberi engkau  
 isteri dan anak-anak sebagai cahaya mata  
 Di waktu engkau keletihan Tuhan tidurkan engkau  
 untuk engkau boleh berehat dan memulihkan  
 kekuatan badan  
 Selepas tidur badan engkau segar  
 dan bertenaga semula  
 Tapi setelah engkau dapat tenaga  
 engkau membuat dosa dan noda  
 Engkau lalai dan alpa kepada Tuhan  
 Begitulah sepanjang hidup harian engkau  
 Allah Taala memberi berbagai-bagai nikmat  
 kepada engkau

Tapi dengan nikmat Tuhan itulah  
 engkau derhaka kepada-Nya  
 Apakah engkau tidak malu kepada Tuhan?  
 Mengapa engkau tidak berfikir satu masa nanti  
 engkau akan menemui-Nya  
 Segala nikmat akan ditanya sekalipun sebesar habuk  
 Bagaimana nanti engkau hendak menjawabnya?!  
 Apakah engkau tidak berfikir ini semuanya?!  
 Mengapa akal engkau yang cerdik itu tidak boleh  
 berfikir tentang nasib engkau?!  
 Apalah ertinya cerdik tapi tidak dapat  
 menyelamatkan diri engkau?

## ANUGERAHKAN NIKMAT-MU BERSAMA RAHMAT-MU

TUHAN! Aku pinta pada-Mu  
 Anugerahkan padaku nikmat-Mu bersama rahmat-Mu  
 Janganlah Engkau kurniakan padaku  
 semata-mata nikmat tanpa rahmat  
 Rahmat-Mu lebih utama dan besar daripada nikmat-Mu  
 Apakah ertinya nikmat tidak disertai dengan rahmat  
 Tuhan! Setiap kebaikan yang aku buat  
 aku tidak harap Syurga-Mu  
 Tapi yang aku harapkan adalah keredhaan-Mu  
 Keredhaan-Mu lebih mahal daripada Syurga-Mu  
 Tuhan! Begitulah aku takut membuat dosa bukan  
 kerana takut dengan Neraka-Mu  
 Tapi aku takut dengan kemurkaan-Mu  
 Kemurkaan-Mu lebih dahsyat dan hebat  
 daripada Neraka-Mu  
 Jadikanlah aku wahai Tuhan, setiap ibadah  
 yang aku lakukan mengharapkan rahmat-Mu  
 Bukan mengharapkan Syurga-Mu  
 Jadikanlah juga aku takut membuat dosa  
 bukan kerana Neraka-Mu  
 Tapi jadikanlah aku takut membuat dosa  
 kerana kemurkaan-Mu  
 Tuhan biarlah apa yang aku buat kerana-Mu  
 Bukan kerana Syurga atau Neraka-Mu  
 Kerana-Mu dan untuk-Mu adalah keikhlasan  
 yang paling tinggi  
 Itulah sifat orang yang merdeka  
 Kerana Syurga dan Neraka masih terikat  
 dengan kebendaan  
 Di sini tercatat sedikit keikhlasan

## SELAMATKAN KAMI DARI TIPU DAYA DUNIA

**T**UHAN, Engkau takdirkan hamba-hamba-Mu  
 tinggal sementara waktu di dunia ini  
 Pada diri mereka Engkau jadikan nafsu  
 Nafsu itu pula dia sentiasa berkehendak  
 Kehendaknya tidak pula terbatas  
 Bahkan kemahuannya tidak puas-puas  
 Sedangkan Engkau jadikan dunia ini pula  
 serba indah dan cantik  
 Mempesona dan menarik  
 Mempengaruhi dan merangsang  
 Menipu daya dan melalaikan  
 Serba sedap dan lazat  
 Apabila nafsu berkehendak dengan dunia  
 yang telah disifatkan tadi  
 Nafsu sentiasa sahaja digodanya  
 Akibatnya digoda dan dinodanya  
 Oleh itu wahai Tuhan!  
 Siapalah yang dapat lari dari perangkapnya  
 Siapalah yang dapat selamat dari jebaknya  
 Kalau rasul dan nabi Engkau pelihara mereka  
 Mereka boleh selamat daripada tipu daya dunia  
 Macam kami yang bukan rasul dan nabi ini,  
 apakah yang menjamin boleh selamat  
 Sedangkan tipu daya dunia amat dahsyat  
 Kasihanilah kami ini Tuhan!  
 Pelihara dan selamatkanlah kami daripada tipu daya dunia  
 Yang sudah jutaan manusia ramainya yang telah dipedayanya  
 Jangan pula kami juga dipedayanya  
 Musnahlah kehidupan kami di dua negara  
 Selamatkanlah kami Tuhan dengan Rahmat-Mu



TAQWA adalah aset bagi dunia dan Akhirat  
 Sumber bantuan, sumber rezeki,  
 sumber kemenangan  
 Kalau ingin musuh dikalahkan,  
 baikilah diri untuk mendapat ketaqwaan  
 Taqwa lebih tajam dari pedang  
 Membaiki diri lebih canggih dari senjata moden  
 Di dalam perjuangan, bukan senjata persiapan utama  
 Walaupun senjata disuruh mengadakannya  
 Membaiki diri lebih utama melakukannya  
 Di dalam berhadapan dengan musuh,  
 ia adalah senjata ghaib yang tidak nampak dipandang  
 Ia lebih berkesan daripada senjata lahir yang tajam  
 Tapi umat Islam di dalam perjuangan  
 sudah ramai yang melupakannya  
 Di dalam berjuang, dosa juga dilakukannya  
 Jika dosa telah berlaku di dalam perjuangan,  
 ternafilah ketaqwaannya  
 Tuhan pun berlepas diri, hadapilah musuh  
 dengan sendiri  
 Biasanya musuh, senjata lahirnya lebih baik  
 dan canggih dari umat Islam  
 Bagaimanalah hendak mendapat kemenangan  
 di dalam perjuangan  
 Kedua-dua senjata tidak dimiliki sama ada  
 senjata rohani mahupun senjata lahir  
 Begitu juga doa-doa adalah senjata orang mukmin  
 Lebih-lebih lagi di masa berjuang  
 Ia bukan menjadi senjata umat Islam  
 Orang mukmin dengan orang Islam jauh  
 sangat bezanya  
 Orang mukmin rasa bertuhan menghayati jiwanya

Oleh itu usahakan ketaqwaan terutama  
di dalam perjuangan  
Ia adalah senjata yang paling ampuh dan tajam  
Awasilah di dalam perjuangan membuat dosa  
dan kesilapan  
Kerana ia lah nanti bantuan Tuhan tidak datang  
Kita akan kecundang dan menerima nasib  
yang malang

## JAMINAN REZEKI DARI TUHAN

SEPATUTNYA kita hamba Allah,  
tentang rezeki tidak perlu bimbang  
Selama hamba itu hidup, ada jaminan dari Tuhan  
Sedangkan seorang ayah terhadap anak-anaknya  
pun bertanggungjawab  
Betapalah Tuhan yang bersifat Rahman terhadap  
hamba-hamba-Nya, mesti ada jaminan  
Kerana itu baik sangka kepada Tuhan perlu,  
dan bertawakal kepada-Nya untuk ketenangan  
Yang penting kepada seorang hamba berusaha  
mencari hidayah, taqwa dan iman  
Yang ini kenal dibimbangkan  
Yang ini kenal benar-benar *struggle* memperolehnya,  
tidak boleh bersenang-senang  
Hidayah, iman dan taqwa kenal cari  
bersungguh-sungguh  
Ilmunya kena cari, bersungguh-sungguh amalkan,  
istiqamah dan perlukan pimpinan  
Kemudian tentang rezeki, Allahlah memberi jaminan  
Bukankah Tuhan pernah berkata yang bermaksud:  
“Barangsiapa yang bertaqwa, rezekinya dijamin  
yang tidak diketahui mana sumber datangnya”  
Dosanya diampun, amalannya diterima  
Tuhan jaga mereka daripada tipuan syaitan  
Musuh-musuh tidak dapat menipu dayanya  
Mereka dijamin diberi kemenangan  
Oleh itu rezeki janganlah dibimbangkan  
Yang perlu, kita dekatkan diri kepada Tuhan  
Bila jadi orang Tuhan segala-galanya ada jaminan

## BERSYUKURLAH DENGAN IMAN DAN ISLAM

**B**ERSYUKURKAH engkau dengan nikmat Tuhan?  
 Kalaupun engkau bersyukur, tapi dengan nikmat  
 yang kecil sangat  
 Engkau bersyukur dengan nikmat yang murah  
 yang engkau usaha dan minta  
 Mungkin engkau bersyukur dengan sebab pangkat  
 yang engkau dapat  
 Boleh jadi juga dengan harta yang engkau dapat  
 Adakalanya mungkin disebabkan dapat anak atau badan sihat  
 Mengapa engkau bersyukur dengan Allah Taala  
 dengan anugerah Tuhan yang murah sangat?  
 Tapi pernahkah engkau bersyukur dengan Tuhan  
 kerana mendapat iman dan Islam?  
 Sudahkah engkau bersyukur dengan nikmat  
 kewujudan engkau oleh Tuhan?  
 Iman dan Islam nikmat yang tidak ada tandingnya  
 Kewujudan engkau tanpa kita minta juga nikmat  
 yang besar dari Tuhan  
 Mengapa engkau tidak pandang besar dengan  
 nikmat iman dan Islam?!

Mengapa engkau tidak terfikir untuk bersyukur kepada Tuhan?  
 Kerana kewujudan engkau di dunia ini?  
 Bahkan engkau tidak terasa apa-apa dengan iman dan Islam  
 Engkau tidak terfikir pun keberadaan engkau sebagai nikmat  
 Harta yang engkau nampak besar  
 Pangkat yang engkau nampak besar dan hebat  
 Yang kecil engkau nampak besar,  
 yang besar engkau nampak kecil  
 Kalau nikmat pun engkau tidak kenal  
 Jika nikmat pun engkau tidak dapat menilai  
 Lebih-lebih lagi Tuhan engkau belum kenal

## NIKMAT TUHAN YANG PALING BERTAMBAH

**M**ARILAH kita berfikir tentang nikmat Tuhan  
 Agar kita boleh bersyukur dan malu kepada-Nya  
 Sedarlah kita, lebih banyak nikmat  
     yang kita tidak minta diberi  
 Yang kita minta tidak dikabuli sedikit sahaja  
 Tapi kita tidak sedar apa yang berlaku kepada diri kita  
 Bahkan nikmat yang diberi yang tidak diminta,  
     lebih berharga daripada yang kita minta  
     sama ada dikabuli atau tidak:  
 Wujudnya kita, satu nikmat yang besar tanpa kita minta  
 Iman dan Islam yang ada pada kita  
     lebih besar lagi tidak kita minta juga  
 Kerana kita lahir daripada ibu bapa  
     yang sudah sedia menerimanya  
 Kita pun terus menyambungnyanya, cuma kita  
     diperintah berusaha menyuburkannya  
 Otak dan hati nurani bukankah juga kita  
     tidak memintanya?  
 Mata, telinga, hidung dan mulut dan segala jawarih  
     adakah kita memintanya?!  
 Tidak perlu saya menjawabnya  
 Juga nafas turun naik Tuhan anugerahkan  
     tanpa memintanya  
 Yang kita usahakan dan yang kita minta dapat,  
     murah sangat nilainya  
 Di antaranya pangkat, wang ringgit, kesihatan,  
     suami atau isteri dan anak-anak  
 Juga rumah, pakaian, pinggan mangkuk dan perhiasan  
     yang ada  
 Selain ini tidak payahlah disebut lagi,  
     sangat murah nilainya  
 Mengapa kita tidak terfikir selama ini nikmat  
     yang diberi yang tidak kita minta lebih besar

nilainya bahkan lebih banyak  
 Mana lebih besar nikmat wujudnya kita  
 yang kita tidak minta dengan wang ringgit  
 yang kita usaha dan minta?  
 Juga iman dan Islam yang kita tidak minta,  
 mana lebih besar daripada pakaian dan perabot?  
 Nafas turun naik yang kita tidak minta,  
 mana lebih utama daripada suami atau isteri kita?  
 Semua orang boleh menjawabnya  
 Oleh itu jika ada yang kita minta tidak dikabulkan  
 oleh Tuhan kita  
 Tak usahlah susah hati kerana yang tidak dapat itu  
 nilainya murah sahaja dibandingkan dengan  
 yang tidak diminta  
 Syukurilah Tuhan apa yang ada!  
 Nanti Allah Taala akan menambahkan lagi  
 sekalipun tidak diminta

## RAHMAT DAN NIKMAT TUHAN YANG TERSEMBUNYI

**R**AMAI umat Islam merasakan rahmat  
 dan nikmat Tuhan itu kesihatan badan  
 Diberi murah rezeki, dianugerahkan anak,  
 mendapat pangkat tinggi  
 Rumah besar, banyak harta,  
 kereta mewah dan canggih  
 Padahal nikmat yang disebutkan  
 belum boleh menyelamatkan kita  
 Adakalanya ia merosak dan dan membinasakan kita  
 Kalau tidak di dunia, ia akan berlaku di Akhirat  
 Tapi ada rahmat dan nikmat Tuhan yang tersembunyi  
 Setengah orang tidak sedar bahawa itu  
 adalah rahmat dan nikmat  
 Rahmat dan nikmat Tuhan yang tersembunyi itu  
 banyak pula  
 Di antaranya kalau kita berdosa diingatkan  
 agar kita bertaubat dan bersedih dengan dosa  
 Di waktu kita lalai dengan-Nya disedarkan kita  
 Sekali-sekala disusahkan kita agar kita insaf  
 Adakalanya kesusahan itu untuk darjat dan pangkat  
 Selalu sahaja kita mengingati Dia  
 Dimasukkan di dalam hati kita sentiasa takut  
 kepada-Nya  
 Di samping itu rasa cinta kepada-Nya selalu ada  
 Digemarkan kita membuat kebaikan  
 dan dibencikan kita dengan kejahatan  
 Dijadikan kita boleh berlemah lembut dengan orang  
 Boleh meminta maaf dan boleh memberi maaf  
 Boleh beristiqamah dengan kebaikan  
 Inilah di antara rahmat dan nikmat Tuhan  
 yang tersembunyi  
 Kalau hendak bersyukur, bersyukur kerana  
 itulah yang lebih utama

Kerana rahmat dan nikmat yang tersembunyi itu  
jarang orang dapat  
Tidak seperti rahmat dan nikmat di atas tadi  
Oleh itu pandai-pandailah menilai rahmat  
dan nikmat  
Agar syukur kita lebih sempurna dan tepat



**H**IDAYAH suatu yang mahal  
Taufik lebih lagilah bertambah mahal  
Mahalnya tidak boleh ditukar gantinya  
Sekalipun dengan mata benda yang paling mahal  
Intan berlian yang diidam-idamkan oleh manusia  
Hidayah dan taufik, harta yang paling berharga dunia  
dan Akhirat  
Intan berlian harta benda yang berharga di dunia aja  
Qiamat dunia hanyutlah dia tidak sampai ke mana  
Hidayah dan taufik hingga ke Akhirat kekal abadi  
Tiada hidayah, tiada taufik hidup tidak ada erti  
Atau hidup sia-sia tiada gunanya  
Sekalipun kita menjadi orang yang paling kaya  
atau paling berkuasa  
Hidup di dunia panjang umur pun tiada gunanya  
Justeru itulah Islam memerintahkan  
Di dalam doa pintalah hidayah serta taufik-Nya  
Apabila keduanya dapat dipinta menjadi milik kita,  
wah mulianya  
Hidup di dunia miskin papa pun tiada mengapa  
Kekayaan Akhirat sedang menunggu kita  
di dalam Syurga  
Panjatkanlah doa, mintalah hidayah dan taufik  
Semoga kita mendapat rahmat Allah sepanjang masa  
di dua negara

## HIDAYAH DAN TAUFIK ADALAH HAK TUHAN

**S**ETIAP manusia boleh berusaha  
 Usaha tidak memberi bekas  
 Ia hanya diperintah oleh Allah Taala  
 Tapi hidayah dan taufik adalah hak Tuhan  
 Ia adalah sangat berharga dan mahal  
 Ia adalah rahsia Tuhan, Dia memberi kepada sesiapa  
 yang Dia suka  
 Hasil usaha manusia dia jadi pandai  
 Tapi hidayah dan taufik tidak mesti dia dapat  
 Sekalipun hafaz Al Quran, Hadis di luar kepala  
 Tidak semestinya dia dapat hidayah dan taufik dari Tuhan  
 Menjadi orang alim boleh, tapi hidayah dan taufik hak Tuhan  
 Ertinya orang alim pun belum tentu ilmunya  
 menjadi panduan  
 Siapa pun boleh menceritakan Islam  
 Tapi Islam itu tidak mesti menjadi pakaiannya  
 Kerana hidayah dan taufik itu tidak mesti didapati  
 oleh orang yang boleh menceritakan  
 Beberapa banyak para motivator Islam  
 Hanya ia sebagai saluran mencari makan  
 Namun tukang cakap tidak mesti mengamalkan  
 Pensyarah Islam tidak semestinya dia Muslim  
 Orang Islam pun tidak mesti mengamalkan Islam  
 Memanglah hidayah dan taufik itu sangat mahal  
 Penentu kebahagiaan manusia di dunia dan Akhirat  
 Ia adalah hak Tuhan  
 Ia adalah rahsia Tuhan  
 kepada sesiapa sahaja boleh Dia berikan  
 Oleh itu pinta hidayah dan taufik selalu kepada Tuhan  
 Kerana ia adalah aset yang paling berharga  
 untuk keselamatan insan

**E**NGKAU duduk di bumi Tuhan  
Engkau berjalan di atasnya ke mana-mana  
Tapi engkau derhaka kepada-Nya  
Engkau makan rezeki Tuhan dan engkau miliki  
apa sahaja  
Malang sekali engkau tidak mempedulikan-Nya  
Engkau menerima berbagai-bagai nikmat dari Tuhan  
Tidak pernah Tuhan meminta bayarannya  
Takut engkau tidak bersyukur kepada-Nya  
Sedangkan manusia berbudi dengan kita  
Kita tidak patut tidak mengenang budi atau jasa  
Jasa manusia selalu kita tidak kenang  
Jiwa kita bahkan jiwa sesiapa pun,  
kita tidak boleh menerimanya  
Inikan pula Tuhan yang mencipta kita  
Menghidupkan kita dan memberi segala-galanya  
kepada kita  
Tiba-tiba kita tidak membesarkan-Nya  
Tidak menyembah dan bersyukur kepada-Nya  
Ertinya kita manusia yang tidak berhati perut  
Manusia yang tidak sedarkan diri  
Bahkan manusia yang membesarkan diri  
dan sombong terhadap Khaliqnya  
Itulah engkau tidak mungkin menongkat langit  
Di suatu hari engkau akan menemui Tuhan engkau  
Di sanalah nanti engkau akan menyesal  
tidak berkesudahan

---

Menjelang Tidur  
15 - 01 - 2000  
(08 Syawal 1420H)

## 228 | CARA BERSYUKUR YANG SEBENARNYA

**N**IKMAT yang diberi oleh Allah Taala kepada kita  
 terlalu banyaknya  
 Berbagai-bagai macam dan jenis  
 Di dalam diri kita seluruhnya adalah nikmat dari-Nya  
 Di luar diri kita bermacam-macam  
 dan berbagai-bagai pula  
 Rumah, isteri, anak-anak, harta, kereta,  
 makan minum, pakaian dan lain-lainnya  
 Balaslah nikmat Tuhan itu tanda bersyukur kepada-Nya  
 dengan nikmat-Nya juga  
 Seperti diri kita, sembah, besarkan, cinta dan takutlah  
 kepada-Nya  
 Gunakan lidah kita menyebut, mensucikan,  
 memuji dan memohon keampunan kepada-Nya  
 Tenaga kita gunakan untuk perjuangan  
 menegakkan agama-Nya  
 Nikmat di luar diri seperti harta gunakan  
 untuk menolong manusia yang miskin, papa  
 Digunakan juga untuk fisabilillah yang diperintahkan  
 kepada kita  
 Kereta kita jadikan alat untuk khidmat kepada agama  
 dan manusia  
 Rumah kita untuk menyambut tetamu  
 dan pertemuan silaturrahim  
 sesama hamba-hamba-Nya  
 Tanah untuk diwakafkan, ditegakkan bangunan pendidikan  
 dan bangunan rumah tetamu  
 Bangunan-bangunan dan gedung-gedung perniagaan  
 demi kemajuan umat Islam patut dibina  
 Begitulah caranya kita bersyukur kepada Tuhan  
 di atas nikmat-nikmat-Nya  
 Menggunakan nikmat-nikmat-Nya  
 untuk keredhaan-Nya

Ertinya nikmat Tuhan itu juga tidak kira  
    nikmat yang mana dikorbankan pada jalan-Nya  
Korbankan nikmat Tuhan kerana nikmat-Nya  
    yang diberikan kepada kita  
Begitulah caranya kita bersyukur kepada Tuhan  
    di atas segala nikmat, rahmat dan anugerah-Nya  
Nikmat dari Tuhan, nikmat itu jugalah  
    kita gunakan untuk Tuhan  
Jangan gunakan nikmat Tuhan bertentangan  
    dengan kehendak Tuhan  
Tidak takutkah kepada Tuhan?  
Jika Tuhan murka Dia boleh rentap bila-bila masa  
Bila-bila masa sahaja kita boleh terhukum dan terhina  
Berhati-hatilah menggunakan nikmat Tuhan  
    agar kita tidak kufur nikmat

---

Menjelang Tidur  
17 Muharam 1421H

## 229 | SYUKUR ATAS SYUKUR

**A**KU syukur pada-Mu Tuhan  
 di atas segala nikmat yang Engkau beri  
 Aku bersyukur kepada-Mu lagi  
 di atas kesyukuran itu  
 Kerana syukur itu satu nikmat  
 yang bersifat maknawi dan rohani  
 Ia adalah satu pemberian-Mu  
 Syukur di atas kesyukuran  
 Begitu juga aku bertaubat di atas dosa-dosaku  
 Seterusnya aku bertaubat  
 di atas taubat-taubatku yang palsu  
 Ertinya taubatku memerlukan taubat lagi  
 Taubat di atas taubat  
 Begitulah yang aku harapkan pada-Mu, ingatkan aku  
 Bahawa syukur itu adalah satu nikmat dan anugerah-Mu  
 Agar aku bersyukur di atas kesyukuran itu  
 Seterusnya ingatkan aku  
 Bahawa taubatku adalah palsu  
 Agar aku bertaubat di atas taubat itu  
 Moga-moga aku tidak menipu diriku

---

 Selepas Asar  
 19 - 12 - 1998

**A**KU cuba mencintai-Mu Tuhan hati tidak juga terasa  
 Aku cuba berkali-kali pun tidak terasa apa-apa juga  
 Aku fikir-fikirkan nikmat-Mu  
 Aku kenang-kenangkan rahmat-Mu  
 agar nampak kemurahan-Mu  
 Atas nama ilmu aku akur, namun aku  
 belum juga jatuh hati dengan-Mu  
 Aku susah hati, aku sedih selalu,  
 mengapa terjadi begini  
 Mengapa cintaku pada-Mu belum berbunga lagi?!  
 Sedangkan aku tahu, aku akui nikmat-Mu  
 terlalu banyak padaku  
 Kalau hendak dihitung tidak mungkin dihitung  
 walaupun melalui komputer!  
 Aku iri hati selalu  
 Cerita dan berita orang soleh zaman dahulu  
 Hebatnya cinta mereka pada-Mu  
 Hilang selera makan kerana-Mu  
 Asyik memuja dan memuji-Mu  
 Mensucikan dan membesarkan-Mu  
 Terutama di waktu malam yang sepi  
 Di waktu orang mimpi  
 Mereka memuja-Mu merintih pada-Mu  
 Mengharapkan kasih sayang pada-Mu  
 Air mata mereka membasahi pipi  
 Adakalanya menitis ke bumi  
 Mereka merasai Engkau adalah segala-galanya  
 Engkau adalah hidup mati mereka  
 Engkau adalah di bibir mereka  
 Engkau adalah hati jantung mereka  
 Tapi aku tidak begitu  
 Aduh kerasnya hatiku

Hingga kini aku belum mencintai Kekasih Agungku  
 Baru aku sadar, cinta pada-Mu adalah anugerah  
 dan hidayah-Mu  
 Bertuahlah dan berbahagialah orang yang  
 Engkau anugerahkan kecintaan pada-Mu  
 Aku bilakah lagi Tuhan?!  
 Dapat sedikit pun jadilah  
 Aku tidak putus asa  
 Aku cuba lagi, selagi ada nyawa di badan  
 Di hujung hidupku pun kalau dapat sudah cukuplah  
 Wahai Tuhan Al Hannan wal Mannan



DI SEGI ilmu tidak ada orang mempertikaikan wahai Tuhan  
 Engkau adalah cinta agung lebih patut dicintai  
 Engkau cinta agung diperkatakan orang  
 Di atas mimbar-mimbar dan di majlis-majlis pengajian  
 Seruan selalu disarankan cintailah Tuhan  
 Engkaulah yang dimaksudkan  
 Aku tidak pasti apakah mereka yang berkata dan  
 menyarankan dapat merasakan  
 Tapi yang pasti Tuhan, aku belum merasai  
 Sedangkan mencintai-Mu itu menyelesaikan segala masalah  
 Cinta pada-Mu adalah kenyang daripada segala  
 yang mengenyangkan  
 Cinta pada-Mu adalah agung, bahagia yang tiada taranya  
 Tenang daripada segala ketenangan  
 Senang daripada segala kesenangan  
 Cinta pada-Mu rindu yang tidak berkesudahan  
 Siapa merindui-Mu, segala yang dirindui tidak ada erti lagi  
 Rindu kepada itu semua musnah sama sekali  
 Begitulah wahai Tuhan, atas dasar ilmu aku akui  
 Tapi malang sekali aku belum merasai  
 Cintaku pada-Mu belum pun berbunga  
 Rindu dan asyik jauh sekali  
 Tuhan aku harap pada-Mu titiskan sedikit air cintaku pada-Mu  
 Jangan Engkau biarkan hatiku gersang dari mencintai-Mu  
 Agar Engkau yang Agung patut dicintai  
 Aku rasai dengan kalbuku  
 Supaya cinta dan kasihku kepada yang lain  
 tidak membunuh jiwaku  
 Rasakanlah wahai Tuhan pada jiwaku  
 Engkau adalah cinta agungku

Selepas Subuh

11 - 05 - 1997

(04 Muharram 1418H)

## KALAU TUHAN BELUM ENGKAU CINTAI

**K**ALAU engkau belum jatuh hati dengan Tuhan  
 Lebih-lebih lagi Tuhan belum engkau cintai  
 Bagaimanalah engkau sembah Tuhan  
 Sudah tentu engkau tidak merasa lazat  
 Manalah engkau hendak rasa indah beribadah  
 Mana boleh dapat melepaskan rasa rindu dengan Tuhan  
 Begitulah juga jika engkau belum rasa takut dengan Tuhan  
 Tidak mungkin di waktu engkau menyembah-Nya  
 Boleh lahir rasa kehambaan  
 Rasa hebat, rasa malu, rasa hina, dan merendah diri  
 Jika engkau sembah juga Allah Taala  
 Sudah tentu secara terpaksa  
 Secara terpaksa sudah tentu menyeksakan  
 Secara terpaksa sudah tentu menjemukan  
 Di waktu-waktu atau di masa-masa sibuk atau susah  
 Sudah tentu engkau tinggalkan  
 Kerana itu mengenal Tuhan itu penting  
 Agar kita takut dan cinta  
 Kita rasa Dia Penyelamat, Pelindung, Pemberi Rezeki  
 Kita sangat terasa Dia Tuhan sangat mencintai kita  
 Di waktu itu baru kita rasa rindu pada Tuhan  
 Kita menyembah-Nya sudah tentu kita rasa asyik  
 Kita dapat mengadu dan bermanja-manja dengan Tuhan  
 Dapat meluahkan perasaan yang terbuku  
 Dapat meluahkan rasa rindu dendam  
 Dengan itu kita dapat menerima harapan dengan Tuhan  
 Hati kita puas, jiwa kita tenang  
 Di antara rasa khauf dan raja' seimbang

## MENGAPA TIDAK SEDIH KALAU ALLAH TIDAK KASIH

**B**ANYAK orang sedih tidak dapat kasih orang lain  
Banyak orang menangis tidak dapat belai kasih  
Hati derita, jiwa sengsara  
Ada yang frust, banyak yang kecewa  
Isteri menangis tidak dapat belai kasih suami  
Suami sedih tidak dapat perhatian isteri  
Anak menangis tidak dapat kasih ibu  
Ibu menangis melihat anak-anak membiarkan dirinya  
Banyak yang berkecil hati tidak dapat simpati manusia  
Banyak yang jiwanya derita tiada siapa mempeduli  
Tidak kurang jiwa yang gelisah tidak dapat menagih kasih  
Begitulah manusia jiwa kosong ketiadaan kasih  
Wahai manusia mengapa tidak menangis  
    kalau Allah tidak kasih  
Mengapa tidak sedih kalau Allah tidak redha  
Mengapa dan mengapa tidak berusaha mengasihani  
Agar kita dicintai, agar kita dikasihani  
Janganlah bersusah hati tidak dapat kasih manusia  
Kerana ia tidak abadi dan tidak sejati  
Ketagihkanlah cinta Allah, carilah kasih sayang-Nya  
Kerana ia kekal abadi lagi sejati

---

3.25 petang  
25 - 01 - 1995

## RAMAI TERSALAH MEMBERI TAKUT DAN CINTA

**R**AMAI orang tersalah bagi takut dan cinta  
 Memberi ketakutan dan kecintaan  
 yang tidak ada kuasa  
 Cinta dan takut kepada manusia dan  
 benda-benda yang tidak bernyawa  
 Yang tidak dapat menjaga, mengawal,  
 menyelamatkan dan membahagiakan manusia  
 Memberi seluruh harapan kepada makhluk  
 ciptaan Tuhan  
 Tidak ada sedikit pun di ruangan hatinya rasa cinta  
 dan takut kepada Tuhan penciptanya  
 Tuhan yang Dia adalah sumber segala-galanya  
 Padahal manusia, harta, pangkat dan entah apa lagi  
 benda yang menjadi pujaan manusia  
 Tidak dapat pun membendung penyakit,  
 tidak dapat menahan kehilangan harta  
 Perkara dan benda yang dipuja,  
 tidak dapat menghalangnya daripada bencana alam,  
 difitnah dan dibunuh orang  
 Kerana itulah manusia di dunia menderita  
 di dalam kesenangan  
 Ketakutan di dalam kemewahan  
 Adakalanya perempuan yang menjadi kecintaannya  
 menghambanya atau mengkhianatinya  
 Kerana itulah huru-hara dan gejala-gejala yang menakutkan  
 sengaja Allah biarkan bermaharajalela  
 Seolah-olah Tuhan berkata:  
 Kalau Aku bukan menjadi kecintaan dan ketakutan engkau  
 Aku tidak ada di dalam kamus hidupmu  
 Kalau Aku sudah tidak diperlukan lagi  
 Sekarang Aku hendak serahkan kepada engkau  
 Manusia, betina dan harta benda yang menjadi  
 kecintaan dan ketakutan engkau

Menjaga segala urusan hidup engkau  
Mampukah perkara-perkara dan benda-benda itu  
menjaga engkau?!

Aku berlepas diri  
Sekarang risiko yang terjadi kerana manusia sudah  
tidak ada pergantungan dengan Tuhan  
Manusia sedang berhadapan dengan neraka dunia  
di dalam kemajuan

---

Selepas ekspedisi  
18 - 08 - 2001

## 235 | MABUK DENGAN TUHAN

**K**ARAM di laut boleh jadi lemas, mungkin membawa kematian  
 KematianNya mungkin membawa syahid akhirnya  
 Nampaknya macam malang, tapi masih untung pada seseorang  
 Karam di dalam percintaan, hidup terumbang-ambing  
 Menjadikan manusia hidup tidak stabil  
 Buat apa sahaja serba tidak kena  
 Penumpuan sesuatu kerja tidak ada  
 Sering termenung dan murung sahaja  
 Banyak urusan dan tanggungjawab terbengkalai dibuatnya  
 Karam dengan dunia manusia terlalu sibuk  
 Tidak ada masa untuk berehat  
 Apatah lagi untuk menyembah Allah Taala  
 dan mengingati-Nya tidak ada ruang baginya  
 Terkejar di sana, terkejar di sini memburu kebahagiaan  
 dengan kekayaan dunia  
 Adakalanya makan pun tidak sempat  
 Dengan isteri pun sekejap-sekejap sahaja  
 hingga isteri curiga dan menderita  
 Kerana kurang dapat bermanja dan belaiannya  
 Tapi mabuk dengan Tuhan rasa bahagia di samping rasa takut  
 Mabuk Tuhan jiwa tenang fikiran tidak berserabut  
 Dan tidak karam dan tenggelam dengan dunia  
 Orang yang cinta Tuhan, cinta pula dengan makhluk-Nya  
 Kerana cinta Tuhan ramai hamba-hamba Tuhan  
 yang dapat manfaat darinya  
 Dapat pemurahnya, pertolongannya, kasih sayangnya,  
 rendah dirinya, kerjasamanya, pemaafnya  
 Mabuk Tuhan sibuk beribadah kepada-Nya  
 dan hati tidak lupa kepada-Nya  
 Sibuk juga berkhidmat dengan makhluk  
 dan hamba-hamba-Nya

---

Selepas Zuhur  
 19 Muharam 1421H

## CINTA TUHAN CINTA YANG HAKIKI

**M**anusia mudah mencintai sesuatu yang dipandang mata  
Juga manusia mudah mencintai sesuatu  
yang boleh difikirkan  
Sedangkan mencintai sesuatu yang dilihat oleh mata  
Atau yang mudah dapat difikirkan  
Adalah cinta murahan  
Mencintai yang dapat dikesan oleh hati atau jiwa,  
payah dikesan  
Kerana akal dan mata selalunya membutuhkan hati  
Selalunya akal dan mata membunuh jiwa  
Kerana itulah hati dan jiwa tidak kenal Tuhannya  
Lantaran itulah Tuhan sudah tidak dirindui dan dicintai  
Padahal Tuhan itulah cinta yang hakiki dan sejati  
Cinta Tuhan cinta yang kekal abadi  
Cinta Tuhan, cinta yang membawa kebahagiaan  
yang berkekalan  
Cintakan Tuhan adalah cinta martabat tertinggi  
Rafiqul A'la, Sahabat Yang Tinggi Lagi Setia  
Mencintai Rafiqul A'la tidak pernah kecewa  
Mencintai Tuhan tidak pernah mengkhianati kita  
Cinta yang menjadi pembela kita  
Cinta yang menjadi pelindung kita di mana-mana  
Cinta yang menyelamatkan kita dunia Akhirat  
Cinta agung yang tidak ada tandingan dan bandingannya  
Cinta yang kalau orang tahu  
Bukan sahaja harta dan tenaga bahkan  
nyawa orang korbankan

---

Menjelang tidur  
14 - 11 - 1999

## 237 | PUJALAH TUHAN

**B**EBERAPA banyak pemuja-pemuja alam,  
 alam habis dirosakkan manusia  
 Beberapa banyak pemuja-pemuja pangkat,  
 akhirnya jatuh juga  
 Beberapa banyak pemuja wang ringgit,  
 habis kesudahannya  
 Atau tidak tahu apa hendak diguna

Tidak kurang pemuja-pemuja betina,  
 akhirnya mati atau tua  
 Ada yang lari setelah kita ditipunya  
 Nama juga banyak yang memburunya,  
 akhirnya hilang di mana lesapnya  
 Tidak ada suratnya, tidak ada ceritanya

Bahkan apa yang diburu semuanya rosak binasa  
 Tidak ada yang kekal, tidak ada yang setia,  
 tidak ada yang bertahan  
 Segala yang dapat semuanya mengecewakan  
 Paling tidak di hujung umur tidak mencapai semuanya

Wahai manusia gunakanlah fikiran buatlah perhatian  
 Jadikanlah iktibar, jadikanlah pengalaman  
 Apakah itu semua hendak kita buru lagi?  
 Yang segala-galanya telah menipu dan mengecewakan

Pujalah Tuhan Dia tidak mengecewakan  
 Cintailah Dia yang kekal tidak berkesudahan  
 Gunakanlah segala-galanya untuk ibadah kepada-Nya  
 Burulah apa saja selagi hala untuk Tuhan



## ENGKAU TIDAK TERASA KASIH SAYANG TUHAN

**D**I WAKTU Tuhan memberi kasih sayang,  
 engkau tidak terasa apa-apa  
 Atau di waktu Allah memberi,  
 engkau biasa sahaja  
 Macam Tuhan itu tidak ada kena-mengena  
 dengan engkau  
 Nafas turun naik engkau setiap detik,  
 kasih sayang Tuhan  
 Engkau boleh melihat dengan mata,  
 itu kasih sayang-Nya  
 Boleh mendengar dengan telinga dari nikmat-Nya  
 Engkau boleh merasa makanan dengan lidah  
 dengan lazatnya, kasih sayang-Nya  
 Engkau boleh berhibur suami isteri,  
 kasih sayang dan rahmat-Nya  
 Di waktu letih engkau ditidurkan-Nya,  
 itu adalah nikmat-Nya  
 Selepas tidur engkau diberi tenaga semula  
 Engkau boleh mandi dari air Tuhan  
 Bersih badan engkau, segar tenaga engkau  
 Semuanya itu bukan engkau punya  
 Engkau hanya dapat percuma dari Tuhan  
 Bahkan ribuan macam lagi nikmat Tuhan  
 kepada engkau  
 Apa yang kita sebut tadi sebahagian kecil sahaja  
 Semuanya itu engkau tidak terasa apa-apa  
 Biasa sahaja, ia berlalu begitu  
 Tanpa engkau memikirkan pemberian siapa?  
 Tapi bila engkau berhadapan dengan ujian  
 Di waktu engkau ditimpa sakit, miskin, bencana alam  
 Ketika engkau kehilangan barang  
 Di waktu engkau dihina orang  
 Wah! Waktu itu engkau terasa sangat

Mengapa Tuhan lakukan begitu?  
Engkau mengeluh dan mengaduh  
Seolah-olah terlalu malang  
Masa yang begitu panjang engkau bergelumbang  
dengan nikmat dan rahmat  
Engkau tidak terasa apa-apa  
Bila engkau sekali-sekala diuji,  
baru engkau terasa  
Patut engkau sedar bahawa engkau ada  
Tuhan yang berkuasa

---

Selepas Zuhur  
11 - 12 - 1999  
(03 Ramadhan)

## KEKASIH ALLAH TIDAK TAKUT DAN TIDAK BERDUKACITA

**A**LLAH Taala ada berfirman, ertinya:  
 “Ketahui olehmu bahawa kekasih Allah itu  
 tidak takut dan tidak berdukacita”  
 Marilah kita mentafsir dan memahami kehendak ayat ini  
 Moga-moga Tuhan memberi kita faham maksud  
 dan kehendak-Nya  
 Dengan itu moga-moga kita dapat menghayati  
 Dan menjadikan pegangan di dalam kehidupan  
 Di antara kehendak ayat ini:  
 Orang bertaqwa itu dia tidak takut dengan manusia  
 dan kuasa manusia  
 Kalau ia didatangkan ujian dari manusia  
 tidak pula berdukacita  
 Orang mukmin tidak takut dengan kemiskinan  
 Jika terjadi kemiskinan tidak pula berdukacita  
 Orang mukmin tidak takut dengan kesakitan  
 Kalau berlaku tidak pula susah hatinya  
 Orang yang bertaqwa tidak bimbang  
 dengan penghinaan dari manusia  
 Kalau terjadi tidak pula sakit hatinya  
 Orang mukmin tidak takut dimurka oleh manusia  
 Kalau berlaku tidak pula susah hati  
 Kekasih Tuhan itu tidak takut dan bimbang  
 tentang rezekinya  
 Kalau tidak ada redha hatinya  
 Orang mukmin itu tidak takut tidak dikasihi orang  
 Kalau terjadi tidak pula cacat jiwanya  
 Wali Allah itu tidak bimbang kalau tidak ada harta  
 Kalau hilang hartanya tidak pula jiwa derita  
 Orang mukmin tidak bimbang dengan takdir Tuhannya  
 Kalau terjadi tidak pula bersedih hati  
 Wali Allah itu tidak takut meninggalkan dunia,  
 harta benda dan sanak-saudaranya

Dan tidak pula bersedih dengan kematiannya  
Orang mukmin itu yang dia takut  
    hanya dengan Tuhannya  
Yang dia berdukacita kalau terbuat dosa  
Dia takut kalau Tuhan tidak redha  
Dia susah hati kalau lalai dengan Tuhannya  
Dia bimbang kalau tercabut imannya  
Dia bersedih kalau cuai dengan ibadahnya  
Begitulah lebih kurang maksud  
    dan kehendak tafsiran ayat  
Moga-moga ada kebenarannya

CINTAILAH Allah Tuhan pencipta manusia  
 Cinta sesama manusia akan terjadi dengan sendiri  
 Cintailah Allah, cinta manusia tidak perlu diperjuangkan  
 Dia akan tercetus secara automatik  
 Cintailah Tuhan, kasih sayang dan perpaduan  
 sesama manusia akan terjalin  
 Takutilah Tuhan  
 Nescaya manusia akan takut melakukan kesalahan  
 sesama manusia  
 Lebih-lebih lagi dengan Tuhan  
 Takutnya itu ia tidak akan melanggar perintah-Nya  
 Cinta dan takut dengan Tuhan rahsia perpaduan  
 Anak kunci kasih sayang sesama manusia  
 Kerana kasih sayang dan perpaduan adalah kerja jiwa  
 Bukan hubungan fizikal, fizikal mengikut sahaja  
 Apabila hati dan jiwa hubungannya  
 dengan Allah begitu mesra  
 Automatik hubungan dan kemesraan sesama manusia  
 terjalin sama  
 Rahsia itulah yang tidak diketahui oleh golongan sekular  
 Yang mengagungkan fikiran dan mengabaikan jiwa  
 Yang memuja akal tapi hatinya dimatikan  
 Fikirannya bercahaya tapi hatinya gelap gelita  
 Akibatnya kegelapan di dalam cahaya  
 Kerana cahaya terlalu terang membutakan matanya  
 Macam matahari terlalu kuat cahayanya  
 Tidak mampu mata memandang dan melihatnya  
 Begitulah golongan sekular  
 Kerana akalnya terlalu terang,  
 membutakan hati atau jiwanya  
 Maka tersesatlah dia daripada kebenaran  
 Bergelaplah dia di dalam terang

---

Selepas Zuhur  
 04 - 10 - 1999

## CINTAKAN TUHAN SUNGGUH AGUNG

**C**INTAKAN Tuhan sungguh agung  
 Cintakan yang Maha Pencipta sungguh suci,  
 qudus dan sejati  
 Cintakan Tuhan tidak berkesudahan  
 Tidak ada tepi dan penghujungnya, bahkan abadi  
 Cintakan selain Allah, cinta nafsu  
 Cinta nafsu ada kesudahannya  
 Cintanya ada tepi dan ada penghujungnya  
 Kerana cinta itu bukan sejati dan hakiki  
 Cintakan makhluk penghujungnya kecewa  
 Cintakan Khaliq membawa bahagia  
 Cinta yang berpanjangan  
 Cinta yang agung  
 Cinta yang tidak ada taranya  
 Cintakan selain Tuhan, cinta yang palsu  
 Cinta yang akan berkesudahan bahkan akan mengecewakan  
 Cintakan Tuhan tidak ada rebutan  
 Sekalipun satu dunia yang mencintai-Nya  
 Namun semua orang akan mendapat kebahagiaan  
 dan kepuasan  
 Tidak ada yang akan kecewa  
 Cintakan dunia akan menjadi rebutan  
 Kalau sudah ada yang dapat, yang lain akan kecundang  
 Yang lain akan kecewa bahkan akan lahir dengki  
 dan sakit-sakit hati  
 Sungguh agung cintakan Tuhan  
 Cinta yang tidak ada bandingan dan tandingan  
 Tapi manusia hatinya buta  
 Yang menjadi rebutan ialah cintakan dunia

## ANUGERAHKAN SEDIKIT RASA CINTA PADA-MU

**A**NUGERAHKANLAH sedikit rasa cintaku  
pada-Mu Tuhan!  
Agar aku tidak mencintai selain-Mu  
Supaya segala yang ada kukorbankan untuk-Mu  
Atau berilah aku sedikit rasa takut pada-Mu Tuhan  
Agar aku boleh mengawal diriku  
Patuh kepada suruhan-Mu  
Menjauhi larangan-Mu  
Hidupkanlah jiwa aku dengan mengingati-Mu Tuhan!  
Bangunkanlah jiwa aku dengan takut kepada-Mu  
Agar rasa kehambaanku subur di dalam jiwaku  
Tuhan! Cinta dan takut pada-Mu memenuhi jiwaku  
Inilah yang akan menyelamatkan aku  
Kalau tidak kerana ini, sudah tentu aku lalai  
dengan-Mu selalu  
Aku lupa suruhan dan larangan-Mu setiap waktu  
Nafsulah yang mempengaruhiku  
Syaitanlah yang akan menipudayaku

---

Menjelang tidur  
06 - 08 - 1999

## 243 | ENKAU PATUT DIRINDU

**T**UHAN, Engkau patut dirindu  
 Kerana cintaku kepada-Mu sepenuh hati  
 Betapalah aku tidak merindui-Mu  
 Rahmat dan nikmat-Mu mengalir kepadaku setiap hari  
 Aku khuatir rinduku kepada-Mu di sebelah pihak  
 Sedangkan Engkau belum lagi mencintaiku  
 Kerana dosa-dosa dan kesalahanku yang aku lakukan  
 terlalu banyak  
 Menjadikan Engkau belum lagi meredhai dan mencintaiku  
 Tuhan, dengan rahmat-Mu ampunkanlah aku ini  
 Tuhan, dengan rahmat-Mu maafkanlah kesalahanku  
 Aku ini bukankah hamba ciptaan-Mu  
 Kalau Engkau maafkan aku, sedikit pun  
 tidak menggugat kebesaran-Mu  
 Tuhan, cukuplah kesalahanku menjadi pengajaran  
 Aku akan mengingatnya sepanjang umurku  
 Cukuplah sudah aku terseksa dengan dosa-dosaku itu  
 Moga-moga di masa hadapan aku tidak melakukannya lagi  
 Namun dengan kelemahanku tidak mungkin  
 aku terlepas dari dosa  
 Kalau bukan dengan kuasa-Mu membantu aku  
 Juga kalau tidak disertakan dengan hidayah  
 dan taufiq dari-Mu  
 Hidayah-Mulah yang aku harapkan  
 Taufiq-Mulah yang aku pinta  
 Pimpinan-Mulah yang aku hendak  
 Agar aku terselamat daripada dosa-dosa  
 yang memburu



## ORANG YANG PALING DICINTAI TUHAN

**O**RANG yang paling Engkau cintai Tuhan  
 Ialah para rasul 'alaihimmussolatuwassalam  
 Selepas itu para-para nabi dan para-para wali  
 Namun demikian merekalah orang yang paling banyak  
 mendapat ujian  
 Ujian demi ujian yang Engkau timpakan  
 Begitulah layanan yang Engkau berikan terhadap  
 orang yang Engkau cintai  
 Aku faham rahsianya!  
 Agar mereka dapat menebalkan rasa kehambaan  
 Juga supaya Engkau Tuhan sentiasa di dalam ingatan  
 Hingga mereka merasakan Engkau  
 adalah pelindung mereka setiap masa  
 Hingga Engkau dirindui dan dikasihi  
 Diingati, disembah dan dipuja  
 Inilah kebahagiaan mereka  
 Dan inilah yang Engkau mahu kepada mereka  
 Inilah yang Engkau suka  
 Agar mereka Engkau redha  
 Maka berlakulah redha-meredhai  
 Di antara Engkau dengan mereka  
 Inilah rahsianya mengapa mereka diuji dan diuji  
 Rupanya di sebalik ujian yang berat ini  
 ada rahsianya yang agung dan mulia  
 Ini tidak dapat difahami oleh manusia  
 yang cinta dunia

## PENCINTA TUHAN DI MALAM SEPI

**D**I WAKTU malam sepi, senyap sunyi  
 Suasana hening, sejuk menyucuk tulang  
 Hanya suara dengkur manusia yang memecah sunyi  
 Sekali-sekala kedengaran suara anjing-anjing liar  
 di waktu malam sepi  
 Di waktu itu pencinta Tuhan bangun dengan penuh tenang  
 Membersihkan diri, berpakaian bersih  
 Bertelut dan berlutut, berdiri dan sujud  
 berulang-ulang kali sepuas hati  
 Berzikir, bertahmid, bertakbir dan bertasbih  
 Puja dan puji disemarakkan, munajat membisikkan,  
 melahirkan cinta  
 Merafakkan doa melahirkan hajat dan harapan  
 Mengagungkan dengan penuh khushuk  
 dan tawadhuk, menghina diri  
 Menghina diri di hadapan cinta agungnya, agar diperhati  
 Air mata mengalir di pipi, jatuh ke bumi  
 Begitulah setiap malam yang berlalu  
 Di suasana kesepian malam, di dalam keheningan suasana  
 Pencinta-pencinta Tuhan memuja cinta agungnya,  
 agar dia dicintai  
 Setelah memuja-memuji sepuas hati  
 Meminta, mengharap sepuas hati  
 Dengan air mata dan tangisan minta dikasihi-Nya  
 Mereka berhenti menunggu malam  
 Hati sentiasa bimbang takut cinta tidak berbalas  
 Namun putus asa tiada, harapan sentiasa berbunga  
 Perhubungan tetap diteruskan

246 | MENJAGA MARUAH DIRI

HARGA diri manusia adalah maruahny  
Pada maruahlah keindahan seseorang itu  
Maruah tidak boleh dijual beli  
Kerana itu jagalah maruah diri  
Jangan cemarkan maruah diri,  
hilang kepercayaan seluruh manusia  
Allah dan Rasul juga memandang tinggi  
maruah manusia  
Jika di dalam kehidupan seseorang itu  
sudah dapat dilihat cacat celanya  
Seperti pembohong, penzina, bergaul bebas dengan betina  
Mungkir janji, khianat, rosak akhlaknya  
Menzalimi, penipu, mementingkan diri jadi budaya  
Harga diri sudah tiada  
Hilanglah kepercayaan manusia  
Di waktu itu ilmu yang tinggi tidak dapat menebusnya  
Wang ringgit tidak akan memulihkan kepercayaan manusia  
Pangkat dan darjat begitu juga  
Sekalipun bertaubat Tuhan terima  
Tapi pada pandangan manusia tetap cacat dan cela  
Jagalah harga diri jangan sampai tercemar  
Jika berlaku, musnah dan punahlah harga diri  
Nama baik tercemar  
Menderitalah sepanjang hidup seseorang itu

---

## 247 | ORANG YANG TIDAK BERMARUAH

**O**RANG yang tidak bermaruah sifat malunya musnah  
 Dia akan membuat apa sahaja untuk hidup jalan mudah  
 Mengampu, menjilat, menghina diri perbuatan  
 yang lumrah  
 Menghina orang, mentohmah, memfitnah,  
 mengadu domba perkara biasa  
 Orang yang hilang malu, membuat kerja  
 yang memalukan, sudah tidak terasa malu  
 Padahal orang ramai merasa jijik dan menjijikkan  
 Dia boleh ulang-alik, turun naik menemui orang  
 yang hendak dilobi  
 Untuk tujuan kepentingan peribadi,  
 yang belum pasti menguntungkan  
 Adakalanya orang yang dilobi dan diampu  
 amat bencinya  
 Tapi dia juga ada keuntungan peribadi,  
 kebenciannya disembunyikannya  
 Apabila dia tidak ada kepentingan peribadi,  
 si pengampu ditendangnya  
 Di waktu itu orang yang hilang maruah itu  
 terumbang-ambing  
 Macam sampah kehanyutan  
 Ada orang walaupun terpelajar tidak pandai  
 hidup sendiri  
 Paling pandai dia boleh hidup makan gaji  
 dengan kerajaan  
 Apabila jawatan terlucut, dia hidup tercengang-cengang  
 Macam orang yang tersesat di tengah padang pasir  
 kehilangan haluan  
 Orang yang tidak bermaruah itu, tidak senang  
 dengan orang yang hidup senang  
 Makin orang senang, jiwa mereka makin tidak tenang  
 dan suka meradang-radang

Apabila seorang muka muram, hilang seri,  
macam kera sumbang  
Sambil berfikir bagaimana hendak menjahanamkan  
orang yang dia radang  
Begitulah kehidupan orang yang kehilangan maruah,  
malunya sudah tiada  
Dia buat apa sahaja terutama mengampu-ampu orang  
yang diharapnya  
Orang ramai telah menghina serta meluat  
dengan sikapnya  
Namun yang punya diri tidak terasa apa-apa,  
macam orang yang mati badannya

---

Selepas Asar  
26 - 05 - 1997  
(18 Muharram 1418H)

## DIRI SENDIRI MENJATUHKAN MARUAH

**M**ANUSIA ini kalaulah orang lain menyelak keaibannya  
 hingga terlihat betis atau pahanya  
 Wah bukan main lagi marahnya  
 Dia merasa diberi malu dan dijatuhkan maruahnya  
 Setengah orang mungkin akan *disue* orang itu  
 ke mahkamah  
 Atau boleh jadi dipukulnya orang itu  
 dengan sepatunya  
 Padahal dia sendiri yang berpakaian  
 sengaja membuka auratnya, tidak pula terasa malu  
 Tidak pula terasa yang maruahnya telah terjatuh  
 Padahal auratnya terdedah ribuan orang  
 yang melihatnya  
 Kalau orang lain yang menyelaknya dia terasa malu  
 Tapi dia sendiri yang membukanya terasa megah pula  
 Begitu juga kalau dia berpakaian menutup aurat  
 terasa pula malu  
 Lebih-lebih lagi kalau dia seorang sahaja  
 yang menutup auratnya  
 Dia merasa mulia bahkan berbangga  
 kalau mendedahkan auratnya  
 sekalipun ribuan mata yang melihatnya  
 Begitulah kalau seseorang itu jika fitrahnya telah rosak  
 Hatinya pula telah buta dirosakkan oleh nafsunya  
 Kerana rasa bertuhan dan rasa kehambaan  
 sudah tidak ada di dalam jiwanya  
 Maka terjadilah yang patut malu dia tidak malu  
 Yang patut tidak malu dia terasa malu  
 Perbuatan jahat terasa mulia  
 Perbuatan baik dia terasa terhina  
 Di waktu itu orang-orang yang baik dipandang serong  
 maka tersisihlah dia

Orang yang jahat dipandang mulia bahkan  
  bintang kehormat diberikan  
Begitulah krisis nilainya berlaku di kalangan manusia  
Semuanya serba terbaliknya  
Segala-galanya berubah rasa dan pandangannya  
Bila berlaku situasi dan kondisi ini  
Perlunya seorang pemimpin yang dibantu oleh Allah  
Untuk memulihkan semula fitrah manusia  
  yang sudah rosak

---

Menjelang Tidur  
27 - 08 - 2000

249 | **MARUAH JATUH TIDAK TERASA**

**M**ANUSIA yang telah rosak jiwanya atau fitrahnya  
 Setiap hari terjatuh wibawanya tidak pun terasa malu  
 Kerana dia sendiri yang menjatuhkan maruahnyanya  
 dia tidak terasa  
 Adakalanya kerana arak apabila mabuk  
 terjatuh di dalam longkang  
 Apabila dia sedar biasa sahaja  
 Setiap hari perkara-perkara sulit di dalam diri  
 yang sepatutnya malu jika terdedah  
 Dengan bangga pula dia didedahkan  
 Tidak pula terasa malu  
 Tidak pula terasa yang maruahnyanya telah koyak-rabak  
 Tidak pula terasa yang dirinya sudah tercabar imejnya  
 Berpegang-pegang tangan, berdua-duaan  
 laki-laki perempuan yang bukan muhramnya  
 Padahal dia lakukan di khalayak ramai  
 Tidak sedikit pun dia terasa malu  
 Bahkan berbangga pula dapat membawa perempuan  
 Berpegang-pegang tangan dan bercumbu-cumbuan  
 Padahal zaman sekarang orang sudah pandai-pandai  
 Rupanya dengan kepandaian sahaja belum boleh terjamin  
 seseorang boleh menilai-nilai baik dan buruknya  
 Kalau fitrah telah rosak dan hati telah buta  
 Akan berlakulah krisis nilai  
 Ramailah manusia yang rupa parasnya masih kekal  
 Tapi perangainya haiwan atau syaitan  
 Paling tidak, hidup macam kayu-kayan  
 Di waktu itu punah-ranahlah kehidupan  
 Rosaklah masyarakat dan pergaulan  
 Maka Allah Taala pun menimpakan kepada manusia  
 sentiasa gelisah di dalam kehidupan

---

 Menjelang Tidur  
 27 - 08 - 2000



**E**NGKAU gaduh apabila ada orang menipu dayamu  
 Engkau susah hati kalau ada orang merosakkanmu  
 Engkau marah sekali jika ada orang  
     yang menjatuhkan maruahmu  
 Engkau sakit hati bilamana nama baikmu dijatuhkan orang  
 Tapi malang sekali setiap hari maruahmu jatuh  
 Wibawamu cacat, nama baikmu tercemar  
 Bukan orang lain yang melakukannya  
 Tapi ilmu engkau sendiri yang menjatuhkannya  
 Kekayaanmu merosakkan kamu  
 Kecantikan dan ketampananmu yang merosakkan nama baikmu  
 Pangkat dan darjat yang menjatuhkan maruahmu  
 Kekuasaanmu yang mencacatkan nama baikmu  
 Tapi kamu tidak perasan dan tidak sedar  
 Kerana itu dilakukan oleh dirimu sendiri  
 Nafsu yang ada di dalam dirimu itulah  
     yang menjatuhkan maruahmu  
 Padahal orang ramai sudah resah dan gelisah  
 Masyarakat telah mengata dan menghina  
 Kamu telah dibual-bualkan orang di merata negeri dan negara  
 Di kedai-kedai kopi, di restoran-restoran,  
     di warung-warung makan  
 Tidak kurang juga engkau diumpat di masjid-masjid  
     dan di surau-surau  
 Di dalam kereta, di dalam kapal terbang  
     dan di tempat-tempat ramai  
 Semuanya itu berlaku ialah disebabkan keistimewaan  
     yang ada pada dirimu  
 Oleh itu berhati-hatilah dengan ilmunu  
 Berwaspadalah dengan kekayaan dan kecantikanmu  
 Awasilah pangkat, darjat dan kekuasaanmu  
 Yang selalunya banyak merosakkan kamu

---

Menjelang Tidur  
 07 - 09 - 2000

## MARUAH DIRI ITULAH HARGA DIRI

**M**ARUAH diri itulah dia harga diri  
 Ada maruah adalah harga, tiada maruah,  
 tiadalah harga  
 Harga diri tidak boleh dijual beli  
 Di dalam Islam mempertahankan maruah  
 diri syahid hukumnya  
 Biar miskin, biar papa, harga diri kena jaga  
 Tidak guna kaya, tidak guna ilmu tinggi,  
 berjawatan tinggi, maruah tiada  
 Tiada maruah diri, binatang yang hidup berupa manusia  
 Kalau sudah bersifat binatang, siapa hendak hormati kita  
 Orang yang bermaruah malunya tinggi, akhlaknya mulia  
 Dengan Allah sangat takut, dengan manusia  
 tidak meminta-minta  
 Mudah mesra, mudah dimesra,  
 tolak ansur budaya hidupnya  
 Lapang dada, sabarnya ketara,  
 tidak membuat kerja-kerja yang hina  
 Miskin tidak meminta-minta,  
 kaya khidmat untuk manusia  
 Orang marah dia selamba, dendam tiada,  
 memaaf mudah sahaja  
 Orang sakit hati dia mendoakannya  
 Kalau hidup miskin dia macam orang kaya,  
 kerana tiada meminta  
 Dengan siapa sahaja dia boleh berkawan, tapi dia tetap dia  
 Orang yang baik hati, miskinkah dia, kayakah dia,  
 senangnya dengannya  
 Kerana dia tidak menyusahkan orang,  
 tapi dia sanggup susah kerana orang  
 Semua orang berpuas hati  
 bergaul dengannya

---

Selepas Asar  
 26 - 05 - 1997  
 (18 Muharram 1418H)

## MEMINTA KEPADA ALLAH KITA TIDAK TERHINA

MEMINTA-MINTA kepada Allah maruah tidak jatuh  
Sama ada dikabulkan atau tidak, tetap mulia  
Mengadu dengan Tuhan tidak mengapa  
Kerana kita hamba, Dia adalah pentadbir, pengurus,  
Penjaga dan pemberi rezeki kepada kita  
Mintalah apa sahaja yang sepadan dengan kita  
Banyak kali, sebanyak mana yang kita minta  
kita tidak terhina  
Tapi meminta sesama manusia wibawa kita jatuh  
Sama ada dia memberi atau menolaknya  
Mengadu dengan manusia inginkan kekayaannya  
kita terhina  
Maruah kita jatuh, wibawa kita sudah tidak ada harga  
Lebih-lebih lagi selalu sahaja meminta dengan manusia  
Orang bertambah benci, kita semakin terhina  
Jagalah maruah diri  
Kerana ia adalah harga diri kita  
Jauhilah meminta-minta sesama manusia  
Kerana kita akan terhina dan orang tidak hormat  
kepada kita  
Memintalah kepada Tuhan, Ia memang tempat meminta  
Makin banyak meminta dengan-Nya kita semakin mulia  
Tuhan suka, manusia tidak boleh menghina,  
wibawa kita terjaga  
Mintalah kepada Tuhan, terpelihara maruah kita  
Jangan meminta-minta dengan manusia,  
kita akan terhina  
Kerana orang meluat dan membenci kita

---

Selepas Zuhur  
18 - 12 - 1999  
(10 Ramadhan 1420H)

## 253 | SIFAT MALU SUDAH TIADA

**S**IFAT malu adalah tabiat insan  
 Satu tabiat yang Allah anugerahkan  
 pada hamba-hamba-Nya sejak lahirnya lagi  
 Sifat ini kalau disuburkan ia menjadi benteng  
 daripada melakukan kemungkaran  
 Ia menjadi perisai pada seseorang  
 daripada menggadai maruah dirinya  
 Sifat ini di waktu keseorangan, malu membuat maksiat  
 kerana Tuhan melihatnya  
 Di waktu ramai, lagilah bertambah malu  
 kerana ramai mata yang melihatnya  
 Orang yang bersifat malu sangat menjaga maruahnya  
 Merasakan maruah diri adalah harga diri  
 dan nilai peribadinya  
 Orang yang bermaruah merasakan jika maruah diri  
 telah tercemar atau ternoda  
 Dunia ini telah sempit dibuatnya  
 Bertemu manusia terasa malu dan terseksa  
 Ingin lari dari manusia  
 Tapi malang sekali di masa kini  
 Sifat malu telah tercabut dari jiwa kebanyakan manusia  
 Lantaran itu maruah diri sudah tak dijaga  
 Maruah diri manusia sudah tergadai atau tiada  
 Tapi mereka tidak terasa  
 Masing-masing merasakan masih ada wibawa  
 Semua merasakan masih ada harga diri  
 Padahal yang ada sifat kebinatangan atau sifat haiwaniannya  
 Berkelakuan haiwan yang berupa manusia  
 Binatang yang berupa manusia inilah yang menguasai dunia  
 Mentadbir manusia dan mendidik mereka  
 Ramailah di dunia ini haiwan  
 yang berupa manusia

---

Selepas Zuhur  
 24 - 11 - 1999

## HILANG MALU ERTINYA BENTENG DIRI HILANG

**M**ALU sudah hilang, ertinya benteng diri sudah tumbang  
 Apabila malu sudah hilang, tidak ada benteng  
 dan kawalan pada diri insan  
 Oleh itu segala-galanya terdedah pada diri seseorang  
 Tidak ada halangan yang akan berlaku pada diri sesiapa sahaja  
 Perasaan malu tidak ada, rasa aib hilang,  
 membuat dosa tidak terasa apa-apa  
 Boleh sahaja buka aurat, boleh sahaja mengorat  
 Bercakap pun tidak bersukat, bercakap mengarut,  
 mencarut boleh aja  
 Boleh tipu, tipu, boleh bohong, bohong jadi budaya  
 Minum arak, lepak-lepak, rasuah, zina biasa sahaja  
 Pada mereka apa orang kata tidak ambil kira  
 Peduli orang, apa rasa kita hendak buat, kita buat  
 Kita mahu bebas, jangan fikir orang  
 Apa yang baik pada kita, kita buat sahaja  
 Yang penting kita puas, yang kita mahu bebas  
 Persetan dengan agama, peduli apa dengan disiplin  
 Apa perlunya etika apa perlunya peraturan  
 Peraturan ini semuanya menyusahkan kita  
 Kita mahu bebas, jangan bataskan kita  
 Kita mahu puas, jangan sekat kita  
 Mereka ini lupa dengan pengalaman hidup mereka  
 Bolehkah mereka bebas dari penyakit?  
 Dapatkah mereka lepas daripada bala bencana?  
 Mampukah mereka lari daripada orang kata dan hina  
 Berjayakah mereka mengelak daripada sesuatu  
 yang menyusahkan hati dan jiwa?  
 Ini menunjukkan ada yang Maha berkuasa ke atas diri kita  
 Oleh itu kenalah ikut peraturan,  
 berpijaklah di bumi yang nyata  
 Lebih menyelamatkan kita daripada  
 hendak lari dari alam nyata

## 255 | IKHLASKAN IBADAH DAN AMAL

**A**LLAH Taala tidak memandang ibadah dan amal yang banyak  
 Tapi yang kholisnya  
 Allah Taala tidak berbangga pengorbanan dan perjuangan  
 yang banyak  
 Tapi yang murni lagi ikhlas  
 Buatlah, walaupun sedikit tapi sempurna dan ikhlas  
 Itulah yang Allah redha  
 Apa erti banyak, tidak sempurna dan tidak ikhlas  
 Allah tolak sahaja  
 Bahkan akan dilempar ke muka kita  
 Beribadahlah dengan jiwa yang selamat  
 Berkorbanlah dengan hati yang murni  
 Berjuanglah dengan hati yang ikhlas  
 Kerana yang menerimanya Allah Taala  
 Yang akan memberi pahalanya Dia juga  
 Bukan manusia  
 Periksa hati selalu  
 Sudahkah selamat, sudahkah murni, sudahkah ikhlas?

**I**KHLAS darjat yang paling tinggi  
Ia adalah penentu apakah amalan itu diterima  
atau sebaliknya  
Ia adalah rahsia Allah  
Malaikat pun tidak mengetahui  
Yang punya diri pun tidak tahu  
Kalau seseorang memberi pada seseorang  
Dengan tujuan waktu susah nanti dia dibantu  
oleh orang itu  
Batal amalannya  
Kalau orang itu tidak mengucapkan terima kasih  
Hatinya berkata, tidak patut  
Hilang ikhlasnya  
Kalau dia memberi mengatakan,  
ambillah saya ikhlas  
Ini pun batal ikhlas  
Di suatu masa orang yang pernah dibantu,  
memusuhi  
Hati kecilnya berkata, eh! orang ini tidak  
mengenang budi!  
Keikhlasannya ditarik semula  
Allah! Susahnya amalan diterima  
Periksalah hati selalu

## APABILA TUJUAN HIDUP MANUSIA TERPESONG

**A**PABILA tujuan hidup manusia sudah terpesong  
 Membuat apa sahaja bukan kerana Allah Taala lagi  
 Tapi ada kepentingan diri sendiri  
 Membuat kerja kerana duit, pangkat, kuasa, nama,  
 betina dan glamour  
 Sama ada dapat atau tidak dapat *side-effectnya*  
 yang negatifnya terlalu banyaknya  
 Kalaupun berjaya di dalam kehidupan  
 tapi tidak ada erti apa-apa lagi  
 Bila tidak tercapai cita-cita, jiwa derita  
 akhirnya kecewa kemuncaknya putus asa  
 Jika berjaya pula, orang benci, orang hasad dengki  
 Sekiranya mendapat kesusahan orang tidak peduli  
 Ramai manusia yang akan berkata-kata setidak-tidaknya  
 di dalam hati: "Padan muka!"  
 Kerana itu hiduplah kerana Allah  
 Buatlah apa sahaja biarlah untuk Allah Taala  
 Dari Allah, bagi Allah, untuk Allah  
 Allah Taala adalah segala-galanya  
 Buatlah kerana Allah sekalipun tidak berjaya  
 Tidak berjaya kita tidak kecewa apatah lagi putus asa  
 Jiwa tidak derita dan sengsara  
 Kalau berjaya kita tidak megah  
 Kerana kita tahu itu semua anugerah Allah,  
 hati tidak berbunga  
 Bahkan malu kepadanya, rendah diri setiap ketika  
 Orang lain pun tidak benci dan marah  
 Kecuali orang yang hasad dengki yang sudah parah



**E**NGKAU takut sangat barangmu kena rompak  
 Juga engkau curiga ditipu orang  
 Lebih-lebih lagi engkau takut barang-barang berharga  
 dicuri orang  
 Tapi engkau tidak sedar  
 Ilmu engkau telah merosakkan hati engkau  
 dengan kesombongan  
 Kekayaan engkau telah merobek-robek iman engkau  
 dengan kesombongan dan riyak  
 Kefasihan dan kepintaran engkau bercakap  
 dan berpidato mengorbankan pahala engkau  
 Pujian orang, nama dan glamour telah menghapuskan  
 keikhlasan engkau  
 Kekuasaan, pangkat dan kedudukan engkau  
 telah merosakkan iman dan ketaqwaan engkau  
 Bahkan entah apa lagi yang telah mengorbankan  
 amal solehmu  
 Rupanya apa yang engkau milik, dapati, punyai,  
 kuasai yang memang engkau suka itulah  
 yang menjadi musuh engkau  
 Ia telah mencuri iman engkau  
 Ia telah merompak ketaqwaan engkau  
 Ia telah menyamun barang yang lebih mahal  
 daripada harta dan kekayaan engkau  
 Semua yang engkau milik telah mengoyak-ngoyak  
 keredhaan Tuhan  
 Tapi engkau tidak sedar  
 Engkau tidak perasan musuh di dalam selimut  
 telah merosakkan engkau  
 Bukan musuh dari luar yang engkau takuti  
 Bukan perompak dan penyamun dari luar  
 yang engkau curigai  
 Tapi kesayangan engkau

Apa yang engkau suka dan cintai  
 Kesukaan dan kecintaan engkau  
     yang telah menipu engkau  
 Bukan pencuri, tidak juga penyamun  
 Engkau telah ditipu oleh penghibur engkau sendiri  
 Engkau takut ilmu engkau hilang  
 Tapi ilmu engkau sendiri telah menghilangkan  
     iman engkau  
 Engkau takut harta dicuri orang, tapi harta engkau  
     menjadi pencuri  
 Engkau takut jawatan engkau dijatuhkan orang  
 Tapi jawatan engkau yang menjatuhkan engkau  
 Engkau akan menjadi orang yang papa-kedana  
     di Akhirat nanti  
 Wal 'iyazubillah

TAKUTILAH riyak, ia adalah pemusnah amal  
Takutilah kibir kerana ia merosakkan kebajikan  
Jauhilah pamarah, ia merosakkan amal soleh  
Ibarat api meleburkan besi  
Takutilah syirik kerana ia menghapuskan  
seluruh ibadah dan kebajikan  
Hindarkanlah nama dan glamour di dalam beramal  
Ia ibarat jatuhnya najis di dalam kuah  
Semuanya rosak tidak boleh dimakan  
Atau ibarat racun termasuk di dalam makanan  
Semuanya sekali rosak  
Menjaga amal lebih susah daripada beramal  
Periksalah hati, adakah di dalamnya mazmumah?  
Ia adalah ibarat racun maknawi di dalam kebaikan  
Kebaikan tidak menjadi kebaikan lagi  
Kebaikan dianggap kejahatan  
Awasilah mazmumah  
Ia selalu sahaja menipu diri kita di dalam beramal

## JADIKAN AKU LEBIH BAIK DARI SANGKAAN MEREKA

**A**KU harap sangka baik orang kepadaku  
 Adalah doanya  
 Sedangkan apa yang disangka oleh mereka  
 tidak ada padaku  
 Aku amat malu mendengarnya  
 Sangka baik mereka moga-moga pahala bagi mereka  
 Jangan pula jadi bala kepadaku  
 Ampunkan dosa-dosaku Tuhan,  
 apa yang mereka tidak tahu  
 Jadikan aku lebih baik daripada apa yang mereka sangka  
 Berilah pahala kepada mereka kerana sangka baiknya  
 Bantulah aku untuk dapat melaksanakan  
 apa yang mereka kata  
 Kerana aku malu kalau aku tidak berbuat  
 apa yang mereka sangka  
 Jangan pula Engkau murka apa yang mereka kata  
 Setiap apa yang mereka kata berilah aku  
 kekuatan untuk melaksanakannya  
 Dan jadikanlah ini satu pendorong buat aku melakukannya  
 Kalaulah mereka tahu kelemahanku  
 Bukan sahaja mereka tidak memuji, bahkan lari dariku  
 Bukan sahaja mereka tidak memuji bahkan akan mencaciku  
 Aku telah terperangkap dengan kata-kata mereka  
 Kalau aku tidak berbuat, orang menyangka aku berbuat  
 Jika aku hendak berbuat, adakalanya tidak mampu  
 Dengan rahmat-Mu berilah aku kekuatan  
 untuk mengerjakannya  
 Moga-moga apa yang mereka katakan  
 aku mampu membuatnya

**A**KU penuh debar dan sungguh cemas  
 menunggu hari kematian  
 Kerana dia datang tanpa kuketahui  
 Aku takut di waktu ketibaan kematian  
 Aku tidak tahu, di dalam taat atau di dalam kederhakaan  
 Di dalam aku mengingati-Nya atau di dalam kelalaian  
 Di waktu taat, husnul khatimahlah  
 Jika di waktu derhaka, su'ul khatimah  
 Aduh, cemas aku setiap waktu bila mengingati mati  
 Kerana aku tidak tahu nasibku, husnul khatimah  
 atau su'ul khatimah  
 Hatiku resah selalu, jiwa aku terganggu tapi orang tidak tahu  
 Aduh, mati adalah penutup segala-galanya  
 Apa yang dikerjakan dan yang dirasakan oleh hati  
 itulah yang dibawa Akhirat  
 Di sana segala-galanya dinilai  
 Jika tersilap, di sana tidak boleh hendak dibetulkan lagi  
 Tuhan!  
 Hatiku sungguh cemas  
 Aku harap matikanlah aku di waktu aku mentaati-Mu  
 Atau di waktu mengingati-Mu  
 Kalau berlaku sebaliknya, kerana kelemahanku  
 Kerana aku ini hamba-Mu, tidak dapat elak  
 daripada kelemahan ini  
 Dengan rahmat-Mu Tuhan, ampunkanlah dosa-dosaku  
 di waktu ini  
 Bila dosaku engkau ampunkan  
 Aku macam tidak membuat dosa  
 Maka ringanlah bebanku di waktu ke sana  
 Itulah harapanku pada-Mu Tuhan  
 Di waktu detik kematianku  
 Engkau sahajalah  
 yang boleh menyelamatkanku

---

Menjelang Maghrib  
 04 - 12 - 1999

## 262 | MASA BERJALAN BEGITU LAJU

**M**ASA berjalan begitu laju  
 Tidak pernah berhenti walaupun sedikit  
 Ertinya begitu laju umur kita pergi  
 Setiap detik umur kita meninggalkan kita  
 Kalau begitu setiap detik umur kita berkurang  
 Tapi kita tidak terasa  
 Setiap detik dunia meninggalkan kita jauh  
 Setiap detik pula Akhirat mendekati kita  
 Kalaulah kita cintakan dunia  
 Apa yang kita cinta makin jauh terpisah  
 Sedangkan Tuhan dan Akhirat tidak pernah  
     kita cinta makin dekat  
 Alangkah terseksanya jiwa  
 Meninggalkan apa yang disukai dan dicinta  
 Bertambah terseksa lagi yang di hadapan  
     kita tidak pernah kita cinta  
 Ertinya kita pergi ke Akhirat tidak membawa apa-apa  
 Yang kita cinta hendak ditinggalkan,  
     yang tidak dicinta akan berhadapan  
 Aduh, dua kali penderitaan  
 Meninggalkan yang kita cinta, hendak bertemu  
     dengan yang tidak kita cinta  
 Ingatlah roda umur kita makin laju ke hadapan  
 Dunia dan yang kita cinta makin jauh kita tinggalkan  
 Tidak terfikirakah oleh kita apakah yang hendak kita bawa  
 Untuk satu kehidupan yang begitu lama

---

 Menjelang tidur  
 10 - 09 - 1999

**S**ETIAP detik umur kita pergi  
 Pergi tidak akan kembali lagi  
 Setiap nafas turun naik mengurangkan lagi  
 Dari detik ke minit, dari minit ke saat  
 Dia bertambah laju pergi  
 Dihakis lagi umur kita, tanpa kita sedari  
 Dari saat ke hari, speed kelajuannya bertambah lagi  
 Laju cepat umur kita yang pergi  
 Dari hari ke minggu, makin jauh umur kita pergi  
 Yang pergi itu tidak berganti  
 Yang pergi tetap pergi, yang datang mengurangkan lagi  
 Dari minggu ke bulan, bertambah laju umur kita lari  
 Lari tidak akan bertemu lagi  
 Yang lari tetap lari, tidak kembali  
 Dari bulan ke tahun,  
 Oh makin jauh dia pergi  
 Dari tahun ke tahun pacuannya terlalu laju  
 Begitulah umur kita pergi, setiap detik dia luak  
 Kita merasa umur kita bertambah lagi  
 Luak, terus luak, kurang terus kurang  
 Kita merasa umur kita bertambah panjang  
 Kita pun berangan-angan panjang  
 Kerana merasakan hidup panjang lagi  
 Tiba-tiba mati  
 Di waktu itu terbeliak biji mata  
 Bekalan yang dibawa tiada  
 Menyesal sepanjang masa, tidak berkesudahannya

## KERETA KEHIDUPAN BERJALAN LAJU

**K**ERETA kehidupan kita setiap detik berjalan  
 dengan lajunya  
 Dia menuju ke destinasiya  
 Tidak pernah berhenti  
 Apatah lagi patah ke belakang  
 Destinasinya (negara yang dituju) itu hanya ada  
 dua tempat sahaja  
 Namanya Syurga dan Neraka  
 Syurga tempat kemuncak nikmat yang tiadaandingannya  
 Neraka pula tempat kemuncak penderitaan  
 yang tiada taranya pula  
 Kereta kehidupan itu kerana terlalu lajunya  
 Kita tidak terasa dia sentiasa berjalan  
 ke arah (yang dituju) matlamatnya  
 Setiap detik kita bertambah hampir ke sana  
 Justeru itu manusia akan terkejut, gemetar dan takut  
 Tiba-tiba dengan tiada persediaan sudah sampai  
 sahaja ke sana  
 Manusia terkejut, terbeliak biji matanya  
 Bekalan tiada, kalau ada pun barang-barang larangan  
 yang sangat dimurka  
 Ah! Kebanyakan manusia tiada bekalan  
 Yang dibawanya barang larangan  
 Aduh! Menyesalnya tiada kesudahannya  
 Penyesalan yang tiada berguna lagi  
 Sudah terlewat, sudah terlambat  
 Bekalan sifat-sifat taqwa tiada  
 Terlalai dan terlupa kerana cuai  
 Yang ada bekalan-bekalan yang tidak boleh dimakan  
 Nerakalah tempatnya



HIDUP di dunia hanya sekali  
Bila pergi tidak akan kembali lagi  
Itu pun bukan lama  
Paling lama seratus tahun  
Itu pun jarang berlaku dan tidak indah lagi  
Tapi banyak yang pergi sebelum usia itu  
Di Akhirat tempat tinggal kekal abadi  
Buat selama-lamanya tidak diukur dengan masa lagi  
Tersilap hidup di dunia  
Padahnya diterima di sana  
Merana, sengsara, menderita,  
tidak dapat dibayangkan bagaimana?  
Berhati-hatilah hidup di dunia  
Ikutlah panduan Yang Punya  
Jangan ikut nafsu kita  
Jangan ikut perasaan sahaja  
Kelak di sana merana

## 266 | HIDUP INSAN YANG MALANG

**A** LANGKAH malangnya seseorang itu diberi masa  
 Itulah umurnya  
 Tapi di dalam sepanjang masa itulah dia lalai  
 Membuang-buang masa tidak keruan dan tidak tentu hala  
 Alangkah malangnya Tuhan memberi harta pada seseorang  
 Hartanya dibazirkan  
 Digunakan pada perkara yang sia-sia  
 Dia makan seorang, orang lain tidak dapat merasa  
 Kerana bakhilnya  
 Mati hartanya tidak dibawa  
 Bahkan akan menjadi bala  
 Kerana di Akhirat kelak semua harta kepunyaannya dihisab  
 Neraka yang maha dahsyat menunggunya  
 Alangkah ruginya orang yang berilmu  
 Ilmunya hanya untuk mencari kekayaan dan nama  
 Untuk diucap dan dicakapkan  
 Bukan untuk diamalkan  
 Kalaupun diamalkan hanya sedikit sahaja  
 Dia akan dicampakkan di dalam Neraka  
 Lebih dahulu atau lebih awal daripada orang lain  
 yang berdosa  
 Alangkah ruginya orang yang miskin yang sombong  
 Tidak sabar dengan ujian  
 Derhaka dengan Tuhan kerana terlalu memikirkan  
 kesusahan dirinya  
 Di dunia sudahlah papa, di Akhirat Neraka pula

**I**NGATKANLAH kematian kita itu dari detik ke detik  
 dan dari saat ke saat  
 Justeru Allah tidak janjikan kematian kita di waktu tua  
 Begitu juga Allah tidak janjikan kematian kita  
 disebabkan sakit  
 Tidak pun sakit boleh mati juga  
 Hal ini sepatutnya tidak payah diberitahu  
 Semua orang tahu, kan pengalaman bersama  
 Ada orang mati kecil, ada orang mati muda,  
 ada orang mati tua  
 Ada orang mati tanpa sebab apa-apa  
 Sedang rehat-rehat atas kerusi tiba-tiba terlintuk saja  
 Ditengok nafas sudah tiada  
 Oleh itu janganlah senang-senang hati dengan kematian  
 Kematian bila-bila masa berlaku  
 Kita tunggulah kematian itu dari nafas ke nafas  
 Agar kita tidak ada angan-angan yang melalaikan  
 Hendak membangun, membangunlah  
 Tapi ingatlah waktu itu boleh mati  
 Hendak maju, majulah tapi kematian boleh berlaku  
 di waktu itu  
 Hendak kejar kekayaan kejarlah  
 Tidaklah salah selagi halal tapi ingatlah mati  
 Ingatlah mati di dalam sebarang hal  
 Agar kita tidak lalai, jiwa sentiasa takut  
 dan gentar dengan Tuhan  
 Bila jiwa takut dengan Tuhan  
 Kita takut hendak membuat dosa  
 di dalam sebarang hal

---

23 - 05 - 1997  
 (16 Muharram 1418H)

## 268 | NEGARA YANG JAUH

**A**KU selalu merenung ke depan, nun negara yang jauh  
 Aku sedar setiap detik kakiku melangkah ke sana  
 Sama ada aku pinta atau tidak aku pasti sampai ke negara itu  
 Apatah lagi memandang usiaku sudah lanjut  
 Sudah pasti hampir sampai ke destinasi  
 Aku mengeluh selalu, aku sedih selalu  
 Aku bimbang tidak menentu  
 Hatiku takut tidak berubat  
 Kerana bekalan belum cukup lagi  
 Bekalan yang sedikit ini pun di sana belum tentu laku  
 Allah! Di sana tidak ada kawan yang membela  
 Allah! Di sana tidak ada sanak saudara memikirkan  
 Aduh! Di sana tiada siapa pun yang menolong  
 Tiada peguambela  
 Di sana betul-betul keseorangan  
 Walaupun ramai tidak peduli-mempedulikan  
 Amalan kita, kitalah yang menghisabnya  
 Allah berfirman: *Kafa binafsika hasiba*  
 Aduh! Sedihnya nasibku belum tahu  
 Tuhan! Belas kasihan-Mulah yang aku harapkan!  
 Kekuranganku Engkau tambahlah!  
 Kelemahanku maafkanlah  
 Dosaku ampunkanlah  
 Aku serahkan diriku pada-Mu, kasihanilah aku  
 Tuhan aku ini hamba-Mu  
 Kesalahanku dan kelemahanku Engkau tahu  
 Jika tidak ada keampunan dari-Mu, rugilah aku  
 Jika Engkau azab aku  
 Aku ini adalah hamba-Mu juga Tuhan!  
 Jika Engkau maafkan aku  
 Engkau tetap Maha Suci daripada kekurangan  
 Kebesaran-Mu tetap tidak kurang

---

 Selepas Asar  
 04 - 05 - 1997

## PERKARA YANG PENTING DILUPAKAN

A KHIRAT destinasi yang akhir buat manusia  
Tapi malangnya dia telah dilupakan oleh manusia  
Persediaan untuk ke sana diabaikan  
Tempat persinggahan sementara ke Akhirat  
ialah kubur atau Alam Barzakh  
Border di antara dunia dan Akhirat  
Di sana ada peperiksaan, juga telah dilupakan  
dan dilalaikan orang  
Iman dan amal soleh penyelamat manusia  
di Akhirat sana  
Namun ia dicuaikan  
Dosa dan derhaka pemusnah kehidupan mereka  
di Darul Qurar itu  
Tapi itulah yang diusahakan dan diperjuangkan  
Dunia negara fana yang ditinggalkan  
Tapi ia dipandang besar dan diambil berat  
serta berpenat-penat  
Menompok-nompok harta yang akan binasa  
Akhirat terus dilupakan  
Bila ditingkatkan hati mereka sakit  
Dimusuhi dan dianggap pengacau masyarakat  
Dituduh penjahat-penjahat  
Begitulah majoriti manusia di dunia  
Dunia yang akan ditinggalkan  
Menjadi idaman dan buruan  
Akhirat tempat tinggal yang kekal abadi dilupakan

## ENGKAU PASTI PULANG KE NEGARA ASALMU

**S**AMA ada engkau mahu pulang atau tidak mahu  
 Engkau akan dipaksa pulang  
 Kerana negara asalmu adalah Akhirat  
 Di dunia hanya sebagai berdagang  
 Untuk mencari bekal dan kekayaan  
 Allah memberi peluang kamu mencari bekal  
 sebanyak-banyaknya  
 Agar kamu senang di Akhirat  
 Tapi perlu ingat  
 Jangan sampai mencari barang-barang larangan  
 Barang-barang larangan tidak dibenarkan membawa pulang  
 Sesiapa yang melakukannya pasti dihukum  
 Mampukah kita menerima hukuman?  
 Hukumannya adalah api Neraka  
 Juga dibelasah, dicemeti dan didera  
 Oleh malaikat Rabbaniah  
 Sangat garang dan bengisnya  
 Ada yang kekal di dalamnya, wal-'iyazubillah  
 Dan ada yang dihukum beribu-ribu tahun  
 Aduh sengsaranya, aduh deritanya  
 Mampukah kita menerimanya?!  
 Masing-masing boleh menjawabnya

## BILA AKU LIHAT LAUTAN

**B**ILA aku lihat lautan  
Saujana mata memandang  
Luas tidak nampak tepi  
Ombak melambung dan menggulung,  
    bergelora tidak berhenti-hentinya  
Menghempas dan memulas  
Bunyiya mengerikan dan menakutkan  
Dalamnya menggerunkan  
Gelap-gelita, melemaskan  
Hatiku membisikkan:  
Kalau Neraka itu seperti ini  
Julangan apinya macam ombak yang melambung,  
    membumbung  
Bunyi apinya macam bunyi angin yang memukul ombak  
Ombak yang sentiasa bergerak tidak henti-hentinya  
Kalau ia api Neraka membaham penghuni-penghuninya  
Tanpa hentinya  
Itu pun sudah cukup menyeksakan  
Aku tidak mampu menanggungnya  
Betapalah api Neraka Tuhan  
Entah berapa kali ganda dahsyatnya  
Lebih lagilah aku tidak mampu menerima azabnya

---

Selepas Asar  
02 - 05 - 1997

## 272 | USIAKU TELAH LANJUT

U SIAKU telah lanjut, menjangkau enam puluh  
 Usiaku telah sampai ke hujung,  
 macam matahari di waktu Maghrib  
 Tidak mungkin patah ke belakang lagi  
 Masa yang berlalu, tetap berlalu dan terus berlalu  
 Oh! Sedihnya aku, hampir seluruh hidupku  
 aku sia-siakan  
 Tidak ada ibadah yang sempurna aku lakukan  
 Tidak ada bakti kepada manusia yang boleh dibanggakan  
 Masaku aku habiskan dengan makan minum,  
 tidur, rehat dan dalam kelalaian  
 Buang-buang masa yang tidak keruan  
 Berjalan-jalan yang tidak tentu haluan  
 Aduh! Seluruh perjalanan hidupku  
 hampir ke Neraka daripada ke Syurga  
 Kakiku lebih banyak kulangkahkan  
 ke Neraka dari ke Syurga  
 Entah beberapa langkah lagi kakiku yang tinggal  
 Aku bimbang apakah langkah yang baki ini  
 menghala ke Syurga atau ke Neraka  
 Aku tidak pasti  
 Tuhanlah yang lebih mengetahui  
 Aku hendak tebus kembali, tidak mungkin lagi  
 Usiaku telah lanjut  
 Segala tenagaku yang *fresh* telah hilang  
 Tenaga yang sedikit dan lemah ini  
 Tidak mampu lagi membuat kerja-kerja yang gemilang  
 Oh sedihnya! Aku telah mensia-siakan umurku  
 Tidak ada lain jalan melainkan jaminan-Mu ya Allah!  
 Aku serahkanlah diriku pada-Mu ya Allah  
 yang penuh dengan dosa-dosa ini  
 Aku menyesal Tuhan!  
 Aku kesal dengan perbuatanku itu!



Keampunan-Mu yang kuharapkan  
Kemaafan-Mu yang aku minta!  
Kalau boleh keredhaan-Mulah yang aku pinta  
Jika Engkau azab aku, aku ini kan hamba-Mu jua  
Jika Engkau ampunkan aku  
Kebesaran-Mu tetap sempurna tidak ada kurangnya  
Ampunkanlah aku Tuhan!  
Kalaupun bukan dengan rahmat-Mu  
tapi dengan kemaafan-Mu Tuhan!

